

# Sipi Sul

Nixmox Seir Su Mel Nei Nixmox Neix Su Mel

- 1** <sup>1</sup> Nixmox neix su ca mel dax ssi nr mae,  
zuixl bei su ca mel ddei jjiumo zex leil nr ngier,  
Arbosobo leil bbeix vuxryixr su ca mel dax cirgo a nr cux su,  
ca eil ddei ggese.<sup>a</sup>
- <sup>2</sup> Yihexrhuaxr ddei Lixlfixr leil yar yarzisael nolnger,  
merxixl-merni lei xiar doxr dae.
- <sup>3</sup> Yar mel saer zzei ar zzei a lazzarmo qir leil dae dae sael a nga,  
saer niar zi ci a, saer niar var,  
yarpeixl lei hie zzu nr var.  
Yar bei dae hazza lei bei cexr.
- <sup>4</sup> Nixmox neix su ca mel nael eine nr nga.  
Yaa leil mel paer mel sael a mersi jia bbeir gger nia.
- <sup>5</sup> Yel serpaxl zi ci a, nixmox neix su ca mel leil zuixl dixl gger a  
ngier ver nr xie.  
Zuixl bei su ca mel nixmox seir su ca mel gga ngier nr cexr.
- <sup>6</sup> Yihexrhuaxr mel nixmox seir su ca mel ssi dae jjiumo zex leil  
saexl,  
nixmox neix su ca mel ssi dae jjiumo zex nael mier var.

Arbosobo Tiur Teixl Lei Zzirmar Ddei

- 2** <sup>1</sup> Arsaenga a middurbbor goxrjia mel cir piar bei a Arbosobo  
leil dir leir?

---

<sup>a</sup>1:1 Yilsi mel dder nixmox seir su mel nixmox neix su ca mel zzubbe dae mel leil no-nr-ni, zuixl bei su ca mel dax bei nr mae, Arbosobo leil bbeix vuxryixr su ca mel dax hher nr dax. Yel ca eil ddei Arbosobo yar leil seir lol.

Arsaenga a middurbbor cassor-worssor mel bei cexr nr var mel leil baexr a xiar leir?

<sup>2</sup> Middurbbor zzirmar mel cirter a xiar har nei vaervaerpor mel cirgo a cux dae a zzipbe a,  
Yihexrhuaxr leil nei yar tiur teixl lei a ssuvi dox deix gger ddei<sup>b</sup> leil dir.

<sup>3</sup> Yaa bbeix: “Niul, yaa niul leil neixl gex dae hexsox zex zex te gger lei,  
yaa ddei baezo zex piar pixl gger lei,”

eine bbeix a.

<sup>4</sup> Merlabbor cux dae ddei<sup>c</sup> vae,  
Seirpor yaa leil vaessi.

<sup>5</sup> Yar sirzzi dae a yaa leil larhorhormo bota,  
yar seifu faex a yaa leil lixlix-laexlaex gexr mal lol a bbeix:

<sup>6</sup> “Ngo, ngo tiur teixl lei hal ddei leil  
ngo ddei seirceix-seirmaer worga hherdder Xi'a worga leil  
zzirmar bei lol ho a,” □

eine bbeix a.

<sup>7</sup> Zzirmar hal ddei bbeix:

“Ngo, Yihexrhuaxr miardal dae mel biar ssi nia:

Yihexrhuaxr ngo leil bbeix:

‘Ni mel ngo ssor a; eilni ngo niabbor bei a.

<sup>8</sup> Ni ngo leil qiuxr a,  
ngo dder cirgoxr-hanga ni leil gger nia,  
mer woxrke maelmaerjjia lei ni ddei loxr lol nia.

<sup>9</sup> Ni he zzargger sser a yaa leil deil no gger nia,  
ni olbbexr mel leil deil me gger mel sael a yaa leil deil me gger  
nia,’ ”

<sup>b</sup>2:2 yar tiur teixl lei a ssuvi dox deix gger ddei Ca eil ddei mel dder Arbosobo tiur teixl lei zzirmar ddei nga a.

<sup>c</sup>2:4 Merlabbor cux dae ddei Merlabbor cux dae ddei mel dder Arbosobo. Yar baxrde taex leil cux dae a merlo milo leil guaxr dae.

<sup>10</sup> Yel zzirmar mel, nia ddar eilmel leil saexl nia;  
middurbbor vaervaerpor mel, nia noni nia.

<sup>11</sup> Nia Yihexrhuaxr leil gexrgexr-zizi visser nia;  
yoxl lixlix-laexlaex ggese nia.

<sup>12</sup> Ssor ddei mel seifu faex niazzir dae a;  
yel nia meir ddei yar leil jiuxl<sup>d</sup> nia;

nr nga a yar seifu faex du lei a,  
nia dder jjiumo gga si zil dae a.

Ha yar leil yaa ddei pahherggie bei lol su mel dder ggese.

### Eilnirrgu Arbosobo Leil Qiuxr A Beijsiu Lol

Daxlweixl yar ddei ssor Yasaloxr leil pahher dae car vaexr sipi.

**3** <sup>1</sup> Yihexrhuaxr, ngo leil dir su ca mel einezeixl miur!  
Ca cirke a ha du lei a, ngo leil dir lei;

<sup>2</sup> ca cirke a ngo leil biar dae a bbeix:  
“Arbosobo yar leil nr jiuxl,”

eine bbeix.

<sup>3</sup> Nael Yihexrhuaxr, ni mel ngo zaza-lili hher dae a,  
ngo leil dir su mel leil bbiur gex gger su ddei nga a;  
ngo leil middux lol su ddei nga a;  
ngo leil oldde bil du lei lol su ddei nga a.

<sup>4</sup> Ngo Yihexrhuaxr leil ae dae a qiuxr a,  
yar dder yar ddei seirceix-seirmaer worga leil ngo leil ddarkoxl  
a.

<sup>5</sup> Yihexrhuaxr ngo leil guaxr dae,  
yel ngo yixr ze i a yixrmeixl jjiu, yixr zucur.

<sup>6</sup> Cassor-worssor hormo du hormo meir lei a,

---

<sup>d</sup>2:12 jiuxl Yilsi mel dder yar leil gexr yar leil i du, yar leil cizixl gger.

zaza-lili ngo leil dir lei bbeixarnar a,  
nael ngo halae nr gexr.

- <sup>7</sup> Yihexrhuaxr, ni leil qiuxr, ni ha du la!  
Ngo ddei Arbosobo, ni leil qiuxr, ngo leil jiuxl la!  
Ni mel ngo leil dir su ca mel ddei xiaxlbaguxr ddei leil deil,  
yarzi gexrddo bei su mel ddei ser deil me gger.
- <sup>8</sup> Yihexrhuaxr, ni mel ca leil jiuxl su ddei nga a.  
Ni, ni ddei cassor-worssor mel leil seir lol la.

### Eilmerxixl Arbosobo Leil Qiuxr A Beijjiu Lol

Daxlweixl vaexr sipi, caxlgo caxl su mel leil guaxr su ddei leil  
jia gger. Bbaexlabox sser a, bbaex dax dae.

- 4** <sup>1</sup> Ngo leil hoxrhoxr i mal gger su Arbosobo, ngo ni leil qiuxr dae  
car,  
ngo leil ddarkoxl la!  
Ngo goxrsol-goxrnaxr goxr dae car, ni ngo leil zzaso lol.  
Ni ngo leil zoxlnixr la,  
ngo leil noni gger la!

- <sup>2</sup> Nia ca eilmel,  
nia ngo ddei idu ddoddo mel leil seixldaddu loxr lol a,  
arddolcar ci niazzir dae neil?  
Nia nga nr var mel leil nolnger, nga nr zi mel leil zo a,  
arddolcar ci niazzir dae neil?

- <sup>3</sup> Nia saexl nia,  
Yihexrhuaxr yar dax bei mae dae su ca mel leil bbe teixl lei a,  
armael ddei loxr lol ho a.

Ngo yar leil qiuxr a, Yihexrhuaxr ngo leil noni.

- <sup>4</sup> Nia lixlix-laexlaex gexr nia, zuixl bei nr ddo;  
yixrgguci leil yixr dae car, arjjiuljjiu a hher dae a, nixmox zzar  
arleixr xiar nia.

- <sup>5</sup> Nia botaddu nr zza ziddu mel zi nia,

yoxl Yihexrhuaxr leil koxl nia.

<sup>6</sup>Ca cirke a bbeix: “Arseir ngua leil seirseir mel saexl lol cexr bbeixleir?” □

Yihexrhuaxr, ni qiaxrmeix ddei bbobbolbbo mel ngua leil zoxl gex dae lol la.

<sup>7</sup>Ni ngo leil nixmox zzar ggese lol a, bir loxlmoxr nei puxrto zzibbaer sixl cirke zza ca hal mel leil lei ggese leixl lol.

<sup>8</sup>Yihexrhuaxr, ni larnei ngo leil sosarsar arla nixixl goxr lol cexr, yel ngo zzasoso a yixr zeil cexr, yixrmeixl jjiu cexr.

### Arbosobo Leil Qiuxr A Guaxr Dae Lol

Daxlweixl vaexr sipi, caxlgo caxl su mel leil guaxr su ddei leil jia gger. Caxlgo mex labox sser a, mex dax dae.

**5** <sup>1</sup>Yihexrhuaxr, ngo ni leil qiuxr, ngo ni dax ddar biar dae mel noni gger la, ngo ni dax sol biar dae naxr biar dae mel noni gger la!

<sup>2</sup>Ngo ddei zzirmar ngo ddei Arbosobo, ngo ni dax ddar biar a, ni leil ae a ni leil qiuxr dae mel, ni ngo leil noni gger la!

<sup>3</sup>Yihexrhuaxr, ngo eilneixrnehe ha du lei a dder ni dax ddar biar; ni leil qiuxr, ngo biar dae mel leil noni gger la! Ngo ni leil xia doxr dae.

<sup>4</sup>Ni mel nr seir mel leil nolnger su Arbosobo ar ddei nr nga, nixmox neix su ca mel ni dax cirgo a hher wo nr ddo.

<sup>5</sup>Col zzae col, ol zzae olvaer ca mel, ni yaa leil ni meixsaer qir leil nr hher lol, ha nr seir bei su ca mel dder ni yaa leil vuxryixr.

- <sup>6</sup> Ddar jiar te su mel,  
ni yaa leil bei zil jjia gger nia,  
ca seixl meixr su, ca fur meixr su mel,  
Yihexrhuaxr yaa leil vuxryixr.
- <sup>7</sup> Ngo nael, ni ca leil perniar nor nixixl nr zza mel leil koxl dae a,  
ni ddei xi gga ddir nia,  
ni leil i du, ni leil gexr a, ni leil zi nia.
- <sup>8</sup> Yihexrhuaxr, ni leil qiuxr,  
ngo leil ni ngo leil bei har zaxr gger dae jjiumo hoxrhoxr zex  
leil ssi dae lol la;  
nr nga a, ngo leil dir su mel ngo leil bei leixl gger leilei.
- <sup>9</sup> Yaa meir gga ddarzi lei nr zza,  
yaa nixmox zzar ca leil ke niazzir lalnga,  
yaa ddar bbeix teixl lei mel yarzi vuxryixrddo,  
hherdder lixrbbaex ddei giexl pu a yarzi bbeirne ddux lei mel  
sael a nga.  
Yaa lo ddei ddar seirseir te a, si leil kuar gger laexl.
- <sup>10</sup> Arbosobo, ni leil qiuxr,  
yaa leil zuixl dixl gger.  
Yaa si leil ke niazzir dae mel, yaa armael leil ke dae lol nia.  
Yaa mel zuixl cirke bei a ni leil dir a ni dax nr mae,  
yel ni yaa leil ggaxr pixl gger la!
- <sup>11</sup> Ha ni leil koxl su ca mel,  
ni yaa leil ni dax pahher dae lol a yaa leil guaxr dae,  
yel yaa leil ggese lol nia;  
ggese a cirleixr nr nor caxlgo caxl lol nia,  
yoxl ni ddei mi ddei leil perniar su ca mel leil ggese lol nia.
- <sup>12</sup> Yihexrhuaxr,  
nixmox seir su ca mel leil,  
ni yaa leil seir lol, ni yaa leil perniar,  
yel ni yaa zaza-lili hher dae a,

yaa leil dir su mel leil bbiur gex gger dae,  
yaa leil guaxr dae.

Yihexrhuaxr Arddolcar Ci A Saelnei Ngo Leil Jiuxl?

Daxlweixl vaexr sipi, caxlgo caxl su mel leil guaxr su ddei leil jia gger. Heixl zex zza caxlgo bbaexlabox ddei sser a, bbaex dax dae.<sup>e</sup>

**6**<sup>1</sup> Yihexrhuaxr, ni leil qiuxr,  
ni sirzzi dae car, ngo leil tor bo-nr-ta,  
ni seifu faex dae car, ngo leil tor nr faxr.

<sup>2</sup> Ngo ha lei ha qir-nr-mi,  
Yihexrhuaxr, ni leil qiuxr, ngo leil zoxlnixr la.

Ngo hherggar mel wor lei wor-nr-ni,  
Yihexrhuaxr, ni leil qiuxr, ngo leil ggukor gger la.

<sup>3</sup> Ngo nixmox zzar zza lei zza nr so,  
Yihexrhuaxr, arddolcar ci nia bbeixleir?

<sup>4</sup> Yihexrhuaxr, ni leil qiuxr,  
za xixl lei a ngo leil jiuxl la.

Ni mel ca leil perniar nor nixixl nr zza,  
yel ngo leil jiuxl la.

<sup>5</sup> Ca sima mel gga ni leil holcir su nr zza.  
Yiji gga arseir ni leil bbeixzae gger su zza bbeixleir?

<sup>6</sup> Ngo cix lei cix le jjia a;  
cirxixl-lorbba meixbbix ddux doxr,  
yixrgguci ddei lei bu du lei nrsulsul,  
lorbbor lei coxr jjia a.

<sup>7</sup> Ngo cix a, meixddur lei cix meixgguir a;  
ngo leil dir su ca mel miur a, ngo meixddur lei cix yojiar a.

---

<sup>e</sup>6:1 Ca cirmelmel a zzirdae a, diuxlzi eil yoxr mel capor caxl ddu diuxlzi.

- <sup>8</sup> Yihexrhuaxr ngo aenge dae mel noni ho a;  
 yel nia yarzi gexrddo bei su ca mel ngo dax tor nr hher!
- <sup>9</sup> Ngo Yihexrhuaxr leil qiuxr dae mel yar noni ho a;  
 ngo Yihexrhuaxr dax ddar biar dae mel yar ddarkoxl var.
- <sup>10</sup> Ngo leil dir su maelmaerjgia seixl zzae seixlda, gexr zzae gexr  
 var;  
 neixleixrsael yaa qiaxrmeix zzi nr zza var, doxdoxsi jjixr var.

Yihexrhuaxr Leil Qiuxr A Nixmox Seir Su Ddei Leil Guaxr Dae Lol

Daxlweixl Bixlyarmir Su Ca Gursixr Ddei Ddar Mel Leil Dor Dae A,  
 Yihexrhuaxr Dax Kebal Mermi Hher Dae A Caxl Dae Mel.

- 7** <sup>1</sup> Yihexrhuaxr ngo ddei Arbosobo, ngo ni koxl,  
 ni leil qiuxr, ngo leil jiuxl la!  
 Ngo leil ggaxrmae su ca mel leixrga gga ngo leil jiuxl teixl la;
- <sup>2</sup> nr nga a, yaa hhemar sael a ngo leil zix gex dae a,  
 zix me gger a lei, ngo leil jiuxl su nr zza a.
- <sup>3</sup> Yihexrhuaxr ngo ddei Arbosobo,  
 ngo ca leil bbae-nr-hhex bei,  
 azo zuixl bei,
- <sup>4</sup> ngo leil seir su ca mel ngo yaa leil nr seir bei koxl xixl,  
 bbeixsael ngo nrbba-nrbba ngo leil dir su ca mel dax su  
 arddeirnga a,
- <sup>5</sup> ngo leil dir su mel dder ngo leil ggaxr wo lol ddo,  
 ngo leil yaa qihher woxrke jjiux gex dae lol ddo,  
 ngo leil middurbbor si pixl dae lol ddo!
- <sup>6</sup> Yihexrhuaxr,  
 ngo leil dir su mel sirzzi zildu a;  
 ni leil qiuxr, ha du la a seifu-faexfaex mo yaa leil faxr la!  
 Ni leil qiuxr, ha du la a ngo leil beijjiu la,  
 ni mel ca leil serpaxl nia dixl har dae ho a.



<sup>7</sup> Circuxr-hanga leil ni zaza-lili hher dae lol nia;  
ni mu ggie hher dae a yaa leil guaxr lol nia.

<sup>8</sup> Yihexrhuaxr,  
ni mel cassor-worssor leil ser.  
Ni leil qiuxr, ngo ddei seirseir mel dax zox dae,  
halae ngo leil bota ddu nr zza mel dax zox dae a,  
ca mel leil ngo zuixl nr zza saexl lol!

<sup>9</sup> Arbosobo, ni mel bbaehhexhhexmo;  
ca mel nixmox zzar arsaе xiar dae lei ni saexl,  
yel nr seir bei su mel leil bei nor lol,  
nixmox seir su ca mel leil seir lol.

<sup>10</sup> Arbosobo mel ngo leil dir su mel leil bbiur gex gger su ddei nga  
a;  
yar nixmox seir a bota ddu nr zza ca mel leil jiuxl.

<sup>11</sup> Arbosobo mel bbaehhexhhexmo ca leil ser su ddei nga a;  
yoxl bbecir-bbeni nixmox neix su ca mel leil seifu faex.

<sup>12</sup> Ha arseir huixr-nr-soxr arddeirnga a,  
yar, yar ddei altor baex teixvilvil mo sael nia;  
yar ddei jir ddaexr labox ddei bei har dae ho a;

<sup>13</sup> ca seixl labox zzaegu ddei lei bei har jjia ho a;  
yar jir ddaexr teixl lei baex mel adoxl bbiu dae.

<sup>14</sup> I ddo a!  
Nixmox neix su mel arsaе nr seir bei nia xiar doxr,  
yar xiar dae mel yarzi duxr mel a nga,  
yar bei dae mel ca fur lalnga.

<sup>15</sup> Yar bbeddur darneixlneixl giexl a si leil xiaxl niazzir,  
nael yar ddei yar halmaex de ji dae a.

<sup>16</sup> Yar yarzi duxr bei dae mel armael oldde leil ddeix nia,  
yar si leil yarzi gexrddo bei dae hal mel lei, armael oldde leil  
ddeix nia.

<sup>17</sup> Yihexrhuaxr bbaehhexhhexmo bei dae mel dax zox dae a,

ngo yar leil nawo nia;  
 caxlgo caxl a,  
 mu zzir ggje hher dae Yihexrhuaxr ddei mi ddei leil caxl zae  
 gger nia.

Yihexrhuaxr Zzarvul-zzarmae Lei Ddo Zzae Ddo Vaer Zzae Vaer

Daxlweixl vaexr sipi, caxlgo caxl su mel leil guaxr su  
 ddei leil jia gger. Jiatexl ddei yoxrcixl mel sser.

**8**<sup>1</sup> Yihexrhuaxr, ngua ddei Seirpor,  
 ni ddei mi ddei middurbbor zzarvul-zzarmae lei ddo zzae ddo  
 vaer zzae vaer!  
 Ni ni ddei zaelzae mel bir merlabbor zaelzae mel leil zae leixl lol.<sup>f</sup>

<sup>2</sup> Ni leil vuxryixr su zza a,  
 ni anix bexlelte nei baxr dda dae mel leil ni ddoddomo bei dae  
 mel leil bbeixzae gger lol,  
 yel dir su nei bei koxl xixl su mel leil bbeixddu nr zza lol.

<sup>3</sup> Ngo ni bei teixl lei merlabbor ddei leil i dae,  
 ni merlabbor deix gger dae xiubbo nei gie mel leil i dae a,

<sup>4</sup> “ca mel azo suax bbeixleir, ni halae yar leil holcir dae,  
 ca ddei ssor azo suax bbeixleir, ni halae yar leil perniar?”  
 eine xiar.

<sup>5</sup> Ni yar leil bir tisir mel leil ardoxr ye lol,  
 halae yar leil middux lol, arseir lei yar leil i du lol.

<sup>6-8</sup> Ni yar leil ni leixrhher gga bei teixl lei mel leil guaxr dae lol.  
 Ni acixl ya nei niur maelmaerjjia,  
 wordabbor yirvu-nilhax,  
 merlabbor ngaxssor-ngaxne,  
 neixvi gga hher dae cirza-hanga  
 eilmel maelmaerjjia leil yar qihher woxrke hher dae lol.

---

<sup>f</sup>8:1 Ni ni ddei zaelzae mel bir merlabbor zaelzae mel leil zae leixl lol. Arbosobo ddei Sul cirberber a bbeix: Ni ni ddei zaelzae mel merlabbor gga mu zzir ggje zza dae lol.

<sup>9</sup>Yihexrhuaxr, ngua ddei Seirpor,  
ni ddei mi ddei middurbbor zzarvul-zzarmae lei ddo zzae ddo  
vaer zzae vaer!

Arbosobo Bbaehhexhhex Mo Bei Dae Mel Leil Bbeixzae Gger

Daxlweixl vaexr sipi, caxlgo caxl su mel leil guaxr su  
ddei leil jia gger. “Muxllabixl” ddei diuxlzi sser.  
(diuxlzi eil yoxr mel cix dae diuxlzi ar yoxr a.)

- 9**<sup>1</sup>Yihexrhuaxr,  
ngo nixmox cirtaex-lorbba ni leil nawo nia,  
ni murgurgur mo bei dae yarzi seir hal mel,  
ngo ca leil biar gger nia.
- <sup>2</sup>Ngo ni leil i dae a yarzisael ggese nia,  
mu zzir ggie hher dae Arbosobo,  
ngo caxlgo caxl a, ni mi ddei leil caxl zae gger nia.
- <sup>3-4</sup>Si ngo leil pix car, ni ngo leil ddar te jjiu,  
ngo bei hoxr si leil saexl lol;  
ni zzirmar baxrde taex leil cux dae a,  
bbaehhexhhexmo ca leil ser,  
yel ngo leil dir su mel doxdoxsi jjixr car,  
ni meixsaer qir leil guirle a si zil dae a.
- <sup>5</sup>Ni Yoxrtaexl su nr nga ca mel leil hie goxr;  
nixmox neix su ca mel leil bei zil gger goxr;  
yaa ddei mi mel huax pixl gger a,  
arddolcar ci a lei holcir su nr zza lol.
- <sup>6</sup>Ngo leil dir su ca mel eine zzezze a nga a;  
ni cirse-cirsil lei yaa leil bei zil gger a.  
Ni yaa ddei zzi mel caexr pixl gger a mier gaxzi lol,  
yaa leil holcir su nr zza lol.

- <sup>7</sup> Yihexrhuaxr larnai arddolcar ci a lei zzirmar bei;  
 yar serpaxl niazzir a, yar ddei zzirmar baxrde taex dol har dae  
 ho a.
- <sup>8</sup> Yar mel bbaehhexhhexmo middurbbor ca mel leil guaxr nia,  
 hoxrhoxr mel dax zox dae a, circuxr-hanga leil ser nia.
- <sup>9</sup> Yihexrhuaxr mel,  
 si yaa leil ci su mel ddei pahher ggie bei nia;  
 goxrsol-goxrnaxr pex dae car, yaa ddei koxl ggie bei nia.
- <sup>10</sup> Yihexrhuaxr,  
 ni leil saexl su ca mel, ni leil koxl nia;  
 ni leil zo su ca mel, ni yaa leil piar nr pixl.
- <sup>11</sup> Caxlgo caxl dae a, Xi'a zzi gga hher dae Yihexrhuaxr leil caxl  
 zae gger nia,  
 yar bei dae mel circuxr-hanga leil biar gger nia.
- <sup>12</sup> Yihexrhuaxr mel ca seixl su mel leil bei koxl xixl su ddei a;  
 yar goxr sol su ca mel leil holcir dae,  
 yaa qiuxr dae mel leil hol-nr-cir nr var.
- <sup>13</sup> Yihexrhuaxr, ni leil qiuxr,  
 ngo leil zoxlnixr la!  
 Ngo leil vuxryixr su ca mel, ngo leil arsae ke dae bbe ni arleixr  
 i;  
 ni leil qiuxr,  
 ngo leil nr si lol jiuxl xixl la.
- <sup>14</sup> Ni mel ngo leil olga jiuxl a,  
 ngo dder Xi'a zzi gga alddur peixl dax hher dae a ggese var;  
 ni cirza-hanga seirseir bei dae mel, ca mel leil biar gger var.
- <sup>15</sup> Yoxrtaexl su nr nga ca mel yaa giexl teixl lei bbeddur ddei gga  
 haxl ji dae a;  
 yaa si leil ker xiaxl dae bel ddei armael qihher leil xiaxl gex dae  
 a.

- <sup>16</sup> Yihexrhuaxr mel bbaehhexhhexmo ca mel leil ser a,  
ca mel dder yar arsae ar ddei a saexl.  
Nael nixmox neix su ca mel,  
yaa armael ddei leixrhher zze zuixl bei dae mel, yaa leil ke dae  
a.
- <sup>17</sup> Nixmox neix su ca,  
hherdder Arbosobo leil hol-nr-cir su circuxr-hanga ca mel,  
yiji gga ssi nia.
- <sup>18</sup> Casolssor mel leil nael holcir nixixl zza;  
goxr sol su mel nga loxia dae mel lei nga nixixl zza.
- <sup>19</sup> Yihexrhuaxr, ni leil qiuxr,  
ha du la, ca mel leil tor bei leixl lol,  
Yoxrtaexl su nr nga ca mel ni meixsaer qir leil hher dae lol a, ni  
yaa leil ser nia.
- <sup>20</sup> Yihexrhuaxr, ni leil qiuxr,  
ni ca circuxr-hanga leil gexr lol,  
yaa leil armael mel ca lar nga saexl lol.

### Arbosobo Leil Qiuxr A Bbaehhexhhex A Bei Lol

- 10**<sup>1</sup> Yihexrhuaxr,  
ni arsaenga a ngua dax vimirmirmo ngier dae?  
Ngua goxrsol-goxrnaxr pex dae car,  
ni arsaenga a pahher du lei?
- <sup>2</sup> Nixmox neix su ca mel col zzae col, ol zzae olvaer, goxr sol su  
mel leil ggux ci;  
yaa si leil ke niazzir dae mel, yaa armael leil ke dae lol nia.
- <sup>3</sup> Nixmox neix su ca mel yaa nixmox zzar nr seir xiar dae mel leil  
kuar;  
zzirbae tuxr su ca mel Yihexrhuaxr dax bei nr mae,  
halae yar leil i ze.

- <sup>4</sup> Nixmox neix su ca mel ol zzae olvaer col zzae col, Arbosobo leil nr zo;  
yar xiar dae hazza lei Arbosobo ar ddei zza nr zzir.
- <sup>5</sup> Yar azo bei lei hazzi bei so;  
Arbosobo yar leil faxr nia hal mel yar nr saexl.  
Yar, yar leil dir su ca mel leil vaessi.
- <sup>6</sup> Yar nixmox zzar xiar dae a bbeix: “Ngo bei wor nr xie nixixl nr zza;  
cirzeix-hanga lei goxrsol-goxrnaxr pex dae nixixl nr zza,” eine bbeix.
- <sup>7</sup> Yar meir gga ca leil hie no, ca leil fur nei ca leil ci mel lillil a nga;  
yar ddar bbeix teixl lei mel, yarzi duxr yarzi gexrddo mel a nga.
- <sup>8</sup> Yar mel kax gga neix dae a,  
si mi-nr-bbe ca hal mel leil seixl zil gger.  
Yar meixddur zze mel koxl ggie nr zza, naer ggie nr zza ca hal mel leil ker i doxr.
- <sup>9</sup> Yar hhemar mel doxlzi gga dox dae mel sael a mia nr ddo ggie neix dae a,  
goxr sol su ca mel leil xia dae a yaa leil ssu;  
yar bel ddei gga kae a, goxr sol su ca mel leil bel si.
- <sup>10</sup> Yar dox dae a,  
koxl ggie nr zza naer ggie nr zza ca mel leil neix dae,  
gexrddoddo mo yaa leil deil a deil guirle gger.
- <sup>11</sup> Yar nixmox zza xiar dae a bbeix:  
“Arbosobo eilmel leil nr guaxr;  
yar meixddur mix gex dae a,  
cirse-cirsil lei ngo leil mia nixixl nr zza,” eine bbeix.□
- <sup>12</sup> Yihexrhuaxr,  
ni leil qiuxr, ha du la!

Arbosobo,  
ni leil qiuxr, goxr sol su ca mel leil holcir dae;  
ni leixrhher ddei bil du lei a yaa leil jiuxl!

<sup>13</sup> Nixmox neix su ca mel,  
arsaenga a Arbosobo leil i zeil a,  
nixmox zzar: “Arbosobo arsae bei lei ngo leil faxr nr var,”  
eine xiar neil?

<sup>14</sup> Nael nga zzael ni mia ho a;  
yar yarzi gexrddo bei dae nei ca leil ke dae mel lei ni mia a.  
Ni ddei leixrhher zze mel arddolcar lei aniuxcir mel leil beijjiu,  
yel koxl ggie nr zza naer ggie nr zza ca hal mel ni leil koxl lei a,  
yaa leil beijjiu lol.

<sup>15</sup> Ni leil qiuxr,  
nixmox neix su ca mel ddei leixrhherba ddei deil te gger,  
nr seir bei su ca mel leil bbeix ci a nael,  
ni yar nr seir bei dae mel leil zo teixl lei gaxzi.

<sup>16</sup> Yihexrhuaxr mel arddolcar ci a lei zzirmar bei ,  
Yoxrtaexl su nr nga ca mel yar ddei middur ddei leil mier nia.

<sup>17</sup> Yihexrhuaxr,  
nr col su ca mel ni leil qiuxr dae a, ni noni;  
ni seirseir a yaa leil noni a, yaa leil nixmox dder vaer.

<sup>18</sup> Ni mel si yaa leil ci su ca mel leil nei aniuxcir mel leil guaxr a,  
middurbbor ca mel leil nrbbba-nrbbba yaa leil nr zux lei lol.

Arbosobo Mel Bota Ddu Nr Zza Ca Mel Ddei Koxl Ggie

Daxlweixl vaexr sipi, caxlgo caxl su  
mel leil guaxr su ddei leil jia gger.

**11** <sup>1</sup> Yihexrhuaxr mel ngo ddei pahher ggie a.  
Nia arsae halae ngo leil bbeix:

- “Ni ngax sael a ni worga ga leil bbiu mal nia!
- <sup>2</sup> I ddo a;  
 nixmox neix su mel jir bbaex labox ddei vei dae,  
 jir baex lei halmaex deix dae a,  
 neixmar ggie hher dae a, bota ddu nr zza ca mel leil ker ddaexr  
 niazzir dae a.
- <sup>3</sup> Cassor-worssor mel azo nr seir bei niazzir dder bei cexr  
 arddeirnga a,  
 nixmox seir su ca mel halae azo bei cexr seir bbeixleir?” eine  
 bbeix.
- <sup>4</sup> Yihexrhuaxr mel yar ddei xi gga hher dae;  
 yar ddei zzirmar baxrde taex mel merlabbor zza dae;  
 yar seirseir a middurbbor ca mel bei dae nei bbeix dae mel lei i  
 dae.
- <sup>5</sup> Yar mel nixmox seir su nei nixmox neix su mel leil lei sixr i;  
 yar yarzi gexrddo hal mel bei meixr su ca mel leil vuxryixr.
- <sup>6</sup> Yar nixmox neix su ca mel dax,  
 adoxl bbiu dae saernir nei liuxrhuaxr zeil lei lol,  
 halae mersi yarzi taxl no jia mal lei lol.  
 Eilmel mel dder yaa li wo mibbe mel nga a.
- <sup>7</sup> Yihexrhuaxr mel bbaehhex;  
 yar bbaehhexhexmo bei su ca mel leil nolnger;  
 bota ddu nr zza ca mel Yihexrhuaxr leil malma mia ddo.

### Yihexrhuaxr Leil Qiuxr A Bei Jjiu Lol

Daxlweixl vaexr sipi, caxlgo caxl su mel leil guaxr su ddei leil jia  
 gger. Heixl zex zza caxlgo bbaex labox ddei  
 sser a, bbaex dax dae. (ca cirmelmel a zzirdae  
 a, diuxlzi eil yoxr mel capor caxl ddu diuxlzi.)

**12** <sup>1</sup> Yihexrhuaxr,  
 ni leil qiuxr, ngua leil beijjiu la.  
 Ni dax bei mae su ca nr zza ho a;



- ddarzziddo ca hal mel lei zo wo nr ddo a.
- <sup>2</sup> Cirddei-hanga lei zzi dax ddarzi nr bbeix;  
yaa ddar noni zaezae bbeix a zzi leil kuar gger,  
nael nixmox zzar xiar dae mel nei meir gga bbeix dae mel  
ciryoxr a nr nga.
- <sup>3</sup> Yihexrhuaxr,  
ni leil qiuxr, yaa ddar vaer te dae meir ddei ddaexrcir gger ssi,  
ddar noni zaezae bbeix a zzi leil kuar gger dae lo ddei ddaex te  
gger ssi.
- <sup>4</sup> Yaa mel bbeix: “Arseir lei ngua leil bbeix leixl gger nr xie;  
ngua arsae bbeix niazzir mel ngua lozza;  
ngua azo ddar bbeix mel arseir ngua leil guaxr cexr bbeixleir?”  
eine bbeix.
- <sup>5</sup> Nael Yihexrhuaxr bbeix:  
“Goxr sol su ca mel nei si yaa leil ke dae ca mel cix a ae dae,  
yel ngo ha du lei nia.  
Ngo yaa leil jiuxl nia;  
eil ddei mel dder yaa li wo loxia dae ddei nga a.
- <sup>6</sup> Yihexrhuaxr ddei ddar mel seibeixbeix mo,  
hherdder piu mel nilhar yoddur gga sir boxl cux goxr mel sael a  
nga.
- <sup>7-8</sup> Nixmox neix su ca mel zzarvul-zzarmae lei ssi dae;  
ca cirddei-hanga lei nr seir eilmel leil kuar gger.  
Nael Yihexrhuaxr mel,  
ngua leil guaxr dae a, ngua leil ca eil coxr leixrga gga jiuxl teixl  
lei.

[Arbosobo Leil Qiuxr A Zoxlnixr Lol/How long Lord?]

Daxlweixl vaexr sipi, caxlgo caxl su  
mel leil guaxr su ddei leil jia gger.

**13** <sup>1</sup>Yihexrhuaxr, ni ngo leil hol-nr-cir a arddolcar ci neil?  
Cirse-cirsil zzezze ci a [ngo]?

Ni qiaxrmeix ddei ngo leil mal nr gger a, [delete ngo leil nr  
guaxr a], arddolcar ci neil?

<sup>2</sup>Ngo nixmox zzar zzasol doxr, cirni-lorbba cix doxr a arddolcar  
ci [delete nia] neil?

Ngo leil dir su [delete ho bei ho] sexr du lei a [delete ngo leil  
guaxr gex dae a] arddolcar ci [delete nia] neil?

<sup>3</sup>Ngo ddei Arbosobo Yihexrhuaxr, ni leil qiuxr,  
ngo leil guaxr dae, ngo leil ddarkoxl la!

Ngo leil worni lol [add la]!

Nr nga a, ngo si a lei zucur nr saexl [a].

<sup>4</sup>Nr nga a ngo leil dir su “Ngo yar leil bei leixl gger a,” eine  
bbeix var. □

[Nr nga a,] ngo yaa dax bei wor nr xie a, ngo leil dir su mel  
dder ggese [a].

<sup>5</sup>Nael ngo ni ca mel leil perniar dae mel leil koxl;  
ni ngo leil jiuxl a, ngo nixmox zzar dder ggese.

<sup>6</sup>Yihexrhuaxr mel ngo leil daxlgaxl-daxllixl seir lol a,  
yel ngo yar leil caxl zae gger nia!

Arbosobo Leil Nr Ssexl Su Ca Mel Ddei Zuixl

Daxlweixl vaexr sipi, caxlgo caxl su  
mel leil guaxr su ddei leil jia gger.

**14**<sup>1</sup> Yarzi coxl yarzi medeil ca mel nixmox zzar xiar dae a bbeix:

“Arbosobo nr zza,” □ eine bbeix.  
 Yaa maelmaerjjia lei nixmox neix,  
 yarzi vuxryixrddo hal mel bei,  
 seirseir bei su ca cir ddei lei bax nr zza.

<sup>2</sup> Yihexrhuaxr merlabbor hher dae a,  
 middurbbor cassor-worssor mel leil i dae,  
 yar mel olnolddu su zza zza bbe i,  
 yar leil zo a yar leil qiuxr su zza zza bbe i.

<sup>3</sup> Nael yaa maelmaerjjia Arbosobo ddei ddar mel dax bei nr mae,  
 maelmaerjjia lei nixmox neix su loxr a;  
 seirseir bei su nr zza,  
 cir ddei lei bax nr zza.

<sup>4</sup> Nr seir bei su ca mel nr saexl a ngo?  
 Yaa ngo ddei cassor-worssor mel leil ci a,  
 almeixr zzor mel sael a, yaa leil zzor;  
 yaa Yihexrhuaxr leil zzael nr qiuxr.

<sup>5</sup> Arbosobo mel nixmox seir su ca mel dax cirgo a hher dae,  
 yel nr seir bei su ca mel gexr zildu a.

<sup>6</sup> Goxr sol su ca mel azo lerler bei niazzir dae a,  
 nixmox neix su mel yaa leil vaessi;  
 nael Yihexrhuaxr mel yaa ddei pahher ggie a.

<sup>7</sup> Yirsaexllixl su mel leil jiuxl su ddei Xi'a zzi gga ddux lei lol nia.  
 Yihexrhuaxr yar ddei cassor-worssor si ssu si hal mel leil jiuxl  
 xixl lei car,

Yargel <sup>9</sup>ddei giedae ca hherdder Yirsaexllixl su ca mel ggese nia.

Arbosobo Ddei Cassor-worssor Mel Arsae Nga Nia?

Daxlweixl vaexr sipi.

- 15** <sup>1</sup>Yihexrhuaxr,  
 arseir ni ddei Sexlmuxl gga hher cexr?  
 Ni mel seirceix-seirmaer,  
 arseir ni dax cirgo a ni ddei worga leil hher cexr?
- <sup>2</sup>Hherdder bota ddu nr zza,  
 bbaehhexhhexmo bei,  
 ddarzi te su ca ddei nga a.
- <sup>3</sup>Yar meir gga si leil nrbba-nrbba nr biar,  
 yar ddei gaxggor-carbeix mel leil nr ke,  
 yar ca mel dax cirgo a, yar dax goxr naer dae su ca mel leil  
 buxlguaxr-laxlsixr nr biar.
- <sup>4</sup>Yar yarzi aelgaxr ca hal mel leil i zei,  
 nael Yihexrhuaxr leil zi a, yar leil gexr su ca mel leil i du.  
 Yar bbeix har zaxr goxr a, yar cixrkui zzorbbeixlei gierbox nixixl  
 nr zza.
- <sup>5</sup>Yar si leil zzirbae cir gger a, miurmiur koxl nr gger lol;  
 yar si yar leil zzirbae ho dae mel li a, ca seir mel leil ke eine nr  
 bei.
- Eimel sael a bei su ca mel,  
 yar azo pex dae zzorbbeixlei bei leixl var.

---

<sup>9</sup>14:7 Yargel Yargel nei Yirsaexllixl hherdder ca cir ddei a nga.

Ngo Ddei Xiu Ddei Leil Tor Piar Pixl Nr Gger

Daxlweixl ddei sipi.

**16**<sup>1</sup> Arbosobo, ngo ni dax pahher lei,  
yel ni leil qiuxr, ngo leil guaxr dae la.

<sup>2</sup> Ngo Yihexrhuaxr dax

“Ni mel ngo ddei Seirpor a;

ngo ddei seirseir maelmaerjjia lei ni dax lei,”<sup>□</sup>

eine bbeix goxr a.

<sup>3</sup> Middurbbor Arbosobo ddei cassor-worssor mel leil bbeix ci a  
mel, yaa zae zae zae, seir zae seir,  
maelmaerjjia lei ngo nolnger dae mel nga a.

<sup>4</sup> Neir mel leil zi su ca mel, yaa ddei goxrsol-goxrnaxr mel miur  
dax nia.

Yaa neir mel leil sirnilni zi car, ngo yaa dax zi nr dax;  
ngo meir gga lei yaa ddei neir mel ddei mi nr ti.

<sup>5</sup> Yihexrhuaxr, ni mel ngo li wo mibbe ddei nga a;  
ngo ddei seirseir maelmaerjjia lei ni dax lei;  
ngo nixixl goxr dae mel ni leixrga gga hher ji dae.

<sup>6</sup> Ni baezo sser a ngo leil liaxr gger dae middei mel yarzi naxrcixl,  
ngo li wo dae mel yarzi igax zae.

<sup>7</sup> Ngo ngo leil mul gger su Yihexrhuaxr ddei seirseir mel biar nia;  
ngo nixmox taex eilmerxixl lei ngo leil mul gger.

<sup>8</sup> Ngo arddolcar lei Yihexrhuaxr leil holcir dae.

Yar mel ngo yo piar a gga hher dae a,  
ngo azo pex dae zzorbbeixlei ha nr var.<sup>h</sup>

<sup>9</sup> Yel ngo nixmox zzar ggese, ngo ddei xiu ddei ggese,

---

<sup>h</sup>16:8 ha nr var Yilsi meldder bbeix: yar bei leixl var.

ngo ddei ggecir ddei lei zzasoso a goxr dae.

<sup>10</sup> Ni mel ngo ddei xiu ddei leil Yiji gga piar dol gger nr var;  
ni mel seirceix-seirmaer hal ddei ddei ggecir ddei leil xiaxr lol  
nr var.

<sup>11</sup> Ni olga zza jjiumo zex ngo leil saexl lol;  
ni meixsaer qir leil hher dae a, ngo yarzi sael ggese;  
ni leixrga gga hher dae a, ngo cirse-cirsil lei ggese.

Arbosobo Leil Koxl Su Mel Leil Ca Nr  
Seir Mel Dax Jiuxl Teixl Lei Qiuxr

Daxlweixl Arbosobo dax ddar biar dae mel.

**17** <sup>1</sup> Yihexrhuaxr,  
ngo ni leil qiuxr dae mel ni bbaehhexhhexmo ser!  
Ngo ni leil ae dae a ni ddarkoxl la!  
Ngo nixmox ga gga ddux lei a ni dax ddarzi biar dae mel,  
ni seirseir a noni gger la!

<sup>2</sup> Arddol mel bota ddu nr zza mel ni saexl,  
yel ni ngo leil zuixl nr zza dixl gger la.

<sup>3</sup> Ngo nixmox taex arsaesael nga mel ni saexl,  
ni eilmerxixl lei ngo leil i dae;  
ni ngo leil sixr i goxr a;  
nael ngo azo nr seir zza zo nr teixl lei.

Ngo xiar har ho a; meir ddei leil ddar bbeix nr cox lol.

<sup>4</sup> Ngo mel kebal ca mel sael a, ddar yarzi gexrddo hal mel nr te;  
ngo ni miardal dae mel leil noni a, yarzi gexrddo bei su ca hal  
mel dax ssi nr mae.

<sup>5</sup> Arddolcar lei ni dax mae dae,  
zeixleixr lei ssi pixl nr goxr.

<sup>6</sup> Arbosobo, ni mel ngo leil ddarkoxl var,  
yel ngo ni leil qiuxr,  
ngo ni dax ddar biar dae mel seirseir a noni gger la.

- <sup>7</sup> Ni ca leil perniar dae arseir lei xiar ci nr xie hal mel ngo leil saexl lol la;  
ni mel leixrhher yo bbor sser a, ni leil koxl su ca mel leil jiuxl a, yaa leil dir su mel dax jiuxl teixl lei su ddei nga a.
- <sup>8</sup> Ni leil qiuxr, ngo leil guaxr dae,  
hherdder armael meixddur leil guaxr mel sael a nga;  
ngo leil ni ddoleixr woxrke pahher dae lol a,
- <sup>9</sup> ngo leil ggux ci su nixmox yarzi neix,  
hherdder ngo leil zaza-lili weixr gex du lei ca mel, ngo leil nr ke lol.
- <sup>10</sup> Yaa ca mel leil zoxl-nr-nixr,  
ddar te a lei yarzi col.
- <sup>11</sup> Ngo arddol ssi lei, yaa ngo leil weix gex du lei a,  
arddolcar ngo leil dder guirle gger cexr bbe i.
- <sup>12</sup> Yaa mel hhemar sael a,  
ngo leil si me gger niazzir;  
yaa hhemar yarzi sexr mel sael a,  
mia nr ddo ggie pahher dae a ngo leil neix dae.
- <sup>13</sup> Yihexrhuaxr, ni leil qiuxr,  
ha du la a, ngo leil dir su mel dax ssi a,  
yaa leil deil leixl gger!  
Ni ddei altor baex sser a, ngo leil nixmox neix su ca mel dax jiuxl teixl la.
- <sup>14</sup> Ni leil qiuxr,  
ni ddei leixrhher zze sser a,  
ngo leil eil se lar be su ca mel dax jiuxl teixl la.  
Ni yaa leil zzaegu naxrcixlcixl gger,  
yaa ddei ssormine leil lei bboxl bbox sser wor lol,  
yaa halae sser nirzwei a yaa ddei lilbol-lilmo leil gger ddu zza.
- <sup>15</sup> Ngo leil bbeix ci a nael,  
zuixl nr zza i mal gger ho a;

yel ngo ni leil mia ddo;  
 ngo zucur car, ni leil mia ddo a,  
 ngo dder nixmox lodda a. check with team, listen, analyze

### Arbosobo Ca Leil Jiuxl A, Yar Leil Bbeixzae Gger

Yihexrhuaxr leil miar bei gger su Daxlweixl vaexr sipi. Caxlgo caxl su mel leil guaxr su ddei leil jia gger. Yihexrhuaxr yar leil, yar leil dir su hazza nei Sarloxr leixrga gga jiuxl teixl lei nixixl mel gga, yar Yihexrhuaxr dax, sipi eil zul ddei ddar mel zza a bbeix:

**18**<sup>1</sup> Yihexrhuaxr, ni mel ngo leil worni lol su ddei nga a;  
 ngo ni leil [yarzi] perniar.

<sup>2</sup> Yihexrhuaxr mel ngo ddei legelbbe, ngo ddei weixrqiaxr, ngo leil jiuxl su,  
 ngo ddei Arbosobo, ngo pahher ggie legelbbe, ngo koxl ggie ddei nga a.

Yar mel ngo leil dir su mel leil bbiur gex gger su, ngo leil jiuxl su,  
 ngo leil guaxr su ddei nga a.

<sup>3</sup> Yihexrhuaxr leil mel bbeixzae gger mibbe.

Ngo yar leil qiuxr a, yar [dder] ngo leil dir su mel leixrga gga ngo leil jiuxl teixl lei.

<sup>4</sup> Halleix, ca leil si lol var ddei baezo [sael a] ngo leil ssox gex dae, ca leil bei zil gger var hal mel ajjix [sael a] ggerggelgger ngo leil pe gex dae;

<sup>5</sup> Yiji ddei baezo [sael a] ngo leil ssox gex dae, ca leil si lol var ddei bel [sael a] ngo leil bel gex dae.

<sup>6</sup> Nael ngo yarzi goxrsol car, ngo ddei Arbosobo Yihexrhuaxr leil qiuxr a,

yar, yar ddei xi gga hher dae a, ngo qiurte ddei leil bbejjiur a; ngo yar dax qiuxr dae mel yar ngo leil noni gger a.

<sup>7</sup> Yar mel seifu faex a,



- middur ddei dder lelelle le du lei a;  
 worjibbei ddei lei lelelle le du lei a.
- <sup>8</sup> Yar noxlbbexsu gga alker sil teixl lei dae,  
 yar meir gga adoxl herhelher ddux lei a,  
 saernir mel lei bbiu du lei a.
- <sup>9</sup> Yar merlabbor ddei ggapu a zeil lei a;  
 [zico] neixlneix mel yar qihher woxrke hher dae.
- <sup>10</sup> Yar [mel] jiluxlboxr ddei leil cux dae a bbiu dae,  
 mersi mel yar ddei ddoleixr bei a, yar yarzi bbiu jiax.
- <sup>11</sup> Neixmar ggie mel yar pahher ggie,  
 yar zaza-lili zico neixmarmarmo gel mix jjia a, almer lei niazzir  
 dae sael a nga.
- <sup>12</sup> Zico tultu, wortaxlaex nei adoxl bbiu dae saernir mel, yar  
 xilmeir bbobbolbbo ddei gga gger lei a.
- <sup>13</sup> Yihexrhuaxr merlabbor almer er [lol],  
 \*[mu zzir ggie hher dae ddei] qiurte ddei ddux lei a,  
 wortaxlaex nei adoxl bbiu dae saernir lei zeil lei a.
- <sup>14</sup> Yar jir ddaexr teixl lei a, yar leil dir su mel lei ggaxr bbeir gger;  
 Almer bbiexr a, yaa leil luaxl lol. <sup>15</sup> Yihexrhuaxr, ni hexr du lei  
 a, noxlbbexsu gga seixl ddux lei a qie, neixvi yarzibbor ddei  
 ddux lei a; middur jibbei ddei leil lei mia ddo a.
- <sup>16</sup> Yar leixrhher ddei merlabbor cei zeil lei a, ngo leil gga  
 gex dae, ngo leil ajjix yarzi neixl ggie gga deix xixl lei.
- <sup>17</sup> Ngo leil dir su yarzi sexr hal mel nei ngo leil vuxryixr  
 su hal mel lei ngo leil sexr leixl, yel yar ngo leil yaa dax  
 jiuxl teixl lei a. <sup>18</sup> Ngo zix ngexl ggie naer ngexl ggie lei  
 nr zza car, yaa mel ngo leil dir lei, nael Yihexrhuaxr  
 mel ngo ddei koxl ggie a. <sup>19</sup> Yihexrhuaxr ngo leil middei  
 kuax ggie<sup>i</sup> hier mal. Yar mel ngo leil ggese a, yel ngo leil  
 jiuxl a.

<sup>i</sup>18:19 middei kuax ggie ddei yilsi mel yar leil dir su nr zza, yar leil ke su nr zza  
 ggie halmaex nga a.

<sup>20</sup> Yar mel ngo bbaehhexhhexmo bei dae mel dax zox dae a, ngo leil bei koxl xixl; ngo seirseir bei dae mel dax zox dae a, ngo leil seir lol. <sup>21</sup> Ngo mel Yihexrhuaxr ddei ddar mel noni, zeixleixr lei yarzi gexrddo bei a, Arbosobo dax nr mae bei nr goxr. <sup>22</sup> Ngo arddolcar lei yar miardal dae mel leil holcir dae, yar ddei lixfaxr mel leil holnr-cir bei nr goxr. <sup>23</sup> Ngo mel yar meixsaer qir leil nixmox seir gaxzi, ngo armael leil guaxr dae a, zuixl nr bei ssi. <sup>24</sup> Yel Yihexrhuaxr dder ngo bbaehhexhhexmo bei dae mel dax zox dae nei ngo seirseir bei dae mel dax zox dae a, ngo leil bei koxl xixl.

<sup>25</sup> Ca leil perniar su mel, ni yar leil perniar; seir gaxzi su ca mel, ni yar leil seir gaxzi; <sup>26</sup> seirseir bei su mel, ni yar leil seirseir bei koxl xixl; nr seir bei meixr su mel, ni yar leil nr seir bei koxl xixl. <sup>27</sup> Goxr sol dae cassor-worsor mel, ni yaa leil jiuxl; meixddur mu su mel, ni yar leil ca yojiar loxr lol.

<sup>28</sup> Ni mel ngo ddei de zar doxl du lei a; ngo ddei Arbosobo Yihexrhuaxr ngo leil neixmar ggie bbele lol. <sup>29</sup> Ngo ni leil koxl dae a, ngo leil dir su meixr mel dax beix gel; ngo ddei Arbosobo leil koxl dae a, lu mel leil tiuxl gel. <sup>30</sup> Arbosobo Yihexrhuaxr leil bbeix ci a mel, yar bei dae mel seir gaxzi; yar ddei ddar mel koxlsseiddo; ha yar leil koxl su mel yar dder yaa leil nr seir mel bbiur gex gger su ddei bei. <sup>31</sup> Yihexrhuaxr nr nga a mel, arseir Arbosobo a bbeixleir? Niul ddei Arbosobo nr nga a mel, arseir niul pahher ggie legelbbe taex a bbeixleir? <sup>32</sup> Arbosobo larnei ngo leil worni lol; yar larnei ngo leil bei seir gaxzi lol. <sup>33</sup> Yar ngo ddei qihher zze leil cimodo sael a beix jiax lol, ngo leil darmumu ggie barververmo hher dae lol. <sup>34</sup> Yar ngo leil mul gger a, ngo leixrhher zze leil zaxlddaexr var lol; ngoleixrhherba ddei, zzir bei teixl lei jir ddaexr labox yarzi lir hal ddei leil lei gga du xie.

<sup>35</sup> Ni mel ngo leil jiuxl a, ngo leil nr seir mel bbiur gex gger su ddei nga a; ni leixrhher yo bbor ngo leil zar gex dae; ni ngo leil zoxlnixr a, ngo leil sexr du lei lol. <sup>36</sup> Ni ngo qihher toxl gex dae jjiumo zex kuax du lei lol a, ngo ddei qihher zze yoxl nr goxr. <sup>37</sup> Ngo, ngo leil

dir su mel leil ggaxr mae ssi a, ggaxr wo a; yaa leil bei zil nr gger a mel, ngo dder nr jjixr lei. <sup>38</sup> Ngo yaa leil deil guirle gger a, yaa leil ha du lei nr xie lol; yaa leil ngo qihher woxrke guir dae lol. <sup>39</sup> Halleix ni mel ngo leil worni lol a, ngo leil zaxlddaexr cexr lol; ngo leil dir su mel leil ngo woxrke hher dae a, ngo leil cizixl gger lol. <sup>40</sup> Ni mel ngo leil dir su mel leil pa du si lol; ngo, ngo leil vuxryixr su ca mel leil bei zil gger. <sup>41</sup> Yaa si leil qiuxr, nael yaa leil jiuxl su nr zza; yaa Yihexrhuaxr leil qiuxr a lei, yar ddar-nr-koxl. <sup>42</sup> Ngo yaa leil mersi jia mal lei nilme mel sael a deil me gger; yaa leil jjiumo gga nilnaexl mel sael a dox teixl lei.

<sup>43</sup> Ni ngo leil zzi dax zex su cassor-worssor mel gga jiuxl teixl lei; ngo leil hormo cuxr ddei vaervaerpor bei lol, ngo zeixleixr lei saexl nr seix cassor-worssor mel lei ngo leil visser. <sup>44</sup> Yaa ngo ddei mi ddei leil bbejjiur a qie dder ngo ddei ddar no; Yoxrtaexl su nr nga ca mel ngo dax ddaexr wor nr xie a dder ddaexr nr bel a. <sup>45</sup> Yaa nixmox ye a gexrgexr-zizi yaa zaxlddaexr a pahher ggie ddux lei.

<sup>46</sup> Yihexrhuaxr mel gol dae Arbosobo ddei nga a! Ca mel leil ngo pahher ggie legelbbe taex leil hherdder Arbosobo leil bbeixzae gger lol nia! Ngo leil jiuxl su Arbosobo leil i du lol nia! <sup>47</sup> Yar mel ngo leil dir su mel leil bei koxl xixl su Arbosobo ddei nga a; yar cassor-worssor mel leil ngo woxrke hher dae lol a, ngo ddei ddar no lol. <sup>48</sup> Yar ngo leil dir su mel dax ngo leil jiuxl teixl lei; yoxl ngo leil quexrlixl zza lol a, bir ngo leil dir su mel leil vaer leixl lol; yar ngo leil yarzi gexrddo bei su ca mel dax jiuxl teixl lei. <sup>49</sup> Yihexrhuaxr, ngo circuxr-hanga dax ni leil nawo nia, ni mi ddei leil caxl zae gger nia.

<sup>50</sup> Yihexrhuaxr mel yar zzirmar bei lol ddei leil hormo boxl nei ddaexr leixl lol; yar cirse-cirsil lei yar tiur teixl lei Daxlweixl leil nei yar giedae ca mel leil perniar doxr dae.

Merlabbor Arbosobo Leil Middux Lol

Daxlweixl vaexr sipi. Caxlgo caxl su  
mel leil guaxr su ddei leil jia gger.

**19**<sup>1</sup> Merlabbor circexr-hanga Arbosobo middux dae mel biar;  
merlabbor cirddei-lorbba yar leixrhher gga bei dae mel  
bbeix.

<sup>2</sup> Bbecir-bbeni lei ddar biar,  
bbecir-bbexixl lei Arbosobo arsae ar ddei a bbeix.

<sup>3</sup> Bbeixddu nr zza, biarddu nr zza,  
qiurte lei bbejjiur nr ddo.

<sup>4</sup> nael mer woxrke cirmaex-hanga lei yaa ddei qiurte ddei biar ci;  
middurbbor zzarvul-zzarmae lei yaa ddei ddar mel biar ci.

Arbosobo merlabbor gga merni taex leil zaxlpoxr daxr gger.

<sup>5</sup> Merni taex mel mixlyixrsixl ddei cirmusixl yixrggie ddux lei sael  
a nga;  
yoxl ca yarzi sexr ar ddei a ggegge-sese a jjiumo gga beix dae  
sael a nga.

<sup>6</sup> Yar merlabbor eilpiar a gga ddux lei a,  
merlabbor halpiar a gga za ci;  
cirza-hanga leil lei lexl wo lol.

Yihexrhuaxr Ddei Lixlfxaxr Seir Gaxzi

<sup>7</sup> Yihexrhuaxr ddei Lixlfxaxr seir gaxzi,  
ca leil nixmox taex seir xixl lei lol;

Yihexrhuaxr dixl har dae lixlfxaxr mel koxlsseiddo,  
ca medeil mel leil olnolddu lol.

<sup>8</sup> Yihexrhuaxr mul gger dae mel hoxr,  
ca mel leil nixmox ggese lol;

Yihexrhuaxr miardal dae ddei botaddu nr zza,

- ca mel leil meixddur zze bbele lol.<sup>j</sup>
- <sup>9</sup> Yihexrhuaxr leil gexr a mel nixmox taex seibeix,  
 arddolcar ci a lei eine nga;  
 Yihexrhuaxr ser dae mel yarzi a;  
 maelmaerjjia bbaehhex.
- <sup>10</sup> Bir sae mel leil nolngerddo,  
 bir sae lillil a nga mel leil lei nolngerddo leixl;  
 bir bbiurvi leil ci,  
 bir bbiur bbe gga bbiurvi mel leil lei ci leixl.
- <sup>11</sup> Eilmel ni leil miar bei gger su mel leil bei ddo bei nr ddo saexl  
 lol,  
 eilmel dax bei mae dae a yaa seirseir cirke li wo ddo.
- <sup>12</sup> Arseir armael bei cox dae mel leil saexl bbeixleir?  
 Ni leil qiuxr, ngo bei cox dae a lei ngo nr saexl hal mel leil tor  
 bo-nr-ta!
- <sup>13</sup> Ngo leil bbiur gex dae a, yarzzir-yarleixr zuixl tor nr bei ssi lol,  
 zuixl mel ngo leil tor guaxr nr gex dae lol.  
 Eine nga a mel ngo seir gaxzi a;  
 Ngo yarzi larhor zuixl hal mel bei nr var a;  
 ngo dder botaddu lei nr zza a.
- <sup>14</sup> Yihexrhuaxr ngo pahher ggie legelbbe,  
 ngo leil jiuxl a vae xixl lei su,  
 ngo meir gga ddar bbeix dae mel, ngo nixmox zzar xiar dae mel  
 lei  
 ni leil nixlodda lol nia.

Arbosobo Leil Qiuxr A, Zzirmar Leil Bei Leixl Lol

Daxlweixl vaexr sipi. Caxlgo caxl su  
 mel leil guaxr su ddei leil jia gger.

---

<sup>j</sup>19:8 ca mel ddei meixddur zze leil bbele lol Ddar eil qir ddei yilsi mel dder “ca mel leil arddol mel hoxr, arddol mel nr hoxr i wo xie lol.”

**20**<sup>1</sup> Ni nr seir pex dae car, Yihexrhuaxr ni leil ddarkoxl lol nia,  
Yargel ddei Arbosobo ni leil guaxr dae lol nia.

<sup>2</sup> Yar, yar ddei xi gga hher dae a,  
ni leil beijjiu lol nia;  
yar Xi'a zzi gga hher dae a,  
ni leil wor jjiu lol nia.

<sup>3</sup> Ni yar leil zi dae cirza-hanga yar holcir dae lol nia,  
ni yar leil zzeir seixl zi dae mel yar leil nixlodda lol nia.

<sup>4</sup> Ni nixmox zzar xiar dae mel,  
yar ni leil gger lol nia,  
ni bei niazzir dae maelmaerjjia,  
yar ni leil bei cexr lol nia.

<sup>5</sup> Ni ddaexr leixl a, ngua ggease a worcixl-worni ae;  
ni bei leixl a jjixr lei a ngua, ngua ddei Arbosobo leil bbeixzae  
gger.

Ni Arbosobo Yihexrhuaxr dax qiuxr dae cirza-hanga lei,  
yar ni leil gger lol nia.

<sup>6</sup> Eilcar ngo saexl a; Yihexrhuaxr mel yar tiur teixl lei zzirmar  
ddei leil jiuxl;  
yar seirceix-seirmaer merlabbor gga hher dae a, yar leil  
ddarkoxl;  
yar yarzi worni leixrhher yo bbor sser a yar leil jiuxl.

<sup>7</sup> Ca cirmelmel a zaxlddaexr marcae leil koxl,  
ca cirmelmel a mur leilkoxl,  
nael ngua mel ngua ddei Arbosobo Yihexrhuaxr leil koxl.

<sup>8</sup> Yaa maelmaerjjia lei de ze i a guir dae a;  
ngua zzael ha du lei a, vever a ngier dae.

<sup>9</sup> Yihexrhuaxr, ni leil qiuxr,  
zzirmar leil jiuxl la;  
ngua ni leil qiuxr car, ngua leil ddarkoxl la.

## Zaxlddaexr Leixl A Bbeixzae Gger

Daxlweixl vaexr sipi. Caxlgo caxl su  
mel leil guaxr su ddei leil jia gger.

- 21** <sup>1</sup>Yihexrhuaxr, ni bbesur zza a, zzirmar ddei ggese;  
ni yar leil jiuxl a, yar ggese zildu a!
- <sup>2</sup>Yar nixmox zzar xiar dae mel, ni yar leil gger a;  
yar meir gga ni dax qiuxr dae mel, ni yar leil ddarkoxl a.
- <sup>3</sup>Ni yar leil cirza-hanga seirseir meixl gger,  
sae lillil a bei teixl lei zzirmar oldde leil ddexr labox ddei,  
yar oldde leil ddexr gex gger.
- <sup>4</sup>Yar ni dax olga zza lol la qiuxr a,  
ni dder yar leil ddarkoxl;  
cirse-cirsil yar leil olga zza lol.
- <sup>5</sup>Ni yar leil jiuxl a, yar yarzi middux;  
ni yoxl ca mel leil yar leil i du lol,  
yar leil zzirmar yarzi ddo loxr lol.
- <sup>6</sup>Ni cirse-cirsil lei yar leil seir lol;  
yoxl yar leil ni meixsaer qir leil ggese lol.
- <sup>7</sup>Mu zzir ggie hher dae Yihexrhuaxr,  
ni mel ca leil perniar nor nixixl nr zza,  
yel zzirmar ddei ni leil koxl dae a,  
yar velver a zzirmar bei doxr dae.
- <sup>8</sup>Ni leixrhher zze ni leil dir su maelmaerjjia leil zo teixl lei nia,  
ni leixrhher yo bbor ni leil vuxryixr su ca mel leil zo teixl lei nia.
- <sup>9</sup>Ni yaa meixsaer qir leil hher dae car,  
yaa leil adoxl taxl zildu gga hher ji dae sael a nga lol nia.  
Yihexrhuaxr seifu faex a, yaa leil mier lol nia;  
adoxl sser a, yaa leil cu pixl gger nia.
- <sup>10</sup>Ni yaa ddei lilbol-lilmo mel leil middurbbor mier lol nia,  
yaa giedae ca mel leil ca mel gga mier lol nia.

- <sup>11</sup> Yaa mel ni leil ke niazzir dae;  
yaa nr seir xiar ji dae bbeixarnar, nael bei cexr nr var.
- <sup>12</sup> Ni jir baex yaa qiaxrmeix leil ddaexr niazzir dae car,  
yaa leil doxdoxsi pa xixl si lol nia.
- <sup>13</sup> Yihexrhuaxr, ni armael ddei bbesur mel sser a,  
ca mel leil ni mel vaer zzir ddei nga a saexl lol,  
eine nga a, ngua dder ni ddei ddoddo mo hal mel leil caxl zae  
gger.

### Goxrsol Su Ca Ddei Arbosobo Leil Qiuxr

Daxlweixl vaexr sipi. Caxlgo caxl su mel leil guaxr su ddei leil jia  
gger. “Eilneixr-nehe Ddei Ci” caxlgo eil ser diuxlzi ddei sser.

**22** <sup>1</sup> Ngo ddei Arbosobo, ngo ddei Arbosobo!  
Arsaenga a ngo dax bbe kae?

Arsaenga a vimirmir hher dae a,  
ngo leil nr jiuxl,  
ngo cix a ae dae ddar mel leil no-nr-ni leir?

<sup>2</sup> Ngo ddei Arbosobo,  
ngo eilnirggu ni leil qiuxr a, ni ddar-nr-koxl;  
ngo eilmerxixl ni leil qiuxr a, cirleixr lei nr nor.

<sup>3</sup> Ni mel seirceix-seirmaer;  
ni Yirsaexllixl su ca mel bbeixzae gger dae ddei nga a.

<sup>4</sup> Ngua ddei porpor mel ni leil koxl.  
Yaa ni leil koxl a, ni yaa leil jiuxl.

<sup>5</sup> Yaa ni leil ae dae a qiuxr a, yaa leil jiuxl wo;  
yaa ni leil koxl a, yaa seixlda nr var.

<sup>6</sup> Nael ngo mel bberzzi a; ca nr nga.  
Marmar-leixlleixl lei ngo leil bbeix vuxryixr,  
cassor-worssor mel ngo leil i ze.



- 7 Ngo leil mia su maelmaerjjia ngo leil vaessi;  
yaa cirzzae-meirzzae oldde taex veil dae a bbeix:
- 8 “Yar armael leil Yihexrhuaxr leixrga gga jia ji gger a mel,  
Yihexrhuaxr yar leil jiuxl lol ddo a!  
Yihexrhuaxr yar leil ggeise a mel,  
Yihexrhuaxr yar leil jiuxl lol ddo a!”
- 9 Nael Arbosobo Yihexrhuaxr, ni ngo leil ngama xilbe gga ddux  
lei lol;  
ngo leil ngama xilbe bbor gga deix dae seir dder ni ngo leil ni  
leil koxl lol.
- 10 Ngo ngama xilbe gga ddux lei a dder, ni leixrga gga jia ji gger  
a;  
ngama ngo leil xiu teixl lei a dder, ni mel ngo ddei Arbosobo  
nga a.
- 11 Goxrsol-goxrnaxr mel ngo dax lei naer ci jiur a;  
ngo leil beijjiu su lei nr zza,  
yel ni leil qiuxr ngo dax tor giex vi-nr-mir.
- 12 Loxrbbexmar cirke a ngo leil weixr gex dae;  
Basa mermi ddei loxrbbexmar yarzi sexr hal mel ngo zaza-lili  
hher dae.
- 13 Yaa ngo dax meir ddeingaxl dae a,  
bbialil-bbialor me dae a, zzorddu zix lel dae hhemar mel sael  
nga a.
- 14 Ngo leil ajjix sael a, dox teixl lei,  
ngo ddei hherggar mel lei ddux ho a.  
Ngo nixmox ddei lei bbiursul sael a zzi ho a.
- 15 Ngo cixlmaexr-wormaexr lei nr ni, ngier sael a hie zzu a;  
ngo lo ddei bborngax ddei leil niaxl gex dae a.  
Ni ngo leil nilme gga hher dae lol a, halmaex gga si lol.
- 16 Anol mel ngo leil weixr gex dae;  
yarzi gexrddo bei su ca cir ngo zaza-lili hher dae.

- Yaa ngo qihher leixrhher leil zzir.
- <sup>17</sup> Ngo ddei hherggar mel leil lei ngo hhe bei xie,  
yaa cirbox-meixboxmo ngo leil i dae.
- <sup>18</sup> Yaa zzi dax ngo ddei pia mel bbe;  
ngo ddei pia xiux leil nijiu.
- <sup>19</sup> Yihexrhuaxr, ni leil qiuxr, ngo dax tor giex vi-nr-mir;  
Ngo leil worni lol su Seirpor, nialngasael ngo leil beijjiu la!
- <sup>20</sup> Ngo ddei olga ddei leil altor dax jiuxl teixl la;  
ngo leil anol dax jiuxl teixl la;
- <sup>21</sup> ngo leil hhemar meir gga jiuxl teixl la.  
Ni ngo leil niur yir ddei cuxgexdaex dax jiuxl teixl lei ddarkoxl  
ho a.
- <sup>22</sup> Ngo ni ddei mi ddei ngo ddei arzzi-nimar mel leil biar gger nia;  
ni leil zi su ca mel gga ngo ni leil bbeixzae gger nia.
- <sup>23-24</sup> Yar goxrsol su ca leil i nr ze, vuxr-nr-yixr;  
yar dax qiaxrmeix ddei leil bbe-nr-gex,  
goxrsol su ca ddei qiuxr dae car, yar noni.
- Yel nia Yihexrhuaxr leil gexr su ca mel yar leil bbeixzae gger nia.  
Yargel giedae ca maelmaerjjia yar leil middux lol nia.  
Yirsaexllixl giedae ca maelmaerjjia yar leil gexr nia i du nia.
- <sup>25</sup> Ngo ni leil zi su ca cirke gga ni leil bbeixzae gger dae ddar mel  
ni dax lei arddeir a;  
ngo ni leil gexr su ca mel meixsaer qir leil ngo bbeix har goxr  
mel bei nia.
- <sup>26</sup> Nr col su ca mel<sup>k</sup> zzor bbox nia;  
Yihexrhuaxr leil qiuxr su ca mel, yar leil bbeixzae gger nia.  
Nia ddei nixmox taex leil arddolcar lei gol dae lol nia.

---

<sup>k</sup>22:26 Nr col su ca mel Arbosobo Ddei Sul cirberber a mel bbeix “sol su ca”.

- <sup>27</sup> Middurbbor cirmaex-hanga lei Yihexrhuaxr leil holcir dae nia,  
yar dax za xixl lei nia;  
cirgoxr-hanga ddei circuxr-hanga lei yar meixsaer qir leil cizixl  
gger a yar leil zi nia.
- <sup>28</sup> Yihexrhuaxr mel zzirmar a;  
yar cirgoxr-hanga leil guaxr.
- <sup>29</sup> Middurbbor cabesu maelmaerjjia zzorzzor-ddadda a yar leil  
oldde textl nia,  
ha nilme gga zeï ci ca mel<sup>l</sup> nei zeixleixr gol nr var su ca mel yar  
leil cizixl gger nia.
- <sup>30</sup> Cirzeix-hanga ca mel yar leil miar bei gger nia,  
Seirpor bei dae mel giedae ca mel leil biar gger nia.
- <sup>31</sup> Yaa yar ddei bbaehhexhex mel xiu teixl lei niazzir dae ca hal  
mel leil biar gger lei nia.  
Eilmel mel yar bei a.

## Yihexrhuaxr Mel Ngo Ddei Yaloxlmo

### Daxlweixl vaexr sipi

- 23**<sup>1</sup> Yihexrhuaxr mel ngo ddei yaloxlmo,  
ngo cirza-hanga lei sser loxr ddo.
- <sup>2</sup> Yar ngo leil silbbar nibaex zza ggïe yixr dae lol,  
ngo leil wornol cexr ajjix<sup>m</sup> qir dax hier mal ci.
- <sup>3</sup> Yar ngo ddei nixmox ddei leil seir xixl lei lol,  
yar armael mi ddei leil weix a  
ngo leil hier dae a jjiumo hoxrhoxr mel leil ssi lol.
- <sup>4</sup> Ni mel ngo dax cirgo a hher dae;  
ni ddei meixlcaex nei ni ddei zzargger lei  
ngo leil nixmox zzaso lol,

<sup>l</sup>22:29 ha nilme gga zeï ci ca mel Ca eil mel hherdder si ho a middur gga giexlhex  
dae ca mel nga a.

<sup>m</sup>23:2 wornol cexr ajjix Ajjix eil mel fa-nr-sol.

yel ngo yarzi neixmar lagiex gga ssi gel bbeixarnar,  
ngo halae yarzi gexrddo mel leil nr gexr.

<sup>5</sup> Ngo leil vuxryixr su ca mel meixsaer qir leil,  
ni ngo leil zzorci-ddami baer gger;  
ni ssuvi sser a ngo oldde taex leil dox deix gger;  
ni ngo ddei beizi taex bbi a mil teixl lei lol.

<sup>6</sup> Seirseir meixl gger dae mel nei perniar dae mel,  
cirse-cirsil ngo dax mae dae nia.  
Arddolcar ci a lei ngo Yihexrhuaxr ddei xi gga hher doxr nia.

Bbobbolbbo Zza Zzirmar

Daxlweixl vaexr sipi.

**24** <sup>1</sup> Middur ddei nei middur leil zza dae mel,  
middurbbor nei middurbbor hher dae mel lei Yihexrhuaxr  
ddei a.

<sup>2</sup> Yar middur ddei neixvi teixl leil hher dae lol,  
ajjix teixl leil hher dae lol.<sup>n</sup>

<sup>3</sup> Arseir Yihexrhuaxr ddei worga leil ddeix cexr?  
Arseir yar ddei xi gga ngier dae cexr?

<sup>4</sup> Hherdder leixrhher zzezuixl nr bei,  
nixmox seir, bbex leil nr zi,  
ca dax bbeix har zaxr car ca leil nr fur su ca ddei nga a.

<sup>5</sup> Yihexrhuaxr yar leil seir lol nia,  
yar leil jiuxl su Arbosobo ddei  
yar leil zuixl nr zza i mal gger nia.

<sup>6</sup> Ca eilmel mel Yihexrhuaxr leil zo,  
Yargel ddei Arbosobo Yihexrhuaxr meixsaer qir leil lei a, yar  
leil qiuxr.

<sup>n</sup>24:2 Yar middur ddei neixvi teixl lei hher dae lol, ajjix teixl lei hher dae lol.  
Halcar Yoxrtaexl su mel zzirdae a, middur ddei woxrke mel neixvi zza.

- <sup>7</sup> Alddur maelmaerjjia lei ggapu nia!  
 Hherdder halcar tortor zza dae alddur mel ggapu nia!  
 Bbobbolbbo zza zzirmar ddei mel ddir lei du a.
- <sup>8</sup> Bbobbolbbo zza zzirmar ddei arseir a neil?  
 Hherdder cirza-hanga lei  
 yarzi ddo yarzi sexr Yihexrhuaxr ddei nga a.  
 Zaxlddaexr a, yarzi ddaexr sexr Yihexrhuaxr ddei nga a.
- <sup>9</sup> Alddur maelmaerjjia ggapu nia!  
 Hherdder halcar tortor zza dae alddur mel ggapu nia!  
 Bbobbolbbo zza zzirmar ddei ddir lei du a.
- <sup>10</sup> Bbobbolbbo zza zzirmar ddei arseir neil?  
 Bbobbolbbo zza zzirmar ddei mel,  
 hherdder meixr hazza leil guaxr dae  
 Yihexrhuaxr ddei nga a!

Arbosobo Leil Qiuxr A, Hier Dae Lol Nei Guaxr Dae Lol

Daxlweixl vaexr sipi.

- 25** <sup>1</sup> Yihexrhuaxr, ngo nixmox zzar ni dax ddar biar.  
<sup>2</sup> Ngo ddei Arbosobo, ngo ni leil koxl.  
 Ni leil qiuxr, ngo leil tor seixl-nr-da lol,  
 ngo leil dir su mel leil ngo leil tor vae-nr-ssi lol.
- <sup>3</sup> Ha ni leil xia su mel dder seixlda nr var;  
 nrbba-nrbba yarzi gexrddo bei su mel larnai seixlda nia.
- <sup>4</sup> Yihexrhuaxr, ni leil qiuxr,  
 ni ddei ddar mel ngo leil saexl lol la,  
 ni ddei jjiimo zex ngo leil mul gger la.
- <sup>5</sup> Ni leil qiuxr,  
 ni ddei ddar mel ngo leil hier dae lol,  
 ngo leil mul gger lol;  
 ni mel ngo leil jiuxl su Arbosobo a;  
 ngo merxixl-merni lei ni leil xia dae.

- <sup>6</sup> Yihexrhuaxr, ni leil qiuxr,  
ni ca leil zoxlnixr nei ca leil perniar mel leil holcir dae,  
ni mel halleix tortor dder eine a.
- <sup>7</sup> Ni leil qiuxr,  
ngo ye tor seir zuixl bei goxr nei ngo bei cox goxr mel leil tor  
hol-nr-cir dae.  
Yihexrhuaxr, ni leil qiuxr,  
ni, ni ca leil seirseir meixl gger mel dax nei,  
ni ca leil perniar mel dax zox dae a, ngo leil holcir dae.
- <sup>8</sup> Yihexrhuaxr mel seir, bbaehhex,  
yel yar zuixl bei su ca mel leil jjiumo hoxrhoxr mel mul gger.
- <sup>9</sup> Yar bbaehhexhexmo,  
nr col su ca mel leil jjiumo hier,  
yar ddei ddar mel yaa leil mul gger.
- <sup>10</sup> Yihexrhuaxr leil mel koxlsseiddo,  
ha yar bbeix har zaxr dae mel dax bei mae su nei,  
yar dixl har dae lixfaxr mel leil noni su ca mel,  
yar dder yaa leil perniar doxr.
- <sup>11</sup> Yihexrhuaxr, ngo ddei zuixl mel yarzi neixl,  
yel ni leil qiuxr, ni mi ddei leil weixr a,  
ngo leil ssoxrsuxl la.
- <sup>12</sup> Arseir Yihexrhuaxr leil gexr yar leil i du mel,  
Yihexrhuaxr dder yar ssi labox jjiumo zex yar leil mul gger.
- <sup>13</sup> Yar leil zzasoso a nixixl goxr lol,  
yar giedae ca mel yar ddei mi mel li wo ddo.
- <sup>14</sup> Yihexrhuaxr mel yar leil gexr yar leil i du su ca mel dax naer,  
yar bbeix har zaxr dae mel yaa leil saexl lol.
- <sup>15</sup> Yihexrhuaxr mel ngo qihher zze leil bel gga gga xixl lei,  
yel ngo arddolcar lei yar leil i dae a, yar leil koxl.
- <sup>16</sup> Yihexrhuaxr,  
ngo gudidimo yarzi goxr sol,

- yel ni leil qiuxr,  
ngo dax za xixl lei a, ngo leil zoxlnixr la.
- <sup>17</sup> Ngo nixmox zzar cix ddu yarzi miur,  
ni leil qiuxr,  
ngo leil ngo goxrsol-goxrnaxr pex dae mel gga jiuxl teixl la.
- <sup>18</sup> Ngo goxrsol-goxrnaxr goxr dae a ngo leil zoxlnixr la;  
ngo ddei zuixl maelmaerjjia leil ssoxrsuxl la.
- <sup>19</sup> Ni ngo leil dir su mel leil arleixr i,  
yaa mel ca yarzi miur,  
yaa ngo leil yarzisael vuxryixr.
- <sup>20</sup> Ngo leil guaxr dae a, ngo leil jiuxl la!  
Ngo ni leil koxl, yel ngo leil tor seixl-nr-da lol.
- <sup>21</sup> Ngo mel ni leil xia dae,  
yel ni seirseirmo nei bbaehhexhhexmo hal mel,  
ngo leil guaxr dae lol la.
- <sup>22</sup> Arbosobo, ni Yirsaexllixl su ca mel leil,  
yaa ddei cirza-hanga cix ddu mel gga jiuxl teixl la.

Nixmox Seir Su Arbosobo Dax Ddar Biar

Daxlweixl vaexr sipi.

- 26** <sup>1</sup> Yihexrhuaxr, ngo mel arddolcar lei seirseir mel bei,  
ni leil koxl gaxzi;  
yel ni leil qiuxr,  
ngo zuixl nr zza bbeix gger la.
- <sup>2</sup> Yihexrhuaxr, ni ngo nr seir bei bei dae bbe i,  
ngo leil sixr i;  
ngo nixmox taex leil nei ngo xiar dae mel leil,  
arsaesael nga bbe zabbar-seilseir a i.
- <sup>3</sup> Ni ca leil perniar mel,  
ngo arddolcar lei holcir dae;  
ngo lei ni ddei ddarzi mel dax zox dae a bei.

- <sup>4</sup> Ngo mel ddarzi nr te su ca mel dax cirgo a nr cux,  
ca fur su ca mel dax cirgo a nr hher.
- <sup>5</sup> Nixmox neix su ca mel cirgo a hher dae a ngo vuxryixr,  
ngo arsaе bei lei yarzi gexrddo bei su ca mel dax cirgo a nr cux.
- <sup>6</sup> Yihexrhuaxr, ngo leixrhher cir a,  
ca mel leil ngo zuixl nr zza saexl lol,  
halae ni leil zi ggіe ddei leil zaza-lili ssi a,  
ni leil bbeixzae gger;
- <sup>7</sup> ngo caxlgo caxl a ni leil nawo,  
halae ni murgurgurmo bei dae mel leil biar.
- <sup>8</sup> Yihexrhuaxr,  
ngo ni hher ggіe, hherdder ni leil zi ggіe xi ddei leil nolnger,  
ni leil zi ggіe ddei mel dder ni bbobbolbbo hher ggіe ddei nga a.
- <sup>9</sup> Ni ngo leil zuixl zza su ca mel dax cirgo a tor nr mier lol,  
ngo leil ca seixl su mel dax cirgo a tor bei zil nr gger.
- <sup>10</sup> Yaa leixrga gga mel yarzi gexrddo, yarzi nr seir hal mel bei,  
yaa mel si yaa leil zzirbae ho dae mel li.
- <sup>11</sup> Nael ngo mel seirseir mel lar bei,  
ni leil qiuxr,  
ngo leil jiuxl la,  
ngo leil zoxlnixr la.
- <sup>12</sup> Ngo bbaelerler ggіe ngier dae a,  
ca mel gga ni leil bbeixzae gger nia.

Yihexrhuaxr Dax Ddar Biar A, Yar Leil Bbeixzae Gger

Daxlweixl vaexr sipi.

**27** <sup>1</sup> Yihexrhuaxr mel ngo leil bbele lol su ddei nga a;  
ngo leil jiuxl su ddei nga a;  
ngo halae arseir leil gexr ssa bbeixleir?  
Yihexrhuaxr mel ngo ddei olga ddei leil guaxr su ddei nga a;  
ngo halae arseir leil gexr ssa bbeixleir?



- <sup>2</sup> Yarzi gexrddo bei su mel hherdder ngo leil dir su mel,  
yaa ngo leil bei zil gger lei niazzir dae car,  
yaa leil dder baxlguirle a.
- <sup>3</sup> Meixr mel ngo leil zaza-lili su dae a ngo leil dir bbeixarnar a,  
ngo nixmox zzar halae nr gexr;  
yaa ngo dax zaxlddaexr lei bbeixarnar,  
ngo halae Arbosobo leil ddarzzi yar leil koxl.
- <sup>4</sup> Halleix ngo Yihexrhuaxr leil qiuxr goxr a;  
ngo halae qiuxr nia, hherdder cirse-cirsil lei ngo leil  
Yihexrhuaxr ddei xi gga hher dae lol,  
yar ddei seirseir mel leil i dae,  
yar ddei xi gga yar leil qiuxr.
- <sup>5</sup> Ngo cirza-hanga nr seir pex dae car,  
yar mia nr ddo ggie ngo leil guaxr dae;  
yar ngo leil yar ddei Sexlmuxl gga pahher dae lol,  
ngo leil legelbbe taex leil hherdder arseir lei ngo leil ke lei nr  
cexr ggie hher dae lol.
- <sup>6</sup> Eilcar ngo oldde taex bil du lei cexr,  
bir ngo leil dir su mel leil lei mu leixl;  
ngo yar ddei Sexlmuxl gga ggegge-sese a yar leil zi nia,  
ngo caxlgo caxl a Yihexrhuaxr leil caxl zae gger nia.
- <sup>7</sup> Yihexrhuaxr,  
ngo ni leil ae a ni leil qiuxr dae car,  
ngo leil noni la;  
ngo leil zoxlnixr la;  
ngo leil ddarkoxl la.
- <sup>8</sup> Ni bbeix: “Nia ngo leil zo nia,” eine bbeix.  
Halcar malmal ngo nixmox zzar ni dax bbeix:  
“Yihexrhuaxr, ngo hherdder ni leil zo nia,” eine bbeix.
- <sup>9</sup> Ni ngo leil tor pa-nr-hher;  
ni seifu faex a, ngo leil tor ggaxr pixl nr gger,

ni mel arddolcar lei ngo leil beijjiu.

Ngo leil jiuxl su Arbosobo,  
ngo leil tor piar pixl nr gger,  
halae ngo leil nr li tor nr bei.

<sup>10</sup> Ngabbor ngama ngo leil nr li a lei,  
Yihexrhuaxr mel ngo leil yar dax hher dae lol var.

<sup>11</sup> Yihexrhuaxr, ni leil qiuxr,  
ni ddei ddar mel ngo leil mul gger a,  
ngo leil arsae nixixl goxr nia saexl lol;  
ngo leil vuxryixr su mel ngo leil dir,  
yel ni ngo leil hier dae a,  
jjiumo bbaelerler ggie ssi lol.

<sup>12</sup> Ca goxl ggie ddar jiar te su mel nei ddar yarzi gexrddo te su ca  
mel ngo leil dir lei,  
yel ni leil qiuxr, ngo leil ngo leil dir su ca mel leil tor jia nr gger,  
yaa leil arsae bei niazzir arsae tor nr bei lol.

<sup>13</sup> Ngo gol dae seir car,  
Yihexrhuaxr ca leil seir lol var ddar-nr-zzi arddeirnga a,  
ngo zi taex lei gexr bbeixr ho a.

<sup>14</sup> Yihexrhuaxr leil xia dae nia!  
Nixmox vaer nia!  
Ni nixmox taex leil vever a nga lol nia!  
Ngo zeixleixr bbeix: Yihexrhuaxr leil xia dae nia!

Seirpor Leil Qiuxr A, Beijjiu Lol

Daxlweixl vaexr sipi.

**28** <sup>1</sup> Yihexrhuaxr, ngo ni leil qiuxr nia;  
ngo ddei legelbbe, ngo leil guaxr su,  
ngo leil ddar nr koxl tor nr bei;  
ni ngo leil ddar nr koxl arddeirnga a,  
ngo dder si niazzir dae ca mel dax ciryoxr a nga.

- <sup>2</sup> Ngo ni leil qiuxr a leixrhher zze ni ddei xi giex dax bil du lei car,  
ngo ni leil qiuxr dae mel leil noni gger la.
- <sup>3</sup> Ngo leil nixmox neix su nei yarzi gexrddo bei su ca mel dax  
cirter a tor bei zil nr gger;  
yaa mel yaa dax goxr naer dae ca mel dax ddar toltor a te,  
nael nixmox zzar zzael nr seir mel xiar ji dae.
- <sup>4</sup> Ni yaa bei dae mel dax zox dae,  
yaa yarzi gexrddo bei dae mel dax zox dae a,  
yaa leil bei koxl xixl.  
Ni yaa leixrhher gga bei dae mel dax zox dae a,  
yaa leil bei koxl xixl,  
yaa leil bei koxl xixl mibbe mel yaa leil bei koxl xixl.
- <sup>5</sup> Yaa mel Yihexrhuaxr bei dae mel leil nei yar leixrhher zze bei  
dae mel leil i zeil,  
yel Yihexrhuaxr yaa leil bei zil gger nia,  
cirse-cirsil lei mier lol nia.
- <sup>6</sup> Yihexrhuaxr mel ngo yar leil qiuxr dae mel leil noni a,  
yel yar leil bbeixzae gger nia.
- <sup>7</sup> Yihexrhuaxr mel ngo leil worni lol su ddei nga a;  
ngo leil dir su mel leil bbiur gex gger su ddei nga a; ngo nixmox  
zzar yar leil koxl a, yar dder ngo leil beijjiu a;  
yel ngo nixmox zzar ggese, ngo caxlgo caxl a yar leil bbeixzae  
gger nia.
- <sup>8</sup> Yihexrhuaxr mel yar ddei cassor-worssor mel leil worni lol su  
ddei nga a;  
yoxl yar tiur teixl lei zzirmar ddei leil guaxr su nei jiuxl su ddei  
nga a.
- <sup>9</sup> Yihexrhuaxr, ni leil qiuxr,  
ni ddei cassor-worssor mel leil jiuxl,  
yaa leil seir lol;  
ni yaloxlmo sael a yaa leil guaxr dae,  
cirse-cirsil zzeze ci.

## Arbosobo Bbobolbbo, Yarzi Quexrlixl Zza

Daxlweixl vaexr sipi.

- 29**<sup>1</sup> Yihexrhuaxr mel bbobolbbo zza,  
 yar ddoddo mo bei;  
 yel Arbosobo ddei ssor mel,  
<sup>o</sup> nia yar leil bbeixzae gger nia.
- <sup>2</sup> Yihexrhuaxr ddei mi ddei leil middux lol mibbe mel,  
 yar leil middux lol nia;  
 Yihexrhuaxr mel seirceix-seirmaer,  
 yar bbobolbbo zza, yel nia yar leil bbeixzae gger nia.
- <sup>3</sup> Yihexrhuaxr ddei qiurte ddei ajjix teixl leil me dae;  
 bbobolbbo zza Arbosobo almer er,  
 Yihexrhuaxr mel neixvi teixl leil almer er.
- <sup>4</sup> Yihexrhuaxr ddei qiurte ddei mel yarzi ddo;  
 Yihexrhuaxr ddei qiurte ddei mel bir zzirmar leil quexrlixl zza,  
 arseir lei i du.
- <sup>5</sup> Yihexrhuaxr ddei qiurte ddei mel,  
 Xiabaexr zzei mel leil lei zex bbaer gger;  
 Yihexrhuaxr mel,  
 Lixrbanexl mermi Xiabaexr zzei mel leil zex me gger.
- <sup>6</sup> Yar lei Lixrbanexl mermi worga mel leil niurssor sael a tiuxl dae  
 lol,  
 Lixrbanexl mermi nei Hiemexr worga mel leil niurssor yaryir  
 mel sael a tiuxl dae lol.
- <sup>7</sup> Yihexrhuaxr ddei qiurte ddei adoxlle mel leil almer bbiexr sael  
 a nga lol.

---

<sup>o</sup>29:1 Arbosobo ddei ssor mel zoxlzoxl a mel merlabbor gie mel leil bbeix. Eilmaex gga nael tisir leil bbeix.

<sup>8</sup> Yihexrhuaxr ddei qiurte ddei mipaerbbae mel leil le du lei lol;  
Yihexrhuaxr mel Jiadirsi mermi mipaerbbae mel leil le du lei lol.

<sup>9</sup> Yihexrhuaxr ddei qiurte ddei mel,  
sixzzei vaervaer mel leil sixl zeigger a, yarpeixl mel leil bbae  
jjia lol;  
ha yar leil ziggie xi gga hher dae ca mel dder yar yarzi middux  
bei dae mel leil biar.

<sup>10</sup> Worpe-vilax car,  
Yihexrhuaxr cux dae a zzirmar bei dae;  
Yihexrhuaxr mel cirse-cirsil leil cux dae a zzirmar bei dae.

<sup>11</sup> Yihexrhuaxr mel,  
yar ddei cassor-worssor mel leil worni lol;  
Yihexrhuaxr mel,  
yar ddei cassor-worssor mel leil seir lol a,  
zzasoso a nga lol.

Arbosobo Dax Ddar Biar A, Yar Leil Nawo

Daxlweixl Arbosobo ddei si zzir, Arbosobo leil  
gger car a, sipi eil zul vaexr.

**30** <sup>1</sup> Yihexrhuaxr, halleix ni ngo leil jiuxl a,  
ngo leil dir su ca mel ngo dax nr kuar lol,  
yel ngo ni leil i du nia.

<sup>2</sup> Yihexrhuaxr ngo ddei Arbosobo,  
halleix ngo ni leil qiuxr a, ni ngo leil no ggukor gger a.

<sup>3</sup> Yihexrhuaxr, halleix ni ngo ddei xiu ddei leil,  
Yiji gga jiuxl deix xixl lei a, ngo leil gol dae lol;  
ngo leil ca si ho mel hher ggie nr zeigger lol.

<sup>4</sup> Yihexrhuaxr kebal ca mel dax bbe teixl lei cassor-worssor mel,  
nia yar leil caxl zae gger nia!

- Yar mel seirceix-seirmaer a holcir dae nia,  
yar leil bbeixzae gger nia.
- <sup>5</sup> Yar sirzzi a mel cirleixr a nga,  
nael yar ca leil seirseir meixl gger dae mel mel cirse-cirsil a.  
Eilmerxixl nge doxr dae bbeixarnar,  
eilneixrnehe dder ggese du lei a.
- <sup>6</sup> Ngo leil bbeix ci a mel,  
ngo azo bei lei azo seir a, ngo dder bbeix:  
“Ngo bei nr cexr lei ar yoxr nr zza.”□
- <sup>7</sup> Yihexrhuaxr,  
halleix ni ngo leil seirseir meixl gger dae mel,  
ngo leil worga sael a vever a nga lol;  
ni qiaxrmeix ddei ngo leil mal nr gger car,  
ngo dder gexr zildu a.
- <sup>8</sup> Yihexrhuaxr, halleix ngo ni leil qiuxr.  
Ngo Yihexrhuaxr leil qiuxr a bbeix:
- <sup>9</sup> “Ngo leil bei zil gger a,  
ngo ca si ho mel hher ggie ze i arddeirnga a,  
azo seirggiebbær zza bbeixleir?  
Nilhar mel ni leil bbeixzae gger a,  
ni yarzi ddarzziddo bei dae mel leil biar var a ngo?”□
- <sup>10</sup> Yihexrhuaxr, ngo qiuxr dae mel leil noni gger la,  
ngo leil zoxlnixr la;  
Yihexrhuaxr ngo leil beijjiu la.”□
- <sup>11</sup> Ni mel ngo ddei nge ddu mel leil tiuxl ddu loxr lol ho a;  
ni ngo cix a zzir pia veixr dae mel lixr pixl gger a,  
ngo leil ggeseddu mel veixr gex gger,
- <sup>12</sup> yel ngo ddei xiu ddei leil,  
cirleixr nr nor ni leil caxl zae gger lol,  
Yihexrhuaxr ngo ddei Arbosobo,  
ngo cirse-cirsil lei ni leil nawo nia.

Arbosobo Leil Ddarzzi A, Yar Dax Ddar Biar

Daxlweixl vaexr sipi. Caxlgo caxl su  
mel leil guaxr su ddei leil jia gger.

- 31** <sup>1</sup> Yihexrhuaxr, ngo ni leil koxl,  
ngo ni leil qiuxr,  
arddolcar lei ngo leil tor seixl-nr-da lol,  
ni seirseirmo bei dae mel dax zox dae a ngo leil jiuxl la.
- <sup>2</sup> Ni leil qiuxr,  
ngo ni leil qiuxr dae mel leil noni,  
nialngasael ngo leil jiuxl la,  
ngo koxl ggie legelbbe nei ngo leil jiuxl su ddei bei a ngo leil  
guaxr dae.
- <sup>3</sup> Ni mel ngo ddei legelbbe,  
ngo ddei pahher ggie;  
yel ni leil qiuxr,  
ni mi ddei leil weix a,  
ngo leil hier dae,  
ngo leil mul gger.
- <sup>4</sup> Ni mel ngo ddei koxl ggie a;  
yel ni leil qiuxr,  
ca mel ngo leil xiaxl dae bel mel gga ngo leil jiuxl teixl la.
- <sup>5</sup> Ngo, ngo ddei xiu ddei ni leixrga gga jia ji gger.  
Yihexrhuaxr ngo ddei Arbosobo,  
ni mel yarzi ddarzziddo,  
ni ngo leil olga jiuxl.
- <sup>6</sup> Ngo bbex leil zi su ca mel leil vuxryixr;  
ngo nael, Yihexrhuaxr leil koxl.
- <sup>7</sup> Yihexrhuaxr,  
ni mel ngo goxr sol dae mel leil mia,

ngo nixmox zzar zzasol dae mel leil saexl,  
yel ni ngo leil perniar a, ngo yarzi ggese nia.

<sup>8</sup> Ni mel zeixleixr lei ngo leil,  
ngo leil dir su ca mel leixrga gga jia ji gger nr goxr,  
ni ngo leil middei kuax ggie<sup>P</sup> hher dae lol.

<sup>9</sup> Yihexrhuaxr, ni leil qiuxr,  
ngo leil zoxlnixr la,  
ngo mel goxr sol zildu a.  
Ngo meixddur lei cix meixgguir,  
ggecir nei nixmox lei zzasol zildu a.

<sup>10</sup> Ngo olga ddei lei cix holpixl jjia a;  
ngo cix a olga lei niul a;  
ngo ddei zuixl mel ngo leil wor-nr-ni lol a;  
ngo ddei hherggar mel lei hie zzu a.

<sup>11</sup> Ngo leil dir su maelmaerjjia ngo leil bei vuxryixr,  
ngo dax goxr naer dae su mel gielgiel bei vuxryixr;  
ngo leil saexl su ca mel ngo leil gexr,  
zalbbaer hher dae a ngo leil mia su mel lei ngo leil pahher.

<sup>12</sup> Ngo leil holcir su nr zza,  
ngo ca si ho mel sael a nga;  
ngo zzaegu meme-laxllaxl mel sael a nga.

<sup>13</sup> Ca cirke a, ngo leil nrbbba-nrbbba biar dae a, ngo bbejjiur a;  
zaza-lili lei yarzi gexrddo;  
yaa cirgo a zzubbe dae a, ngo leil dir lei car,  
ngo leil bei zil gger niazzir.

<sup>14</sup> Nael Yihexrhuaxr, ngo halae ni leil koxl.  
Ngo bbeix: “Ni mel ngo ddei Arbosobo a.” □

<sup>15</sup> Ngo ca mu cir se lei ni leixrga gga hher ji dae.  
Ni leil qiuxr, ngo leil dir su mel leixrga gga nei ngo leil bixr su  
mel dax ngo leil jiuxl teixl la.

---

<sup>P</sup>31:8 middei kuax ggie ddei yilsi mel yar leil dir su nr zza, yar leil ke su nr zza  
ggie halmaex nga a.



- <sup>16</sup> Ngo mel ni leil miar bei gger su a;  
ni leil qiuxr, ni qiaxrmeix ddei ngo leil mal gger la,  
ni ca leil perniar mel dax zox dae a,  
ngo leil jiuxl la.
- <sup>17</sup> Yihexrhuaxr,  
halleix ngo ni leil ae dae a ni leil qiuxr,  
yel ni ngo leil tor seixl-nr-da lol;  
yarzi gexrddo bei su ca mel leil seixlda lol nia,  
yaa leil arjjiuljjiu a yiji gga hher dae lol nia.
- <sup>18</sup> Ca fur su mel yarzi col,  
yarzi olvaer, yaa ddar vaer te a nixmox seir su ca mel leil dir,  
yaa leil ddar te nr var lol nia.
- <sup>19</sup> Ni leil gexr ni leil i du su, ni leil koxl su ca mel,  
ni yaa leil zaxr gger dae mel yarzi seir,  
ni ca mel meixsaer qir leil yaa leil seirseir meixl gger dae mel  
yarzi miur.
- <sup>20</sup> Ni yaa leil ni meixsaer qir leil mia nr ddo ggie pahher dae lol,  
nr nga a ca mel yaa leil ke var;  
ni arjjiuljjiu a yaa leil guaxr dae a,  
ni yaa leil bei har zaxr gger ggie halmaex hher dae lol,  
nr nga a ca mel yaa leil hie no var.
- <sup>21</sup> Ca mel ngo leil zzi gga weixr gex ji dae car,  
Yihexrhuaxr ngo leil einezeixl perniar ngo leil saexl lol,  
yel yar leil bbeixzae gger mibbe.
- <sup>22</sup> Ngo leil bbeix ci a mel,  
halleix ngo yarzi gexr car bbeix:  
“Ngo ni dax bbe kae ho a.” □eine bbeix.  
Nael ngo ni leil qiuxr car, ni halae ngo qiuxr dae mel leil noni.
- <sup>23</sup> Yihexrhuaxr kebal ca mel dax bbe teixl lei cassor-worssor mel,  
nia Yihexrhuaxr leil perniar nia!  
Yihexrhuaxr mel ddarzziddo ca hal mel leil guaxr dae,

nael yar col su ca mel leil larhorhormo bei koxl xixl.  
<sup>24</sup> Ha Yihexrhuaxr leil koxl su ca mel,  
 nia nixmox vaer nia,  
 nixmox zzar velver a yar leil koxl nia!

### Zuixl Cexrssexl Nei Ssoxrsuxl

Daxlweixl vaexr ca leil mul gger dae sipi.

**32** <sup>1</sup> Yar bei cox goxr mel leil ssoxrsuxl ho,  
 zuixl bei dae mel leil bei pixl gger ho ca eil ddei mel  
 Arbosobo yar leil seir lol.

<sup>2</sup> Ha nixmox zzar ca leil nr fur,  
 Yihexrhuaxr yar leil zuixl zza i mal nr gger,  
 ca eil ddei mel Arbosobo yar leil seir lol.

<sup>3</sup> Ngo meir ddei mix gex dae a,  
 ngo ddei zuixl mel cexr-nr-ssexl car,  
 ngo mel cirni-lorbba lei worgge a, hherggar lei hie zzu a.

<sup>4</sup> Merxixl-merni lei,  
 ni leixrhher ddei lirbebemo ngo leil nixl gex dae;  
 ngo cixlmaexr-wormaexr lei nr ni a;  
 hherdder gielco zi cirmaex-hanga lei lexl hie jjia sael a nga a.

<sup>5</sup> Ngo ni dax ngo ddei zuixl mel cexrssexl,  
 ngo yarzi gexrddo bei goxr mel ker-nr-zi.  
 Ngo bbeix: “Ngo Yihexrhuaxr dax ngo bei cox goxr mel  
 cexrssexl.”

□ Ni dder ngo ddei zuixl maelmaerjjia ssoxrsuxl.

<sup>6</sup> Yel ha zabbar-seilseir a ni dax bei mae su ca mel,  
 ni leil zo wo ddo car leil jiux dae a, ni dax ddar biar nia;  
 cirmaex-hanga lei vi mil car dder arsae bei lei yar leil mil dae  
 nr var.

- <sup>7</sup> Ni mel ngo pahher ggie;  
ni arsae bei lei ngo leil goxrsol-goxrnaxr mel gga jiuxl teixl lei;  
ni ngo leil jiuxl a, ngo zaza-lili hher dae ca mel dder  
worcixl-worni caxlgo caxl.
- <sup>8</sup> Yihexrhuaxr bbeix: “Ngo ni leil mul gger nia,  
ni ssi labox jjiumo mel ni leil bbeix gger nia;  
ngo meixddur zze ni leil i dae a, ni leil quex nia.
- <sup>9</sup> Ni mel azo lei nr saexl lozi nei mur mel sael a nga nr ddo,  
yaa leil mel loxrde nei bbordu toxl gex dae nia,  
nr nga a dder guaxr wor nr ddo.
- <sup>10</sup> Nixmox neix su ca mel cirke goxr sol nia;  
Yihexrhuaxr leil koxl su ca mel larnei,  
Yihexrhuaxr yaa zaza-lili hher dae a,  
yaa leil perniar.
- <sup>11</sup> Nia nixmox seir su ca mel Yihexrhuaxr leil koxl dae a,  
ggegge-sese a nga nia,  
nia bota ddu nr zza su ca mel lei ggese a ae du lei nia.

Caxlgo Caxl, Bbeixzae Gger

- 33** <sup>1</sup> Nixmox seir su ca mel,  
nia Yihexrhuaxr leil koxl dae a ggese nia;  
bota ddu nr zza su ca mel yar leil bbeixzae gger dae mel hoxr.
- <sup>2</sup> Nia caxlgo bbaex labox ddei bbaex dae a, Yihexrhuaxr leil nawo  
nia;  
yoxrcixl peix labox ddei sser a yar leil caxl zae gger nia.
- <sup>3</sup> Yar leil caxlgo yarsixl caxl gger nia,  
noni zaezae a bbaex nia,  
worcixl-worni caxl nia.
- <sup>4</sup> Yihexrhuaxr ddar bbeix dae mel mel hoxr gaxzi,  
yar bei dae maelmaerjjia koxlsseiddo.

- <sup>5</sup> Yihexrhuaxr mel seirseir bei dae mel nei bbaehhexhhex bei dae mel nolnger;  
yar middurbbor maelmaerjjia leil perniar.
- <sup>6</sup> Merlabbor maelmaerjjia Yihexrhuaxr miardal a coxl teixl lei;  
merni, xiubbo, gie lei yar ddei ddar sser a coxl teixl lei.
- <sup>7</sup> Yar neixvi gga ajjix mel leil cirgo a hher dae lol,  
hherdder ca mel zzaegu mel cirgo a zzaegu dol ggie dol dae sael a nga.
- <sup>8-9</sup> Yihexrhuaxr bbeix, zza bbeix a mel dder zza;  
Yihexrhuaxr miardal a ddux lei bbeix a mel dder ddux lei;  
yel middurbbor maelmaerjjia lei Yihexrhuaxr leil gexr yar leil i du lol nia,  
middurbbor hher dae ca maelmaerjjia lei yar leil gexr lol nia.
- <sup>10</sup> Yihexrhuaxr mel, cirgoxr-hanga ca mel bei niazzir dae mel bei nr cexr lol,  
cassor-worssor mel xiar dae mel bei nr cexr lol.
- <sup>11</sup> Yihexrhuaxr bei niazzir dae mel cirse-cirsil lei gierbox nixixl nr zza;  
Yar nixmox zzar xiar dae mel arddol zeix dax ci a lei zza doxr dae var.
- <sup>12</sup> Yihexrhuaxr leil Arbosobo bei lol su goxrjia mel,  
Arbosobo dder seir lol!  
Yar tiur teixl lei a, yar ddei cassor-worssor bei lol ca hal mel,  
yar yaa leil seir lol!
- <sup>13</sup> Yihexrhuaxr merlabbor i dae a,  
yar middurbbor cassor-worssor maelmaerjjia leil mia dae.
- <sup>14</sup> Yar yar hher ggie xi gga i teixl lei a,  
middurbbor hher dae ca maelmaerjjia leil i dae.
- <sup>15</sup> Yar mel yaa cirddei-hanga nixmox taex leil coxl teixl lei su ddei nga a;  
yaa bei dae hazza leil saexl su ddei nga a.

<sup>16</sup> Zzirmar mel zaxlddaexr a meixr miur a lei, ddaexr leixl nr ddo;  
zzi deil sexrsexr ca mel warni a lei, armael leil jiuxl nr cexr.

<sup>17</sup> Mur leil koxl dae a, armael leil jiuxl lol niazzir ca mel baexr a  
koxl lalnga;  
mur mel warni a lei, ca leil jiuxl nr cexr.

<sup>18</sup> Yihexrhuaxr mel,  
yar leil gexr yar leil i du su ca nei yar leil xia dae a,  
yaa leil perniar lol niazzir su ca mel leil guaxr,

<sup>19</sup> yaa leil olga jiuxl a nr si lol,  
halae loxlmoxr zzor ddu nr zza car lei yaa leil gol dae lol.

<sup>20</sup> Ngua nixmox zzar arddolcar lei Yihexrhuaxr leil xia dae,  
yar mel ngua leil beijjiu su ddei nga a;  
ngua leil dir su mel leil bbiur gex gger su ddei nga a.

<sup>21</sup> Ngua nixmox zzar yar leil koxl dae a arsae bei lei ggese,  
ngua mel arddolcar lei yar seirceix-seirmaer mi ddei leil koxl.

<sup>22</sup> Yihexrhuaxr, ni leil qiuxr,  
ngua ni leil ddarzzi dae mel dax zox dae a,  
ngua leil perniar la.

Yihexrhuaxr Ddei Seirseir Mel Leil Bbeixzae Gger

Daxlweixl vaexr sipi

Daxlweixl Yalbirmirlexl meixsaer qir leil tae  
laexl a, yar leil ggaxr teixl gger a.

**34** <sup>1</sup> Ngo arddolcar lei Yihexrhuaxr ddei seirseir mel biar nia,  
ngo meir gga cirleixr nr nor yar leil bbeixzae gger nia.

<sup>2</sup> Ngo nixmox zzar Yihexrhuaxr leil kuar gger nia,  
goxrsol-goxrnaxr su ca mel leil bbejjiur lol nia, ggese lol nia.

<sup>3</sup> Nia ngo dax cirgo a Yihexrhuaxr mel vaer zzir ddei nga a bbeix  
nia,  
niul cirgo a yar ddei mi ddei leil i du nia.

- <sup>4</sup> Ngo Yihexrhuaxr leil qiuxr a, yar ngo leil ddarkoxl a;  
ngo leil ngo cirza-hanga gexr dae mel gga jiuxl teixl lei a.
- <sup>5</sup> Ha yar leil i su mel dder bbolbbo zza,  
yaa qiaxrmeix zzi nr zza nr var.
- <sup>6</sup> Ngo goxr sol su ca eil ddei Yihexrhuaxr leil ae dae a qiuxr a, yar  
dder noni a,  
ngo leil goxr sol dae maelmaerjgia gga jiuxl teixl lei a.
- <sup>7</sup> Yihexrhuaxr ddei tisir ddei yar leil gexr yar leil i du su ca mel  
dax zaza-lili hher dae a yaa leil jiuxl.
- <sup>8</sup> Nia Yihexrhuaxr arsaesael seir bbe arleixr i nia;  
ha yar dax pahher lei su ca mel dder ggese var!
- <sup>9</sup> Yihexrhuaxr leil gexr yar leil i du su ca mel sser loxr nr ddo lei  
ar yoxr nr zza,  
yel Arbosobo ddei cassor-worssor mel, nia yar leil gexr nia, yar  
leil i du nia.
- <sup>10</sup> Hhemar yarleixl mel lei zzorddu nr zza a meixr dae var,  
nael Yihexrhuaxr leil qiuxr su ca mel, seirseir mel nr zza lei ar  
yoxr nr zza.
- <sup>11</sup> Leixl su mel, nia ngo ddar biar ggie noni lei,  
ngo nia leil Yihexrhuaxr leil gexr yar leil i du mul gger nia.
- <sup>12</sup> Arseir gol dae ggese,  
olga si niazzir, goxr seir niazzir a mel,
- <sup>13</sup> yar dder yar lo ddei leil ddar nr seir hal mel te lol nr ddo,  
yar meir ddei leil ca fur lol nr ddo.
- <sup>14</sup> Nr seir hal mel bei nr ddo, seirseir bei nia,  
toltor a bei meixr nia.
- <sup>15</sup> Yihexrhuaxr ddei meixddur zze nixmox seir su ca mel leil i dae,  
yar ddei nolba zze yaa qiuxr dae mel leil noni.

- <sup>16</sup> Nael Yihexrhuaxr ddei qiaxrmeix ddei yarzi gexrddo bei su mel leil mal nr gger, yaa leil dir,  
yaa leil middurbbor mier lol a, holcir su nr zza lol.
- <sup>17</sup> Nixmox seir su ca mel Yihexrhuaxr leil ae dae a qiuxr a,  
yar bbejjiur a, yaa leil cirza-hanga goxrsol-goxrnaxr mel gga jiuxl teixl lei.
- <sup>18</sup> Yihexrhuaxr nixmox cix su ca mel dax naer;  
huixrsoxr su ca mel leil jiuxl.
- <sup>19</sup> Nixmox seir su ca mel cirke goxr sol var,  
nael Yihexrhuaxr yar leil cirza-hanga goxr sol dae mel gga jiuxl teixl lei,
- <sup>20</sup> yoxl yar cingge-circir hherggar mel leil guaxr dae a,  
cir ci lei bax ngaxl nr te lol.
- <sup>21</sup> Nixmox neix su ca mel, yaa nr seir bei dae mel yaa leil ke zil gger;  
nixmox seir su ca mel leil vuxryixr su hal mel leil mel zuixl dixl gger nia.
- <sup>22</sup> Yihexrhuaxr mel yar leil miar bei gger su mel leil vae xixl lei;  
ha yar dax pahher su ca mel leil dder zuixl dixl nr gger.

Arbosobo Leil Qiuxr A, Beijjiu Lol

Daxlweixl vaexr sipi.

- 35** <sup>1</sup> Yihexrhuaxr, ni leil qiuxr,  
ngo dax zex su ca mel, ni yaa dax zex;  
ngo dax zaxlddaexr su ca mel, ni yaa dax zaxlddaexr!
- <sup>2</sup> Ni leil qiuxr,  
zaxlddaexr ddu vaervaer yelye mel vei dae a,  
ngo leil beijjiu lei.
- <sup>3</sup> Ni ddei zzi deil labox darsisi baex bil du la a,  
ngo leil ggaxrmae lei su ca mel leil bbiur gex dae.  
Ni leil qiuxr, ngo ddei xiu ddei leil:

“Ngo mel ni leil jiuxl su ddei nga a,” □ eine bbeix.

<sup>4</sup> Ngo ddei olga li niazzir su mel leil seixlda lol nia!

Ngo leil ke niazzir su mel leil qiaxrmeix zzi nr zza a doxdoxsi  
jjixr lol nia!

<sup>5</sup> Yihexrhuaxr ddei tisir mel yaa leil ggaxrmae dae car,  
yaa leil paer mel sael a jia du si lol nia.

<sup>6</sup> Yihexrhuaxr ddei tisir mel yaa leil ggaxrmae dae car,  
yaa ddei jjiumo zex neix zzae neixmar, yoxl zzae yoxl nga lol  
nia.

<sup>7</sup> Yaa mel nrbba-nrbba ngo leil xiaxl;

yaa nrbba-nrbba bbeddur giexl a ngo leil ke zil gger niazzir.

<sup>8</sup> Goxrsolsol mel neixleixrsael yar leil ddeix lol nia;

yar si leil xiaxl dae mel yar armael leil xiaxl gex dae lol nia,  
yar leil eilmel gga de ji lol a goxr sol lol nia.

<sup>9</sup> Ngo Yihexrhuaxr leil koxl dae a, nixmox zzar ggese;  
yar ngo leil jiuxl a, ngo ggese.

<sup>10</sup> Ngo nixmox zzar bbeix: “Yihexrhuaxr, arseir ni zzi zza  
bbeixleir?

Ni mel goxr sol su ca mel leil bir yaa leil sexr su ca mel dax jiuxl  
teixl lei;

goxr naxr su ca nei azo lei nr zza su ca mel leil yaa dax su su  
ca mel dax jiuxl teixl lei,” eine bbeix nia.

<sup>11</sup> Yarzi gexrddo bei su mel casersu meixsaer qir leil ngo leil  
nga-nr-zi mel goxl,  
ngo leil ngo nr saexl mel biex.

<sup>12</sup> Ngo yaa leil seirseir bei dae lei,

yaa ngo leil yarzi gexrddo bei xixl a, ngo leil nixmox no lol .

<sup>13</sup> Ngo leil bbeix ci a mel,

yaa no car, ngo zzir pia veixr dae a yaa leil cix gger,



zzo lei nr zzor, olzzir dae a, yaa leil Arbosobo dax ddar biar gger.

<sup>14</sup> Ngo eine bei a mel,  
yaa ngo ddei gaxggor carbeix,  
ngo ddei arzzi-nimar sael a nga;  
ngo cix a olmer dae,  
hherdder ca mel yarma leil cix gger sael a nga.

<sup>15</sup> Ngo goxr sol dae car zzael,  
yaa cirgo a hher dae a yarzi ggese,  
ngo saexl lei saexl nr seix ca leil dir su hal mel lei cirgo a hher dae a ngo leil dir,  
yaa ngo leil zix xiaxr gger nrsulsul.

<sup>16</sup> Hherdder yarzi duxr ca mel pirdaexl dae ca ddei leil bbeix vuxryixr sael a nga;  
yaa ngo leil vuxryixr a, ser ddei lei giexrgiexlgiexr kexl gex dae.

<sup>17</sup> Seirpor, ni eilmel leil i dae a nr guaxr a arddolcar ci niazzir dae neil?

Ni leil qiuxr, ngo leil yaa leixrga gga jiuxl teixl la a,  
yaa leil ngo leil nr ke lol!

Ngo olga ddei leil hhemar sael a ca eil cir dax jiuxl teixl la!

<sup>18</sup> Yel ca mel cirgo a hher pex dae car, ni leil nawo nia;  
cassor-worssor mel dax ni leil bbeixzae gger nia.

<sup>19</sup> Ni leil qiuxr, nrbba-nrbba ngo leil dir su ca mel leil ngo dax tor nr kuar lol!

Nrbba nrbba ngo leil vuxryixr su ca mel leil ngo leil cirsixl-meixsixl tor nr bei lol!

<sup>20</sup> Yaa mel ddar toltor a hal mel nr te,  
doxgoxleixr ddar jiar te a,  
si dax toltor a bei su ca mel leil ke.

<sup>21</sup> Yaa cirngaxl-meirngaxl ngo leil dir a bbeix:

“Hax hax a; hax hax a; ngua meixddur zze malmal mia a.”

- 22 Yihexrhuaxr, ni mia ho a;  
ni leil qiuxr, arjjiuljjiu a tor nr hher dae!  
Seirpor, ni leil qiuxr, ngo dax vimirmirmo tor nr hher.
- 23 Ngo ddei Arbosobo, ngo ddei seirpor,  
ni ha du la a ngo leil ddar bbeix jjiu;  
nrbbba-nrbbba ngo leil goxl dae mel ser gger.
- 24 Yihexrhuaxr ngo ddei Arbosobo, ni leil qiuxr,  
ni ddei bbaehhexhhex mel dax zox dae a ngo leil ser a,  
ngo zuixl nr zza yaa leil saexl lol;  
yaa leil ngo dax tor nr kuar lol.
- 25 Yaa leil nixmox zzar “Hax hax, eil ddei mel dder ngua li niazzir  
dae ddei nga a!  
Ngua yar leil bei leixl gger a!” □ eine tor nr bbeix lol.
- 26 Ngo goxr sol a ggese su mel leil cirgo a yixrsixr nr zza lol nia,  
si xilwormeir lei ddux bei nr ddo lol nia;  
ngo dax yarzi olvaer bei su mel leil qiaxrmeix zzi nr zza lol nia,  
oldde lei bil du lei nr ddo lol nia.
- 27 Yihexrhuaxr ngo leil bbaehhexhhex a ser a,  
ngo zuixl nr zza ca mel leil saexl lol a,  
ggese su hal mel leil ggese a worcixl-worni ae du lei lol nia;  
yaa leil arddolcar lei “Yihexrhuaxr mel vaer zzir ddei nga a;  
Yar mel yar leil miar bei gger su ddei zzasoso a nga loxia!” eine  
bbeix lol nia.
- 28 Ngo lo ddei arddolcar lei ni bbaehhexhhexmo bei dae mel biar  
nia;  
arddolcar lei ni leil caxl zae gger nia.

Arbosobo Bota Ddu Nr Zza Ca Mel Leil Perniar Nei Guaxr Dae

Yihexrhuaxr leil miar bei gger su Daxlweixl vaexr sipi.  
caxlgo caxl su mel leil guaxr su ddei leil jia gger.

**36** <sup>1</sup>Yarzi gexrddo bei su ca mel nixmox zzar hher ji dae zuixl ddei

“Ngo Arbosobo leil nr gexr, yar leil i nr du,” □ eine bbeix.

<sup>2</sup>Yar kuar zzae kuarddo, ol zzae olvaer,  
yar zzirdae a yar yarzi gexrddo bei dae mel arseir lei saexl nr  
var, vuxryixr su nr zza.

<sup>3</sup>Yar meir gga bbeix teixl lei hazza mel dder zuixl yarzi neixl hal  
mel nei cafur-calel hal mel a nga,  
olnoldduddumo seirseir bei dae hal mel yar zeixleixr nr bei a.

<sup>4</sup>Yar yixrgguci leil yixr dae car, arsaе zuixl bei nia xiar;  
yar nr seir bei dae jjiumo zex leil ssi xiar har a;  
yarzi gexrddo bei dae hal mel leil vuxr-nr-yixr.

<sup>5</sup>Yihexrhuaxr, ni ca leil perniar dae mel mel merhhexr gga  
zzezze ddeix ci,  
ni yarzi ddarzziddo bei dae mel mel merlabbor zzezze ddeix ci.

<sup>6</sup>Ni bbaehhexhhexmo bei dae mel mel ni ddei worga darmumu  
mel sael a nga;  
ni serpaxl dae mel mel lagiex arsaе neixlneixl mel sael a nga.  
Yihexrhuaxr, ca lor zzeir lor lei ni guaxr dae.<sup>9</sup>

<sup>7</sup>Arbosobo, ni arsaе ca leil einezeixl perniar!  
Cassor-worssor mel lei ni ddoleixr woxrke pahher dae.

<sup>8</sup>Yaa mel ni ddei xi gga zzorci-ddami mel zzor a zzor bbox a;  
ni yaa leil ni ddei lazzarmo gga ajjix mel dda lol a, yaa leil  
ggese lol.

<sup>9</sup>Ni mel dder olga ddux lei ggie nga a;  
ni ddei bbolbbo mel ngua leil zoxl gex dae a,  
ngua dder bbelele mia ddo.

<sup>10</sup>Ni leil arddolcar lei ni leil saexl su ca mel leil perniar lol nia,

<sup>9</sup>36:6 Ni bbaehhexhhexmo bei dae mel mel worga darmumu mel sael a nga; ni serpaxl dae mel mel lagiex arsaе neixlneixl mel sael a nga. Yihexrhuaxr, ca lor zzeir lor lei ni guaxr dae. Yilsi mel dder bbaehhexhhex mel yarzisaе miur, yar serpaxl dae mel ca mel arseir lei xiar ci nr xie.

bei hoxr gaxzi su ca mel leil bbaehhexhhexmo bei lol nia.

<sup>11</sup> Ni col su ca mel leil ngo leil tor nr ci lol,  
yarzi gexrddo bei su ca mel leil ngo leil tor nr ggaxr pixl gger  
lol.

<sup>12</sup> Ni i ddo a! Yarzi gexrddo bei su ca mel de ze i ho a;  
yaa leil dder guirle gger a, zeixleixr lei ha du lei nr xie a.

Nixmox Seir Su Ca Nei Nixmox Neix Su Ca Mel Arsae Nga Var

Daxlweixl vaexr sipi.

**37** <sup>1</sup> Yarzi gexrddo bei su mel leil i dae a bbae-nr-hhex zzir nr  
ssa, nr seir bei su mel leil i dae a nixnox nr ssa. <sup>2</sup> Cirleixr  
dder yaa leil mel silbbar sael a caer pixl gger, yaa silbbar nibaex  
mel cirleixr dder hie zzu hal mel sael a nga.

<sup>3</sup> Ni Yihexrhuaxr leil koxl dae a seirseir bei nia; yar yarzi ddarzzi-  
ddo bei dae mel leil koxl dae a nixixl goxr nia. <sup>4</sup> Ni Yihexrhuaxr leil  
ni ddei ggeseddu bei lol nia, yar dder ni nixmox zzar qiuxr dae mel  
ni leil gger.

<sup>5</sup> Ni bei dae hazza Yihexrhuaxr leil jia gger nia; halae yar leil koxl  
nia, yar dder ni leil bei gger. <sup>6</sup> Yar ni bbaehhexhhex bei dae mel  
bbolbbo sael a zoxl teixl lei lol; ni seirseir bei dae mel eilnirrggu ddei  
merni sael a nga lol.

<sup>7</sup> Ni arjjiuljjiu a Yihexrhuaxr leil koxl nia, ssertexr zzazzamo yar  
leil xia dae nia; azo bei lei bei cexr su ca mel leil mia nei nr seir xiar  
su mel bei cexr ggie mia a bbae-nr-hhex zzir nr ssa.

<sup>8</sup> Sirzzi nr ddo; seifu faex nr ddo; bbae-nr-hhex zzir nr ddo; nr nga  
a, zuixl bei ssi leilei. <sup>9</sup> Yarzi gexrddo bei su mel leil mel bei zil gger  
nia; Yihexrhuaxr leil xia doxr su mel lar yaa hher ggie middei ddei  
li wo ddo.

<sup>10</sup> Hormo arleixr nr nga mel, yarzi gexrddo bei su mel leil dder mia  
nr ddo a; ni seirseir a yar hher goxr ggie i a lei, azo lei mia nr ddo a.

<sup>11</sup> Nael nr col su mel yaa hher ggie middei ddei li wo ddo; zzasoso  
a goxr seirseir mo goxr wo ddo.

<sup>12</sup> Yarzi gexrddo bei su mel ca seir mel leil ke niazzir, yoxl yar ser ddei lei giexrgiexlgiexr kexl gex dae. <sup>13</sup> Nael yar leil faxr nixixl ddei mel cirleixr dder ci du a; yel Seirpor yar leil vaessi.

<sup>14</sup> Yarzi gexrddo bei su mel jir baex ddaexr teixl lei niazzir dae a; altor baex lei die teixl lei ho a; yaa goxr naxr su ca nei azo lei nr zza su ca mel leil deil guirle gger niazzir, nixmox seir su ca mel leil seixl zil gger niazzir. <sup>15</sup> Nael yaa altor baex armael nixmox taex leil zzir gex dae nia; yaa jir ddaexr labox ddei ngaxl te gger nia.

<sup>16</sup> Ca seir mel cirdoxr a zza bbeixarnar, nael bir nixmox neix su mel cirza-hanga be leil lei seir leixl. <sup>17</sup> Nixmox neix su ca mel ddei leixrhherba ddei mel ngaxl te gger nia; nael Yihexrhuaxr mel ca seir mel leil beijjiu.

<sup>18</sup> Bota ddu nr zza ca mel nixixl goxr a, arsae goxr dae mel Yihexrhuaxr saexl; yaa li wo mel arddolcar ci a lei zza dae. <sup>19</sup> Yaa yarzi goxr sol pex dae car lei, seixlda nr var; loxlmoxr zzor ddu nr zza car lei, yaa zzor bbox ddo.

<sup>20</sup> Nael nixmox neix su ca mel leil mel bei zil gger nia; Yihexrhuaxr leil dir su mel vixlux mel veixsixl sael a nga nia, yaa alker mel sael a mier nia.

<sup>21</sup> Nixmox neix su ca mel zzirbae cir a lei koxl nr gger; nael ca seir mel mel si leil zoxlnixr, si leil meixl gger. <sup>22</sup> Yihexrhuaxr seir lol dae ca mel yaa hher ggie middei ddei li wo ddo, yar faxr dae ca mel leil mel ggaxr teixl gger nia.

<sup>23</sup> Yihexrhuaxr mel ca seir mel ssi dae jjiumo zex leil guaxr dae; yaa ssi dae jjiumo zex leil yar yarzi ggese. <sup>24</sup> Yihexrhuaxr leixrhher ddei yar leil zar gex dae a, yar yoxl guirle bbeixarnar a de zei gaxzi nr var.

<sup>25</sup> Halleix ngo ye tor cirdae a eilboxl camar loxr a lei, nixmox seir su ca mel leil piar pixl gger ggie mia nr seix, yar giedae ca mel zzo meixl lel ggie lei mia nr seix. <sup>26</sup> Yar arddolcar lei ca leil zoxlnixr, ca leil cir gger. Arbosobo lei yar giedae ca mel leil seir lol.

<sup>27</sup> Ni yarzi gexrddo hal mel bei nr ddo, seirseir bei nia. Yel dder arddolcar ci a lei ni hher ggie middei ddei gga hher zei si cexr. <sup>28</sup> Arbosobo mel bbaehhexhex mel leil ggese, yar ddei, yar kebal ca mel

dax bbe teixl lei cassor-worssor mel leil piar nr pixl, arddolcar ci a lei yaa leil guaxr doxr dae; nael nixmox neix su ca mel ddei giedae ca mel leil mel bei zil gger nia. <sup>29</sup> Nixmox seir su ca mel yaa hher ggie middei ddei guaxr wo ddo, arddolcar ci lei li wo ddo.

<sup>30</sup> Nixmox seir su ca mel, meir gga mel olnoldduddumo ddar hal mel biar; yar lo ddei mel, bbaehhexhhexmo ddar hal mel biar. <sup>31</sup> Arbosobo ddei lixfaxr mel yar nixmox zzar ji dae; yar qihher ddei yoxl de zei nr var.

<sup>32</sup> Nixmox neix su ca mel nixmox seir su ca mel leil ker i dae a, yar leil seixl zil gger niazzir. <sup>33</sup> Nael Yihexrhuaxr yar leil nixmox neix su ca mel leixrga gga jia ji gger nr var; yar leil serpaxl car lei, zuixl dixl nr gger.

<sup>34</sup> Ni Yihexrhuaxr leil xia dae nia, yar ddei ddar mel dax bei mae dae nia, yar dder ni leil i du a, ni leil ni hher dae middei ddei li wo lol; ni nixmox neix su ca mel leil bei zil gger ggie mia nia.

<sup>35</sup> Ngo nixmox neix su ca mel yarzi quexrlixl zza mia goxr, hherdder sixzzei nibaexbaex zzei middur gga ner ji dae sael a nga. <sup>36</sup> Nael ca mel halmaex ssi gel a, xiar lei xiar nr ci, yar leil nr mia a; ngo yar leil zo a lei zo nr wo a.

<sup>37</sup> Ca dax toltor a bei meixr su ca mel, arddolcar goxr seir var. Yel ni seirseir a nixmox seir gaxzi ca mel leil i dae nia, bota ddu nr zza ca mel leil i dae nia. <sup>38</sup> Nael zuixl bei su ca mel cirgo a si jjia nia; nixmox neix su ca mel leil bei zil gger nia.

<sup>39</sup> Nixmox seir su ca mel leil jiuxl wo a mel, Yihexrhuaxr yaa leil jiuxl a nga arddeir a; yaa goxr sol dae car, yar yaa ddei pahher ggie bei. <sup>40</sup> Yihexrhuaxr yaa leil beijjiu, yaa leil jiuxl; yaa yar leil koxl a, yar dder yaa leil nixmox neix su ca mel dax jiuxl teixl lei.

### GoxrSol Su Mel Arbosobo Dax Ddar Biar

Daxlweixl Yihexrhuaxr leil qiuxr a, yar leil holcir dae lol a vaexr sipi.

**38** <sup>1</sup> Yihexrhuaxr, ni leil qiuxr, ni sirzzi dae car ngo leil tor bo-nr-ta; seifu faex dae car, ngo leil tor nr faxr! <sup>2</sup> Ni ddei jir baex

ngo ggecir ddei leil ddaexr gex dae a; ni leixrhher bbor ngo leil nixl gex dae a.

<sup>3</sup> Ni ngo leil seifu faex a, ngo ddei hoxrneixr mel nr no lei ar maex nr zza a; ngo zuixl bei a, ngo ddei hherggar mel zza-nr-so. <sup>4</sup> Ngo ddei zuixl mel ngo oldde leil lei mu leixl a; hherdder daxr lirlir mel sael a nga, ngo bil lei bil du nr xie a.

<sup>5</sup> Ngo yarzi medeil hal mel bei a, yel ngo no ggie lei bbeirne a bbi ddux lei a. <sup>6</sup> Ngo no zildu a zzoxrbbeix lei no biax jjia a; ngo cirni-lorbba cix doxr. <sup>7</sup> Ngo cingge-circir lei taxl zildu a, hoxrneixr mel nr no lei ar maex nr zza a. <sup>8</sup> Ngo cixlmaexr-wormaexr lei ardoxr nr ni a; nr si dox a nga a; ngo nixmox zzar cix zzae cix, no zzae no, ngo arddolcar lei no lir ae dae.

<sup>9</sup> Seirpor, ngo nixmox zzar xiar dae mel ni saexl; ngo no lir ae dae a, ni bbejjiur a. <sup>10</sup> Ngo nixmox taex lei derdelder tiuxl dae; ngo wor lei nr ni, meixddur lei pu du lei nr ddo. <sup>11</sup> Ngo no dae car, ngo ddei gaxggor carbeix mel ngo leil nr guaxr, ngo ddei cirssor mel lei vimirmirmo ngier dae.

<sup>12</sup> Ngo leil bei zil gger niazzir su ca mel ngo leil xiaxl dae; ngo leil ke niazzir su ca mel ddar gexrddoddo mo te, yaa cirni-lorbba arsae ca leil fur nia xiar doxr. <sup>13</sup> Nael ngo nolbbar su mel sael a no-nr-ni, ddar te nr var su mel sael a ddar nr biar. <sup>14</sup> Ngo bbe-nr-jjiur su ca mel sael a nga, meir gga ddarkoxl ddu nr zza.

<sup>15</sup> Yihexrhuaxr, ngo mel ni leil koxl; Seirpor ngo ddei Arbosobo, ni arsae bei lei ngo leil ddarkoxl. <sup>16</sup> Halleix ngo bbeix: “Argaxl yaa ngo dax kuar lalnga; ngo de zei car, yaa ngo dax ddar vaer te.” □ eine bbeix.

<sup>17</sup> Ngo de zei nrsulsul, arddolcar lei goxr sol doxr. <sup>18</sup> Ngo, ngo ddei zuixl mel cexrssexl; ngo ddei zuixl mel leil weixr a cix. <sup>19</sup> Nael ngo leil vuxryixr su mel sexr zzae sexr, wor zzae worni; nrbba-nrbba ngo leil vuxryixr su mel miur du dax lei a. <sup>20</sup> Ngo mel seirseir bei a, yel seirseir bei su mel leil yarzi gexrddo bei koxl xixl su mel, ngo leil dir. <sup>21</sup> Yihexrhuaxr, ni leil qiuxr, ngo leil tor piar pixl nr gger! Ngo ddei Arbosobo, ni leil qiuxr, ngo dax vimirmirmo tor nr hher dae!

<sup>22</sup> Ngo leil jiuxl su Seirpor, ni leil qiuxr, nialngasael ngo leil beijjiu lei!

## Goxrsol Su Mel Zuixl Cexrssexl

Daxlweixl vaexr sipi. caxlgo caxl su mel  
leil guaxr su Yiduxlduixl leil jia gger.

**39** <sup>1</sup> Ngo bbeix goxr a bbeix: “Ngo azo bei lei fadae nia, ngo ddar bbeix a, zuixl nr bei lol; yarzi gexrddo bei su mel ngo meixsaer qir leil hher dae car, ngo meir ddei mix gex dae a ddar nr te lol. <sup>2</sup> Ngo arjjiuljjiu a hher dae, ddar seirseir mel lei nr biar a, ngo dder ho bei ho cix du lei a. <sup>3</sup> Ngo nixmox zzar zzilzzil-zzerzzermo. Ngo xiar dae car, seifu ddei zzerzzelzzer faex du lei a; ngo meir gga dder ddar te du lei a.

<sup>4</sup> Yihexrhuaxr, ni leil qiuxr, ngo olga ddei arsae sisi zza ngo leil saexl lol la! Ngo arddolcar si var? Arddolcar ngo maelele goxr ci ni ngo leil saexl lol la! <sup>5</sup> Ni ngo ddei nixixl ddei leixrkata leilei a nga lol. Ngo cir se ddei nixixl ddei lei ni meixsaer qir leil mel nr zza dae sael a nga. Ca mel ddei olga ddei mel dder seixl ar qir sael a nga. <sup>6</sup> Nixixl goxr a mel, avix sael a nga. Yaa jiur a lei baexr a jiur dae lalnga. Zzirbae zaxr dae mel lei arddolcar arseir li wo lei nr saexl.

<sup>7</sup> Seirpor, eilcar ngo halae azo xia neil? Ngo nga loxia dae mel dder ni dax lei. <sup>8</sup> Ni leil qiuxr, ngo leil cirza-hanga zuixl mel gga jiuxl teixl la, ca medeil mel leil ngo leil tor bbeix vuxr-nr-yixr lol. <sup>9</sup> Ngo pex dae mel mel ni ngo leil pex dae lol arddeir a; yel ngo dder ddar nr biar, arjjiuljjiu a hher dae. <sup>10</sup> Ni leixrhher ddei ngo leil deil a, ngo dder mier a; yel ni leil qiuxr, ni ngo leil tor nr faxr hor. <sup>11</sup> Ca mel zuixl bei a, ni yar leil bota a, yar leil faxr; hherdder yar nolnger dae cirza-hanga mel leil bber zzor sael a nga. Ca mel ddei olga ddei mel dder seixl ar qir sael a nga.

<sup>12</sup> Yihexrhuaxr, ni meixsaer qir leil mel ngo mel cirmaex-hanga ssi za su mel sael a nga, ngol hher dae lalnga, ngo ddei porpor mel dax ciryoxr a nga; yel ni leil qiuxr, ngo ni dax ddar biar dae mel leil noni, seilseir a ngo ni leil qiuxr dae mel leil noni! Ngo meixbbix ddux dae



a ni leil qiuxr, ni arjjiuljjiu a tor nr hher dae. <sup>13</sup> Ni leil qiuxr, ngo leil tor sir-nr-zzi, ngo si xilmeir leil ngo leil ggese lol la.

### Arbosobo Leil Bbeixzae Gger Caxlgo

Daxlweixl vaexr sipi. caxlgo caxl su  
mel leil guaxr su ddei leil jia gger.

**40** <sup>1</sup> Ngo halleix ssertexr zzazzamo Yihexrhuaxr leil xia dae; yar ngo qiuxr dae mel leil noni a. <sup>2</sup> Yar ngo leil bbeddur darneixl-neixl gga nei lurcirta gga gga deix xixl lei, ngo qihher ddei leil legelbbe leil toxl gex dae lol, ngo cibbi ddei leil vever a nga lol. <sup>3</sup> Yar ngo leil caxlgo yarsixl caxl lol, hherdder niul ddei Arbosobo leil bbeixzae gger ddar mel nga a. Ca cirke a mia a dder Yihexrhuaxr leil i du yar leil gexr, halae yar leil koxl nia.

<sup>4</sup> Yihexrhuaxr leil koxl a, col su nei yarjjar bei su ca mel dax bei nr mae su ca mel, Arbosobo yar leil seir lol nia. <sup>5</sup> Yihexrhuaxr ngo ddei Arbosobo, ni murgurgurmo bei dae hal mel nei ni ngua leil bei lol niazzir dae mel yarzisael miur; ngo biar jjia nia arddeirnga a, eilmel hhe lei hhe jjia nr ddo.

<sup>6</sup> Ni leil zi dae nei ni leil gger dae mel ni li-nr-zoxr; ni ngo nolba ddei leil bbejjiur xie lol ho a. Adoxl gga cu a ni leil zi dae mel nei zuixl ssoxrsuxl lol a ni leil zzeir seixl zi dae mel, ni li dae mel nr nga. <sup>7</sup> Halcar ngo bbeix: “I ddo a; ngo lei a! Ngo leil bbeix gger dae mel ni ddei sul ber leil vaexr deix dae ho a. <sup>8</sup> Ngo ddei Arbosobo, ngo ni xiar dae mel dax zox dae a bei ggese, ni ddei lixfaxr mel ngo nixmox zzar hher ji dae.

<sup>9</sup> Ca cirke hher pex dae car, ngo bbaehhexhhexmo ddar seirseir mel biar, ngo ngo meir ddei leil mix nr gex dae lol; Yihexrhuaxr, eilmel mel ni saexl. <sup>10</sup> Ngo zeixleixr lei ni ddei bbaehhexhhex mel nixmox zzar kerzi dae nr goxr; ni yarzi koxlsseiddo bei dae mel nei ni ca leil jiuxl dae mel, ngo biar teixl lei ho a; ngo zeixleixr lei ca cirke hher pex dae car, ni ca leil perniar dae mel nei yarzi ddarzziddo bei dae mel, kerzi dae nr goxr. <sup>11</sup> Yihexrhuaxr, ngo saexl, arddolcar

ci a lei ni ngo leil zoxlnixr; ni ca leil perniar nei ni yarzi ddarzziddo bei dae mel dax zox dae a zoxlzoxl a ngo leil guaxr dae.

### Arbosobo Dax Ddar Biar A Beijjiu Lol

<sup>12</sup> Hhe lei hhe jjia nr ddo goxrsol-goxrnaxr mel ngo leil zaza-lili weixr gex dae; ngo ddei zuixl mel ngo dax ggaxr mae ci a, ngo leil oldde lei bil du lei nr xie lol; zuixl eilmel bir ngo olce mel leil lei miur leixl a, ngo dder nixmox zzar gexr zildu a. <sup>13</sup> Yihexrhuaxr, ni leil qiuxr, ngo leil jiuxl la! Yihexrhuaxr, ni leil qiuxr, nialngasael ngo leil beijjiu la! <sup>14</sup> Ngo leil bei zil gger niazzir su mel leil cirter a yixr-sixr nr zza lol nia, qiaxrmeix zzi nr zza lol nia! Ngo goxr sol a ggese su mel leil doxdoxsi jjixr lol a, seixlda lol nia! <sup>15</sup> Ngo leil “Haxhax a; haxhax a” □bbeix su mel leil bei wor nr xie a, seixlda lol nia.

<sup>16</sup> Ni dax lei ci su hazza leil ggese lol nia. Ni yaa leil jiuxl a, ggese su ca hal mel leil zoxlzoxl a “Yihexrhuaxr mel vaer zzir ddei nga a” □bbeix lol nia. <sup>17</sup> Ngo mel goxr sol a azo lei nr zza, nael Seirpor, ni halae ngo leil holcir dae. Ni mel ngo leil beijjiu su a; ngo leil jiuxl su a; ngo ddei Arbosobo, ni leil qiuxr, tor da-nr-wo hor!

### No Car A, Arbosobo Dax Ddar Biar

Daxlweixl vaexr sipi. caxlgo caxl su mel leil guaxr su ddei leil jia gger.

**41** <sup>1</sup> Sol su ca mel leil zoxlnixr su mel Arbosobo yar leil seir lol! Yar goxrsol-goxrnaxr pex dae car, Yihexrhuaxr arsaе bei lei yar leil jiuxl. <sup>2</sup> Yihexrhuaxr arsaе bei lei yar leil guaxr dae a, yar leil goxl dae lol; yar middurbbor goxr seirseir a goxr wo ddo. Ni leil qiuxr, yar leil yar leil vuxryixr su mel leixrga gga tor jia ji nr gger, yaa xiar dae mel sael a tor nr nga lol. <sup>3</sup> Yar no a, yixrgguci leil hher dae car, Yihexrhuaxr arsaе bei lei yar leil beijjiu; yar no dae car, yar leil kor du lei lol.

<sup>4</sup> Halleix ngo bbeix: “Yihexrhuaxr, ngo zuixl bei a ni leil de dae a; ni leil qiuxr, ngo leil zoxlnixr la, ngo leil i kor gger la. <sup>5</sup> Ngo leil vuxryixr su mel ddar yarzi gexrddo te a ngo leil biar a bbeix: “Yar arddolcar

si neil? Yar ddei mi ddei arddolcar mier neil?” □ eine bbeix. <sup>6</sup> Yar ngo leil i lei zzorbbeixlei, ddar te dae mel lei yarjiar a nga; yar nixmox zzar nr seir mel xiar ji dae a, zalbbaer ddux ci a sael bbeix teixl lei. <sup>7</sup> Ngo leil vuxryixr su mel zzicarzzi nolba ddei dax dux gex dae a, ngo leil biar; yaa nr seir mel xiar a, ngo leil ke niazzir.

<sup>8</sup> Yaa bbeix: “Yar no ddei i kor nr ddo a; yar zeixleixr lei yixrgguci ddei leil ha du lei nr var a,” □ eine bbeix. <sup>9</sup> Ngo ddei gaxggor-carbeix ngo dax yarzi gaxggor seir, ngo yarzi ddarzzi, ngo dax cirgo a zzo zzor goxr hal ddei lei qihher ddei sser a ngo leil tiex. <sup>10</sup> Yihexrhuaxr, ni leil qiuxr, ngo leil zoxlnixr la, ngo leil kor du lei lol, yel ngo leil vuxryixr su mel leil bei koxl xixl.

<sup>11</sup> Ngo leil vuxryixr su mel ngo dax yaa bei leixl a kuar nr cexr a, ngo dder ni ngo leil ggese saexl a. <sup>12</sup> Ngo mel bota ddu nr zza a, ni dder ngo leil beijjiu, ngo leil cirse-cirsil lei ni meixsaer qir leil ngier dae lol.

<sup>13</sup> Yirsaexllixl su ddei Arbosobo Yihexrhuaxr leil mel bbeixzae gger nia, halcar tortor cirdae a arddolcar ci a lei bbeixzae gger nia. Amae! Amae!

### Ngo Nixmox zzar Arbosobo Leil Zixlkur-zixllixl Jjiur

Kerla ddei giedae ca vaexr sipi. Caxlgo caxl su mel leil guaxr su ddei leil jia gger.

**42** <sup>1</sup> Arbosobo, ci mel ajjix pe dae mel leil sixl sael a, ngo nixmox zzar lei ni leil hal mel sael a jjiur.

<sup>2</sup> Ngo nixmox zzar, gol dae Arbosobo leil zixlkur-zixllixl jjiur. Ngo arddolcar sael Arbosobo qiaxrmeix ddei leil mia ddo bbeixleir?

<sup>3</sup> Ngo merxixl-merni meixbbix zzo xiux lel, ca mel cirleixr nr nor ngo leil bbeix:

“Ni ddei Arbosobo arddolmaex hher dae neil?” □

<sup>4</sup> Halleix ngo ca cirke dax cirgo a ssi, yaa leil hier dae a Arbosobo ddei xi dax ssi, yaa dax cirgo a ggegge-sese nawo a caxl dae a jiax goxr.

Ngo nixmox zzar yarzi cix a eilmel leil holcir du lei a.

<sup>5-6</sup> Ngo ddei nixmox, ni arsaenga a cix leir?

Arsaenga a ngo dax hher ji dae a zzilzzil-zzerzzer zza leir?

Ngo ddei nixmox, ni Arbosobo leil xia nia.

Ngo halae yar leil bbeixzae gger nia.

Yar mel ngo leil jiuxl su Arbosobo ddei nga a.

Ngo nixmox zzar cix,

yel ngo Yuedaxl mermi, Hiemexr worga nei Mirsar worga leil ni leil holcir.

<sup>7</sup> Ni ddei ajjix mel porpolpor pe ze lei a,  
darneixlneixl mel dder zzileil ddarkoxl.

Ni ddei bolaxl ddaexr dae mel nei vi mil dae mel  
ngo ggecir leil lei mil hex a.

<sup>8</sup> Eilnirggu Yihexrhuaxr ngo leil perniar,  
eilmerxixl ngo yar leil caxl zae gger,  
ngo leil olga gger su Arbosobo dax ddar biar.

<sup>9</sup> Ngo, ngo ddei Arbosobo ngo ddei legelbbe taex leil bbeix:

“Ni arsaenga a ngo leil hol-nr-cir leir?

Ngo arsaenga a ngo leil vuxryixr su mel ngo leil ke a cix leir?” □  
eine bbeix.

<sup>10</sup> Ngo ddei hherggar mel deil me gger sael a,  
ngo leil dir su mel ngo leil hie vuxryixr.

Yaa cirleixr nr nor ngo leil bbeix:

“Ni ddei Arbosobo arddolmaex hher dae neil?” □ eine bbeix.

<sup>11</sup> Ngo ddei nixmox, ni arsaenga a cix leir?

Arsaenga a ngo dax hher ji dae a zzilzzil-zzerzzer zza leir?

Ngo ddei nixmox, ni Arbosobo leil xia nia.

Ngo halae yar leil bbeixzae gger nia.

Yar mel ngo leil jiuxl su Arbosobo ddei nga a.

Ngo, Ngo Leil Ggese Lol Su Arbosobo Dax Ssi Ci Niazzir

**43** <sup>1</sup> Arbosobo, ni leil qiuxr, ngo leil hoxrhoxrmo ser la,  
ni dax bei nr mae su cassor-worssor mel dax ngo leil ddar  
te jjiu la;

ngo leil ca fur su nei nixmox neix su ca mel dax jiuxl teixl la.

<sup>2</sup> Ni mel ngo ddei pahher ggie Arbosobo ddei nga a.

Ni arsaenga a ngo leil piar pixl gger leir?

Ngo arsaenga a ngo leil vuxryixr su mel ngo leil ke a cix leir?

<sup>3</sup> Ni leil qiuxr, ni ddei bbolbbo mel leil nei ddarzi mel leil miardal  
teixl la a, ngo leil hier dae lol;

ngo leil ni ddei seirceix-seirmaer worga leil ni hher ggie hier ci  
lol,

<sup>4</sup> Ngo dder Arbosobo leil zzeir seixl zi ggie ssi ci,

ngo ssi meixr ngo leil ggese lol su Arbosobo dax ssi ci.

Arbosobo, ngo ddei Arbosobo,

ngo bbaexlabox ddei bbaex dae a, ni leil bbeixzae gger nia.

<sup>5</sup> Ngo ddei nixmox, ni arsaenga a cix leir?

Arsaenga a ngo dax hher ji dae a zzilzzil-zzerzzer zza leir?

Ngo ddei nixmox, ni Arbosobo leil xia nia.

Ngo halae yar leil bbeixzae gger nia.

Yar mel ngo leil jiuxl su Arbosobo ddei nga a.

Seirpor Leil Qiuxr A, Guaxr Dae Lol

Kerla ddei giedae ca, ca leil mul gger a vaexr sipi.

Caxlgo caxl su mel leil guaxr su ddei leil jia gger.

**44** <sup>1</sup> Arbosobo, halcar ni ngua ddei porpor mel dax bei dae mel,  
ngua malma bbejjiur a;

ngua ddei porpor mel lei ngua leil biar gger goxr a.

<sup>2</sup> Halleix ni leixrhher bbor sser a Yoxrtaexl su nr nga ca mel leil  
zzael ggaxr teixl gger,

ngua ddei porpor mel leil zzael hhel du lei lol;

- ni Yoxrtaexl su nr nga ca mel leil zzael goxr sol lol,  
 ngua ddei porpor mel leil zzael goxr seir lol.
- <sup>3</sup> Yaa middei hal ddei li wo a mel,  
 armael ddei altor mel leil koxl dae nr nga,  
 yaa lei armael leixrhherba ddei leil koxl dae a bei leixl nr nga;  
 ni mel yaa leil ggese a,  
 ni ddei leixrhher yo bbor leil,  
 ni ddei leixrhherba leil nei ni qiaxrmeix leil bbolbbo zoxl teixl  
 lei mel leil,  
 koxl dae a nga arddeir a.
- <sup>4</sup> Arbosobo, ni mel ngo ddei zzirmar a;  
 ni leil qiuxr, ni miardal a Yargel leil bei leixl lol.
- <sup>5</sup> Ngua ni leil koxl dae a ngua leil dir su mel leil bei leixl gger nia;  
 ni ddei mi ddei leil koxl dae a, ngua leil deil lei su mel leil jjiux  
 gex dae nia.
- <sup>6</sup> Ngo mel ngo ddei jir ddaexr labox ddei leil koxl nr nga;  
 ngo ddei altor baex lei ngo leil bei leixl lol nr var.
- <sup>7</sup> Nael ni ngua leil,  
 ngua leil dir su mel dax jiuxl teixl lei,  
 ngua leil vuxryixr su mel leil qiaxrmeix zzi nr zza lol.
- <sup>8</sup> Ngua zoxlzoxl a ni leil bbeixzae gger nia,  
 cirse-cirsil ni leil nawo nia.
- <sup>9</sup> Nael eilcar, ni ngua leil piar pixl gger a, ngua leil seixlda lol;  
 ni ngua ddei meixr mel dax cirgo a zaxl-nr-ddaexr ssi.
- <sup>10</sup> Ni ngua leil, ngua leil dir su mel meixsaer qir leil doxdoxsi jjixr  
 lei lol,  
 ngua leil vuxryixr su mel azo su niazzir su lol.
- <sup>11</sup> Ni ngua leil seixl lel labox ya hal mel sael a nga lol;  
 ngua leil cirgoxr-hanga dax bbe mal gger.
- <sup>12</sup> Ni, ni ddei cassor-worssor mel leil perlala a vur pixl gger,  
 zzirbae vur wo mel ni leil be nr dax lol.
- <sup>13</sup> Ni ngua dax goxr naer dae su mel leil ngua leil hie vuxryixr lol,

ngua dax zaza-lili goxr dae su mel leil ngua leil vaessi lol,  
bbeix vuxryixr lol.

<sup>14</sup> Ni ngua leil Yoxrtaexl su nr nga ca mel ddei vaessi ddu loxr lol;  
cassor-worssor mel leil oldde taex veil dae a ngua leil vaessi  
lol.

<sup>15-16</sup> Ngo, ngo leil hie no su nei nrbba-nrbba biar su mel ddei  
qjurte bbejjiur,  
halae ngo leil dir su mel ngo leil bei koxl xixl a,  
ngo ddei seixldaddu mel arddolcar lei ngo meixsaer qir leil mia  
dae,  
ngo ddei seixlda ddu mel ngo leil bbe gex du lei a.

<sup>17</sup> Eilmel maelmaerjjia ngua ggecir leil ddeix a lei,  
nael ngua halae ni leil holcir dae,  
ni bbeix har dae mel dax bei mae dae.

<sup>18</sup> Ngua nixmox taex vever a ni dax mae dae;  
ngua qihher zze lei ni ddei jjiumo zex leil ssi nr pixl.

<sup>19</sup> Nael ni zzael anol yir mel hher ggie ngua leil bei no gger;  
ngua leil si nrsulsul nga lol,  
hherdder neixmarmar ddei ngua leil bbe gex dae sael a nga.

<sup>20</sup> Ngua, ngua ddei Arbosobo leil hol-nr-cir,  
neir leil qiuxr ssi arddeirnga a,

<sup>21</sup> holbbaexl Arbosobo eilmel leil nr mia dae a ngo?  
Yar mel ca mel nixmox zzar kerzi dae mel lei saexl.

<sup>22</sup> Ngua ni leil weix a,  
merxixl-merni lei si ngua leil seixl;  
ca mel ngua leil i dae a,  
seixl niazzir dae acixl ya mel sael a nga.

<sup>23</sup> Seirpor, ni leil qiuxr, ni zucur!  
Arsaenga a yixr doxr dae leir?  
Ni leil qiuxr, ha du la,  
ngua leil cirse-cirsil tor piar pixl nr gger!

- <sup>24</sup> Ni arsaenga a qiaxrmeix ddei ngua leil mal nr gger?  
 Ngua goxr sol dae mel leil nei si ngua leil ggux ci dae mel leil nr  
 guaxr.
- <sup>25</sup> Ngua nilme mel leil puxr gex dae;  
 ngua ggecir ddei lei middur ddei dax naelnaer a puxr gex dae.
- <sup>26</sup> Ni leil qiuxr, ha du la a ngua leil beijjiu la!  
 Ni ca leil perniar mel dax zox dae a, ngua leil jiuxl la!

Zzirmar Hhexr Ggie Baxl A, Caxl Labox Caxlgo

Kerla ddei giedae ca, ca leil mul gger a vaexr sipi, yoxl zzi leil  
 seissaexr a caxl labox caxlgo. Caxlgo caxl su mel leil guaxr su ddei  
 leil jia gger. Baexrhexrhua ddei diuxlzi sser. (diuxlzi eil yoxr yarzi  
 noni zae, zzi leil seissaexr a caxl, bbeixsael ggie baxl a caxl.)

- 45** <sup>1</sup> Ngo nixmox zzar ddar zaelzae a ar mel ddux lei,  
 ngo zzirmar ddei leil ddar zaelzae a eilmel zza gger;  
 ngo ddei lo ddei mel dder sul vaexr a yarzi vaexr sexr ca hal mel  
 ddei bixr sael a nga.
- <sup>2</sup> Ni mel ca mel gga zae zzir ddei nga a;  
 ni meir gga bbeix teixl lei ddar hazza lei ca leil seir lol,  
 yel Arbosobo cirse-cirsil lei ni leil seir lol.
- <sup>3</sup> Yarzi ddo zzirmar,  
 ni zzoxrbbeix ddei leil altor baxr ddexr dae ddo a;  
 ni yarzi middux, arseir lei ni leil i du.
- <sup>4</sup> Ddarzi mel leil, bbaehhexhhex mel leil nei ca nr col hal mel leil  
 weix a,  
 zaxlddaexr marcae ddei leil cux dae a zaxlddaexr ssi,  
 ddaexr nr leixl lei ar boxl zza nr var!  
 Ni ddei leixrhher yo bbor ddoddo mo bei lol nia.
- <sup>5</sup> Ni ddei jir baex teixvilvilmo,



zzirmar leil dir su ca mel ddei nixmox taex leil malmal ddaexr  
gex dae a,  
circuxr-hanga lei ni qihher dax de zei dae a.

<sup>6</sup> Arbosobo, ni mel cirse-cirsil lei zzirmar bei;  
ni, ni ddei goxr ddei leil bbaehhexhhexmo guaxr.

<sup>7</sup> Ni bbaehhexhhex mel leil nolnger, yarzi gexrddo mel leil  
vuxryixr;

yel Arbosobo, hherdder ni ddei Arbosobo,  
ca leil ggese lol var ssuvi ddei ni oldde leil dox deix gger,  
bir ni ddei carbeix mel leil dox deix gger miur leixl.

<sup>8</sup> Ni ddei pia mel leil mel yarzi nerxiu cexrxia, moxlyoxl nei  
ssexlguixl ner wo ddo;

ho zzae bei teixl lei zzirmar xi gga mel caxlgo bbaex dae a, ni  
leil ggese lol.

<sup>9</sup> Ni ddei maeryemo mel gga mel,  
cirmaex-hanga zzirmar mel ddei ssormaer lei ca dae.  
Ni ddei maervulmo ddei sae yarzi naxrcixl ddexr dae a,  
ni ddei yo piar a gga ngier dae.

<sup>10</sup> Zzirmar nolnger dae ssormaer<sup>s</sup>,  
ni noni nia, xiar nia, seirseir a noni nia;  
ni mermi su mel leil nei niabbor hhexr leil holcir nr ssa a.

<sup>11</sup> Zzirmar ddei mel ni zae a ni leil nolnger;  
yar mel ni ddei seirpor a,  
yel ni yar leil i du, yar leil bbeixzae gger nia.

<sup>12</sup> Tuiloxr su mel ni leil zzaegu ho mal gger lei nia;  
cassor-worssor mel gga be su ca mel lei ni leil ggese lol nia.

---

<sup>s</sup>45:10 Zzirmar nolnger dae ssormaer Yilsu mel zzirmar ddei maerssor leil bbeix  
arddeir a.

- <sup>13</sup> Zzirmar nolnger dae ssormaer<sup>t</sup> ddei zzirmar hher ggie xi gga hher dae a yarzi zae!  
 Yar veixr dae pia mel mel sae mesixlsixl a hal mel sser a, naexr teixl lei.
- <sup>14</sup> Yar pia yarzi zae hal mel veixr dae a, yar leil zzirmar dax hier mal nia;  
 yar dax mae su ssormaerleixl mel leil lei ni dax hier mal nia.
- <sup>15</sup> Yaa leil ggegge-sese a zzirmar dax hier mal nia;  
 yaa zzirmar hher ggie xi gga ddir nia.
- <sup>16</sup> Ni giedae ca mel ni porpor mel ddei dirtu bei nia;  
 ni yaa leil cirmaex-hanga ddei zzirmar bei lol nia.
- <sup>17</sup> Ngo cirzeix-hanga leil lei ni mi ddei leil holcir dae lol nia,  
 yel circuxr-hanga lei cirse-cirsil ni leil nawo nia.

### Arbosobo Niul Dax Hher Dax Dae

Kerla ddei giedae ca vaexr caxlgo. Caxlgo caxl su mel leil guaxr su ddei leil jia gger. Ssormaer ddei diuxlzi sser.

- 46** <sup>1</sup> Arbosobo mel ngua ddei pahher ggie,  
 ngua leil worni lol su,  
 ngua goxrsol-goxrnaxr pexr dae a,  
 arddolcar lei ngua leil beijjiu su ddei nga a.
- <sup>2</sup> Yel middur ddei gierbox,  
 worga mel le a,  
 neixvi agala gga le mal,
- <sup>3</sup> halae ajjix gga bolaxl mel arsae mumu ddaexr du lei,  
 ajjix mel miur du lei a,  
 worga mel lei go du lei a bbeixarnar a,  
 ngua halae nr gexr.

---

<sup>t</sup>45:13 Zzirmar nolnger dae ssormaer Yilsi mel zzirmar ddei maerssor leil bbeix arddeir a.

- <sup>4</sup> Lazzarmo ar zex zza, lazzarmo eil zex Arbosobo ddei zzi gga ca mel leil ggese lol;  
zzi eil ddei mel hherdder mu zzir ggie hher dae Arbosobo hher ggie xi giex nga a.
- <sup>5</sup> Arbosobo zzi eil ddei gga hher dae a,  
zzi eil ddei leil bei xiaxr gger nr var;  
merteir a qie, Arbosobo arsae bei lei zzi eil ddei leil beiijiu.
- <sup>6</sup> Yoxrtaexl su nr nga ca mel gexr a, bbialil-bbialor me;  
Arbosobo yaa ddei goxrjia mel leil le du lei lol;  
yar ddei qiurte ddei bbeix teixl lei a, middur ddei dder mier a.
- <sup>7</sup> Meixr hazza leil guaxr su Yihexrhuaxr ngua dax cirgo a hher dax dae;  
Yargel ddei Arbosobo mel ngua ddei pahher ggie a.
- <sup>8</sup> Nia Arbosobo bei dae mel leil i lei ddo a;  
yar middurbbor murgurgurmo bei dae mel leil i lei ddo a.
- <sup>9</sup> Yar middurbbor zzarvul-zzarmae zaxlddaexr su mel leil ddaexr nor lol;  
jir ddaexr labox nei zzi deil a sser ddu teixvilvil mel ngaxl te gger,  
zaxlddaexr a sser dae marcae mel cu pixl gger.
- <sup>10</sup> Nia wornol nia, ngo mel Arbosobo a saexl nia!  
Circuxr-hanga lei ngo leil i du nia,  
middurbbor zzarvul-zzarmae lei ngo leil i du nia.
- <sup>11</sup> Meixr hazza leil guaxr su Arbosobo Yihexrhuaxr ngua dax cirgo a hher dax dae;  
Yargel ddei Arbosobo mel ngua ddei pahher ggie a.

Mu Zzir Ggie Hher Dae Guaxr Su Ddei

Kerla ddei giedae ca vaexr sipi. Caxlgo caxl su mel leil guaxr su ddei leil jia gger.

- 47<sup>1</sup> Cassor-worssor mel,  
 nia ggeese a leixrhher zze deil du lei nia,  
 worcixl-worni caxl dae a,  
 Arbosobo leil caxl zae gger nia.
- <sup>2</sup> Mu zzir ggie hher dae Yihexrhuaxr leil mel gexr a, i du nia;  
 yar mel middurbbor hazza leil guaxr su zzirmar vaervaer ddei  
 nga a.
- <sup>3</sup> Yar ngua leil circuxr-hanga leil ddaexr leixl lol a,  
 yaa leil guaxr dae lol.
- <sup>4</sup> Yar ngua leil middei hher ggie tiur gger,  
 yar perniar dae cassor-worssor mel kuar ddu bei lol.
- <sup>5</sup> Ca mel ggegge-sese a ae dae nei cuxgexdaex baerlae mex dae  
 car,  
 Arbosobo Yihexrhuaxr yar ddei zzirmar baxrde taex leil ddeix.
- <sup>6</sup> Nia caxlgo caxl a, Arbosobo leil caxl zae gger nia!  
 Nia caxlgo caxl a, zzirmar ddei leil caxl zae gger nia!
- <sup>7</sup> Arbosobo mel middurbbor hazza ddei zzirmar;  
 nia caxlgo caxl a, yar leil caxl zae gger nia.
- <sup>8</sup> Arbosobo zzirmar bei a, cirgoxr-hanga leil guaxr;  
 Arbosobo yar ddei seirceix-seirmaer zzirmar baxrde taexl leil  
 cux dae a.
- <sup>9</sup> Arbosobo mel zzirmar hazza leil guaxr,  
 yar mu zzir ggie hher dae ddei nga a;  
 yel circuxr-hanga ddei zzirmar mel lei cirgo a hher dae a,  
 Yalboxrlahar ddei Arbosobo ddei cassor-worssor bei.

Xi'a Zzi Hherdder Arbosobo Ddei Zzi

Kerla ddei giedae ca vaexr caxlgo.

- 48<sup>1</sup> Yihexrhuaxr mel vaer zzir ddei nga a;  
 ngua Arbosobo ddei zzi gga, yar ddei seirceix-seirmaer  
 worga gga leil hher dae a,  
 yar leil bbeixzae gger nia.
- <sup>2</sup> Xi'a worga leil zzirmar vaer zzir ddei zzi ddei mel baexrfa piar  
 a gga a;  
 mu zzae mu, zae zzae zae, middurbbor hher dae hazza leil  
 yarzi ggese lol.
- <sup>3</sup> Arbosobo mel yar ddei zzi gga zzirmar hher ggie xi gga hher  
 dae,  
 yar mel dder ca mel koxl ggie ddei nga a.
- <sup>4</sup> I ddo a! Zzirmar mel cirgo a hher pex dae a, cirter a ssi gel lei a.
- <sup>5</sup> Yaa zzi eil ddei leil mia a, yarzi murgur,  
 gexr zildu a dder nialngasael pa du si.
- <sup>6</sup> Yaa halmaex gga gexr mil si a;  
 yaa aniux xiu a, xiu sol ssormaer hal mel sael a nga.
- <sup>7</sup> Arbosobo, ni dofa piar a gga mersi jia lol a,  
 Tasi mermi cuaxr mel bei xiaxr gger.
- <sup>8</sup> Ngua meixr hazza leil guaxr su Yihexrhuaxr ddei zzi,  
 hherdder ngua ddei Arbosobo ddei zzi gga,  
 yar bei dae mel leil mia a;  
 hherdder ngua bbejjiur mel dax ciryoxr a nga.  
 Arbosobo arsae bei lei zzi eil ddei leil arddolcar ci a lei zza dae  
 lol nia.
- <sup>9</sup> Arbosobo, ngua ni ddei xi gga hher dae a,  
 ni ngua leil perniar mel leil holcir.
- <sup>10</sup> Arbosobo, ni leil bbeixzae gger dae a mel ni ddei mi ddei sael a  
 nga,  
 middurbbor cirmaex-hanga ci,  
 ni leixrhher yo bbor bbaehhexhhex a lillil a nga.
- <sup>11</sup> Ni bbaehhexhhexmo ca leil ser a,  
 Xi'a worga leil hher dae ca mel ggese nia,

Yoxrdaxl zzi gga hher dae ca mel lei gge se nia.

<sup>12</sup> Nia Xi'a zzarvul-zzarmae ssi nia,  
zaza-lili ssi a, weixrqiaxr leil zaxlddaexr a pahher ggie xi mel  
leil hhe nia.

<sup>13</sup> Seilseir a yar ddei weixrqiaxr mel leil i nia;  
seilseir a cassor-worssor mel pahher ggie xi mel leil i nia;  
eine nga a mel, nia giedae ca mel leil biar gger cexr.

<sup>14</sup> Arbosobo eil ddei mel cirse-cirsil lei ngua ddei Arbosobo a;  
yar arsae bei lei ngua leil jjiumo hier nia,  
hherdder ngua si hane zzezze ci.

### Zzirbae Leil Koxl Su Mel Medeil

Kerla ddei giedae ca vaexr sipi. Caxlgo caxl su  
mel leil guaxr su ddei leil jia gger.

**49** <sup>1</sup> Cassor-worssor mel, nia noni nia,  
middurbbor ca hazza,  
<sup>2</sup> vaervaerpor bei su nei nr bei su,  
be su bbeixsael so su lei maelmaerjia seilseir a noni dae nia!  
<sup>3</sup> Ngo meir gga olnoldduddumo ddar mel biar nia,  
nixmox zzar ca leil cirza-hanga lei saexl lol ddar mel leil xiar  
nia.

<sup>4</sup> Ngo seilseir a bir dae a biar dae mel noni nia;  
ngo caxlgo bbaex labox ddei bbaex dae a,  
zzirddar mel azo yilsi a bbaex teixl lei nia.

<sup>5</sup> Goxrsol-goxrnaxr gga,  
arjjiuljjiu a ngo leil ke su nixmox neix su ca mel,  
ngo leil weixr gex dae car,  
ngo azo gexr ssa bbeixleir?

<sup>6</sup> Yaa zzaegu nei zzirbae mel leil koxl dae a,  
armael yarzi be kuar.

- <sup>7</sup> Nael ca cir ddei lei yar ddei arzzi-nimar leil vae xixl lei nr cexr,  
vaeper ddei Arbosobo leil gger nr cexr,
- <sup>8-9</sup> Vaeper ddei mel yarzi perniar a,  
yel yar dder yar leil vae xixl lei nr cexr;  
yar leil cirse-cirsil lei gol dae lol a,  
yiji gga nr ssi lol bei nr cexr.
- <sup>10</sup> Yar arsaе bei lei olnolddu su ca mel si ggie mia,  
medeil su ca mel nei zzeir sael a ca hal mel si ggie mia,  
yaa ddei zzirbae nei zzaegu mel kebal ca leil dol gger dae a.
- <sup>11</sup> Yaa nixmox zzar xiar dae a,  
yaa ake ddei arddolcar ci a lei zza dae,  
yaa hher ggie ddei cirzeix-hanga lei zza dae;  
yaa armael mi ddei dax zox dae a,  
yaa middei ddei leil mi mi gger.
- <sup>12</sup> Nael ca mel yarzisael be zzorbbeixlei,  
gol doxr dae nr var,  
yaa zzeir mel sael a si nia.
- <sup>13</sup> Jjiumo eil zex mel, ca medeil mel ssi dae zex nga a;  
nael yaa giedae ca mel halae yaa ddar bbeix dae mel leil i du.
- <sup>14</sup> Yaa mel ca si ho a hher ggie ssi nia dixl har dae acixl ya mel  
sael a nga;  
ca leil si lol su ddei yaa ddei yaloxlmo bei.  
Merteir a bbaehhexhhexmo ca hal mel yaa leil guaxr;  
yaa ddei ggecir ddei mel ca si ho a hher ggie xiaxr pixl a,  
hher ggie lei nr zza.
- <sup>15</sup> Nael Arbosobo arsaе bei lei ngo ddei xiu ddei leil ca si ho mel  
leil guaxr su ddei dax jiuxl teixl lei,  
yar ngo leil yar dax cirgo a hher lol.
- <sup>16-17</sup> Si car mel azo lei vei si nr cexr,  
gol dae seir middux a lei,  
si ho a mel guaxr-nr-zoxr a;

yel si zzirbae cirke bei wo,  
ake ho bei ho be du lei car,  
ni gexr nr ssa.

<sup>18</sup> Yar gol dae seir car, armael ddei armael yarzi miexr seir kuar  
bbeixarnar (ni armael ddei armael seir arddeirnga a, ca mel  
arsae bei lei ni leil kuar gger),

<sup>19</sup> nael yar arsaе bei lei yar porpor mel dax cirgo a ssi nia,  
cirse-cirsil lei bbelele ddei leil mia nr ddo.

<sup>20</sup> Ca mel be bbeixarnar a,  
nael hal mel yar leil nr si lol bei nr cexr,  
yaa lei zzeir mel sael a si nia.

### Yarzi Arbosobo Leil Bbeixzae Gger

Yalsaxl vaexr sipi.

**50** <sup>1</sup> Ddo zzir Arbosobo Yihexrhuaxr ddar bbeix teixl lei a,  
middurbbor merni ddux lei ggie cirdae a,  
merni lal ggie zzeze hazza leil ae gel lei.

<sup>2</sup> Arbosobo ddei bbobbolbbo mel zae zzir naxrcixl zzir Xi'a zzi  
gga zox teixl lei a.

<sup>3</sup> Ngua ddei Arbosobo lei nia;  
yar meir ddei mix gex dae nr var;  
yar xilmeir leil adoxl herhelher bbiu dae,  
yar zaza-lili mersi daxlgaxl jia dae.

<sup>4</sup> Yar merlabbor middurbbor hazza leil ae gel lei a mel,  
yar ddei cassor-worssor mel leil ser arddeir a.

<sup>5</sup> Yar bbeix: “Ngo ddei kebal ca mel dax bbe teixl lei  
cassor-worssor,  
hherdder ziddu sser a ngo dax bbeix har zaxr su ca mel leil,  
ngo dax eilmaex ae si la.”□

<sup>6</sup> Arbosobo mel, serpaxl su ddei nga a;



yel merlabbor zza dae cirza-hanga lei yar mel bbaehhexhhexmo nga bbeix nia.

<sup>7</sup> Ngo ddei cassor-worssor mel,  
nia ngo ddei ddar noni nia!

Yirsaexllixl su ca mel,  
nia bei cox dae mel ngo nia leil bbeix gger nia;  
ngo mel Arbosobo a;  
ni ddei Arbosobo a.

<sup>8</sup> Ngo, ni ngo leil zi dae mel leil weix a ni leil bota nr nga;  
ni zzeir seixl a ngo leil zi dae mel nei adoxl gga cu a ngo leil zi  
dae mel,  
arddolcar lei ngo meixsaer qir leil zza dae.

<sup>9-10</sup> Sixzzei cili gga yirvu-nilhax hazza lei ngo ddei a;  
worga hazza leil zzeir mel lei ngo ddei a;  
yel ngo ni ake gga zeil dae loxrbbe mel nei ni zzeir bbe gga  
acixlbol mel lei nr li.

<sup>11</sup> Wordabbor ngax mel leil lei ngo saexl,  
mipaerbbae gga yirvu-nilhax hazza lei ngo ddei a.

<sup>12</sup> Middurbbor ddei nei middurbbor zza dae hazza lei ngo ddei a;  
yel ngo meixr a lei ni leil bbeix gger nr ssa.

<sup>13</sup> Holbbaexl ngo loxrbbe ddei hor zzor a ngo?  
Holbbaexl ngo acixl ddei sirnilni dda a ngo?

<sup>14</sup> Ni Arbosobo leil nawo a mel,  
hherdder yar leil zi;  
ni mu zzir ggie hher dae hal ddei dax bbeix har goxr hal mel  
saexl a bei nia.

<sup>15</sup> Goxrsol-goxrnaxr pexr dae car, ni ngo leil qiuxr nia;  
ngo arsae bei lei ni leil jiuxl nia,  
yel ni ngo leil middux lol nia.

<sup>16</sup> Nael Arbosobo nixmox neix su ca mel leil bbeix: “Ni arsae ngo  
ddei lixfaxr mel biar ssi bel,

meir gga ngo bbeix har zaxr dae mel leil biar ci leir?

<sup>17</sup> Ni mel ngo ni leil guaxr dae nei mul gger dae mel leil vuxryixr, ni ngo ddei ddar mel piar pixl gger.

<sup>18</sup> Ni zzaexpor mel leil mia a dder yaa dax cir cir a bei ggese; yoxl kerjiar su mel dax cirgo a nga.

<sup>19</sup> Ni meir gga ddar yarzi gexrddo hal mel bbeix niazzir a dder bbeix;  
lo ddei cafur-calel.

<sup>20</sup> Ni cux dae a ni ddei arzzi-nimar leil buxlguaxr-laxlsixr biar, niama ddei ssor leil nrbbba-nrbbba biar.

<sup>21</sup> Ni eilmel bei a lei ngo arjjiuljjiu a hher dae a, ni zzirdae a ngo ni dax ciryoxr a nga;  
nael ngo ni leil bota nia, eilmel ni meixsaer qir leil zza dae lol.

<sup>22</sup> Nia Arbosobo leil hol-nr-cir su mel, seirseir a eilmel leil xiar nia;  
nr nga a, ngo nia leil zix me gger a, arseir lei nia leil jiuxl nr cexr a.

<sup>23</sup> Ha ngo leil nawo a mel, hherdder ngo leil zi a, ngo leil middux lol a;  
ngo miardal dae mel dax bei mae dae su mel, ngo arsae bei lei yaa leil jiuxl wo lol.

### Daxlweixl Arbosobo Dax Huixrsoxr

Daxlweixl Baxrsixlba dax naer ho a, xiezi Naxrda yar leil i lei ho a, Daxlweixl sipi eil zul vaexr.  
Caxlgo caxl su mel leil guaxr su ddei leil jia gger.

**51** <sup>1</sup> Arbosobo, ni leil qiuxr, ni ca leil perniar a seirseir meixl gger mel dax zox dae a, ngo leil zoxlnixr la.

Ni ca leil daxlgaxl-daxllixl seirseir meixl gger dae mel dax zox  
 dae a,  
 ngo ni leil dir zuixl mel ca pixl gger la.

<sup>2</sup> Ngo ni dax bei nr mae zuixl mel cir pixl gger la,  
 halae ngo ddei zuixl mel gga ngo leil cir seibeix gger la.

<sup>3</sup> Ngo ni leil dir zuixl mel ngo saexl,  
 ngo ddei zuixl mel arddolcar lei ngo meixsaer qir leil zza dae.

<sup>4</sup> Ngo zuixl bei a ni leil lar de dae;  
 ngo ni meixsaer qir leil yarzi gexrddo eilmel bei a;  
 yel ni ngo leil bota dae car ni bbaehhex,  
 ni ngo leil ser dae car ni hoxr.

<sup>5</sup> Ngo leil mel xiu teixl lei a dder zuixl zza a;  
 ngama ngo leil niar dae car ngo dder zuixl zza a.

<sup>6</sup> Ni mel, nixmox zzar ddarzi ji dae hal mel leil nolnger;  
 ngo leil olnoldduddu mel saexl lol.

<sup>7</sup> Ni leil qiuxr,  
 Ni niuxrxicar sser a ngo ddei zuixl mel gga ngo leil cir xia gger  
 a, ngo leil seibeix lol;  
 ngo leil cir xia gger a, ngo leil bir wor leil lei piu leixl lol.

<sup>8</sup> Ni ngo leil ggesese qiurte ddei leil bbejjiur lol;  
 ni nixlte gger hherggar mel leil ggesese cexr lol.

<sup>9</sup> Ni qiaxrmeix ddei za xixl a, ngo ddei zuixl mel leil tor nr i;  
 ngo ni dax bei nr mae zuixl hazza leil ca pixl gger la.

<sup>10</sup> Arbosobo, ni leil qiuxr,  
 ngo leil nixmox seibeixbeix ar taex coxl gger la;  
 botaddu nr zza xiu ddei ngo dax hher ji xixl lol la.

<sup>11</sup> Ngo leil ni dax tor ggaxr pixl nr gger;  
 ni ddei seirceix-seirmaer Xiu ddei leil ngo dax tor se xixl nr si.

<sup>12</sup> Ngo leil jiuxl a, ngo leil zeixleixr ggesese lol la;  
 ni leil noni yuex xiu ddei ngo leil gger a, ngo leil beijjiu lol.

<sup>13</sup> Ngo dder ni ddei ddar mel, ni leil dir zuixl hal mel zza su ca mel leil mul gger, zuixl zza su ca mel ni dax jjixr lei var.

<sup>14</sup> Ngo leil jiuxl su Arbosobo, ni leil qiuxr, ngo leil ca mel leil sirnilni ddux lol zuixl ddei gga jiuxl teixl la! Ngo lo ddei dder ggesese a ni ddei bbaehhexhhex mel leil caxl nia.

<sup>15</sup> Seirpor, ngo meir ddei leil ngaxl kae lol a, ngo ni leil bbeixzae gger dae ddar mel biar.

<sup>16</sup> Ni leil zi dae mel ni li-nr-zoxr.

Lizoxr arddeirnga a, ngo dder ni leil zi.

Adoxl gga cu a ni leil zi dae mel lei ni li-nr-zoxr.

<sup>17</sup> Cix dae xiu ddei mel, hherdder Arbosobo ni li niazzir dae ziddu ddei nga a.

Cix dae nei huixrsoxr dae nixmox taex leil mel, Arbosobo ni i nr ze.

<sup>18</sup> Ni leil qiuxr, ni ggesese a Xi'a zzi ddei leil seir lol la;

Yiluxlsaler zzi ddei weixrqiaxr ddei bei box lol la.

<sup>19</sup> Hane ci a hoxrhoxrmo ni leil zi dae mel, ni lizoxr.

Zzeir cirddei-lorbba adoxl gga cu a ni leil zi dae mel, ni lizoxr.

Loxrbbe mel ni leil ziggie zi nia.

Arbosobo Ca Leil Serpaxl Nei Ca Leil Seirseir Meixl Gger

Yirdo su ca Doyixl Sarloxr leil bbeix: “Daxlweixl Yalximirlexl dax ssi ci a;” bbeix gger halcar a, Daxlweixl ca leil mul gger Sipi eil zul vaexr. Caxlgo caxl su mel leil guaxr su ddei leil jia gger.

**52** <sup>1</sup> Yarzi sexr ca, ni arsaenga a yarzi gexrddo bei a armael ddei armael kuar?

Arbosobo mel arddolcar lei ca leil perniar doxr.

- <sup>2</sup> Ni lo ddei yarzi gexrddo, ca leil ke;  
 hherdder oldde cox altor yarzi teix mel sael a nga,  
 ca leil bei no gger.
- <sup>3</sup> Ni yarzi gexrddo mel leil nolnger a bir seirseir mel leil nolnger  
 leixl;  
 yoxl ddar jiar te meixr, ddarzi te nr meixr.
- <sup>4</sup> Ca leil fur su lo ddei,  
 ni ca leil ke ddar hazza lei te meixr.
- <sup>5</sup> Arbosobo lei ni leil cirse-cirsil bei zil gger nia.  
 Yar ni leil ssu gex dae a ni ddei sur bei teixl lei xigex gga gga  
 teixl lei a,  
 ni leil gol dae ca mel dax die teixl lei nia.
- <sup>6</sup> Nixmox seir su ca mel mia a dder gexr nia,  
 halae yar leil vaessi a bbeix:
- <sup>7</sup> “I ddo a; eil ddei mel dder Arbosobo leil nr koxl su ca ddei nga  
 a;  
 yar armael ddei zzirbae mel leil lar koxl,  
 yarzi gexrddo mel bei a, armael leil hhel du lei lol,” eine bbeix  
 nia.
- <sup>8</sup> Nael ngo leil bbeix ci a mel,  
 hherdder Arbosobo ddei xi gga saercor zzei nibaexbaexmo hal  
 zzei sael a nga;  
 ngo cirse-cirsil lei Arbosobo ca leil perniar mel leil koxl.
- <sup>9</sup> Arbosobo, ni eilmel bei a ngo cirse-cirsil lei ni leil nawo nia.  
 Ni ddei mi ddei mel yarzi seir,  
 yel ngo lei ni ddei, ni kebal ca mel dax bbe teixl lei  
 cassor-worssor mel meixsaer qir leil,  
 ni ddei mi ddei leil koxl nia.

## Medeil Su Ca Mel Ddei Zuixl

Daxlweixl vaexr ca leil mul gger dae sipi. Caxlgo caxl su mel leil guaxr su ddei leil jia gger. Maxrhala ddei diuxlzi sser. (Diuxlzi eil ddei mel huade tiuxl labox, ca cirmelmel a zzirdae a, Daxlweixl Yueguixl ddei leil zi xixl lei a, huade tiuxl car a dder diuxlzi eil ddei sser.)

**53**<sup>1</sup> Medeil su ca mel nixmox zzar xiar dae a bbeix: “Arbosobo nr zza.”

Yaa maelmaerjjia lei cirdoxr lei nr seir,  
yarzi vuxryixrddo zuixl hal mel bei;  
seirseir bei su cir ddei lei nr zza.

<sup>2</sup> Arbosobo merlabbor hher dae a,  
middurbbor ca mel olnolddu su zza zza bbe i.  
Yar leil zo a yar leil qiuxr su zza zza bbe i.

<sup>3</sup> Yaa cirddei-hanga lei yar dax bei nr mae;  
maelmaerjjia lei nixmox neix su loxr a;  
seirseir bei su nr zza,  
cir ddei lei bax nr zza.

<sup>4</sup> Yarzi gexrddo bei su mel azo lei nr saexl a ngo?  
Yaa zzo zzor mel sael a ngo ddei cassor-worssor mel leil zzor,  
ngo leil nr qiuxr.

<sup>5</sup> Arbosobo mel ni leil dir lei a cirgo a hher dae ca mel leil seixl zil  
gger a,  
yaa ddei hherggar mel bbe kae gger a;  
yel yaa dder gexr ddu nr zza car lei, yarzisael gexr.  
Arbosobo mel yaa leil piar pixl gger a,  
yel ni yaa leil qiaxrmeix zzi nr zza lol a.

<sup>6</sup>Yirsaexllixl su mel leil jiuxl su ddei Xi'a zzi gga ddux lei lol nia!  
 Arbosobo yar ddei cassor-worssor si ssu si hal mel leil jiuxl xixl  
 lei car,  
 Yargel <sup>u</sup>ddei giedae ca hherdder Yirsaexllixl su ca mel ggese  
 nia.

### Seirpor Leil Qiuxr A, Guaxr Dae Lol

Xifuxr su ca ddei lei a Sarloxr leil bbeix: “Nrnga Daxlweixl ngua  
 dax halmaex pa hher dae zzarmar!” bbeix gger halcar a,  
 Daxlweixl ca leil mul gger sipi eil zul vaexr, caxlgo caxl su mel  
 leil guaxr su ddei leil jia gger. Heixl zex zza  
 caxlgo bbaex labox ddei sser a, bbaex dax dae.

**54** <sup>1-3</sup>Kebal su ca mel ngo leil dir lei,  
 yarzi gexrddo bei su ca mel ngo leil bei zil gger niazzir,  
 yaa meixddurga gga mel Arbosobo nr zza.

Yel Arbosobo, ni leil qiuxr,  
 ni ddei mi ddei leil sser dae a,  
 ngo leil jiuxl la;  
 si ngo leil goxl a, ni ddoddo mo bei a,  
 ngo leil bbeix jjiu la;  
 ngo ni dax ddar biar dae mel leil noni gger la;  
 ngo meir gga biar dae ddar mel leil, seilseir a noni gger la.

<sup>4</sup>Arbosobo mel ngo leil beijjiu su ddei a;  
 ngo olga ddei leil guaxr su ddei a.

<sup>5</sup>Yar ngo leil dir su mel yarzi gexrddo bei dae mel dax zox dae a,  
 yaa leil bei koxl xixl nia.

Ni leil qiuxr, ni, ni leil ddarzziddo mel dax zox dae a,  
 yaa leil bei zil jjia gger.

<sup>6</sup>Ngo ggegge-sese a ni leil zi nia.

---

<sup>u</sup>14:7 Yargel Yargel nei Yirsaexllixl hherdder ca cir ddei a nga.

Yihexrhuaxr, ngo ni mi ddei leil bbeixzae gger nia;  
ni mi ddei mel yarzi seir.

<sup>7</sup> Yar ngo leil cirza-hanga goxrsol-goxrnaxr mel gga jiuxl teixl lei;  
ngo lei ngo leil dir su mel ddaexr wor nr xie ggie malma mia a.

Arbosobo Dax Ddar Biar A, Beijjiu Lol Qiuxr

Daxlweixl vaexr ca leil mul gger dae sipi. Caxlgo caxl su mel  
leil guaxr su ddei leil jia gger. Heixl zex zza  
caxlgo bbaex labox ddei sser a, bbaex dax dae.

**55** <sup>1</sup> Arbosobo, ni leil qiuxr, seilseir a ngo ni dax ddar biar dae  
mel leil noni gger la;

pahher dae a ngo ni leil qiuxr dae mel leil no-nr-ni tor nr bei!

<sup>2</sup> Seilseir a ngo leil noni a, ngo leil ddarkoxl la.

Ngo cix a, nixmox zzar zzasol a dder ae dae a.

<sup>3</sup> Ngo eine cix a mel, ngo leil dir su mel ae doxr dae, nixmox neix  
su mel ngo leil ggux ci a nga arddeir a;  
yaa mel goxrsol-goxrnaxr mel ngo leil ddeix lol,  
seifu-faexfaexmo ngo leil bixr.

<sup>4</sup> Ngo nixmox taex yarzi no,  
ngo yarzisael si leilei a gexr.

<sup>5</sup> Ngo gexrgexr-zizimo, lixlix-laexlaexmo,  
cirgge-circir lei ssurssulssur.

<sup>6</sup> Ngo bbeix: “Ngo dderbel sael a ddoleixr niar dae bbaexl,  
ngo dder bbiu du si a wornol ssi cexr.

<sup>7</sup> Ngo arsae bei lei vimirmir bbiu mal a,  
mipaerbbae gga xixl.

<sup>8</sup> Ngo arsae bei lei ggerggelgger pahher ggie pa mal,  
sizzaexr-siveil hherdder goxrsol-goxrnaxr mel leil pahher.”

<sup>9</sup> Ngo mel zzi gga yarzi gexrddo bei ggie nei zzi dax zex ggie mia  
a;



yel Seirpor, ni leil qiuxr, nixmox neix su ca mel bei niazzir dae  
mel bei nr cexr lol,

yaa leil ddar ciryoxxr a nr te lol!

<sup>10</sup> Yaa merxixl-merni zzi weixrqiaxr ddei leil ssi za dae;  
zzi ddei gga lei zuixl nei yarzi gexrddo mel zza.

<sup>11</sup> Zzi gga yarzi gexrddo hal mel zza;  
zzijiul gga lei ca leil ci,  
ca leil fur hal mel zoxlzoxl a zza.

<sup>12</sup> Nael ngo leil dir su mel ngo leil hie no nr nga bbe!  
Ngo leil dir su mel nga arddeirnga a, ngo halae sser ssei ddo;  
halae ngo leil vuxryixr su mel ngo dax olvaer nr nga bbe!  
Ngo leil vuxryixr su mel nga arddeirnga a, ngo yaa leil pahher  
dae cexr.

<sup>13</sup> Xiar lei xiar nr ci, ni a bbe!  
Ni mel ngo dax ciryoxxr a nga, ngo ddei carbeix,  
ngo dax gaxggor seir zzir ddei a.

<sup>14</sup> Niul zoxlzoxl a zzi dax ddar biar a lei yarzi biar kor;  
niul ca mel dax cirgo a Arbosobo leil zi ggie xi gga ssi.

<sup>15</sup> Yaa hher ggie nei yaa nixmox zzar lei yarzi gexrddo,  
yel yaa leil neixleixrsael si lol nia,  
yaa leil gol dae seir dder ca si ho a hher ggie zei lol nia.

<sup>16</sup> Nael ngo leil bbeix ci a mel,  
ngo Arbosobo leil qiuxr nia,  
Yihexrhuaxr dder arsae bei lei ngo leil jiuxl.

<sup>17</sup> Ngo eilmerxixl, eilneixrnehe, eilnirggu lei cix nia, aenge nia;  
yar arsae bei lei ngo qiurte ddei leil noni.

<sup>18</sup> Ngo dax zex su ca mel yarzisael miur,  
yel yar ngo leil dir su mel leixrga gga ngo olga ddei leil vae xixl  
lei a, ngo leil jiuxl,  
ngo leil zzasoso a nga lol.

<sup>19</sup> Gier-nr-box, Arbosobo leil i nr du nei nr gexr su ca hal mel,

halcar tortor dder zza dae Arbosobo ddei bbejjiur a dder yaa  
leil goxr sol lol.

<sup>20</sup> Halleix ngo carbeix ddei yar ddei xiahor-carbeix leil dir,  
yar armael bbeix har zaxr goxr mel sael a nr bei.

<sup>21</sup> Yar meir ddei zzael, ssuvi mei dae mel sael a maeryoxlyoxlmo,  
(ddar biar teixl lei mel hazzi noni zae);  
nixmox taex zzael, arsae zaxlddaexr nia xiar ji dae.  
Yar ddar biar dae mel zzael, bir cae mel leil lei norlix;  
nga zzael, die teixl lei dae altor baex sael a nga.

<sup>22</sup> Ni, ni goxr sol dae mel, Yihexrhuaxr leil jia gger nia,  
yar arsae bei lei ni leil guaxr;  
yar arsae bei lei bota ddu nr zza ca seir mel leil de nr zeil lol.

<sup>23</sup> Arbosobo, ni arsae bei lei nixmox neix su ca mel leil,  
ca leil si lol bbeddur gga zeil lol;  
ca seixl su nei ca fur su mel arsae bei lei olga cir peix lei gol wo  
nr ddo?  
olga si nr var, nael ngo ni leil koxl nia.

Arbosobo Leil Koxl A, Arsae Bei Lei Nr Gexr

Feilixlsixl su ca mel Jiatexl mermi Daxlweixl leil ssu  
gex dae a. Halcar a yar yarzi middux sipi eil  
zul vaexr. Cix dae, vurneixl dae diuxlzi sser.

**56** <sup>1</sup> Arbosobo, ni leil qiuxr,  
ngo leil zoxlnixr la, ca mel ngo leil ixl ji nrsulsul,  
cirni-lorbba ngo leil ddaexr, ngo leil ggux ci.

<sup>2</sup> Colcolmo ngo leil ddaexr lei su mel yarzi miur,  
yel ngo leil dir su mel cirni-lorbba ngo leil ixl ji nrsulsul.

<sup>3</sup> Ngo gexr car, ni leil koxl nia.

<sup>4</sup> Ngo Arbosobo leil koxl;

ngo yar ddei ddar mel leil bbeixzae gger nia;  
 ngo Arbosobo leil koxl a, arsae bei lei nr gexr.  
 Ca mel ngo leil arsae bei cexr bbeixleir?

<sup>5</sup> Yaa bbecir-bbeni ngo ddei ddar mel nr hoxr bbeix mal gger,  
 yaa xiar dae hazza lei ngo leil ke niazzir.

<sup>6</sup> Yaa cirgo a pahher dae a, ngo ddei cibbi leil ker i dae;  
 yaa xia dae a, ngo leil ke zil gger niazzir.

<sup>7</sup> Yaa zuixl bei a, holbbaexl pato ddo a ngo?  
 Arbosobo, ni leil qiuxr, seifu faex du lei a,  
 ca eilmel leil si jjia lol.

<sup>8</sup> Ngo goxr sol dae mel ni saexl;  
 ni leil qiuxr, ngo ddei meixbbix mel,  
 ni ddei zzi bei teixl lei daexlzi gga ji dae.  
 Nr nga eilmel doxl ni ddei sul ber leil vaexr deix dae ho a  
 zzarmar?

<sup>9</sup> Ngo ni leil qiuxr dae car,  
 ngo leil dir su mel doxdoxsi jjixr nia.  
 Arbosobo ngo leil beijjiu dae mel ngo saexl.

<sup>10</sup> Ngo Arbosobo leil koxl,  
 ngo yar ddei ddar mel leil bbeixzae gger nia;  
 ngo Yihexrhuaxr leil koxl,  
 ngo yar ddei ddar mel leil bbeixzae gger nia.

<sup>11</sup> Ngo Arbosobo leil koxl a, arsae bei lei nr gexr.  
 Ca mel ngo leil arsae bei cexr bbeixleir?

<sup>12-13</sup> Arbosobo, ni mel ngo leil olga jiuxl a, nr si lol.

Ni ngo leil jiuxl a, de nr zeil lol;  
 ngo leil olga zza bbelele ddei gga, ni meixsaer qir leil ssi dae  
 lol.

Yel ngo ni dax bbeix har goxr mel bei ci nia;  
 ngo ni leil nawo a, ni leil zi nia.

## Seirpor Leil Beijjiu La Qiuxr

Daxlweixl Sarloxr leil pa a doxzi gga pahher dae. Halcar a yar yarzi middux sipi eil zul vaexr. Xiboxrlaexr su ddei liuxrxixrge diuxlzi sser. (Diuxlzi eil yoxr mel Moxrxi dax cirdae dder zei lei a.)

**57** <sup>1</sup> Arbosobo, ni leil qiuxr,  
ngo leil zoxlnixr la, ngo leil zoxlnixr la!

Ngo nixmox zzar mel ni leil koxl.

Ngo ni ddoleixr woxrke hher dae a, ni leil koxl nia,  
goxrsol-goxrnaxr mel goxr jiexr zzezze ci.

<sup>2</sup> Ngo mu zzir ggie hher dae Arbosobo leil qiuxr nia,  
hherdder ngo leil cirza-hanga bei har gger su Arbosobo ddei nga a.

<sup>3</sup> Ngo leil ixl ji niazzir su ca hal mel ngo leil hie no car,  
Arbosobo arsae bei lei merlabbor hher dae a,  
ngo leil seir lol a ngo leil jiuxl.  
Yar ngo leil perniar, yar bei dae mel yarzi koxlsseiddo.

<sup>4</sup> Ngo leil dir su ca mel ngo leil weixr gex dae;  
yaa mel, ca zzor su hhemar mel sael a nga.  
Yaa ddei ser mel mel, zzi deil a sser ddu teixvilvil mel nei jir  
mel sael a nga;  
yaa ddei lo mel mel, zzi deil ddu altor teixvilvil sael a nga.

<sup>5</sup> Arbosobo, ca mel ni leil i du a, bir merlabbor maelmaerjjia leil i  
du leixl lol nia,  
ni ddei bbobbolbbo ddei middurbbor cirmaex-hanga zoxl gex  
dae lol nia.

<sup>6</sup> Yaa ngo qihher ddei leil xiaxl a, ngo nixmox zzar zzasol lol;  
yaa ngo xilmeir leil bbeddur giexl har zaxr gger,

nael doxgoxleixr yaa ddei yaa halmaex de ji dae a.

<sup>7</sup> Arbosobo, ngo nixmox ddei velver a ni dax mae, velver a ni dax mae;

ngo caxlgo caxl nia,  
ngo ni leil caxl zae gger nia!

<sup>8</sup> Ngo ddei xiu ddei, ni zucur nia!

Caxlgo bbaex labox nei yoxrcixl peix labox mel, nia zucur nia!  
Ngo armael lei neixrneixr-sisi zucur nia.

<sup>9-10</sup> Seirpor, ni ca leil perniar dae mel mel, merlabbor dax ddeix ci;

ni yarzi ddarzziddo bei dae mel mel, zico dax ddeix ci.  
Yel ngo cassor-worssor mel gga ni leil nawo nia;  
circuxr-hanga gga ni leil caxl zae gger nia.

<sup>11</sup> Arbosobo, ca mel ni leil i du a, bir merlabbor maelmaerjjia leil i du leixl lol nia,  
ni ddei bbobbolbbo ddei middurbbor cirmaex-hanga zoxl gex dae lol nia.

Arbosobo Leil Qiuxr A, Nr Seir Bei Su Ca Mel Leil Faxr Lol

Daxlweixl ddei yarzi middux sipi. Caxlgo caxl su mel leil guaxr su ddei leil jia gger. Xiboxrlaexr su ddei liuxrxixrge diuxlzi sser.  
(diuxlzi eil yoxr mel Moxrxi dax cirdae dder zei lei a.)

**58** <sup>1</sup> Ca leil guaxr su mel, nia arjjiuljjiu a hher dae a dder yarzi bbaehhexhex mel dax hoxr a ngo?

Nia ca leil ser car, holbbaexl hoxrhoxr mel dax zox dae a ngo?

<sup>2</sup> Nr nga, nia nixmox zzar nr seir mel xiar ji dae;  
nia ddei leixrhher mel middurbbor yarzi gexrddo hal mel bei.

<sup>3</sup> Nixmox neix su ca mel, xiu teixl lei a qie dder Arbosobo dax nr naer;  
yarma xilbe gga ddux lei a qie dder jjiumo ssi cox, ddar jiar te.

<sup>4</sup> Yaa mel duxr zza sae hal mel sael a nga;  
cirgge-circir lei duxr zza.

Yaa mel nolba ddaexrcir dae, bbejjiur nr xie yarzi duxr sae hal  
mel sael a nga.

<sup>5</sup> Neir bei su mel ddei qiurte ddei leil no-nr-ni,  
neir jjiexr dae ddar yarzi guaxrzoxr hal mel leil lei no-nr-ni.

<sup>6</sup> Arbosobo, ni leil qiuxr,  
yaa meir gga ser mel deil me gger!

Yihexrhuaxr, ni leil qiuxr,  
hhemar yarleixl ddei zzae mel deil bbae gger!

<sup>7</sup> Yaa leil ajjix pe dae mel sael a mier lol nia;  
yaa jir ddaexr car, jir oldde baex ngaxl te lol nia.

<sup>8</sup> Yaa leil bbernaexlbix maex goxr ddur mel sael a mier lol nia,  
yoxl ssormaer mel ji pixl a merni mia nr goxr seir anix mel  
sael a nga lol nia.

<sup>9</sup> Nia alcur mel adoxl zi, allur taex lei lemel nr mael seir,  
yar mersisixl sixl lol a, bbiu dae nei nr bbiu dae mel cirgo a jia  
pixl gger nia.

<sup>10</sup> Nixmox seir su ca mel zuixl bei su ca mel leil bei koxl xixl ggie  
mia a dder yarzi ggese,  
yaa nixmox neix su ca mel ddei sirnilni mel gga qihher cir nia.

<sup>11</sup> Yel ca mel: “Nixmox seir su ca mel leil seirseir bei koxl xixl nia;  
middurbbor yarzi ca leil ser su Arbosobo ar ddei zza bbe,” eine  
bbeix nia.

### Arbosobo Leil Qiuxr A, Guaxr Dae Lol

Sarloxr ca leil miardal a, Daxlweixl hher ggie xi gga ker i lei lol a,  
yar leil seixl niazzir. Halcar a Daxlweixl yarzi middux sipi eil zul  
vaexr. Caxlgo caxl su mel leil guaxr su ddei leil jia gger.

Xiboxrlaexr su ddei liuxrxixrge diuxlzi sser. (diuxlzi  
eil yoxr mel Moxrxi dax cirdae dder zei lei a.)

- 59**<sup>1</sup> Ngo ddei Arbosobo, ni leil qiuxr,  
 ngo leil ngo leil dir su mel dax jiuxl teixl la,  
 ngo leil mu ggie hher dae lol a,  
 ngo leil dir su mel dax jiuxl teixl la.
- <sup>2</sup> Ni leil qiuxr, ngo leil yarzi larhor zuixl bei su ca mel dax nei ca  
 seixl meixr su mel dax jiuxl teixl la.
- <sup>3</sup> Yaa mel pahher dae a, ngo leil ke zil gger niazzir;  
 yarzi sexr ca mel hher pex du lei a, ngo leil deil lei.  
 Yihexrhuaxr, eilmel mel ngo bei cox a zzi nr nga,  
 ngo zuixl bei a zzi nr nga.
- <sup>4</sup> Ngo azo lei bei nr cox bbeixarnar,  
 yaa cirza-hanga bei har zaxr dae a beix mal lei a ngo leil deil  
 lei;  
 ni leil qiuxr, ha du la a, arleixr i a, ngo leil beijjiu la.
- <sup>5</sup> Meixr hazza leil guaxr su Arbosobo Yihexrhuaxr;  
 ni mel Yirsaexllixl su ddei Arbosobo a.  
 Ni leil qiuxr, ha du la a, Yoxrtaexl su nr nga ca mel leil faxr!  
 Ca leil fur meixr nixmox neix su ca mel leil zoxlnixr nr ssa.
- <sup>6</sup> Yaa eilmerxixl jjixr lei a,  
 anol sael a lu dae a,  
 zzi ddei leil zaza-lili ssi za dae.
- <sup>7</sup> Yaa meir gga yarzi gexrddo ddar te teixl lei,  
 meir gga altor hher ji dae sael a nga;  
 yaa bbeix: “arseir bbejjiur var bbeixleir?”
- <sup>8</sup> Nael Yihexrhuaxr, ni arsae bei lei yaa leil vaessi;  
 ni circuxr-hanga leil vaessi nia.
- <sup>9</sup> Ngo leil worni lol su Arbosobo,  
 ni mel ngo ddei pahher ggie,  
 yel ngo arsae bei lei ni leil koxl.
- <sup>10</sup> Ngo ddei Arbosobo mel ngo leil perniar a,  
 ngo leil zi lei nia;  
 yar ngo leil ngo leil dir su mel leil bei koxl xixl ggie mia lol nia.

- 11 Yaa leil seixl nr ddo;  
nr nga a, ngo ddei cassor-worssor mel hol-nr-cir var.  
Seirpor, ni mel ngua leil dir su mel leil bbiur gex gger su ddei nga  
a;  
ni leil qiuxr, ni ddei bbesur mel sser a, yaa leil ssi bbeir lol;  
halae ca mel yaa leil i zeil lol.
- 12 Yaa meir gga ddar biar dae mel dder zuixl mel leil biar,  
halae ca leil hie no, ca leil fur,  
yel yaa col zildu car, yaa leil baxlguirle lol nia.
- 13 Ni leil qiuxr, seifu faex du lei a yaa leil mier lol, cirza lei nr zza  
lol;  
yaa leil ni Yargel ddei giedae ca mel leil guaxr dae,  
middurbbor cirmaex-hanga zzezze lei guaxr dae saexl lol.
- 14 Yaa eilmerxixl jjixr lei a, anol sael a lu dae a,  
zzi ddei leil zaza-lili ssi za dae.
- 15 Yaa ssicixl-ssige ssi doxr dae a, zzor ddu zo.  
Zzor nr bbox arddeirnga a dder bbialil-bbialor me.
- 16 Nael, ni mel ngo ddei koxl ggie bei goxr a;  
ngo goxrsol-goxrnaxr pex dae car,  
ni ngo ddei pahher ggie bei goxr a.  
Yel ngo ni ddei wor mel leil caxl zae gger nia;  
eilneixr-nehe worcixl-worni ni ca leil perniar dae mel leil caxl  
nia.
- 17 Ngo leil warni lol su Arbosobo,  
ni mel ngo ddei pahher ggie,  
ngo leil seir lol su Arbosobo ddei nga a;  
yel ngo ni leil caxl zae gger nia.



Seirpor Leil Qiuxr A, Jiuxl Lol Baexrhexrhua ddei diuxlzi sser.

Daxlweixl lazzarmo nr zex agala gga, Yallaxr dax nei Sorba zzirmar Yallaxr dax zaxlddaexr car a, Yueya za xixl lei a, cor zza lagiex gga Yirdo leil ddaexr a, ca cir meir nr du seixl zil gger a. Halcar a Daxlweixl yarzi middux sipi eil zul vaexr a ca leil zza lol. Caxlgo caxl su mel leil guaxr su ddei leil jia gger. Baexrhexrhua ddei diuxlzi sser. (diuxlzi eil yoxr yarzi noni zae, zzi leil seissaexr a caxl, bbeixsael ggie baxl a caxl.)

- 60**<sup>1</sup> Arbosobo, ni ngua leil piar pixl gger a, ngua leil ddaexr wor nr xie lol;  
 ni ngua leil seifu faex goxr a;  
 eilcar ni leil qiuxr, ngua leil halleix sael a seir lol la!
- <sup>2</sup> Ni middur ddei leil le lol, halae zex bbeixr lol;  
 middur ddei mel le dae, yel ni leil qiuxr, zex bbeixr dae ddei mix gex xixl lol.
- <sup>3</sup> Ni, ni ddei cassor-worssor mel leil goxrsol-goxrnaxr pex dae lol;  
 ni ngua leil ca leil zzizzi-zzaezzae nga lol var zzibbaer mel dda lol.
- <sup>4</sup> Ni zaxlddaexr leixl a bil dae mae co ni leil i du su, ni leil gexr su ca mel leil gger a,  
 yaa leil halmaex pa mal a, yaa leil dir su ca mel ddei jir mel leil pahher cexr lol.
- <sup>5</sup> Ni leil qiuxr, ngua leil ddarkoxl la,  
 ni leixrhher yo bbor ngua leil jiuxl la,  
 yel ni perniar dae ca ddei leil jiuxl wo lol.
- <sup>6</sup> Arbosobo yar ddei seirceix-seirmaer xi gga hher dae a bbeix:  
 “Ngo ggese nia,  
 ngo Sixljixl mermi ddei bbe kae gger nia;  
 Suxge lagiex ddei leil liaxr nia.

<sup>7</sup> Zilixl mermi ddei mel ngo ddei a;  
 Marnaxrsi mermi ddei mel ngo ddei a;  
 Yirfaxrlixr mermi ddei mel ngo oldde leil koxl ddu a;  
 Yoxrdaxl mermi ddei mel ngo ddei quexrlixl zza zzargger a.  
<sup>8</sup> Moxrya mermi ddei mel ngo ggecir ci lar;  
 ngo qixnex zze Yirdo mermi piar mal nia;  
 ngo Feilixlsixl su mel leil deil leixl gger a, yel worcixl-worni caxl  
 nia.”

<sup>9</sup> Arseir ngo leil zzi yarzi ssei ddei gga hier dil cexr bbeixleir?  
 Arseir ngo leil Yirdo mermi hier mal cexr bbeixleir?  
<sup>10</sup> Arbosobo, nr nga ni doxl ngua leil piar pixl gger a zzarmar?  
 Arbosobo, ni ngua ddei meixr mel dax cirgo a nr ssi a ngo?  
<sup>11</sup> Ca mel mel ngua leil beijjiu guaxr-nr-zoxr,  
 yel ni leil qiuxr, ngua leil beijjiu a,  
 ngua leil dir su mel leil ddaexr ssi.  
<sup>12</sup> Ngua Arbosobo leil koxl a saelnei ddoddo mo bei cexr,  
 yar arsae bei lei ngua leil dir su mel leil ddaexr leixl gger nia.

### Seirpor Leil Qiuxr A, Guaxr Dae Lol

Daxlweixl vaexr sipi. Caxlgo caxl su mel leil guaxr su ddei leil jia  
 gger. Heixl zex zza caxlgo bbaex labox ddei sser a, bbaex dax dae.

**61** <sup>1</sup> Arbosobo, ni leil qiuxr, ngo qiuxr dae mel leil noni;  
 ngo ni dax ddar biar dae mel leil seilseir a noni!

<sup>2-3</sup> Ni mel ngo ddei pahher ggie bei goxr a;  
 ngo, ngo leil dir su mel leil pahher ggie weixrqiaxr ddei bei goxr  
 a.

Yel, ngo nixmox zzar zzasol car, middurbbor vimir zzir ggie  
 cirdae a, ni leil qiuxr nia.

Ni leil qiuxr, ngo leil hier dae a bir ngo leil mu leixl legelbbe  
 taex leil ddeix.

- <sup>4</sup> Ngo arddolcar ci a lei ni ddei Sexlmuxl gga hher nia!  
 Ngo ni leil koxl a, ni ddoleixr woxrke pahher nia.
- <sup>5</sup> Arbosobo, ni ngo ni dax bbeix har dae mel leil bbejjiur a;  
 ni, ni leil gexr, ni leil i du su ca mel li wo mibbe mel ngo leil  
 gger.
- <sup>6</sup> Ni zzirmar ddei leil olga si dax lol nia,  
 yar leil hormo zeix zzezze gol ci lol nia.
- <sup>7</sup> Yar leil cirse-cirsil lei Arbosobo meixsaer qir leil cux dae lol nia;  
 ni yar leil perniar a, ni yarzi koxlsseiddo bei dae mel dax zox  
 dae a, yar leil guaxr nia.
- <sup>8</sup> Eine nga a, ngo cirse-cirsil lei ni mi ddei leil caxl zae gger nia,  
 bbecir-bbeni ngo ni dax bbeix har dae mel bei ci nia.

Ngo Nixmox Ddei Arjjiuljjiu A Arbosobo Leil Lar Xia

Daxlweixl vaexr sipi. Yiduxlduixl bei dae mel dax zox dae.  
 Caxlgo caxl su mel leil guaxr su ddei leil jia gger.

**62** <sup>1</sup> Ngo nixmox ddei arjjiuljjiu a Arbosobo leil lar xia;  
 ngo leil jiuxl su ddei mel yar nga a.

<sup>2</sup> Yar larnei ngo ddei legelbbe, ngo leil jiuxl su;  
 yar mel ngo ddei koxl ggie, ngo arsae bei lei de ze i nr var.

<sup>3</sup> Nia ca ar ddei leil dir a arddolcar ci niazzir dae neil?  
 Yar mel lu zzae dae nei de ze i niazzir dae cubial mel sael a nga.

<sup>4</sup> Yaa zzi dax zzibbe a, yar leil vaervaerpor bei ggie gga ze i lei;  
 yaa mel ca fur meixr. Meir gga si leil seir lol dae bbeixarnar a,  
 nixmox zzar zzael si leil hie no dae.

<sup>5</sup> Ngo nga loxia dae ddei mel Arbosobo dax lei,  
 yel ngo nixmox ddei arjjiuljjiu a Arbosobo leil lar xia.

<sup>6</sup> Yar larnei ngo ddei legelbbe, ngo leil jiuxl su;

- yar mel ngo ddei koxl ggie, ngo arsae bei lei de ze i nr var.
- <sup>7</sup> Arbosobo mel dder ngo leil jiuxl su, ngo leil mi ddux lol su;  
Arbosobo mel dder ngo ddei legelbbe, yar ngo leil worni lol;  
yar mel ngo ddei pahher ggie.
- <sup>8</sup> Nia ca maelmaerjia arddolcar lei yar leil koxl nia,  
nixmox zzar xiar dae mel yar meixsaer qir leil biar nia;  
Arbosobo mel niul ddei pahher ggie a.
- <sup>9</sup> Quexrlixl nr zza su ca mel baexr a ca mu dae lalnga;  
quexrlixl zza su ca mel lei baexr a ca mu dae lalnga;  
yaa leil cex gga ji a lei cex du lei nr ddo,  
yaa bir seixl ho teixl lei mel leil lei la leixl.
- <sup>10</sup> Quexrlixl zza a si leil ci nr ddo;  
si dax su ssi a be lol niaxiar nr ddo;  
zzirbae nei zzaegu naxrcixlcixl mel miur dax a lei, hal mel leil  
koxl nr ddo.
- <sup>11</sup> Arbosobo cir boxl nr boxl bbeix a ngo bbejjiur a;  
hherdder bbesur mel mel Arbosobo ddei a.
- <sup>12</sup> Seirpor, ca leil perniar dae mel lei ni dax lei,  
ni mel ca mel bei dae mel dax zox dae a yaa leil bei koxl xixl.

### Arbosobo Leil Mia Niazzir

Daxlweixl Yoxrdaxl mermi hierbolpae gga  
hher dae car a, sipi eil zul vaexr.

- 63** <sup>1</sup> Arbosobo, ni mel ngo ddei Arbosobo a;  
ngo zabbar-seilseir a ni leil zo a ni leil qiuxr nia;  
ngo ajjix nr zza ggie hher dae a yarzi bei le,  
ajjix sixl mel sael a zixlkur-zixllixl ni leil jjiur,  
yarzi ni leil mia loxia.
- <sup>2</sup> Ngo ni ddei xi gga ni leil yarzi mia loxia a mel,

ni ddoddo mo bei ggie nei ni ddei bbobolbbo mel leil mia  
niazzir a nga arddeir a.

<sup>3</sup> Ni ca leil perniar dae mel mel bir olga leil lei seir leixl,  
yel ngo meir gga ni leil caxl zae gger nia.

<sup>4</sup> Ngo gol dae seir car, ni leil bbeix zae gger nia;  
ngo ni mi ddei leil koxl dae a, leixrhher zze bil dae a, ni dax  
ddar biar nia.

<sup>5-6</sup> Ngo yixrgguci leil hher dae car, ni leil holcir dae;  
eilmerxixl, ngo ni leil holcir dae a,  
ngo nixmox zzar dder yarzi ggese,  
hherdder biu nei cae zzor bbox sael a nga,  
ngo meir gga lei ggegge-sese a ni leil caxl zae gger nia.

<sup>7</sup> Halleix ni mel ngo leil beijjiu,  
yel ngo dder ni ddoleixr woxrke pahher dae a ggese a caxlgo  
caxl.

<sup>8</sup> Ngo nixmox taex ni dax naelnaer a mae dae,  
ni leixrhher yo bbor ngo leil zar gex dae.

<sup>9</sup> Nael ngo leil zo a ngo leil bei zil gger niazzir su ca mel,  
arsae bei lei middurzzar zei nia;

<sup>10</sup> yaa leil arsaе bei lei altor sser a seixl zil gger nia,  
veimar mel zzor ji nia.

<sup>11</sup> Nael, zzirmar ddei mel Arbosobo leil koxl dae a ggese nia;  
yar leil dor dae a bbeix har zaxr su mel lei yar leil bbeix zae  
gger nia;  
ca fur su mel ddei meir mel nael, ddaexrcir gger nia.

Seirpor Leil Qiuxr A, Guaxr Dae Lol

Daxlweixl vaexr sipi. Caxlgo caxl su  
mel leil guaxr su ddei leil jia gger.

**64** <sup>1</sup> Arbosobo, ngo cix a ae dae car, ni leil qiuxr,  
ngo qiuxr dae mel leil noni;

- ni leil qiuxr, ngo olga ddei leil guaxr dae a,  
ngo leil vuxryixr su mel ngo leil zux wo nr xie lol.
- <sup>2</sup> Ni leil qiuxr, ngo leil kerzi du la a,  
ngo leil yarzi gexrddo bei su ca mel nr seir xiar dae mel gga  
jiuxl teixl la.  
Zuixl bei su ca mel ngo leil ke niazzir dae ddei gga jiuxl teixl la.
- <sup>3</sup> Yaa ddei lo ddei mel altor sael teix ho mel sael a nga,  
yarzi duxr ddar mel te teixl lei,  
jir baex arddolmaex ddaexr mal nia i har ho sael a nga.
- <sup>4</sup> Yaa seir a bota ddu lei nr zza ca hal mel leil ker ddaexr,  
yaa neixleixrsael yar leil ddaexr a lei, gexr nr saexl.
- <sup>5</sup> Yaa zzi leil nixmox dder vaer a, si leil ke ddu yarzi gexrddo xiar  
har zaxr;  
yaa zzi dax zzibbe a si lei ker xiagl a bbeix: "Arseir mia xie  
bbeixleir?"
- <sup>6</sup> Yaa si leil ke ddu yarzi gexrddo hal mel xiar a bbeix: "Niul xiar  
teixl lei mel arseir lei saexl nr var." eine bbeix.  
Ca nixmox zzar xiar dae mel arseir lei xiar ci nr xie.
- <sup>7</sup> Nael Arbosobo jir sser a yaa leil ddaexr nia;  
neixleixrsael jir baex yaa leil ddaexr no gger nia.
- <sup>8</sup> Yaa arsae bei lei de ze, yaa armael lo ddei yaa leil ke;  
ha yaa leil mia su mel dder oldde taex veil dae.
- <sup>9</sup> Cassor-worssor mel maelmaerjjia lei gexr nia,  
Arbosobo miar bei dae mel leil biar nia,  
halae yar bei dae mel leil xiar nia.
- <sup>10</sup> Seir a bota ddu lei nr zza su ca mel Yihexrhuaxr leil koxl nia,  
yar leil koxl dae a ggese nia;  
ha nixmox seir su ca mel dder yar leil bbeix zae gger nia.

## Bbeixzae Gger, Nawo

Daxlweixl vaexr caxlgo. Caxlgo caxl su  
mel leil guaxr su ddei leil jia gger.

- 65** <sup>1</sup> Arbosobo, Xi'a zzi gga ca mel lei ni leil xia dae a, ni leil  
bbeix zae gger;  
ni dax azo bei nia bbeix har goxr mel lei bei ci nia.
- <sup>2</sup> Ni dax ddar biar dae mel leil noni gger su Seirpor,  
ca maelmaerjjia lei ni dax lei nia.
- <sup>3</sup> Zuixl ddei ngo leil bei leixl gger a;  
nael ngua bei cox dae mel leil bbeix ci a mel,  
ni maelmaerjjia leil ssoxrsuxl.
- <sup>4</sup> Ni tiur teixl lei a, ni dax naer lol,  
ni ddei zzaexggu gga hher lol ca hal ddei dder ni yar leil seir  
lol!  
Ni hher ggie hherdder ni ddei xi gga seirseir mel ngua leil  
nixlodda lol.
- <sup>5</sup> Ni, ni ddei bbaehhexhhex mel dax zox dae a,  
ngua ni dax ddar biar dae mel leil noni a,  
murgurgur mo bei a ngua leil bei leixl lol, ngua leil jiuxl.  
Middurbbor cassor-worssor mel nei mer woxrke ca hazza lei ni  
leil ddarzzi a ni leil koxl.
- <sup>6</sup> Ni mel yarzi ddo;  
ni armael ddei wor sser a,  
worga mel leil vever a zza dae lol.
- <sup>7</sup> Ni neixvi mel leil nei bolaxl mel leil porpolpor nr me lol;  
cassor-worssor mel leil bbialil-bbialor nr me lol, arjjiuljjiu a  
hher dae lol.
- <sup>8</sup> Mer woxrke zzarvul-zzarmae hher dae ca mel lei ni ddoddo mo  
bei dae mel leil mia a gexr a, ni leil i du;

ni merni ddux lei ggie cirdae a merni lal ggie zzezze ca mel leil ggese a caxlgo caxl lol.

- <sup>9</sup> Ni middur ddei leil guaxr dae a almer lei bei lol a, naxrcixl lol.  
Arbosobo ddei lazzarmo gga ajjix ni bbi a;  
ni middur leil ajjix her a, ca mel leil cirza-hanga loxlmoxr bei zaxr gger.
- <sup>10</sup> Ni almer mel middurbbor ggerjiux mel leil her,  
ggerwor mel leil lei bei lol, bbaelbbae a loxr lol,  
yoxl almer yelye lei lol a middur ddei leil pusar lol,  
halae middur ddei leil ner du lei hazza leil lei seir lol.
- <sup>11</sup> Ni bbecir-bbekoxl lei loxlmoxr naxrcixl lol,  
ha ni ssi ci ggie dder cirza-hanga lei miur lol.
- <sup>12</sup> Zzeirloxlbbae gga niur nei acixl ya mellei cir cir cir cir;  
worga mel lei yarzi ggese.
- <sup>13</sup> Silbbarbbae leil acixl ya hher bbi a;  
lagiex gga lei loxlmoxr lillil a nga.  
Eilmel maelmaerjgia lei ggese a caxlgo caxl dae.

### Arbosobo Bei Dae Mel Leil Bbeixzae Gger

Caxlgo ar zul. Caxlgo caxl su mel leil guaxr su ddei leil jia gger.

- 66** <sup>1</sup> Middurbbor ca hazza lei ggese a,  
worcixl-worni caxl dae a Arbosobo leil bbeix zae gger nia.
- <sup>2</sup> Yar ddei mi ddei mel middux;  
yel yar leil caxl zae gger nia!  
Yar leil bbeix zae gger dae ddar mel bbeix a,  
yar middux ca mel leil saexl lol nia.
- <sup>3</sup> Arbosobo leil bbeix: “Ni bei dae mel yarzi seir yarzi murgurddo!  
Ni ddoddo mo bei a, ni leil dir su mel arsae bei lei ni leil gexr a  
ni dax cir piar a bei laexl.
- <sup>4</sup> Middurbbor ca hazza lei ni leil bbeix zae gger nia,



ni leil caxl zae gger nia, ni mi ddei leil caxl zae gger nia,” eine bbeix nia.

<sup>5</sup> Nia Arbosobo bei dae mel leil i lei,  
yar cassor-worssor dax bei dae mel yarzi seir yarzi murgurddo.

<sup>6</sup> Yar neixvi bbe leil middur hie loxr lol,  
cassor-worssor mel leil lazzarmo gga ssi gel lol;  
yar eine bei a, ngua halmaex gga hher dae a ggese.

<sup>7</sup> Yar, yar ddei quexrlixl sser a, cirse-cirsil lei cassor-worssor  
hazza leil guaxr;  
yar meixddur zze circuxr-hanga leil i dae;  
yar ddei ddar nr no su ca mel col nr ddo.

<sup>8</sup> Cassor-worssor hazza, nia ngua ddei Arbosobo leil bbeix zae  
gger nia;  
ca mel leil yar leil bbeix zae gger dae qiurte mel leil bbejjiur lol  
nia.

<sup>9</sup> Yar ngua olga ddei leil gol dae lol,  
ngua leil de nr zeil lol.

<sup>10</sup> Arbosobo, ni halleix ngua leil sixr i;  
ni ngua leil sixr i a hherdder piu mel leil adoxl gga cu sael a  
nga.

<sup>11</sup> Ni ngua leil, si ngua leil xiagl dae ddei gga de ji lol,  
daxr lirlir mel ngua ggecir leil dol deix gger.

<sup>12</sup> Ni ca mel leil zaxlddaexr marcae leil cux dae a, ngua oldde leil  
lel gel lol;  
ngua ajjix gga nei adoxl gga lei ssi gel lei a;  
nael eilcar ni ngua leil, ngua leil dir su nr zza ggie hher dae lol.

<sup>13</sup> Ngo adoxl gga cu a ni leil ziddu mel vei dae a, ni ddei xi gga  
ddir nia.

Ngo ni dax bbeix har goxr mel bei nia,  
<sup>14</sup> hherdder ngo goxr sol goxr naxr pex dae car,

ngo meirlaexgel ddei bbeix goxr, ngo meir gga bbeix teixl lei  
mel nga a.

<sup>15</sup> Ngo niur paxlpaxl mel adoxl gga cu a ni leil zi nia,  
yabol mel lei adoxl gga cu a xiuzixzix mo hal gur ni leil zi nia;  
ngo halae loxrbbe nei acixlbol mel ni leil zi nia.

<sup>16</sup> Ha Arbosobo leil gexr yar leil i du su ca mel,  
nia maelmaerjjia lei a noni lei;  
ngo yar ngo leil bei gger dae mel biar nia.

<sup>17</sup> Ngo meir ddei halleix Arbosobo leil qiuxr,  
ngo lo ddei lei yar leil bbeix zae gger.

<sup>18</sup> Ngo, zuixl mel leil ngo nixmox zzar hher ji doxr dae lol  
arddeirnga a,  
Seirpor arsae bei lei ngo leil no-nr-ni.

<sup>19</sup> Nael Arbosobo yarzi noni a;  
yar seilseir a ngo yar dax ddar biar dae qiurte ddei leil noni a.

<sup>20</sup> Arbosobo leil mel bbeix zae gger nia!  
Yar ngo yar dax ddar biar dae mel leil no-nr-ni nr bei,  
yar ngo leil per-nr-niar nr bei.

Cassor-worssor Mel Lei Arbosobo Leil Bbeixzae Gger Nia

Caxlgo ar zul. Caxlgo caxl su mel leil guaxr su ddei leil jia gger.  
Heixl zex zza caxlgo bbaex labox ddei sser a, bbaex dax dae.

**67** <sup>1</sup> Arbosobo leil niul leil zoxlnixr lol nia,  
niul leil seir lol nia,  
yar qiaxrmeix leil bbolbbo mel niul leil zoxl gex dae lol nia,  
<sup>2</sup> yel middurbbor hher dae hazza leil ni ddei jjiumo zex leil saexl  
lol,  
circuxr-hanga leil ni ca leil arsae jiuxl saexl lol.  
<sup>3</sup> Arbosobo, circuxr-hanga ni leil bbeix zae gger lol nia!  
Cassor-worssor hazza lei ni leil bbeix zae gger lol nia!

<sup>4</sup> Ni mel arsae bei lei bbaehhexhhex mo cassor-worssor hazza leil ser,  
 halae middurbbor circuxr-hanga leil mul gger,  
 yel circuxr-hanga leil ggese a worcixl-worni ae dae lol nia.

<sup>5</sup> Arbosobo, cirddei-hanga ni leil bbeix zae gger lol nia!  
 Cassor-worssor hazza ni leil bbeix zae gger lol nia!

<sup>6</sup> Mi gga cirza-hanga loxlmoxr ddux lei ho a;  
 Arbosobo, hherdder niul ddei Arbosobo niul leil seir lol.

<sup>7</sup> Arbosobo niul leil seir lol;  
 middurbbor cassor-worssor hazza leil yar leil i du yar leil gexr lol nia.

Zaxlddaexr Leixl A, Caxlgo Caxl

Daxlweixl vaexr caxlgo. Caxlgo caxl su  
 mel leil guaxr su ddei leil jia gger.

**68** <sup>1</sup> Arbosobo ha du lei a, yar leil dir su mel leil ggaxr bbeir jjia gger,  
 yar leil vuxryixr su mel yar meixsaer qie leil pa du si.

<sup>2</sup> Yaa leil ggaxr pixl gger a, hherdder alker mel leil mersi jia bbeir gger sael a nga;  
 nixmox neix su ca mel Arbosobo meixsaer qir leil mier a;  
 hherdder laxrzuxr mel leil adoxl cu zzi gger saexl a nga.

<sup>3</sup> Nael nixmox seir su ca mel ggese,  
 Arbosobo meixsaer qir leil hher dae a ggesese a nga.

<sup>4</sup> Nia Arbosobo leil caxlgo caxl gger a, yar mi ddei leil caxl zae gger nia;  
 zaxlddaexr marcae cux dae a mipaerbbae gga ssi goxr hal ddei leil jjiumo bbaelerler ggu gger.  
 Yar ddei mi ddei mel Yihexrhuaxr a;  
 yar meixsaer qir leil ggese nia.

- <sup>5</sup> Arbosobo yar ddei xi gga hher dae a, aniuxcir mel ddei arbbor bei,  
maermocir mel leil guaxr.
- <sup>6</sup> Yar ca cirmuzil mel leil ake zza lol,  
ge ji dae ca mel leil hier teixl lei a goxr seir lol;  
nael yar ddei ddar nr no su ca mel yarzi hie yarzi lexl ggie goxr dae.
- <sup>7</sup> Arbosobo, halleix ni, ni ddei cassor-worssor mel xilmeir leil ddux lei a,  
yaa leil hier dae a mipaerbbae gga ssi gel car,
- <sup>8</sup> middur ddei ni leil mia a, le du lei a;  
merlabbor lei almer lei zeil lei a;  
Xinaer worga ga Yirsaexllixl su ddei Arbosobo leil mia a lei, le du lei a.
- <sup>9</sup> Arbosobo, ni almer vaervaer lei zeil lei,  
ni ddei cassor-worssor Yirsaexllixl su mel bei le car,  
ni yaa leil hhel du lei lol.
- <sup>10</sup> Ni ddei ca mel halmaex goxr dae;  
Arbosobo, ni ddei seirseir mel mel goxr sol su mel leil bei har gger dae arddeir a.
- <sup>11</sup> Seirpor ddar mel miardal teixl a,  
ddar bbeix gger ssi su ssormaer mel seirseil ar cir zza a.
- <sup>12</sup> Zzirmar mel nei yaa ddei meixr mel pa du si a; pa du si a!  
Ake xia dae ssormaer mel su si lei zzaegu mel bbe.
- <sup>13</sup> Nia ya bbe mel gga yixr dae car,  
dderbel ddoleixr mel leil piu niar dae,  
me mel leil sae niar dae sael a nga.
- <sup>14</sup> Ddo zzir Arbosobo zzirmar mel leil ggaxr bbeir gger car,  
hherdder Sarmae worga leil wor lei dae mel sael a nga.
- <sup>15</sup> Basa worga mel Arbosobo ddei worga a;  
Basa worga mel wornobex yarzi miur worga a.

- 16 Wornobex yarzi miur worga mel,  
 nia arsaenga a meixsixlmo Arbosobo hher niazzir/nolnger  
 worga ga leil i dae neil?  
 Yihexrhuaxr cirse-cirsil lei worga eil ga leil hher nia.
- 17 Arbosobo yar ddei meixr nei zaxlddaexr marcae hormo du  
 hormo meir leil hier dae a,  
 Xinaer worga leil cirdae a, yar ddei xi gga ddir.
- 18 Arbosobo Yihexrhuaxr, ni darmumu ggie ddeix a,  
 ni leil dir su mel leil ssu si a;  
 ni ca mel dax hherdder ni leil dir su mel dax yaa ni leil gger dae  
 mel li;  
 yel ni leil yaa dax cirgo a hher dae cexr lol.
- 19 Bbecir-bbeni ngua ddei daxr lirlir bil gger su Seirpor,  
 hherdder ngua leil jiuxl su Arbosobo leil mel bbeix zae gger nia.
- 20 Arbosobo mel ngua leil jiuxl su Arbosobo a;  
 yar mel Yihexrhuaxr a;  
 ngua leil nr si lol jiuxl teixl lei su Seirpor ddei nga a.
- 21 Nael Arbosobo yar leil dir su mel ddei oldde taex deil bbaer  
 gger nia,  
 hherdder zoxlzoxl a zuixl bei su ca mel ddei oldde taex nga a.
- 22 Seirpor bbeix: “Ngo yaa leil Basa mermi cirdae jjixr lei lol nia,  
 yaa leil neixvi neixlneixl gga cirdae jjixr lei lol nia,
- 23 ni qihher ddei yaa sirnilni gga jjiu ji dae lol nia,  
 ni ddei anol leil yaa ddei sirnilni laexr lol nia.
- 24 Arbosobo, ni mel ngo ddei Arbosobo, ngo ddei zzirmar;  
 ca mel ni ssi dae a ni ddei xi gga ddir ggie mia ho a.
- 25 Caxlgo caxl su mel xilmeir ssi dae,  
 caxlgo bbaex su mel giedae mae dae,  
 surgu deil su ssormaerssor mel agala gga ssi dae.
- 26 Yirsaexllixl dax ddux lei ca hazza,

nia cassor-worssor mel gga Seirpor Arbosobo leil bbeix zae gger nia.

<sup>27</sup> Ye zzir Bixlyarmir ddei cuxr mel xilmeirbbaer ssi dae;  
Yoxrdaxl ddei cuxr gga ddei vaervaerpor mel nei yaa dax mae dae su mel nael, giedaebbaer ssi dae;  
Xibuxlluixr nei Naxrfuxrtalixl ddei cuxr gga vaervaerpor mel nael, maelele ssi dae.

<sup>28</sup> Arbosobo, ni leil qiuxr, ni ddoddo mo bei dae mel, ca leil mia lol,  
eilmel mel hherdder ni halleix ngua leil weix a bbesur sser dae mel nga a.

<sup>29</sup> Ni ddei xi zzir mel Yiluxlsaler zzi gga zza dae,  
yel circuxr-hanga ddei zzirmar mel halmaex lei a,  
ni leil zzaegu ho lei nia.

<sup>30</sup> Ni leil qiuxr, ni bokiex cili gga hher dae yirvu-nilhax hherdder Aezixr goxrjia ca mel leil hie;  
ni loxrbbox nei loxrbbox ssor hherdder goxrjia vaervaer yelye mel leil hie.

Halae piu nolnger su ca mel leil qihher woxrke jjiux ji dae;  
Arbosobo mel zaxlddaexr meixr su cirgoxr-hanga leil ggaxr bbeir jjia gger ho a.

<sup>31</sup> Aezixr goxrjia vaervaerpor mel Arbosobo leil i lei nia,  
Gursir su ca mel nialngasael leixrhher bil du lei a, Arbosobo dax ddar biar nia.

<sup>32</sup> Middurbbor cirgoxr-hanga,  
nia Arbosobo leil caxlgo caxl gger nia;  
nia Seirpor leil caxl zae gger nia!

<sup>33</sup> Halcar tortor dder zza dae merlabbor gga ssi za dae Seirpor ddei leil caxl zae gger nia!

Yar qiurte bbeix teixl lei ddei mel, yarzi vaer.

<sup>34</sup> Nia Arbosobo ddoddo mo bei dae mel leil biar nia.

Yar mel bbobbolbbo yarzi quexrlixl zza Yirsaexllixl su ddei zzirmar ddei a;

yar ddoddo mo bei dae mel merlabbor mia ddo.  
<sup>35</sup> Arbosobo, ni, ni ddei xi gga hher dae a,  
 arseir lei ni leil gexr ni leil i du;  
 Yirsaexllixl su ca ddei Arbosobo mel,  
 yar ddei cassor-worssor mel leil warni lol, bbesur zza lol.  
 Arbosobo leil mel bbeix zae gger nia!

### Arbosobo Leil Qiuxr A, Beijjiu Lol

Daxlweixl vaexr sipi. Caxlgo caxl su mel leil guaxr su ddei leil jia  
 gger. Baexrhexrhua ddei diuxlzi sser. (diuxlzi eil yoxr yarzi noni  
 zae, zzi leil seissaexr a caxl, bbeixsael ggie baxl a caxl.)

**69** <sup>1</sup> Arbosobo, ajjix mel ngo leil mil hex niazzir dae a;  
 ni leil qiuxr ngo leil jiuxl la!

<sup>2</sup> Ngo leil lurcirta gga haxl ji dae a, qihher toxl gex ggie lei nr zza  
 a;

ngo ajjix neixlneixl gga ze ci a, ajjix mel ngo leil mil hex a.

<sup>3</sup> Ngo, Arbosobo leil ngo leil jiuxl la ae a wor lei nr ni a;  
 leihher lei ae hiel a; ngo Arbosobo leil xia a, nge doxr a,  
 meixddur lei yojiar a.

<sup>4</sup> Nrbba-nrbba ngo leil vuxryixr su mel bir ngo ddei olce mel leil  
 lei miur;  
 nrbba-nrbba ngo leil dir su mel ngo leil bei zil gger niazzir, yaa  
 yarzisael sexr.

Ngo yaa dax su nr goxr lei, yaa ngo leil koxl gger lol.

<sup>5</sup> Arbosobo, ngo medeil mel ni halleix dder saexl,  
 ngo ddei zuixl mel ni dax kerzi dae nr cexr.

<sup>6</sup> Meixr hazza ddei Seirpor Yihexrhuaxr, ni leil qiuxr,  
 ni leil xia dae su ca mel leil ngo giedae qiaxrmeix zzi nr zza tor  
 nr nga lol.

Yirsaexllixl ddei Arbosobo, ni leil zo su mel leil ngo giedae tor  
 seixl-nr-da lol.

- <sup>7</sup> Ngo ni leil weix a, si ngo leil hie vuxryixr a ngo qiaxrmeix zzi lei nr zza a.
- <sup>8</sup> Ngo ddei arzzi-nimar mel ngo leil piar nr saexl su ca i mal gger; ngo dax cir xilbe a ddux lei mel lei ngo leil kebal su ca i mal gger.
- <sup>9</sup> Ngo ca mel leil ni ddei xi zzir leil yarzisael i du lol niazzir a, ca mel ngo leil bei zil gger nia; halae ni leil hie vuxryixr su ca mel hherdder ngo leil hie vuxryixr.
- <sup>10</sup> Ngo nge dae a zzor lei nr zzor armael leil guaxr gex dae, nael yaa zzael ngo leil bbeix vuxryixr.
- <sup>11</sup> Ngo zzir pia veixr dae a, yaa ddei vaessi ddu loxr a.
- <sup>12</sup> Zzi alddur dax cux dae mel lei ngo leil biar doxr; zzibbaer ddayixrboxr mel lei ngo leil caxlgo caxl.
- <sup>13</sup> Yihexrhuaxr, ngo leil bbeix ci a mel, ngo ni dax ddar biar nia; Arbosobo, ni mel ca leil perniar, ni ca leil jiuxl nia bbeix har goxr a; yel ni dixl har dae nixixl ddei dax zox dae a, ngo leil ddarkoxl la!
- <sup>14</sup> Ni leil qiuxr, ngo leil lurcirta gga jiuxl teixl la, halmaex gga haxl nr ji dae lol.  
Ni leil qiuxr, ngo leil vuxryixr su mel dax ngo leil jiuxl teixl la, ngo leil ajjix neixlneixl gga ddux lei lol.
- <sup>15</sup> Ajjix mel ngo leil mil nr hex lol, ajjix neixlneixl mel ngo leil ixl nr ji lol, bbeddur mel ngo ggaxrne mix nr gex lol.
- <sup>16</sup> Yihexrhuaxr, ni leil qiuxr, ngo leil ddarkoxl la!  
Ni yarzi seir, ni ca leil perniar.  
Ni leil qiuxr, ni ca leil zoxlnixr dae mel dax zox dae a, za xixl lei a, ngo leil beijjiu la.



- 17 Ni leil qiuxr, qiaxrmeix ddei ni leil miar bei gger su ddei leil mal  
nr gger tor nr bei, ngo goxr sol zildu a;  
ni leil qiuxr, nialngasael ngo leil ddarkoxl la!
- 18 Ni leil qiuxr, ngo dax naer lei, ngo leil jiuxl la!  
Ni leil qiuxr, ngo leil vuxryixr su mel dax ngo leil vae xixl la!
- 19 Si ngo leil arsae hie vuxryixr, arsae ci, arsae bei vuxryixr mel  
ni saexl;  
ngo leil dir su mel ni meixsaer qir leil hher dae.
- 20 Si ngo leil hie vuxryixr a, ngo nixmox no zildu a; ngo yarzi cix.  
Ngo si ngo leil zoxlnixr loxia, nael zoxlnixr su lei ar ddei nr zza;  
ngo si ngo leil quex loxia, nael quex su lei ar ddei nr zza.
- 21 Yaa karmmermer mel ngo leil zzor lol;  
ngo ajjix sixl a, yaa ngo leil zeilzei dda lol.
- 22 Yaa zzorci-ddami zzor ggie ddei yaa meixsaer qir leil bel gex  
ggie loxr lol nia;  
yaa zzasoso a halcar, yaa leil xiaxl ggie loxr lol nia.
- 23 Yaa leil meixddur zze meixdae a, mia nr xie lol nia;  
yaa leil zzoxrbbeix ddei arddolcar lei lixlix-laexlaex go dae lol  
nia.
- 24 Ni sirzzi dae mel, yaa leil ddeix lol nia;  
ni seifu faex dae mel, yaa dax ggaxrmae ci lol nia.
- 25 Yaa hher ggie azo lei nr zza loxr lol nia;  
yaa hher ggie sur bei teixl lei xigex mel gga ca hher su nr zza  
lol nia.
- 26 Ni faxr dae ca ddei, yaa yar leil bixr;  
ni bei no gger ca ddei, yaa yar goxr sol dae mel leil vaessi a  
biar.
- 27 Yaa leil zuixl bbeix zuixl a nga lol nia,  
ni yaa leil zuixl nr zza i mal nr gger.
- 28 Yaa ddei mi ddei leil olga zza su ca mel ddei mi guax deix dae  
sul ber gga huax pixl gger a,  
nixmox seir su ca mel dax cirgo a vaexr nr deix lol nia.

<sup>29</sup> Nael ngo mel goxr sol, ngo mel cix; Arbosobo, ni leil qiuxr, ngo leil jiuxl a, ngo leil guaxr dae.

<sup>30</sup> Ngo caxlgo caxl a, Arbosobo ddei mi ddei leil caxl zae gger nia; yar leil nawo a, yar vaer zzir ddei nga a bbeix nia!

<sup>31</sup> Eine nga a mel Yihexrhuaxr leil ggese lol, bir yar leil niur zi bbeixsael cuxgexdaex niar dae nei bbexr niar dae loxrbbe mel yar leil zi leil lei seir leixl.

<sup>32-33</sup> Yihexrhuaxr mel, goxr sol su ca mel qiuxr dae mel leil noni; ge ji dae ca mel leil i nr ze. Yel, nr col su ca mel mia a dder ggese; Arbosobo leil zo su ca mel leil nixmox ddervaer lol nia.

<sup>34-36</sup> Arbosobo mel, Xi'a zzi ddei leil jiuxl nia; Yoxrdaxl mermi zzi mel zi nia; yar ddei cassor-worssor mel halmaex hher nia, middei hal ddei li wo nia. Yar leil miar bei gger su ca mel ddei giedae ca mel middei hal ddei li wo nia; yar leil perniar su mel halmaex hher nia. Yel, merlabbor, middurbbor nei neixvi mel gga olga zza maelmaerjjia lei, yar leil bbeixzae gger lol nia!

### Arbosobo Leil Qiuxr A, Beijjiu Lol

Daxlweixl Yihexrhuaxr leil qiuxr a, yar leil holcir dae lol a vaexr sipi. Caxlgo caxl su mel leil guaxr su ddei leil jia gger.

**70** <sup>1</sup> Arbosobo, ni leil qiuxr, nialngasael ngo leil jiuxl la!  
<sup>2</sup> Yihexrhuaxr, ni leil qiuxr, nialngasael ngo leil Beijjiu la!  
<sup>2</sup> Ngo leil bei zil gger niazzir su mel leil yixrsixr nr zza lol nia, qiaxrmeix zzi nr zza lol nia!

Ngo goxr sol a ggese su mel leil doxdoxsi jjixr lol a, seixlda lol nia!

<sup>3</sup> Ngo leil “haxhax haxhax” zex vae su mel leil seixlda a doxdoxsi jjixr lol nia.

<sup>4</sup> Ni dax lei ci su hazza leil ggese lol nia.

Ni yaa leil jiuxl a ggese su ca mel leil, zoxlzoxl a “Arbosobo mel vaer zzir ddei nga a” □ bbeix lol nia.

<sup>5</sup> Nael ngo mel goxr sol, azo lei nr zza;

Arbosobo, ni leil qiuxr, nialngasael ngo dax eilmaex lei!

Ni mel ngo leil beijjiu su, ngo leil jiuxl su.

Yihexrhuaxr, ni leil qiuxr, tor da-nr-wo hor.

### Camarmel Arbosobo Dax Ddar Biar

**71** <sup>1</sup> Yihexrhuaxr, ngo ni leil koxl;

ni leil qiuxr, arddolcar ci a lei ngo leil tor seixl-nr-da lol!

<sup>2</sup> Ni leil qiuxr, ni ddei bbaehhexhhex mel dax zox dae a, ngo leil beijjiu la, ngo leil jiuxl la;

seirseir a ngo qiuxr dae mel leil noni la, ngo leil jiuxl la!

<sup>3</sup> Ni mel ngo ddei legelbbe, ngo ddei pahher ggie;

yel ni leil qiuxr, arddolcar lei ngo pahher ggie legelbbe taex bei, ni mel ngo leil jiuxl nia dixl har ho a.

<sup>4</sup> Ngo ddei Arbosobo, ni leil qiuxr, ngo leil nixmox neix su ca mel leixrga gga jiuxl teixl la,

bbae-nr-hhex su ca nei yarzi duxr ca mel leixrga gga jiuxl teixl la.

<sup>5</sup> Seirpor Yihexrhuaxr, ni mel ngo li wo loxia dae ddei nga a; ngo ye tor seir dder ni mel ngo ddei koxl ggie ddei nga a.

<sup>6</sup> Ngo ngama xilbe gga ddux lei a qie ni leil koxl;

ngo leil ngama xilbe gga ddux lei lol su ddei mel ni a.

Ngo arddolcar lei ni leil bbeixzae gger nia!

<sup>7</sup> Ca cirke a ngo leil i dae a yarzi murgur,

- nael ni mel ngo pahher ggie yarzi ssei ddei nga a.
- <sup>8</sup> Ngo meir gga cirni-lorbba ni leil bbeixzae gger,  
ni middux dae mel leil biar.
- <sup>9</sup> Ni leil qiuxr, ngo mar car, ngo leil tor piar pixl nr gger!  
Ni leil qiuxr, ngo wor-nr-ni car, ngo leil nr li tor nr bei.
- <sup>10</sup> Ngo leil dir su mel ngo leil biar;  
ngo leil ker i dae a, ngo leil bei zil gger niazzir su mel zzi dax  
zzibbe a
- <sup>11</sup> bbeix: “Arbosobo yar leil nr li ho a;  
yar leil jiuxl su nr zza a;  
niul yar leil ggaxrmae ssi a, yar leil ssu ssi yo!”
- <sup>12</sup> Arbosobo, ni leil qiuxr, ngo dax vimirmir mo tor nr hher dae!  
Ngo ddei Arbosobo, ni leil qiuxr, nialngasael ngo leil beijjiu la!
- <sup>13</sup> Ngo leil goxl su mel leil yixrsixr nr zza lol nia,  
yaa leil bei zil gger lol nia;  
ngo leil ke su mel leil seixlda lol nia,  
qiaxrmeix zzi nr zza lol nia!
- <sup>14</sup> Nael ngo arddolcar lei ni leil xia dae, halae ho bei ho ni leil  
bbeixzae gger nia.
- <sup>15</sup> Ni ddei bbaehhexhhex mel nei ni ca leil jiuxl dae mel hhe lei  
hhe jjia nr ddo,  
yel ngo meir gga cirni-lorbba lei eilmel leil biar nia.
- <sup>16</sup> Ngo, Seirpor Yihexrhuaxr miar vaervaermo bei dae mel leil  
biar nia,  
ni ddei bbaehhexhhex mel leil lar biar nia.
- <sup>17</sup> Arbosobo, ngo ye tor seir dder ni ngo leil mul gger;  
eilni zzezze ci a lei, ngo ni murgurgur mo bei dae mel leil biar.
- <sup>18</sup> Arbosobo, ni leil qiuxr, ngo mar a, olpiu-hossae loxr car, ngo  
leil nr li tor nr bei!  
Ngo ni ddei bbesur mel ngo giedae ca mel leil biar gger nia,  
ni ddoddo mo bei dae mel ngo giedae ca mel leil biar gger nia.

- <sup>19</sup> Arbosobo, ni ddei bbaehhexhhex mel merlabbor lei ddeix ci a; miar vaervaer bei goxr Arbosobo, arseir ni zzi zza bbeixleir?
- <sup>20</sup> Ni ngua leil goxrsol-goxrnaxr yarzi larhor pex dae lol, nael ngua leil worni du xixl lei lol nia, ni ngua leil lixrbbaex gga ddir lol nr var.
- <sup>21</sup> Ni leil qiuxr, ngo leil ho bei ho sexr du lei lol; yoxl za xixl lei a, ngo leil nixmox dder vaer gger.
- <sup>22</sup> Ngo ddei Arbosobo, ngo yoxrcixl peix labox ddei sser a, ni yarzi ddarzziddo bei dae mel leil bbeixzae gger nia! Yirsaexllixl ddei seirceix-seirmaer Arbosobo, ngo caxlgo bbaex labox ddei bbaex dae a, ni leil caxl zae gger nia!
- <sup>23</sup> Ngo ni leil caxl zae gger car, ggegge-sese a worcixl-worni caxl nia; ni ngo leil olga jiuxl a, ngo worcixl-worni caxl nia.
- <sup>24</sup> Ngo leil ke niazzir su ca hal mel leil qiaxrmeix zzi nr zza lol ho a; seixlda lol ho a; yel ngo lo ddei lei cirni-lorbba ni ddei bbaehhexhhex mel leil biar nia.

Zzirmar Leil Arbosobo Dax Ddar Biar Gger

Sorloxrmexr vaexr sipi.

- 72** <sup>1</sup> Arbosobo, ni leil qiuxr, zzirmar ddei leil nixmox zzar bbaehhexhhex a nga lol; zzirmar ddei ssor ddei<sup>v</sup> leil nixmox zzar hoxrhoxr mel a xiar lol.
- <sup>2</sup> Yar hoxrhoxr mo ni ddei cassor-worssor mel leil ser nia; bbaehhexhhexmo ni ddei goxr sol su ca mel leil ser nia.
- <sup>3</sup> Goxrjia cirddei-lorbba leil zzasoso a nga lol nia; cassor-worssor hazza leil lei bbaehhexhhex a nga lol nia.

<sup>v</sup>72:1 zzirmar ddei ssor ddei Zzirmar ddei ssor mel dder zzirmar nga a; ca cir ddei a nga.

- <sup>4</sup> Yar leil cassor-worssor mel gga goxr sol su ca mel leil beijjiu lol nia;  
 azo lei nr zza su mel leil jiuxl lol nia;  
 halae ca leil ggux ci su mel leil nixl me gger lol nia.
- <sup>5</sup> Merni taex zza dae, xiubbo taex zza dae hozze,  
 ca cirzeix-hanga leil ni leil i du ni leil gexr lol nia!
- <sup>6</sup> Yar leil almer sael a silbbarbbae leil lei deix lol nia;  
 almer yelye sael a, middur ddei leil lei bei gger lol nia.
- <sup>7</sup> Yar zzirmar bei dae car, nixmox seir su ca mel leil goxr seir lol nia,  
 zzasoso a nga lol nia, hherdder xiubbo taex arddolcar ci a lei zza dae mel sael a nga.
- <sup>8</sup> Neixvi eil ddei cirdae a neixvi hal ddei zzezze,  
 lazzarmo cirdae a middurbbor zzarvul-zzarmae zzezze lei yar guaxr nia.
- <sup>9</sup> Mipaerbae gga goxr dae ca mel yar leil cizixl gger nia,  
 yar leil dir su mel nilme laexr nia.
- <sup>10</sup> Tasi mermi nei neixvi gga worga leil hher dae zzirmar mel yar leil zzaegu vei mal gger nia;  
 Sixlba nei Xiba mermi zzirmar mel yar leil zzaegu ho nia.
- <sup>11</sup> Zzirmar hazza yar leil olddetexl nia,  
 cirgoxr-hanga yar leil visser nia.
- <sup>12</sup> Sol su ca mel yar leil qiuxr car, yar yaa leil jiuxl nia;  
 ca beijjiu su nr zza goxr sol su mel leil, yar lei yaa leil jiuxl nia.
- <sup>13</sup> Yar quexrlixl nr zza su ca nei azo lei nr zza su ca mel leil zoxlnixr nia;  
 yar azo lei nr zza su ca mel leil olga jiuxl nia.
- <sup>14</sup> Yar yaa leil, yaa leil ci su nei yarzi gexrddo bei su ca mel dax jiuxl teixl lei;  
 yaa ddei olga ddei leil i du.

- 15 Yar leil olga si lol nia! Yar leil Sixlba mermi ddei sae mel li wo lol nia;  
 yar leil cirleixr nr nor Arbosobo dax ddar biar gger su ca zza lol nia;  
 Arbosobo arddolcar lei yar leil seir lol nia.
- 16 Middurbbor loxlmoxr cirke zza lol nia,  
 worga oldde leil naxrcixl lol nia;  
 loxlmoxr saer mel naxrcixl a, Lixrbanexl worga leil sixzwei cili mel sael a nga lol nia;  
 zzi gga ca mel miur dax lol nia,  
 hherdder middurbbor silbbar mel sael a nga.
- 17 Yar ddei mi ddei arddolcar ci a lei zza dae lol nia,  
 merni taex zza dae hozzeze zza dae lol nia.  
 Cirgoxr-hanga lei Arbosobo dax zzirmar leil seir lol dae mel sael a,  
 yaa leil seir lol la qiuxr.
- 18 Yihexrhuaxr Yirsaexllixl su ddei Arbosobo leil mel bbeixzae gger nia!  
 Yar larnei yarzi seir yarzi murgurddo hal mel bei var.
- 19 Yar yarzi middux, cirse-cirsil lei yar ddei mi ddei leil bbeixzae gger nia.  
 Yar ddei bbobbolbbo mel middurbbor zzarvul-zzarmae hher bbi lol nia! Amae! Amae!
- 20 Yixi ddei ssor Daxlweixl Arbosobo dax ddar biar dae mel biar jjia a. team checked

Arbosobo Mel Nixmox Neix Su Ca Mel Leil Faxr

Botaddu Nr Zza Ca Mel Leil Seir Lol

Yalsaxl vaexr sipi.

**73** <sup>1</sup> Arbosobo mel yarzi Yirsaexllixl su botaddu nr zza ca mel leil seir lol!

<sup>2</sup> Nael ngo zzael, qihher zze zeixleixr nr nga a toxlsar a;

zeixleixr nr nga a yoxl guirle a.

<sup>3</sup> Ngo nixmox neix su col su ca mel zzasoso a goxr ggie mia a dder,  
yaa leil nixnox.

<sup>4</sup> Yaa goxr sol nr goxr;  
yaa ggecir ddei deilbebemo.

<sup>5</sup> Yaa kebal ca mel sael a gexrddu-cixddu nr zza,  
kebal ca mel sael a goxrsol-goxrnaxr pex nr dae.

<sup>6</sup> Yel yaa yarzi col bei dae mel,  
xiarlir sael a yaa leibbei ddei leil ddexr gex dae;  
yaa yarzi gexrddo bei dae mel,  
pia sael a yaa ggecir ddei leil bbe gex dae.

<sup>7</sup> \*\*\*Yaa meixddur zze paxl a box teixl lei a;  
nixmox zzar nr seir xiar dae mel bbi a.

<sup>8</sup> Yaa si leil vaessi, ddar yarzi gexrddo te;  
yaa armael leil i mul gger a si leil ggux ci.

<sup>9</sup> Yaa meir gga merhhexr leil bbeix no;  
yaa lo ddei middurbbor bbeix vuxryixr.

<sup>10</sup> Yel cassor-worssor mel lei za xixl lei a,  
ajjix mel dda jjia gger a.<sup>w</sup>

<sup>11</sup> Yaa bbeix: “Arbosobo arsae saexl var bbeixleir?  
Mu zzir ggie hher dae ddei saexl var a ngo?”

<sup>12</sup> Nixmox neix su ca eimel arddolcar lei yarzi bbae seir, zzirbae  
halae miur dax.

Yel ngo yaa leil nixnox a, zeixleixr nr nga a toxlsar a.

<sup>13-14</sup> Ngo cirni-lorbba lei goxrsol-goxrnaxr pex dae;  
bbecir-nehe lei ngo leil larhorhormo faxr.

Yel ngo nixmox ddei seibeixbeix a nga lol a lei, baexr a nga lol  
lalnga;

---

<sup>w</sup>73:10 Yel cassor-worssor mel lei za xixl lei a, ajjix mel dda jjia gger a Ca cirmelmel zzirdae a ddar eil qir ddei yilsil mel dder: ca mel Arbosobo dax bbe kae a nixmox neix su ca mel dax za xixl a yaa ddei ddar no.



- ngo leixrhher zze cir a lei, baexr a cir lalnga.<sup>x</sup>
- <sup>15</sup> Ngo nixmox zzar xiar dae ddar eilmel bbeix teixl lei arddeirnga  
a,  
ngo dder ni ddei cassor-worssor eil coxr leil fur a.
- <sup>16</sup> Ngo arsae xiar no kor xiar a eilmel leil saexl niazzir,  
i dae a yarzi saexl sol ddo!
- <sup>17</sup> Ngo Arbosobo ddei xi gga ddir ci a saelnei,  
yaa maelele ci a arsae nga var saexl.
- <sup>18</sup> Ni yarzi yaa leil yoxl ggie hher dae lol a,  
yaa leil de zei lol a azo lei nr zza lol.
- <sup>19</sup> Yaa leil mel saexl loci a qie bei zil gger a;  
yaa yarzi gexr a, gexr zil jjia a!
- <sup>20</sup> Yaa mel yixrmeixka dae mel sael a nga, merteir a qie mia nr  
ddo a.  
Seirpor, ni zucur a qie, yaa mier a.
- <sup>21</sup> Ngo nixmox no  
xiu ddei zixlkur-zixllixl zza sol,
- <sup>22</sup> ngo medeil, azo lei nr saexl;  
ni meixsaer qir leil zzeir sael a nga.
- <sup>23</sup> Nael ngo arddolcar lei ni dax hher dae;  
ni ngo ddei leixrhher yo bbor leil gga gex dae.
- <sup>24</sup> Ni, ni mul gger dae ddar mel sser a ngo leil hier dae;  
arddolcar, ni ngo leil bbobbolbbo gga hier dil.
- <sup>25</sup> Ni nr nga a mel, merlabbor ngo azo zza bbeixleir?  
Ni leil nr nga a mel, middurbbor ngo lei nolnger ddu nr zza.
- <sup>26</sup> Ngo ddei ggecir nei nixmox ddei [mar zei lei a/yojia a];  
nael Arbosobo mel ngo leil nixmox zzar warni lol su ddei nga a;  
yoxl cirse-cirsil lei ngo seirseir li wo dae ddei nga a.

---

<sup>x</sup>73:13-14 Yel ngo nixmox ddei seibeixbeix a nga lol a lei, baexr a nga lol lalnga; ngo leixrhher zze cir a lei, baexr a cir lalnga. Ddar eil qir ddei yilsi mel dder: yar nixmox zzar nr seir mel nr xiar, leixrhher zze nr seir mel nr bei.

<sup>27</sup> I ddo a! Ni dax vimirmir bbe kae su hal mel si nia;  
 ni leil nr li kerjiar ssi su ca mel leil ni maelmaerjjia bei zil gger.<sup>y</sup>  
<sup>28</sup> Nael ngo mel Arbosobo dax naer a ngo leil yarzi seir!  
 Ngo Seirpor Yihexrhuaxr leil ngo ddei pahher ggie bei lol a mel,  
 ngo ni bei dae hazza leil biar nia.

Arbosobo Leil Qiuxr A, Yar Ddei  
 Cassor-worssor Mel Leil Holcir Dae Lol

Yalsaxl vaexr ca leil mul gger dae sipi.

**74** <sup>1</sup> Arbosobo, ni arsaenga a cirse-cirsil lei ngua leil piar pixl  
 gger leir?

Ni arsaenga a ni ddei silbbarbbae gga ya mel leil seifu faex a,  
 alker sil teixl lei mel sael a nga leir?

<sup>2</sup> Ni leil qiuxr, halcar ni tiur teixl lei ca mel leil holcir dae,  
 hherdder ni jiuxl xixl lei, ni armael ddei ca ceinir cuxr nga a;  
 halae ni hher dae Xi'a worga leil holcir dae la.

<sup>3</sup> Ngua leil vuxryixr su mel ni ddei xi zzir bei xiaxr jjia gger ho a.  
 Ni leil qiuxr, legelbbe lei caexr pixl jjia, hormo nixixl xia ho  
 middei ddei leil i lei.

<sup>4</sup> Ni leil vuxryixr su mel ni ddei xi gga bbialil-bbialor me dae;  
 yaa armael ddei qixr ddei halmaex cex dae a, hoxltexr bei.

<sup>5</sup> Yaa six taexl su mel sael a,  
 goxlor baxr a bil du lei a sixzzei mel taexl zeigger.

<sup>6</sup> Ni ddei xi gga ha kiexl teixl lei mel leil,  
 yaa goxlor nei cuixr sser a deil xiaxr gger a.

<sup>7</sup> Yaa adoxl sser a ni ddei xi zzir cu pixl gger,  
 ni ddei xi zzir leil bei vuxryixr,  
 middur zzezze caexr pixl gger.

<sup>8</sup> Yaa nixmox zzar xiar dae a bbeix: “Ngua bei xiaxr jjia gger nia.”

<sup>y</sup>73:27 ni leil nr li kerjiar ssi su ca mel leil ni maelmaerjjia bei zil gger Kerjiar ddei  
 yilsi mel dder: Arbosobo leil lar zi nr nga, neir nei bbex mel leil lei zi.

Yaa dder cirmaex-hanga Arbosobo leil zi ggie mel cu pixl gger.

- <sup>9</sup> Ngua, ngua ddei qixr mel leil nr mia a;  
 xiezi lei zeixleixr nr zza a;  
 ngua ca mel gga lei goxrsol-goxrnaxr eil ddei arddolcar ci saexl  
 su ca ar ddei nr zza.
- <sup>10</sup> Arbosobo, ni leil dir su ca mel, ni leil arddolcar hie vuxryixr ci  
 neil?  
 Ni leil vuxryixr su ca mel cirse-cirsil lei ni mi ddei leil bbeix no  
 doxr a ngo?
- <sup>11</sup> Ni arsaе nga a ni ddei leixrhher yo bbor zuxl xixl si?  
 Ni leil qiuxr, xilbebbor gga cei teixl lei a yaa leil bei zil jjia gger.
- <sup>12</sup> Arbosobo mel halleix tortor dder ngo ddei zzirmar bei,  
 middurbbor ca mel leil jiuxl.
- <sup>13</sup> Halleix ni ddoddo mo bei a, neixvi gga ajjix mel bbe kae gger;  
 ajjix gga gol dae yarzi gexrddo hal mel ddei oldde taex deil  
 bbaer gger.
- <sup>14</sup> Ni lixlweixlyaltar<sup>z</sup> ddei oldde taex deil me gger a,  
 mipaerbbae gga yirvu-nilhax mel leil zol.
- <sup>15</sup> Ni lur zer teixl lei lol; vixiur gga ajjix pe teixl lei lol;  
 yoxl lazzarmo gga ajjix pe dae mel hie lol.
- <sup>16</sup> Eilnirggu ni ddei a; eilmerxixl lei ni ddei a;  
 merni nei bbo dae mel lei ni bei har zaxr dae.
- <sup>17</sup> Middur ddei arddolmaex zzezze ssi ci lei ni dixl har dae;  
 gielcozi, zzixzi lei ni coxl a.
- <sup>18</sup> Yihexrhuaxr, ni leil dir su ca mel ni leil hie vuxryixr,  
 ni leil nr ssexl su cassor-worssor mel ni ddei mi ddei leil bei  
 vuxryixr;  
 ni leil qiuxr, eilmel leil holcir dae.

---

<sup>z</sup>74:14 lixlweixlyaltar Ca cir mel mel a zzirdae a, lixlweixlyaltar mel dder kolloxr a.

- <sup>19</sup> Ni ddei baxrgoxr ngax mel yirvu-nilhax mel leil tor jia ji nr gger;  
ni cirse-cirsil lei ni ddei goxr sol su ca mel leil hol-nr-cir eine tor nr bei.
- <sup>20</sup> Middurbbor mel neixmarmarmo yarzi gexrddo lillil a bei dae; yel ni leil qiuxr, ni bbeix har zaxr goxr mel leil holcir dae.
- <sup>21</sup> Si yaa leil ci dae ca hal mel leil, qiaxrmeix zzi nr zza tor nr jjixr lol;  
goxr sol su nei azo lei nr zza su mel leil ni mi ddei leil bbeixzae gger lol nia.
- <sup>22</sup> Arbosobo, ni leil qiuxr, ha du la a ni armael leil weix a ddar te!  
Ni leil nr ssexl su ca mel cirni-lorbba ni leil arsae hie vuxryixr holcir dae nia.
- <sup>23</sup> Ni leil dir su mel ddei qiurte ddei leil holcir dae;  
ni leil dir lei su ca mel cirleixr nr nor bbialil-bbialor ae dae holcir dae nia.

### Arbosobo Mel Ca Leil Ser Su Ddei Nga A

Yalsaxl vaexr caxlgo. Caxlgo caxl su mel leil guaxr su ddei leil jia gger. Xiboxrlaexr su ddei liuxrxixrge diuxlzi sser. (diuxlzi eil yoxr mel Moxrxi dax cirdae dder zei lei a.)

- 75** <sup>1</sup> Arbosobo, ni mel ca dax naer lei,  
yel ngua ni leil nawo, ni leil nawo!  
Ca mel lei ni yarzi seir yarzi murgurddo bei dae mel leil biar.
- <sup>2</sup> Ni bbeix: “Dixl har dae nixixl ddei ci a,  
ngo bbaehhexhex mel dax zox dae a ser nia.
- <sup>3</sup> Middur nei middur leil hher dae cassor-worssor mel lili-lele ha dae bbeixarnar a;  
ngo middur ddei leil velper a hher dae lol nia.

- <sup>4</sup> Ngo col zzae col, ol zzae olvaer ca mel leil bbeix: ‘Col nr ddo; olvaer nr ddo!’  
Nixmox neix su ca mel leil bbeix: ‘Cuxgexdaex baex bil du lei nr ddo!’
- <sup>5</sup> Nia ddei cuxgexdaex baex darmumu bil du lei nr ddo; leibbei ddei arsae mumu bil dae a ddar te nr ddo,’ ” eine bbeix.
- <sup>6</sup> Ca leil ser a mel, dofa piar a gga lei nr nga, xifa piar a gga lei nr nga, naxrfa piar a gga lei nr nga.
- <sup>7</sup> Ca leil ser a mel, Arbosobo dax a lei; yar ca eil ddei leil mi-nr-ddux lol, ca hal ddei leil middux lol.
- <sup>8</sup> Yihexrhuaxr leixrhher gga mel beizi vei dae, beizi gga zzipbaer mel hexlvi ddux lei a; beizi gga zzipbaer sixlix-xiuxlox ji bbi a; yar dox teixl lei a, middurbbor nixmox neix su ca maelmaerjjia, arsae bei lei zzipbaer eilmel gga ddiddi-ddeiddei mel jiujiu dda jjia nia.
- <sup>9</sup> Nael ngo cirse-cirsil lei biar nia; ngo Yargel ddei Arbosobo leil caxl zae gger nia!
- <sup>10</sup> Yar nixmox neix su ca maelmaerjjia ddei cuxgexdaex mel taexl te gger nia; nixmox seir su ca mel ddei cuxgexdaex mel larnei darmumu mo bil dae lol.

### Bei Leixl Su Ddei Mel, Arbosobo A

Yalsaxl vaexr caxlgo. Caxlgo caxl su mel leil guaxr su ddei leil jia gger. Heixl zex zza caxlgo bbaex labox ddei sser a, bbaex dax dae.

- 76** <sup>1</sup> Yoxrdaxl su mel arseir lei Arbosobo leil saexl; Yirsaexllixl su mel gga yar mi ddei vaer zzir a.
- <sup>2</sup> Sexlmuxl ddei Yiluxlsaler zzi gga zza dae; yar hher ggie xi zzir Xi'a zzi gga zza dae.

- <sup>3</sup> Yar halmaex gga jir ddaexr labox ddei leil jir baex,  
zzi deil a pahher ddu, altor nei zzi deil a sser ddu maelmaerjgia  
ngaxl te gger.
- <sup>4</sup> Arbosobo, ni yarzi middux!  
Ni, ni leil dir su mel leil deil leixl gger a,  
quexrlixl zzazza mo worga mel dax jjixr lei!
- <sup>5</sup> Yaa ca mel gga zzi deil sexrsexr mel si dax su si lei mel yoxl si  
su si a;  
yaa ddei meixr mel yixr mil si a, ha du nr saexl a;  
si leil bei koxl xixl nr var a.
- <sup>6</sup> Yargel ddei Arbosobo, ni yaa leil hie a qie,  
yaa zaxlddaexr marcae cux su nei mur zzaer su mel lei si jjia a.
- <sup>7</sup> Ni leil larnai arseir lei i du!  
Ni seifu faex du lei a mel,  
arseir ni meixsaer qir leil ngier ver xie bbeixleir?
- <sup>8-9</sup> Ni merlabbor hher dae a arddol mel hoxr, arddol mel nr hoxr  
bbeix a ca leil bbejjiur lol.  
Arbosobo ha du lei a ca leil serpaxl,  
yar middurbbor nr col su ca hazza leil jiuxl nia;  
halcar middur ddei dder gexr a arjjiuljjiu a hher dae a.
- <sup>10</sup> Ca mel seifu faex a gielgiel ni leil middux lol;  
ca mel seifu faex nr nor a, ni yaa leil bbiur gex dae nia.
- <sup>11</sup> Nia Arbosobo Yihexrhuaxr dax bbeix har zaxr goxr mel, nia  
bei ci nia;  
zaza-lili hher dae ca mel lei zzaegu vei si lei a, arseir lei i du  
Seirpor ddei leil gger nia.
- <sup>12</sup> Zzirmar ddei ssor ddei col a, yar yar leil bei leixl gger,  
yar middurbbor zzirmar mel leil, arseir lei yar leil i du saexl lol.

Goxrsol-goxrnaxr Goxr Dae Car A, Arbosobo Bei Dae Mel Leil Holcir

Yalsaxl vaexr sipi. Yiduxlduixl bei dae mel dax zox dae.  
Caxlgo caxl su mel leil guaxr su ddei leil jia gger.

**77** <sup>1</sup> Ngo Arbosobo leil ae dae a, yar leil qiuxr;  
ngo Arbosobo leil ae a, yar ngo leil noni.

<sup>2</sup> Ngo goxrsol-goxrnaxr pex dae car, Seirpor leil zo a qiuxr;  
eilmerxixl ngo cirleixr nr nor leixrhher ddei bil du lei a yar dax  
ddar biar;  
nael ngo nixmox ddei leil quex lei quex vu-nr-ssi.

<sup>3</sup> Ngo Arbosobo leil jjiur a dder zzilzzil-zzerzzer mo hher lei hher  
ssei nr ddo;  
ngo cix ae ae a dder nixmox zzar yarzi zzasol.

<sup>4</sup> Ni ngo leil yixrmeixl lei jjiu nr ddo lol, ngo nixmox zzar zzasol  
wor nr ddo a, ddar lei biar nr cexr a. <sup>5</sup> Ngo halcar ddei nixixl  
mel leil holcir; halleix cir koxl cir koxl goxr gel lei mel leil  
holcir. <sup>6</sup> Ngo eilmerxixl ngo caxlgo caxl dae mel leil holcir du  
lei a, ngo nixmox zzar seirseir a xiar a ngo armael leil biex:  
<sup>7</sup> holbbaexl Seirpor cirse-cirsil ngo leil piar pixl gger a ngo?  
Zeixleixr ngo leil nr seir lol a ngo? <sup>8</sup> Holbbaexl yar ca leil  
perniar dae mel, cirse-cirsil lei nor a ngo? Yar bbeix har zaxr  
goxr mel cirse-cirsil lei nr bei a ngo? <sup>9</sup> Holbbaexl Arbosobo ca  
leil seirseir meixl gger hol-nr-cir a ngo? Yar seifu faex a dder  
ca leil zoxlnixr nor a ngo? <sup>10</sup> Ngo bbeix: “Ngo leil nixmox no  
lol ddei mel dder, mu zzir ggie hher dae hal ddei leixrhher yo  
bbor halleix sael a ddoddo mo nr bei a,” eine bbeix a.

<sup>11</sup> Nael ngo Yihexrhuaxr bei dae mel holcir dae nia; ngo  
arsae bei lei halcar ni yarzi seir yarzi murgurddo bei  
dae mel leil holcir dae nia. <sup>12</sup> Ngo ni bei dae mel leil  
seirseir a xiar doxr nia; ni bei dae mel leil xiar nia.

<sup>13</sup> Arbosobo, ni bei dae mel seir gaxzi, ca mel zi dae mel arddol ddei Arbosobo leil vaer leixl su zza bbeixleir?

<sup>14</sup> Ni mel yarzi seir yarzi murgurddo bei su Arbosobo ddei nga a; ni halleix ni ddei bbesur mel circuxr-hanga leil mia lol. <sup>15</sup> Halleix ni, ni ddei leixrhherba ddei sser a, ni ddei cassor-worssor, hherdder Yargel nei Yuesaexl ddei giedae ca mel leil jiuxl xixl lei.

<sup>16</sup> Arbosobo, ajjix mel ni leil mia a qie dder gexr; ajjix neixlneixl mel lei gexr a le du lei a. <sup>17</sup> Zico mel gga ajjix dox zeil lei; merlabbor qiurte me teixl lei; ni ddei jir baex lei zaza-lili bbiu dae. <sup>18</sup> Ni almer er dae qiurte ddei mersisixl gga hher ji dae; almer bbiexr dae mel middurbbor leil bbele lol; middur ddei lei lelelle le du lei a. <sup>19</sup> Ni ddei jjiumo zex mel neixvi gga hher dae; ni ddei jjiumo zex mel ajjix vaervaer gga hher dae; nael ni ddei ciddur mel leil saexl su ca nr zza. <sup>20</sup> Halleix, ni Moxrxi nei Yalluixr ddei leixrhher leil sser dae a ni ddei cassor-worssor mel leil hier dae; hherdder acixl ya cir leil hier dae sael a nga.

Arbosobo Nei Yar Ddei Cassor-worssor Mel

Yalsaxl vaexr ca leil mul gger dae sipi.

**78** <sup>1</sup> Ngo ddei cassor-worssor mel, nia ngo ddei lixfaxr mel leil noni nia;

ngo meir gga biar dae ddar mel seirseir a noni nia.

<sup>2</sup> Ngo meir gga bir dae a biar nia;

ngo halcar tortor ddei zzirddar mel biar teixl lei nia;

<sup>3</sup> hherdder ngua bbejjiur goxr, ngua saexl goxr,

halae ngua ddei porpor mel lei ngua leil biar gger goxr hal mel nga a.



- <sup>4</sup> Ngua eilmel ngua giedae ca mel dax ker-nr-zi;  
 Yihexrhuaxr leil bbeixzae gger mibbe mel nei yar ddei bbesur  
 mel,  
 halae yar yarzi seir yarzi murgurddo bei dae mel,  
 giedae-giebbaer ca mel leil biar gger nia.
- <sup>5</sup> Yar Yargel leil dixl har dae lixfaxr mel gger,  
 Yirsaexllixl leil lixfaxr dixl gger;  
 hherdder yar ngua ddei porpor mel leil miardal a  
 giedae-giebbaer ca mel leil mul gger lol mel nga a.
- <sup>6</sup> Yel xiu nr teixl lei seir hal mel leil jiujiu saexl lol;  
 yaa lei cir zeix cir zeix ca mel leil biar gger nia.
- <sup>7</sup> Yel yaa leil Arbosobo leil koxl lol, Arbosobo bei dae mel leil  
 holcir dae lol,  
 yar miardal dae mel dax bei mae dae lol.
- <sup>8</sup> Yaa ddei porpor mel sael a, nixmox gex, ddar nr no, bar-nr-ver,  
 Arbosobo dax mae gax-nr-zi hane nr nga lol.
- <sup>9</sup> Yirfaxrlixr su meixr mel jir ddaexr labox vei dae,  
 nael zaxlddaexr zi ci a yoxl doxdoxsi pa xixl lei a.
- <sup>10</sup> Yaa Arbosobo bbeix har dae mel dax bei nr mae;  
 yar ddei lixfaxr mel bei nr yuex.
- <sup>11</sup> Yar bei dae mel leil nei yar yarzi seir yarzi murgurddo bei dae  
 a,  
 yaa leil i lol hal mel leil hol-nr-cir.
- <sup>12</sup> Yar Aezixr goxrjia Sor'a mipaerbbae gga,  
 yaa porpor mel meixsaer qir leil yarzi seir yarzi murgurddo bei.
- <sup>13</sup> Yar neixvi gga ajjix mel bbe kae lol a, yaa leil ssi gel lol;  
 yoxl ajjix mel leil lu yarzi ssei mel sael a ngier dae lol.
- <sup>14</sup> Yar eilnirggu nael zico sser,  
 eilmerxixl nael cirxixl-lorbba adoxlle sser a yaa leil hier dae.
- <sup>15</sup> Mipaerbbae gga yar legelbbe mel leil bbeixr zil lol a, yaa leil  
 ajjix cirke dda wo lol,  
 hherdder ajjix yarzi neixl hal mel sael a miur.

- 16 Yar ajjix mel leil legelbbe gga pe teixl lei lol,  
ajjix mel leil lazzarmo gga sael a pe dae lol.
- 17 Nael yaa halae yar leil de dae doxr,  
yaa hierbolpae gga hher dae car, mu zzir ggie hher dae hal  
ddei ddei ddar nr no.
- 18 Yaa nixmox zzar Arbosobo leil sixr i a,  
yaa armael xiar dae mel dax zox dae a zzor ddu qiuxr,
- 19 Halae nrbba-nrbba Arbosobo leil biar a bbeix:  
“Arbosobo mipaerbbae gga zzorci-ddami baer cexr a ngo?”
- 20 I ddo a! Halleix yar Moxrxi leil legelbbe taex leil deil lol a,  
ajjix pe teixl lei lol a, lazzarmo loxr lol.  
Holbbaexl yar halae zzor ddu gger cexr a ngo?  
Yar ddei cassor-worssor mel leil hor gger cexr a ngo?” eine  
bbeix.
- 21-22 Yaa mel Arbosobo leil ddar-nr-zzi;  
yar yaa leil jiuxl a lei, yaa yar leil nr koxl.  
Yel Yihexrhuaxr bbejjiur a dder seifu faex.  
Yar Yargel ddei giedae ca mel leil adoxl cu dae mel sael a faxr;  
Yirsaexllixl su ca mel leil seifu faex.
- 23 Nael yar halae merlabbor leil miardal,  
yoxl merlabbor alddur mel ggapu gger a,
- 24 marnaxr mel leil almer sael a lei zeil lei lol a, yaa leil zol.  
Merlabbor loxlmoxr mel yaa leil gger.
- 25 Ca mel tisir ddei zzor ddu mel zzor;  
yaa leil loxlmoxr gger a, yaa leil zzor bbox lol.
- 26 Arbosobo merlabbor ddei dofa piar a gga mersi jia du lei lol;  
yoxl yar ddei bbesur sser a, naxrfa piar a gga mersi jia mal lei  
lol.
- 27 Almer lei zeil lei mel sael a, ngax mel yaa dax zeil lei lol, bir sa  
mel leil lei miur;  
ngax hor mel bir nilme mel leil lei miur.
- 28 Yar ngax mel leil yaa sur bei teixl lei xigex daxr ggie,

- hherdder yaa hher ggie zaza-lili nor dae lol.
- <sup>29</sup> Yaa lei zzor a; halae zzor bbox a;  
eine mel dder yaa li niazzir dae mel sael a nga a.
- <sup>30</sup> Nael yaa mel yarzi zzordusi,  
zzor ddu mel halae yaa meir gga ni dae seir,
- <sup>31</sup> Arbosobo dder yaa leil seifu faex a, yaa ca mel gga sexrsexr  
hal mel leil seixl zil gger a;  
Yirsaexllixl su mel gga leixl su mel leil lei deil zil gger a.
- <sup>32</sup> Eine nga bbeixarnar, yaa halae zuixl bei doxr;  
yar yarzi seir yarzi murgurddo bei dae mel leil ddar-nr-zzi.
- <sup>33</sup> Yel yar dder yaa nixixl goxr dae mel baexr a goxr lol;  
yaa gol dae hozze yaa leil gexr doxr lol.
- <sup>34</sup> Yar yaa leil seixl car saelnei yaa yar leil qiuxr;  
nixmox zzar huixrsoxr a, seirseir a yar leil zo a yar leil qiuxr.
- <sup>35</sup> Yaa lei Arbosobo mel yaa ddei legelbbe,  
mu zzir ggie hher dae Arbosobo mel yaa leil jiuxl su Seirpor  
ddei nga a holcir du lei.
- <sup>36</sup> Nael yaa halae meir ddei yar leil kuar gger laexl,  
lo ddei yar leil fur.
- <sup>37</sup> Yaa nixmox taex yar dax velper a nr mae,  
yar bbeix har zaxr goxr mel dax bei nr mae.
- <sup>38</sup> Nael yar zzael yaa leil zoxlnixr,  
yaa ddei zuixl mel ssoxrsuxl, yaa leil bei zil nr gger,  
yar halae hormo boxl nei seifu faex nor,  
yar ddei seifu maelmaerjgia faex nr teixl lei.
- <sup>39</sup> Yaa mel ca lar nga, yar holcir dae,  
hherdder mersi mel jia gel ho a jia nr xixl lei hal mel sael a nga.
- <sup>40</sup> Yaa hormo boxl nei mipaerbbae gga yar ddei ddar nr no,  
hierbolpae gga yar leil nixmox no lol!
- <sup>41</sup> Yaa gguixrleix-boxleix yar leil sixr i;  
Yirsaexllixl su ca leil guaxr su seirceix-seirmaer ddei leil seifu  
faex lol.

- 42 Yaa yar ddei bbesur mel leil nei yar yaa leil dir su ca mel dax  
jiuxl teixl lei goxr mel leil hol-nr-cir a. 43 Yar Aezixr goxrjia  
gga ddoddo mo bei dae mel leil hol-nr-cir a;  
Sor'a mipaerbbae gga yarzi seir yarzi murgurddo bei dae mel  
leil hol-nr-cir a.
- 44 Yar mel, yaa ddei lazzarmo gga ajjix mel nei laxiur gga ajjix  
mel sirnilni loxr lol,  
yaa leil dda nr cexr lol.
- 45 Yar yamir seirseil ar cir leil yaa dax lei lol a, yaa leil ke lol;  
yoxl gelderdo mel leil yaa hher ggie bei xiaxr gger lol.
- 46 Yaa ddei loxlmoxr mel zaxbiul mel leil jia gger,  
yaa sulku teixl lei mel zaxbiul mel leil zzor lol.
- 47 Yar wortaexlaex lei lol a, yaa ddei puxrto zzei mel deil xiaxr  
gger,  
nixpiu zax lol a, yaa ddei saersulsul zzei mel zax zil gger.
- 48 Yaa ddei zzeir mel leil wortaexlaex deil zil lol, yaa ddei zzeir  
mel leil almer zaex zil lol.
- 49 Yar larhorhormo seifu faex ddu, sirzzi ddu, vuxryixr ddu,  
goxrsol ddu mel ca leil ke su tisir sael a yaa leil ke lol.
- 50 Yar seifu maelmaerjjia faex teixl lei a,  
yaa leil nogiel no lol a, yaa leil si lol.
- 51 Aezixr goxrjia gga ssor vaervaer maelmaerjjia seixl zil gger,  
Har ddei ca mel<sup>a</sup> gga yaa leixl tor seir hier beil maelmaerjjia  
seixl zil gger.
- 52 Yar, yar ddei cassor-worssor mel leil zzael hier teixl lei,  
hherdder acixl ya mel leil hier teixl lei sael a nga;  
mipaerbbae gga yaa leil hier dae,  
hherdder acixl ya mel leil hier dae sael a nga.
- 53 Yar yaa leil hier dae a zzasoso a ssi gel, yel yaa nr gexr;  
neixvi gga ajjix mel zzael yaa leil dir su mel leil mil hex gger a.

---

<sup>a</sup>78:51 Har ddei ca mel “Har ddei ca mel” hherdder Aezixr goxrjia su ca mel nga  
a.

- 54 Yar yaa leil hier dae a, yar ddei seirceix-seirmaer middei yarqir leil ssi ci, yar ddei leixrhher yo bbor li wo worga ga leil ssi ci.
- 55 Yar yaa meixsaer qir leil Yoxrtaexl su nr nga ca mel leil ggaxr pixl gger a,  
middei mel yaa leil bbe gger a, yaa leil hher lol,  
Yoxrtaexl su nr nga ca hal mel ddei sur bei teixl lei xigex mel yaa leil hher lol.
- 56 Nael yaa halae mu zzir ggie hher dae Arbosobo leil sixr i,  
yar ddei ddar nr no; yar ddei lixfaxr dax bei nr mae.
- 57 Yaa doxdoxsi jjixr a, yar dax nr mae,  
yaa ddei porpor mel dax ciryoxr a nga;  
yaa leil koxl ssei nr ddo, hherdder ddaexr ma nr ddo jir ddaexr labox ddei sael a nga.
- 58 Yaa ddei worga leil neir zi ggie mel, yar leil seifu faex lol;  
yaa bbex kiexl teixl lei mel, yar leil nixnox lol.
- 59 Arbosobo bbejjiur a dder seifu faex;  
Yirsaexllixl su ca mel leil yarzisael vuxryixr.
- 60 Yar Silloxr mermi gga,  
yar ddei Sexlmuxl ddei leil hherdder yar ca mel dax hher ggie ddei leil nr li.
- 61 Yar, yar ddei bbobbolbbo zza, yar ddei bbesur zza yueguixl ddei,  
yar leil dir su ca mel leil su si lol.
- 62 Yar, yar ddei cassor-worssor mel leil altor vei su mel leixrga gga jia ji gger a yaa leil seixl lol;  
yar, yar armael ddei ca mel leil seifu faex.
- 63 Caleixlssor mel leil adoxl cu zil gger a;  
ssormaerleixl mel lei ggie baxl a caxl dae caxlgo mel bbejjiur nr ddo.
- 64 Arbosobo leil zi su mel leil seixl zil gger a lei,  
maermocir mel ae-nr-nge.

- 65 Halcar, Seirpor mel yixrmeixljjiu su mel zucur mel sael a zucur a;  
 yar yarzi sexr ca mel zzipbaer dda a worcixl-worni ae dae sael a nga.
- 66 Yar, yar leil dir su mel leil deil leixl gger a, yaa leil doxdoxsi jjixr lol;  
 yaa leil cirse-cirsil qiaxrmeix zzi nr zza lol.
- 67 Yar Yuesaexl ddei giedae ca mel leil nr li;  
 Yirfaxrlixr ddei cuxr leil nr tiur.
- 68 Nael Yoxrdaxl ddei cuxr leil tiur;  
 eil cuxr mel hherdder yar nolnger Xi'a worga ga nga a.
- 69 Halmaex gga yar ddei xi zzir zi,  
 muggiebbaer merlabbor ddeix ci,  
 middur sael a velver a zza dae,  
 cirse-cirsil zzezze lei zza ci.
- 70 Yoxl yar leil miar bei gger su Daxlweixl leil tiur teixl lei,  
 ya bbe gga yar leil ae teixl lei a,
- 71 yar leil baxr da dae yamodo mel dax zeixleixr nr mae dae lol,  
 yar ddei cassor-worssor Yargel ddei giedae ca mel leil nei yar armael ddei ca Yirsaexllixl su mel leil guaxr lol.
- 72 Yel yar nixmox zzar seirseir xiar dae mel dax zox dae a yaa leil guaxr;  
 bbesur zzazza mo yaa leil hier dae.

Seirpor Leil Qiuxr A, Goxrjia Leil Jiuxl Lol

Yalsaxl vaexr sipi.

**79**<sup>1</sup> Arbosobo, Yoxrtaexl su nr nga ca mel ni ddei cassor-worssor mel leil ddaexr lei,  
 ni ddei xi zzir leil sei-nr-beix loxr lol <sup>a</sup>,  
 Yiluxlsaler zzi ddei leil bei xiaxr gger a.

<sup>b</sup>79:1 sei-nr-beix loxr lol Sei-nr-beix loxr lol ddei yilsi mel dder Arbosobo vuxryixr dae mel bei.

- <sup>2</sup> Ni leil miar bei gger su ca mel ddei ggecir mel,  
merlabbor bbiu dae ngax mel leil zol,  
ni ddei, ni kebal ca mel dax bbe teixl lei cassor-worssor mel  
ddei ggecir leil hor mel,  
yivu-nilhax mel leil zol.
- <sup>3</sup> Yaa ddei sirnilni mel Yiluxlsaler zzi ddei zaza-lili ajjix sael a dox  
teixl lei,  
yaa leil giexlhex su nr zza.
- <sup>4</sup> Ngua, ngua dax naer dae goxrjia mel ddei bbeix vuxryixr ddu  
loxr a;  
ngua dax zaza-lili goxr dae ca mel ddei vaessi ddu nei bbeix no  
ddu loxr a.
- <sup>5</sup> Yihexrhuaxr, eimel arddolcar goxr ci nia neil?  
Ni cirse-cirsil lei seifu faex doxr a ngo?  
Ni seifu faex dae mel adoxl cu mel sael a bbiu doxr dae lol a  
ngo?
- <sup>6</sup> Ni seifu faex dae mel,  
ni leil nr saexl circuxr-hanga leil nei ni ddei mi leil nr qiuxr su  
goxrjia mel leil ddeix ci lol nia.
- <sup>7</sup> Yaa mel Yargel ddei giedae ca, hherdder ni ddei cassor-worssor  
mel leil bei zil gger;  
halae ni hher ggie ddei bei xiaxr jjia gger a, azo lei nr zza loxr  
lol.
- <sup>8</sup> Arbosobo, ni leil qiuxr, ngua porpor mel zuixl bei a, ngua leil tor  
nr faxr;  
nialngasael ngua leil zoxlnixr la,  
ngua nixmox zzar zzasol zildu a.
- <sup>9</sup> Ngua leil jiuxl su Arbosobo,  
ni yarzi middux mi ddei leil i dae a ngua leil beijjiu la!  
Ni mi ddei leil i dae a, ngua leil jiuxl la,  
ngua ddei zuixl mel ssoxrsuxl la.
- <sup>10</sup> Arsaenga a kebal goxrjia su ca mel leil “Yaa ddei Arbosobo  
arddolmaex hher dae?” eine bbeix lol?

Kebal goxrjia su ca mel ni leil miar bei gger su mel leil seixl zil  
gger;  
yel ni leil qiuxr, ngua leil ni yaa leil bei koxl xixl ggie mia lol.

<sup>11</sup> Ge ji dae ca mel ni leil qiuxr dae qiurte ddei ni dax ddeix ci lol  
nia;  
ni ddei ddoddo mo mel dax zox dae a,  
si niazzir dae ca mel leil gol dae lol.

<sup>12</sup> Seirpor, ni leil qiuxr,  
ngua dax zaza-lili goxr dae mel ni leil bei vuxryixr dae mel,  
ni yaa leil sir peix bei koxl xixl.

<sup>13</sup> Eine nga a, ngua cirse-cirsil lei ni leil nawo nia;  
arddol coxr ci a lei, ni leil bbeixzae gger nia.  
Ngua mel ni ddei cassor-worssor,  
ni ddei silbbarbbae leil ya mel nga a.

### Seirpor Leil Qiuxr A, Goxrjia Ddei Leil Bei Jjiu Lol

Yalsaxl vaexr sipi. Caxlgo caxl su mel leil guaxr su ddei leil jia  
gger. Baexrhexrhua ddei diuxlzi sser. (diuxlzi eil yoxr yarzi noni  
zae, zzi leil seissaexr a caxl, bbeixsael ggie baxl a caxl.)

**80** <sup>1</sup> Yihexrhuaxr, ni mel dder Yirsaexllixl su ca mel ddei  
yaloxlmo.

Ni ya cir leil hier dae mel sael a Yuesaexl ddei giedae ca mel  
leil hier dae.

Yel ni leil qiuxr, seilseir a noni la!

Jiluxlboxr nrrnel ggaxrne cux dae Seirpor,  
ni leil qiuxr, bbobbolbbo bbo teixl la!

<sup>2</sup> Yirfaxrlixr su ca, Bixlyarmir su ca nei Marnaxrsi su ca  
meixsaer qir leil ddoddo mo bei a ngua leil jiuxl lei.

<sup>3</sup> Arbosobo, ni leil qiuxr, ngua leil ni dax za xixl lei lol,  
ni ddei qiaxrmeix leil bbolbbo mel ngua leil zoxl gex dae lol a,



- ngua leil dder jiuxl wo a!
- <sup>4</sup> Meixr hazza leil guaxr su Arbosobo Yihexrhuaxr,  
ni, ni ddei cassor-worssor mel ni dax ddar biar dae mel leil  
seifu faex a, arddolcar ci neil?
- <sup>5</sup> Ni meixbbix mel zzor ddu bei lol a, yaa leil zol;  
meixbbix cirke ddux lol a, yaa leil dda lol.
- <sup>6</sup> Ni ngua dax naer dae su ca mel leil ngua leil weix a zzi dax zex  
lol;  
ngua leil dir su mel lei zzi dax ngua leil vaessi.
- <sup>7</sup> Meixr hazza leil guaxr su Arbosobo,  
ngua leil ni dax za xixl lei lol,  
ni ddei qiaxrmeix leil bbolbbo mel ngua leil zoxl gex dae lol a,  
ngua leil dder jiuxl wo a!
- <sup>8</sup> Ni Aezixr goxrjia puxrto zzei ar zzei ba si lei a,  
kebal su ca mel leil ggaxr pixl gger a,  
puxrto zzei halmaex dae ji.
- <sup>9</sup> Ni middur ddei giexl har zaxr dae a,  
yarji ddei arsae neixlneixl ner ji a,  
middurzzar cirmaex-hanga lei ner ci a.
- <sup>10</sup> Yar avix ddei worga mel leil bbe gex du lei a,  
yarbaxlleixr mel Xiabaexr zzei mel sael a nga.
- <sup>11</sup> Yar yarbaxlleixr caxl teixl lei a, neixvi dax ssi ci;  
yarggax ggax teixl lei a, lazzarmo dax ggax ci.
- <sup>12</sup> Ni arsaenga a, sixzzei zaza-lili weixr gex dae mel caexr pixl  
gger,  
jjiumo dax ssi gel lei ca mel leil arsae caex niazzir caex lol.
- <sup>13</sup> Sixzzei cili gga nilveixr mel lei yar leil bei xiaxr gger;  
yirvu-nilhax mel lei yar leil zzor lei.
- <sup>14</sup> Meixr hazza leil guaxr su Arbosobo, ni leil qiuxr, za xixl lei!  
Merlabbor i zeil lei a puxrto zzei eil zzei leil guaxr dae.

- <sup>15</sup> Ni leixrhher yo bbor dae teixl lei nei ni armael leil weix a hhel du lei lol  
yarggax mel leil guaxr dae.
- <sup>16</sup> Sixzzei eil zzei leil mel adoxl cu pixl gger ho a; taexl zeigger ho a;  
ni seifu faex teixl lei a, yaa ni qiaxrmeix ddei leil mia a dder si a.
- <sup>17</sup> Ni ddei leixrhher bbor ni yo piar a gga ca ddei leil zar gex dae lol nia,  
hherdder ni armael leil weix a hhel du lei lol ca ddei ssor ddei nga a.
- <sup>18</sup> Eine nga a, ngua dder doxdoxsi nr jjixr;  
ni leil qiuxr, ngua leil jiuxl gol du la,  
ngua dder ni mi ddei leil koxl dae a ni dax qiuxr.
- <sup>19</sup> Meixr hazza leil guaxr su Arbosobo Yihexrhuaxr,  
ni ddei qiaxrmeix leil bbolbbo mel ngua leil zoxl gex dae lol a,  
ngua leil dder jiuxl wo a!

Arbosobo Ddei Cassor-worssor Mel,  
Yar Ddei Qiurte ddei Leil No-nr-ni

Yalsaxl vaexr sipi. Caxlgo caxl su mel leil guaxr  
su ddei leil jia gger. Jiatexl ddei yoxrcixl sser.

- 81** <sup>1</sup> Nia ggese a niul leil worni lol su Arbosobo leil caxl zae gger nia;  
ggese a Yargel ddei Arbosobo dax caxlgo caxl du lei nia.
- <sup>2</sup> Caxlgo caxl nia, surgu deil nia,  
caxlgo bbaex labox ddei bbaex nia,  
yoxrcixl peix labox ddei peix nia.
- <sup>3</sup> Ddeixteixl nei ceingor ci a, jiax goxr a,  
cuxgexdaex mex nia.
- <sup>4</sup> Eil ddei mel Yirsaexllixl su leil dixl gger dae lixfaxr ddei nga a;  
Yargel ddei Arbosobo miardal dae ddei nga a.

- <sup>5</sup> Yar Aezixr goxrjia leil faxr car,  
Yuesaexl ddei giedae ca mel leil dixl gger a,  
yaa leil holcir dae lol ddei nga a.
- Ngo halmaex gga ngo nr saexl ddar mel bbejjiur a.
- <sup>6</sup> Arbosobo bbeix: “Ngo ni paezixlleixr leil daxr lirlir bil dae mel  
nor zei lol;  
leixrhher gga vei dae beller lirlir taex dol zei lol.
- <sup>7</sup> Ni goxrsol-goxrnaxr pex dae a, ngo leil qiuxr a, ngo dder ni leil  
jiuxl;  
ngo almer er dae mel gga ni leil ddarkoxl;  
Mirlixlba mermi ajjix dax halmaex ni leil sixr i.
- <sup>8</sup> Ngo ddei cassor-worssor, ngo quex dae mel ni noni nia!  
Yirsaexllixl su mel, ngo ni ngo ddei ddar no loxia.
- <sup>9</sup> Kebal ca mel zi dae hal mel ni dax halmaex zza dae lol nr ddo;  
ni hal mel leil olddetexl nr ddo.
- <sup>10</sup> Ngo mel ni ddei Arbosobo Yihexrhuaxr a;  
halleix ni leil Aezixr goxrjia gga hier teixl lei;  
ni meir ddei arsae leilei ngaxl dae nia,  
ngo dder ni leil zol bbox.
- <sup>11</sup> Nael ngo ddei cassor-worssor mel, ngo qiurte ddei leil  
no-nr-ni;  
Yirsaexllixl su mel, ngo leil i lei i meixl nr gger.
- <sup>12</sup> Ngo dder yaa leil nr guaxr,  
yaa leil nixmox gex doxr dae lol,  
yaa xiar dae mel sael a bei lol.
- <sup>13</sup> Ngo, ngo ddei cassor-worssor mel,  
ngo ddei ddar no loxia;  
ngo ddei jjiumo zex leil ssi loxia;
- <sup>14</sup> eine nga a mel, ngo dder nialngasael yaa leil vuxryixr su mel  
leil bei leixl gger,  
za xixl lei a yaa leil dir su mel leil ddaexr.

- <sup>15</sup> Yihexrhuaxr leil vuxryixr su mel gexr a, yar xielmeir leil puxr  
gex dae nia;  
cirse-cirsil lei yaa leil faxr nia.
- <sup>16</sup> Nael yar nia leil so naxrcixl zzir mel zol nia,  
legelbbe gga tu teixl lei bbiurvi mel nia leil zzor bbox lol.”

## Arbosobo Mel Guaxr Su Vaer Zzir Ddei Nga A

Yalsaxl vaexr sipi.

- 82** <sup>1</sup> Arbosobo merhhexr gga quexrlixl zza su mel agala gga  
ngier dae a,  
yar ca mel zi dae mel leil ser a bbeix:
- <sup>2</sup> “Nia ca mel leil bbaehhexhhex a ser-nr-paxl,  
yarzi gexrddo bei su ca mel leil beijjiu a arddolcar ci niazzir  
dae neil?
- <sup>3</sup> Nia casolssor nei aniuxcir mel leil ddar bbeix jjiu nia;  
goxr sol su nei azo lei nr zza su ca mel leil bbaehhexhhex a ser  
gger nia.
- <sup>4</sup> Casolssor nei azo lei nr zza su mel leil jiuxl nia;  
yaa leil nixmox neix su ca mel leixrga gga jiuxl teixl lei nia.
- <sup>5</sup> Nia halae medeil, nr saexl, neixmar ggie nixixl goxr dae;  
middurbbor hoxrhoxr nei seirseir bei su nr zza a.
- <sup>6</sup> Halleix ngo bbeix: “Nia Arbosobo lesel xiu ar mel a;  
mul zzir ggie hher dae hal ddei ddei ssor mel a.
- <sup>7</sup> Nael nia middurbbor ca mel dax ciryoxr a si nia;  
nia zzirmar ddei ssor ddei sael a de zei nia,” eine bbeix a.
- <sup>8</sup> Arbosobo, cirgoxr-hanga lei ni ddei a;  
ni leil qiuxr, ha du la a, middurbbor hazza leil serpaxl.

Seirpor Leil Qiuxr A, Yirsaexllixl Su Ca  
Leil Dir Su Mel Leil Bei Leixl Gger

Yalsaxl vaexr caxlgo.

- 83** <sup>1</sup> Arbosobo, ni leil qiuxr, arjjiuljjiu a tor nr hher dae!  
Arbosobo, ni leil qiuxr, meir ddei tor mix nr gex dae,  
ddar nr biar tor nr bei!
- <sup>2</sup> I ddo a! Ni leil dir su mel bbialil-bbialor ae dae;  
ni leil vuxryixr su mel ha du lei a, ni leil dir.
- <sup>3</sup> Yaa yarzi gexrddo xiar ji dae a, ni ddei cassor-worssor mel leil  
ke niazzir;  
yaa zzi dax zzubbe a, ni guaxr dae ca ddei leil ke niazzir.
- <sup>4</sup> Yaa bbeix: “Lei, niul yaa leil bei zil jjia gger, yaa ddei goxrjia  
ddei mier lol!  
Yirsaexllixl mi eil ddei leil holcir su nr zza lol!
- <sup>5</sup> Yaa ciryoxr a xiar dae,  
zzi dax cir piar a bei nia zzubbe har a, ni leil dir.
- <sup>6</sup> Hherdder Yirdo su ca, Yirsirmarlxl su ca,  
Moxrya su ca, Xiaxljiaxr su ca,
- <sup>7</sup> Jiabalexl su ca, Yalmae su ca, Yaxlmarlxl su ca,  
Feilixlsixl su ca nei Tuiloxr su ca mel nga a.
- <sup>8</sup> Yalsuxl su ca mel lei yaa dax cir piar a bei;  
yaa Loxrdaexr ddei giedae ca mel leil beijjiu.
- <sup>9</sup> Arbosobo, ni leil qiuxr, ni Mirdixl su ca mel leil arsae bei mel,  
yaa leil lei arsae bei,  
Zisuixl lazzarmo dax Xixila nei Yibixl yaa nnel leil bei dae mel  
sael a nga.
- <sup>10</sup> Yaa Yirdo'aer mermi si a, ggecir mel xiaxr a.
- <sup>11</sup> Ni leil qiuxr, yaa ddei vaervaerpor mel leil Exrlxl nei Xiyiboxr  
dax ciryoxr a nga lol;  
yaa ddei zzirmar ddei ssor mel leil Xiba nei Sarmuxlnaxr dax  
ciryoxr a nga lol.

- <sup>12</sup> Yaa bbeix: “Ngua Arbosobo ddei middei mel li wo a, ngua armael ddei middei loxr lol nia.”
- <sup>13</sup> Ngo ddei Arbosobo, ni leil qiuxr, yaa leil mersisixl sixl mal lei nilme mel sael a nga lol, mersi jia mal lei bexlze mel sael a nga lol.
- <sup>14</sup> Adoxl mel arsae sixzzei cili mel cu pixl gger, adoxlle mel arsae worga mel cu pixl gger mel,
- <sup>15</sup> ni leil qiuxr, ni lei hal mel sael a mersi daxlgaxl jia lol a yaa leil ggaxrmae dae lol; almer daxlgaxl lei lol a yaa leil zux.
- <sup>16</sup> Yihexrhuaxr, ni leil qiuxr, yaa leil seixlda a, qiaxrmeix zzi cirdoxr lei nr zza lol a, yaa leil ni mi ddei leil qiuxr lei lol!
- <sup>17</sup> Yaa leil cirse-cirsil lei qiaxrmeix zzi nr zza lol nia, gexr zildu lol nia! Yaa leil yixrsixr nr zza a, si lol nia!
- <sup>18</sup> Yaa leil, ni leil Yihexrhuaxr mi; ni larnei middurbbor hazza leil guaxr su mu zzir ggie hher dae ddei nga a saexl lol!

### Sexlmuxl Ddei Leil Nolnger

Kerla ddei giedae ca vaexr sipi. Caxlgo caxl su mel leil guaxr su ddei leil jia gger. Jiatexl ddei yoxrcixl sser.

**84** <sup>1</sup> Meixr hazza leil guaxr su Yihexrhuaxr, ni ddei Sexlmuxl ddei yarzisael nolngerddo!

<sup>2</sup> Ngo Yihexrhuaxr ddei xi gga yarzisael ssi niazzir; ngo ddei nixmox nei ngo ddei ggecir lei, cirse-cirsil lei gol dae Arbosobo leil ae dae a yar leil qiuxr.

<sup>3</sup> Meixr hazza leil guaxr su Yihexrhuaxr ngo ddei zzirmar, ngo ddei Arbosobo, ni ddei xi gga ni leil zzeir seixlziggie halmaex, zzugal mel lei armael leil hher ggie zo gger wo,

- ziljuerlaexl mel lei ngax ssor mel hher ggie cide zo wo.
- <sup>4</sup> Ni ddei xi gga hher su mel, ni seir lol dae ca mel nga a!  
Yaa ni leil bbeixzae gger doxr.
- <sup>5</sup> Ni leil koxl dae a worni du lei ca ddei, ni seir lol dae ca ddei nga a!  
Ca eil ddei nixmox zzar Xi'a ssi ggie jjiumo hal zex leil yarzisael ssi niazzir.
- <sup>6</sup> Yaa meixbbix ddux a lagiex gga ssi gel a,  
lagiex eil ddei leil lur ddux ggie loxr lol a;  
loxlmoxr se zi almer lei a, lagiex gga ajjix bbi a.
- <sup>7</sup> Yaa ho ssi ho worni, ca cirddei-hanga Xi'a ssi a,  
Arbosobo meixsaer qir leil ssi.
- <sup>8</sup> Meixr hazza leil guaxr su Arbosobo Yihexrhuaxr,  
ni leil qiuxr, ngo ni dax ddar biar dae mel leil noni!  
Yargel ddei Arbosobo,  
ni leil qiuxr, seirseir a noni dae!
- <sup>9</sup> Arbosobo, ni mel ngua leil dir su mel leil bbiur gex gger su ddei nga a;  
ni leil qiuxr, ni qiaxrmeix ddei ni tiur teixl lei zzirmar ddei leil mal gger a, yar leil arleixr i.
- <sup>10</sup> Ni ddei xi zzaexggu gga ar ni hher a mel,  
bir kebal cirdu ni hher leil lei seir leixl;  
ngo, ngo Arbosobo hher ggie alddur su dae lei ddo,  
nixmox neix su ca mel ddei ake gga hher nr yuex.
- <sup>11</sup> Arbosobo Yihexrhuaxr mel merni sael a nga,  
ngo leil dir su mel leil bbiur gex su ddei nga a;  
yar ca leil seirseir meixl gger, middux lol.  
Yar cirza-hanga seirseir mel,  
seir a bota ddu nr zza ca mel leil nr gger dol dae cir yoxr lei nr zza.
- <sup>12</sup> Meixr hazza leil guaxr su Yihexrhuaxr,  
ni leil koxl su ca ddei mel,

ni seir lol dae ddei nga a!

## Goxrjia Mel Leil Zzasoso A Nga Lol Qiuxr

Kerla ddei giedae ca vaexr sipi. Caxlgo caxl su  
mel leil guaxr su ddei leil jia gger.

- 85** <sup>1</sup> Yihexrhuaxr, ni, ni tiur teixl lei middei ddei leil seir lol ho  
a;  
Yargel ddei giedae ca kebal mermi ssu mal hal mel leil jiuxl xixl  
lei ho a.
- <sup>2</sup> Ni, ni cassor-worssor ddei zuixl mel ssoxrsuxl ho a;  
yaa bei cox dae maelmaerjjia bei pixl gger ho a.
- <sup>3</sup> Ni yaa leil seifu faex dae mel faex nor a;  
yaa leil yarzi larhor sirzzi dae mel sirzzi nor a.
- <sup>4</sup> Ngua leil jiuxl su Arbosobo,  
ni leil qiuxr, ngua leil ni dax za xixl lei lol,  
ni ngua leil vuxryixr dae mel vuxryixr nor lol.
- <sup>5</sup> Ni cirse-cirsil lei ngua leil sirzzi doxr a ngo?  
Ni cirzeix-hanga leil lei seifu faex doxr a ngo?
- <sup>6</sup> Ni zeixleixr ngua leil jiuxl gol du nr xixl lei a,  
ni ddei cassor-worssor mel leil ni leil koxl dae a gge-nr-se lol a  
ngo?
- <sup>7</sup> Yihexrhuaxr, ni leil qiuxr, ngua leil jiuxl la;  
eine nga a mel, ngua dder ni ngua leil perniar dae mel leil saexl  
var.
- <sup>8</sup> Arbosobo Yihexrhuaxr mel,  
yar ddei ca hherdder yar ddei, yar kebal ca mel dax bbe teixl  
lei cassor-worssor mel leil zzaso lol nia bbeix goxr a;  
yel ngo yar ddei ddar no nia;  
nael yar ddei ca mel yar dax nr mae za xixl lei a, nrbbba-nrbbba  
bei ssi nr ddo.



- <sup>9</sup> Arbosobo arsae bei lei yar leil i du su mel leil jiuxl a,  
middurbbor hher dae ca mel dder yar leil middux lol var.
- <sup>10</sup> Ca leil perniar dae mel nei yarzi ddarzziddo bei dae mel zzi  
dax zzi;  
bbaehhexhhexmo bei dae mel nei zzasoso mo bei dae mel zzi  
leil jiuxl.
- <sup>11</sup> Yarzi ddarzziddo bei dae mel, middurbbor ddux lei;  
bbaehhexhhexmo bei dae mel, merlabbor i zeil lei.
- <sup>12</sup> Arbosobo Yihexrhuaxr arsae bei lei seirseir mel ngua leil gger;  
ngua ddei mi gga lei loxlmoxr ddux lei nia.
- <sup>13</sup> Bbaehhexhhex mel yar xilmeir ssi dae a,  
yar leil jjiumo bei zaxr gger nia.

Arbosobo Leil Qiuxr A, Bei Jjiu Lol

Daxlweixl Yihexrhuaxr dax ddar biar.

- 86** <sup>1</sup> Yihexrhuaxr, ngo goxr sol, azo lei nr zza;  
ni leil qiuxr, seilseir a noni dae a, ngo leil ddarkoxl la!
- <sup>2</sup> Ngo mel seilseir a ni dax bei mae dae,  
yel ni leil qiuxr, ngo leil gol dae lol.  
Ngo ddei Arbosobo, ngo mel, ni leil koxl dae a,  
ni leil miar bei gger, yel ni ngo leil jiuxl la!
- <sup>3</sup> Seirpor, ngo cirni-lorbba ni leil ae dae a,  
ni leil qiuxr doxr, yel ni ngo leil zoxlnixr la!
- <sup>4</sup> Seirpor, ngo nixmox zzar xiar dae mel, ni leil jia gger;  
ngo mel, ni leil miar bei gger su ar ddei a;  
yel ni leil qiuxr, ngo leil nixmox zzar ggese lol.
- <sup>5</sup> Seirpor, ni mel halcar tortor dder seir,  
halae ca leil ssoxrsuxl ggese;  
ha ni leil qiuxr su ca mel leil ni dder yarzisael perniar.
- <sup>6</sup> Yihexrhuaxr, ni leil qiuxr,

seirseir a ngo ni dax ddar biar dae mel leil noni gger la;  
seirseir a ngo ni leil qiuxr dae mel leil noni gger la.

<sup>7</sup> Ni mel arsae bei lei ngo leil ddarkoxl;  
yel ngo goxrsol-goxrnaxr pex dae car, ni leil qiuxr nia.

<sup>8</sup> Seirpor, ca mel zi dae maelmaerjjia lei,  
cir ddei lei ni zzi nr zza;  
arseir bei dae mel lei ni bei dae mel dax bir nr cexr.

<sup>9</sup> Seirpor, ni coxl teixl lei circuxr-hanga lei ni leil bbeixzae gger  
lei nia,  
ni leil middux lol nia.

<sup>10</sup> Ni mel vaer zzir ddei nga a;  
halae yarzi seir yarzi murgurddo bei;  
ni larnei Arbosobo.

<sup>11</sup> Yihexrhuaxr, ni leil qiuxr,  
ngo jjiumo ssi labox zex ngo leil mul gger la;  
ngo ni ddei ddar mel dax bei mae dae nia;  
ni leil qiuxr, ngo ddei nixmox cirtaex-lorbba ni mi ddei leil i du  
lol!

<sup>12-13</sup> Seirpor ngo ddei Arbosobo,  
ni ngo leil perniar dae mel yarzi miur;  
ni ngo ddei xiu ddei leil jiuxl a, ca si ho mel hher ggie arsae  
neixlneixl halmaex nr ssi lol;  
yel ngo nixmox cirtaex-lorbba ni leil bbeixzae gger nia;  
ngo cirse-cirsil lei ca mel leil ni middux saexl lol nia.

<sup>14</sup> Arbosobo, yarzi col ca mel ngo leil dir,  
yarzi gexrddo bei su ca mel ngo leil bei zil gger niazzir;  
yaa ni leil meixddur ga gga lei nr ddir.

<sup>15</sup> Seirpor, ni mel ca leil zoxlnixr,  
ca leil seirseir meixl gger su Arbosobo ddei nga a;  
ni eine sirzzi nr so, ni halae ca leil yarzi perniar,  
ni bei dae mel yarzi ddarzziddo.

<sup>16</sup> Ni leil qiuxr, qiaxrmeix ddei ngo dax za xixl lei a, ngo leil zoxlnixr.

Ngo mel, ni leil miar bei gger su a;  
yel ni ngo leil worni lol.

Ngo mel, ni leil miar bei gger su ssormaer ddei ssor a;  
yel ni ngo leil jiuxl.

<sup>17</sup> Yihexrhuaxr, ni mel ngo leil beijjiu, ngo leil nixmox dder vaer;  
ni leil qiuxr, ni ngo leil seir lol dae mel ca leil mia lol,  
yel ngo leil vuxryixr su mel mia a dder yixrsixr nr zza lol.

Xi'a Zzi Leil Bbeixzae Gger

Kerla ddei giedae ca vaexr caxlgo.

**87** <sup>1</sup> Yihexrhuaxr mel, seirceix-seirmaer worga leil yar ddei Xi'a zzi ddei zi.

<sup>2</sup> Yar Xi'a zzi ddei leil nolnger a bir Yirsaexllixl zzi arddol ddei leil lei nolnger leixl.

<sup>3</sup> Arbosobo ddei Xi'a zzi,  
ni midduxddux mo hal mel leil biar ggie noni dae.

<sup>4</sup> Arbosobo bbeix: “Ngo ddei ddar no su goxrjia mel gga,  
ngo Aezixr goxrjia, Babirluixr goxrjia,  
Feilixlsixl goxrjia, Taexl'aer goxrjia nei Gursir goxrjia lei ca  
dax dae lol nia,  
ngo yaa leil Xi'a zzi gga ddei cassor-worssor bei lol nia.”

<sup>5</sup> Xi'a zzi leil bbeix ci a mel, “Cirgoxr-hanga ca mel lei halmaex  
ddei cassor-worssor a;”  
mu zzir ggie hher dae hal ddei Xi'a zzi ddei leil zza doxr dae lol  
nia.

<sup>6</sup> Arbosobo cassor-worssor mel ddei mi mel sul ber leil vaexr deix  
dae car,  
yaa leil Xi'a zzi gga ddei cassor-worssor bei lol.

<sup>7</sup> Yaa huade tiuxl dae, caxlgo caxl dae a bbeix: “Ngualeil goxr seir lol dae maelmaerjia Xi'a zzi gga lei.”

### Seirpor Leil Qiuxr A, Zoxlnixr Lol

Kerla ddei giedae ca vaexr caxlgo, hherdder Yirsila su ca Ximaxl vaexr ca leil mul gger dae sipi. Caxlgo caxl su mel leil guaxr su ddei leil jia gger. Maxrhala Lixl'axl'exr diuxlzi sser.

**88** <sup>1</sup> Yihexrhuaxr, ni mel ngo leil jiuxl su Arbosobo ddei nga a. Ngo merxixl-merni lei ni leil qiuxr doxr.

<sup>2</sup> Ngo ni dax ddar biar dae mel ni meixsaer qir leil ddeix ci lol nia; ni leil qiuxr, seirseir a ngo qiuxr dae mel leil noni.

<sup>3</sup> Ngo goxrsol-goxrnaxr cirke pex dae a, olga ddei lei pixl nrsulsul.

<sup>4</sup> Ngo mel middurzzar giexlhex dae ca mel sael a nga, cixlmaexr-wormaexr lei nr ni a.

<sup>5</sup> Ngo leil mel casima mel dax cirgo a piar dol gger a, si yaa leil seixl zil gger ca hal mel lixrbbaex gga yixr dae sael a nga.

Ni zeixleixr lei yaa leil holcir nixixl nr zza, yaa leil bei nr jjiu.

<sup>6</sup> Ni ngo leil bbeddur darneixlneixl gga piar ji gger; halmaex mel, neix zzae neixmar darneixlneixl ggie nga a.

<sup>7</sup> Ni ngo leil sirzzi dae mel, lirbebemo ngo ggecir ddei leil nixl gex dae; bolaxl sael a, ngo leil mil hex du lei.

<sup>8</sup> Ni ngo piar saexl ca mel leil vimirmir ggie bbe mal gger a, yaa leil ngo leil vuxryixr lol.

Ngo leil mel, ge ji du lei a, ngo ddux lei ddux lei nr cexr.

<sup>9</sup> Ngo meixddur lei cix meixgguir jjia a.

Yihexrhuaxr, ngo leixrhher zze bil du lei a, bbecir-bbeni ni leil qiuxr doxr.

<sup>10</sup> Ni casima mel leil murgurgur mo bei gger a ngo?

Holbbaexl, caxiu mel ha du lei a, ni leil bbeixzae gger var a ngo?

<sup>11</sup> Arseir lixrbbaex gga hher dae a, ni ca leil perniar dae mel leil biar var bbeixleir?

Arseir yiji gga hher dae a, ni yarzi koxlsseiddo bei dae eilmel leil biar var bbeixleir?

<sup>12</sup> Ni ddoddomo bei dae mel, neixmar ggie hher su ca mel arsae saexl var bbeixleir?

Ni hoxrhoxr mo bei dae mel, halmaex hher dae ca mel arsae holcir dae var bbeixleir?

<sup>13</sup> Yihexrhuaxr, ngo ni leil ae dae a ni leil qiuxr, ngo eilneixrnehe ni dax ddar biar dae mel, ni meixsaer qir leil ddeix ci nia.

<sup>14</sup> Yihexrhuaxr, ni arsaenga a ngo leil piar pixl gger?

Ni arsaenga a qiaxrmeix ddei sixl xixl si a ngo leil nr guaxr?

<sup>15</sup> Ngo mel ye tor seir dder goxr sol, zeixleixr nr nga lei si a;

ni ngo leil zux a, ngo ssilssil-ssurssur mo gexr mal a.

<sup>16</sup> Ni ngo leil sirzzi dae hal mel ajjix sael a ngo leil mil hex du lei a; ni ngo leil zux a, ngo leil ni dax bbe kae lol.

<sup>17</sup> Cirza-hanga goxrsol-goxrnaxr eilmel,

arddolcar lei ajjix sael a ngo leil zaza-lili weixr gex dae.

<sup>18</sup> Ni ngo leil perniar su nei ngo ddei gaxggor-carbeix mel leil vimir ggie bbe mal gger;

neixmarmar ddei leil ngo carbeix bei lol.

Goxrsol-Goxrnaxr Pex Dae A, Caxl Labox Caxlgo

Yirsila su ca Yirtaxl vaexr ca leil mul gger dae sipi.

**89** <sup>1</sup> Yihexrhuaxr, ni ca leil perniar dae mel, ngo cirse-cirsil lei caxl zae gger nia; ni yarzi ddarzziddo bei dae mel, ngo hormo zeix zzezze biar ci nia.

- <sup>2</sup> Ngo saexl, ni ca leil perniar dae mel mel cirse-cirsil lei zza dae var;  
ni yarzi ddarzziddo bei dae mel mel, velver a merlabbor zza dae.
- <sup>3</sup> Ni bbeix: “Halleix ngo, ngo tiur teixl lei ca hal ddei dax bbeix har zaxr ho a;  
halleix ngo, ngo leil miar bei gger su Daxlweixl dax bbeix har zaxr a bbeix:
- <sup>4</sup> ‘Ngo ni giedae ca mel leil cirse-cirsil lei zzirmar bei lol nia;  
arddol zeix dax ci a lei, ngo, ni leil ni ddei goxr ddei leil guaxr dae lol nia.’ ”
- <sup>5</sup> Yihexrhuaxr, merhhexr gga hher dae mel ni yarzi seir yarzi murgurddo bei dae mel leil caxl zae gger nia;  
seirceix-seirmaer hal mel cirgo a hher dae car,  
ni yarzi ddarzziddo bei dae mel leil bbeixzae gger nia.
- <sup>6</sup> Yihexrhuaxr, merhhexr gga hher dae eilmel,  
arseir ni zzi zza bbeixleir?  
Ca mel zi dae eilmel, arseir ni zzi zza bbeixleir?
- <sup>7</sup> Seirceix-seirmaer eilmel cirgo a hher dae car,  
ni leil gexr ni leil i du;  
yaa ni zaza-lili hher dae a, ni leil gexr zzir a.
- <sup>8</sup> Meixr hazza leil guaxr su Arbosobo Yihexrhuaxr,  
arseir ni zzi zza bbeixleir?  
Seirpor, ni bei dae cirza-hanga lei yarzi ddarzziddo.
- <sup>9</sup> Ni lili-lolo ha dae neixvi mel leil guaxr dae,  
bolaxl ddaexr dae mel leil ddaexr nor lol.
- <sup>10</sup> Ni mel neixvi gga hher dae yarzi gexrddo, Lahaboxr <sup>c</sup>te leil deil me gger a, yar leil seixl zil gger a.  
Ni leixrhherba ddei yarzi warni a,  
yel ni leil dir su mel leil deil leixl gger a, cirmaex-hanga pa mal lol a.

---

<sup>c</sup>89:10 Lahaboxr Lahaboxr mel neixvi gga hher dae guaexlwuxl leil bbeix.

- <sup>11</sup> Merlabbor ddei ni ddei a; middurbbor ddei lei ni ddei a;  
ni mel middurbbor ddei leil nei middurbbor hazza-hamaer leil  
coxl teixl lei.
- <sup>12</sup> Naxrfa piar a gga, baexrfa pia a gga lei ni coxl teixl lei.  
Taboxr worga nei Hiemexr worga lei ggese a, ni leil caxlgo caxl  
gger.
- <sup>13</sup> Ni leixrhherba ddei mel worni!  
Ni ddei leixrhher bbor worni!  
Ni ddei leixrhher yo bbor lei bil du lei a.
- <sup>14</sup> Ni zzirmar bei a mel, hoxrhoxr mo bbaehhexhhexmo bei;  
ni ca leil perniar, ni leil yarzi ddarzziddo.
- <sup>15</sup> Ggese a ni leil caxlgo caxl gger su cassor-worssor mel, ni yaa  
leil seir lol a.  
Yihexrhuaxr, ni qiaxrmeix leil bbobbolbbo zoxl teixl lei a, yaa  
leil bbele lol a.
- <sup>16</sup> Yaa ni mi ddei leil koxl dae a, cirni-lorbba lei yarzi ggese;  
yaa ni ddei seirseir mel leil bbeixzae gger.
- <sup>17</sup> Ni yaa leil worni lol, yaa leil middux lol.  
Ni ngua leil ggese a, ngua leil bei leixl lol a, cuxgexdaex mex  
lol.
- <sup>18</sup> Yihexrhuaxr, ni mel ngua leil dir su mel leil bbiur gex gger su  
ddei nga a;  
ni mel ngua Yirsaexllixl su ddei zzirmar seirceix-seirmaer ddei  
nga a.
- <sup>19</sup> Halleix, ni ddei, ni kebal mel dax bbe teixl lei cassor-worssor  
mel leil meixcir mia lol a,  
yaa leil bbeix: “Ngo ca leil jiuxl bbesur ddei ca sexrsexr hal  
ddei leil gger ho a.  
Ngo cassor-worssor mel gga tiur teixl lei hal ddei leil middux  
lol nia.
- <sup>20</sup> Ngo mel ngo leil miar bei gger su Daxlweixl leil tiur teixl lei a,

- oldde leil dox deix gger labox ssuvi ddei yar leil dox deix gger  
a, yar leil zzirmar bei lol.
- <sup>21</sup> Ngo leixrhher bbor yar leil bbesur zza lol nia,  
ngo leixrhherba ddei yar leil worni lol nia, sexr lol nia.
- <sup>22</sup> Yar leil dir su mel yar leil bei leixl gger a, yar dax cirza-hanga  
li nixixl nr zza;  
yarzi gexrddo bei su mel lei yar leil deil leixl gger nr xie.
- <sup>23</sup> Ngo yar meixsaer qir leil, yar leil dir su mel leil deil me gger  
nia,  
yar leil vuxryixr su mel leil seixl zil gger nia.
- <sup>24</sup> Ngo leil mel yarzi ddarzziddo, ngo yar leil perniar;  
yar ngo ddei mi ddei leil koxl dae a, bei leixl a, cuxgexdaex mex  
nia.
- <sup>25</sup> Ngo yar ddei goxr ddei leil yarzisael vaer lol nia,  
Yofaladir lazzarmo zex dax cirdae a, neixvi zzezze ci lol nia.
- <sup>26</sup> Yar ngo leil ae a bbeix: 'Ni mel ngo ddei Arbbor, ngo ddei  
Arbosobo,  
ngo leil jiuxl su legelbbe taex nga a,'□ eine bbeix nia.
- <sup>27</sup> Ngo yar leil ssor vaervaer ddei bei lol nia,  
middurbbor zzirmar vaer zzir ddei bei lol nia.
- <sup>28</sup> Arddolcar ci a lei, yar leil perniar;  
ngo yar dax bbeix har zaxr dae mel gierbox nixixl nr zza.
- <sup>29</sup> Ngo cirse-cirsil lei yar giedae ca nr ceix lol;  
yar ddei goxr ddei merlabbor sael a zza doxr dae lol nia.
- <sup>30</sup> Nael yar giedae ca mel ngo ddei lixfaxr mel piar pixl gger,  
ngo miardal dae mel dax bei nr mae,
- <sup>31</sup> ngo ddei lixfaxr mel no-nr-ni,  
ngo miardal dae mel nr bei arddeirnga a,
- <sup>32</sup> ngo dder zzargger sser a, yaa leil deil a, yaa bei cox a saexl lol;  
ngo dder lorddu sser a, yaa leil deil a, yaa ddei zuixl mel leil  
mia lol.
- <sup>33</sup> Nael ngo Daxlweixl leil perniar nor nixixl nr zza;  
arddolcar ci a lei, yar ngo leil ddarzzi ddo.



- 34 Ngo yar dax bbeix har zaxr dae mel mel, ngo arsae bei lei bei  
ci;  
ngo meir gga bbeix teixl lei mel mel, gierbox nixixl nr zza.
- 35 Ngo mel seirceix-seirmaer, ngo armael leil dor dae a bbeix,  
ngo arsae bei lei Daxlweixl leil nr fur.
- 36 Yar giedae ca mel cirse-cirsil lei ceix nixixl nr zza;  
yar ddei goxr ddei mel merni sael a bbo doxr dae;
- 37 yar ddei zzirmar baxrde taex mel xiubbo sael a zza doxr dae;  
merlabbor ddei zza doxr dae sael a nga.
- 38 Nael ni, ni tiur teixl lei zzirmar ddei leil seifu faex a dder yar  
leil ni dax ggaxr pixl gger, yar leil nr li.
- 39 Ni, ni leil miar bei gger su ddei dax bbeix har zaxr goxr mel dax  
zox dae a nr bei;  
yar ddei goxr ddei bei xiaxr gger,
- 40 yar ddei weixrqiaxr mel lei caexr pixl gger,  
yar pahher ggie ddei lei bei xiaxr gger.
- 41 Jjiumo-jjiucar gga ssi dae ca mel lei yar dax cirza-hanga su lei;  
yar dax hher naer dae goxrjia mel lei yar leil vaessi.
- 42 Ni yar leil dir su ca mel ddei leixrhher yo bbor sexr du lei lol,  
yar leil dir su ca maelmaerjjia leil ggese lol.
- 43 Ni yar ddei altor baex sser nr cexr lol;  
zzi deil car, yar leil deil wor nr xie lol.
- 44 Yar leil quexrlixl nr zza lol,  
yar ddei zzirmar baxrde taex dder guirle gger a,  
yar leil zzirmar nr bei lol.
- 45 Ni yar leil olga niul lol, yar leil yixrsixr nr zza lol.
- 46 Yihexrhuaxr, eimel arddolcar goxr ci nia neil?  
Ni cirse-cirsil lei ngua leil pahher doxr a ngo?  
Ni seifu faex dae mel adoxl sael a bbiu doxr dae a, arddolcar ci  
nia neil?
- 47 Ni leil qiuxr, ni holcir dae, ngo ca mu eil se mel olga yarzi niul;  
ni ca coxl a, yaa leil baexr a ca mu lol a ngo?

<sup>48</sup> Arseir si nr var bbeixleir?

Arseir armael ddei xiu ddei leil yiji gga jiuxl teixl lei cexr  
bbeixleir?

<sup>49</sup> Seirpor, ni leil mel yarzi ddarzziddo,

halleix ni Daxlweixl dax yar leil perniar nia bbeix har zaxr goxr  
mel arsaenga a nr bei neil?

<sup>50</sup> Seirpor, ni leil qiuxr, si ni leil miar bei gger su mel leil arsae  
bbeix vuxryixr holcir dae.

Kebal su ca mel ngo leil arsae seixlda lol holcir dae.

<sup>51</sup> Yihexrhuaxr, ni leil dir su ca mel,

ni tiur teixl lei zzirmar ddei leil eilmel sael a seixlda lol,  
yar arddolmaex ssi ci lei, yar leil bbeix vuxryixr.

<sup>52</sup> Nael Yihexrhuaxr, ni leil mel cirse-cirsil lei bbeixzae gger nia!  
Amae, amae!

### Moxrxi Arbosobo Dax Ddar Biar

Arbosobo ddei ca Yihexrhuaxr dax ddar biar.

**90** <sup>1</sup> Seirpor, cirzeix-hanga lei ni mel ngua pahher ggie ddei  
nga a.

<sup>2</sup> Worga mel leil lei coxl nr teixl lei seir,

middur ddei leil nei middurbbor cirza-hanga mel leil lei coxl nr  
teixl lei seir,

halcixl-halwor tor cirdae a, arddolcar ci a lei, ni mel Arbosobo  
a.

<sup>3</sup> Ni ca mel leil nilhar loxr xixl lol a, bbeix:

“Nia middurbbor ca mel, nilhar loxr xixl nia,” □ eine bbeix a.

<sup>4</sup> Ni i dae a mel, cirdu koxl lei goxr gel lei ho arni sael a nga,  
yoxl eilmerxixl ar me yixr zucur sael a nga.

<sup>5</sup> Ni yaa leil vi mil a ajjix gga pe teixl si mel sael a nga lol;  
yaa mel halae yixrmeixl ar me jjiu sael nga;

- yaa yoxl eilneixrnehe vaer dax dae silbbar mel sael a nga.
- <sup>6</sup> Silbbar mel, eilneixrnehe lei niux teixl lei a vaer dax dae seir, eilmerxixl caer xixl lei a, dder hie zzu a.
- <sup>7</sup> Ni sirzzi a qie dder ngua leil mier lol a; ni seifu faex a, ngua gexr zildu a.
- <sup>8</sup> Ngua zuixl bei dae mel maelmaerjjia lei ni mia dae; ngua kerzi dae hal mel lei ni meixsaer qir leil bbele ggie zza dae a.
- <sup>9</sup> Ni seifu faex a, ngua nixixl goxr dae mel leil nganiul lol a; ngua ddei olga ddei mel cirleixr dder mier a.
- <sup>10</sup> Ngua ca mu eil se mel sircei koxl a gol wo ddo, sexrsexr hal mel lei heixlcei koxl a gol wo ddo, nael ngua ddei kuar ddu mel mel ngua goxr sol dae mel nei ngua cix dae mel lar nga; ngua ddei olga ddei bbiu gel si sael a nga, meixcix sael dder nr zza a.
- <sup>11</sup> Ni sirzzi dae mel, arsaesael sexr mel arseir saexl bbeixleir? Ni seifu faex dae mel, arsaesael gexrddo mel arseir saexl bbeixleir?
- <sup>12</sup> Ni leil qiuxr, ngua leil ngua nixixl goxr dae mel yarzi nganiul saexl lol, yel ngua leil olnoaddu lol a, seilseir a nixixl goxr lol.
- <sup>13</sup> Yihexrhuaxr, ngua arddolcar xia ci nia neil? Ni leil qiuxr, za xixl lei a, ni leil miar bei gger su ddei leil zoxlnixr la!
- <sup>14</sup> Ni leil qiuxr, bbecir-bbene ha du lei a qie, ngua leil yarzisael perniar la, yel ngua leil cir se lei ggegge-sese mo nixixl goxr lol.
- <sup>15</sup> Ni leil qiuxr, ni ngua leil goxr sol lol nixixl ddei dax zox dae nei ngua nr seir pex dae nixixl ddei dax zox dae a,

ngua leil hal mel miumiu ggese lol la.

<sup>16</sup> Ni bei dae mel, ni leil miar bei gger su mel leil mia lol la;  
ni ddei bbobolbbo mel, yaa giedae ca mel leil mia lol la.

<sup>17</sup> Seirpor Arbosobo, ni ngua leil seir lol la.

Ni leil qiuxr, ngua leixrhher gga bei dae miar mel leil seir lol la;  
ngua leixrhher gga bei dae miar mel, ni ngua leil seir lol la.

### Arbosobo Mel Niul Leil Guaxr Su Ddei Nga A

**91** <sup>1</sup> Muzzirggie hher dae hal ddei dax pahher dae a mel  
Ddo zzir hal ddei yar leil guaxr nia.

<sup>2</sup> Ngo Yihexrhuaxr leil bbeix ci a bbeix:

“Yar mel ngo ddei pahher ggie, ngo ddei weixrqiaxr,  
ngo ddei koxl ggie Arbosobo ddei nga a.”

eine bbeix.

<sup>3</sup> Yar ni leil ngax bel su mel ddei bel gga jiuxl teixl lei nia,  
ca leil si lol var nogiel mel gga jiuxl teixl lei nia.

<sup>4</sup> Yar yar ddei me mel sser a ni leil bbe gex dae,  
ni yar ddoleixr woxrke pahher nia;

yar yarzi ddarzziddo bei dae mel,  
ni leil dir su mel leil bbiur gex dae.

<sup>5</sup> Eilmerxixl yarzi gexrddo hal mel leil ni nr gexr;  
eilnirgggu jir ddaexr mal lei mel leil lei ni nr gexr.

<sup>6</sup> Eilmerxixl nogiel mel leil ni nr gexr;  
eilnirgggu si lol var noco mel leil lei ni nr gexr.

<sup>7</sup> Ca cir du a ni dax halmaex de ze, i,  
ca cir meir a ni yo piar a gga de ze i a lei,  
nael yarzi larhor eilmel ni dax lei naer ci nr var.

<sup>8</sup> Ni meixddur zze nixmox neix su ca mel leil bei koxl xixl ggie mia  
nia.

<sup>9</sup> Ni Muzzirggie hher dae hal ddei leil hherdder ngo pahher ggie  
Yihexrhuaxr leil

- ni ddei hher ggie bei lol a mel,  
<sup>10</sup> yarzi gexrddo mel ni dax lei ci nr var,  
 nogiel mel ni hher ggie lei naer ci nr var.  
<sup>11</sup> Yar mel yar ddei tisir mel leil miardal a,  
 ni ssi dae jjiumo hazza gga ni leil guaxr dae lol.  
<sup>12</sup> Yaa leixrhher ddei ni leil ddor gex dae var,  
 ni ddei qihher ddei legelbbe leil zuax nr dae lol.  
<sup>13</sup> Ni hhemar nei sae yarzi duxr mel leil jjiux gex dae nia;  
 hhemar yarleixl nei sae vaervaer mel ni qihher woxrke jjiux ji  
 dae nia.
- <sup>14</sup> Arbosobo bbeix: “Yar ngo leil perniar a, ngo dder yar leil jiuxl  
 nia;  
 yar ngo ddei mi ddei leil saexl a, ngo dder yar leil guaxr dae  
 nia.  
<sup>15</sup> Yar ngo leil qiuxr car a, ngo yar leil ddarkoxl nia;  
 yar goxrsol-goxrnaxr pex dae a, ngo yar dax cirgo a hher dax  
 dae nia;  
 ngo yar leil jiuxl nia, arseir lei yar leil i du lol nia.  
<sup>16</sup> Ngo yar leil olga si lol nia, yar leil jiuxl nia.”

Bbiex Zae Gger Dae Caxlgo

Wornol nixixl cir ni ddei caxlgo

- 92** <sup>1</sup> Yihexrhuaxr leil nawo nei mu zzir ggie hher dae hal ddei  
 mi ddei leil caxl zae gger a mel, yarzi seir!  
<sup>2-3</sup> Xixrzi lesel bbaex labox mel sser,  
 caxlgo bbaex labox mel sser nei yoxrcixl peix labox mel sser a,  
 noni zaezae mo bbaex teixl lei,  
 eilneixrnehe ni ca leil perniar dae mel leil biar;  
 bbecir-bbexixl ni yarzi ddarzziddo bei dae mel biar, eine mel  
 yarzi seir.  
<sup>4</sup> Yihexrhuaxr, ni bei dae mel ngo leil ggese lol;

ni leixrhher gga bei dae mel ngo leil ggese a caxlgo caxl lol.

<sup>5</sup> Yihexrhuaxr, ni miar bei dae mel einezeixl vaer!

Ni xiar dae mel arseir lei xiar ci nr xie!

<sup>6</sup> Ji-nr-lixr su ca mel nr saexl;

ca medeil mel lei nr saexl.

<sup>7</sup> Nixmox neix su ca mel silbbar sael a vax du lei nei zuixl bei su

ca hazza sexr du lei car,

hherdder yaa leil bei zil gger zi ci a, cirse-cirsil zzezze ci.

<sup>8</sup> Nael Yihexrhuaxr, ni larnai cirse-cirsil zzezze lei mu zzir ggie

hher dae.

<sup>9</sup> Yihexrhuaxr, ni i ddo a!

Ni leil vuxryixr su maelmaerjjia si jjia nia;

zuixl bei su hazza ssi bbeir jjia nia.

<sup>10</sup> Ni ngo leil niur yir mel sael a sexr lol;

ngo leil seirseir daxlgaxl-daxllixl meixl gger.

<sup>11</sup> Ngo meixddur gga ngo leil vuxryixr su ca mel leil bei koxl xixl

ggie mia wo a;

ngo nolba gga nixmox neix su, ngo leil dir su ca mel leil faxr

ggie bbejjiur wo a.

<sup>12</sup> Nixmox seir su ca mel jji zzei mel sael a vax du lei nia;

Lixrbanexl mermi Xiabaexr zzei mel sael a vaer du lei.

<sup>13</sup> Yaa leil Yihexrhuaxr ddei xi gga dae ji dae,

ngua ddei Arbosobo ddei zzaexggu gga vax du lei.

<sup>14</sup> Yaa mar lei halae saer niar nia;

six vizu yarzi ni; yarpeixl mel, arddolcar lei nibaexbaex mo.

<sup>15</sup> Yel ca mel leil Yihexrhuaxr mel bbaehhexhhexmo nga saexl lol.

Yar mel ngo ddei legelbbe, yar dax mel nr hoxr cirdoxr lei nr

zza.

Arbosobo Mel Zzirmar

**93** <sup>1</sup>Yihexrhuaxr, ni zzirmar bei a, ni zzirmar ddei pia veixr dae.

Yihexrhuaxr, ni yarzi ddo,  
middurbbor ddei dder ha nr var,  
velver mo zza doxr dae.

<sup>2</sup>Azo lei nr zza seir, ni ddei zzirmar baxrde taex dder velver a zza dae ho a;  
ni mel halcixl-halwor tor dder zza ho a.

<sup>3</sup>Yihexrhuaxr, ajjix mel pox du lei a, porpolpor me dae,  
bolaxl mel lei arsae mumu ddaexr du lei.

<sup>4</sup>Nael Yihexrhuaxr, ni mel mu zzir ggie hher dae a, ddo zzir ddei nga a;  
ni ajjix mel porpolpor me ddei hal mel leil lei ddo leixl,  
neixvi gga bolaxl arsae mumu ddaexr dae hal mel leil ddo leixl.

<sup>5</sup>Yihexrhuaxr, ni dixl har dae lixfaxr mel koxlsseiddo;  
ni ddei xi zzir mel, cirse-cirsil lei seirceix-seirmaer.

### Arbosobo Ca Hazza Leil Serpaxl

**94** <sup>1</sup>Yihexrhuaxr, ni mel ca mel leil bei koxl xixl su Arbosobo ddei nga a.

Ca mel leil bei koxl xixl su Arbosobo, ni leil qiuxr, ni ddei bbobbolbbo mel zox teixl la!

<sup>2</sup>Middurbbor hazza leil serpaxl su Seirpor,  
ni ngier du lei a, yarzi col su ca mel bei dae mel dax zox dae a yaa leil bei koxl xixl!

<sup>3</sup>Yihexrhuaxr, nixmox neix su ca mel yaa bei leixl hal mel leil kuar doxr a,  
arddolcar ci nia neil? Arddolcar sael kuar nor neil?

<sup>4</sup>Yaa ddar vaer te;  
zuixl bei su hazza lei armael leil kuar.

- <sup>5</sup> Yihexrhuaxr, yaa ddoddo-nrddo ni ddei cassor-worssor mel leil ci,  
ni ddei ca mel leil ke.
- <sup>6</sup> Yaa maermocir nei ngol hher dae ca mel leil seixl zil gger,  
yoxl aniuxcir mel leil lei seixl zil gger.
- <sup>7</sup> Yaa bbeix: “Yihexrhuaxr nr mia;  
Yargel ddei Arbosobo nr guaxr,” eine bbeix.
- <sup>8</sup> Cassor-worssor mel gga, nia azo lei nr saexl su mel arleixr xiar;  
ca medeil mel nia arddolcar sael olnolddu neil?
- <sup>9</sup> Nolba coxl su ddei holbbaexl yar bbejjiur nr xie a ngo?  
Meixddur coxl su ddei holbbaexl yar mia nr xie a ngo?
- <sup>10</sup> Yar cirgoxr-hanga leil guaxr, holbbaexl yaa leil nr faxr a ngo?  
Yar mel ca leil mul gger su, holbbaexl yar cirza-hanga nr saexl a ngo?
- <sup>11</sup> Yihexrhuaxr saexl,  
ca mel xiar dae mel mel baexr a xiar dae lalnga.
- <sup>12</sup> Yihexrhuaxr, ni guaxr dae, lixfaxr sser a mul gger dae ca hal ddei,  
ni yar leil seir lol a!
- <sup>13</sup> Yar goxrsol-goxrnaxr goxr dae car, ni yar leil zzaso lol,  
nixmox neix su ca mel bbeddur giexl har dae ddei gga de ji zzezze ci.
- <sup>14</sup> Yihexrhuaxr yar ddei cassor-worssor mel leil piar nr pixl;  
yar ddei ca mel leil nr li bei nr var.
- <sup>15</sup> Serpaxl car mel, bbaehhexhhex ser nia;  
nixmox seir hazza lei bbaehhexhhex mel leil nolnger nia.
- <sup>16</sup> Arseir ngo leil weix a ngier du lei a, nixmox neix su mel leil dir neil?  
Arseir ngo leil weix a ngier du lei a zuixl bei su mel leil bbiur gex dae neil?
- <sup>17</sup> Yihexrhuaxr ngo leil bei-nr-jjiu arddeirnga a,



- ngo arddol-cirsil dder ca si ho a hher ggie hher dae ho a.
- <sup>18</sup> Ngo de zei a bbeix dae a qie, Yihexrhuaxr ni ngo leil perniar a, ngo leil zar gex dae a, ngo leil de nr zei lol.
- <sup>19</sup> Ngo nixmox zzar cirke cix dae, cirke zoxrzixr dae car, ni ngo leil nixmox dder vaer a, ngo leil ggese lol.
- <sup>20</sup> Lixlfxar sser dae a, si leil ke su hal mel nei yar ddei quexrlixl sser dae a, yarzi gexrddo bei su hal mel, holbbaexl yaa ni dax cir piar a bei cexr a ngo?
- <sup>21</sup> Yaa cirgo a hher pex dae a nixmox seir su ca mel leil dir, azo lei bei nr cox ca ddei leil si nia zuixl dixl gger.
- <sup>22</sup> Nael Yihexrhuaxr mel ngo ddei pahher ggie bei; ngo ddei Arbosobo mel ngo koxl ggie legelbbe bei.
- <sup>23</sup> Yar yaa zuixl bei dae mel yaa leil ddeix lol.  
Yaa zuixl bei dae car malmal, yar yaa leil bei zil gger nia; Yihexrhuaxr ngua ddei Arbosobo yaa leil bei zil gger nia.

### Arbosobo Leil Bbeix Zaer Gger Caxlgo

- 95** <sup>1</sup> Lei, niul Yihexrhuaxr leil caxlgo caxl gger nia!  
Niul leil jiuxl su legelbbe taex leil ggesese a worcixl-worni caxl gger nia!
- <sup>2-3</sup> Yihexrhuaxr mel Arbosobo a;  
yar yarzi vaer; yar mel zzirmar a;  
yar yarzi vaer; yar ca mel zi dae maelmaerjgia leil vaer leixl.  
Yel niul yar meixsaer qir leil lei a, yar leil nawo nia;  
ggesese a worcixl-worni yar leil caxlgo caxl gger nia!
- <sup>4</sup> Middurzzar arsae neixlneixl lei yar leixrga gga hher ji dae; worga arsae mumu lei yar ddei.
- <sup>5</sup> Neixvi mel yar coxl teixl lei a, yel yar ddei a;  
hieltebbor mel lei yar leixrhher gga coxl teixl lei.
- <sup>6</sup> Lei, niul middur leil puxr gex dae a yar leil bbeixzae gger nia; niul leil coxl su Yihexrhuaxr meixsaer qir leil cizixl gger nia.

<sup>7</sup> Yar mel niul ddei Arbosobo;  
niul mel yar ddei silbbarbbae leil ya mel nga a;  
yar leixrga gga cassor-worssor mel nga a.

Eilni nia yar ddei ddar noni nia:

<sup>8</sup> nia nixmox gex nr ddo,  
halleix nia porpor mel Mirlixlba mermi hherdder mipaerbbae  
gga Marsar mermi hher dae a nixmox gex mel sael a nga nr  
ddo.

<sup>9</sup> Yaa ngo yaa leil weix a bei dae mel leil mia a bbeixarnar a,  
halae ngo leil sixr i, ngo leil seifu faex lol.

<sup>10</sup> Licei koxl gga, ngo ca hal coxr leil vuxryixr,  
ngo bbeix: ‘Yaa nixmox zzar ngo dax nr mae, ngo bei dae mel  
leil lei nr saexl.’

<sup>11</sup> Yel ngo dder seifu faex dae a bbeix har zaxr a bbeix:  
‘Yaa ngo ddei wornol ggie ddir wo nr ddo.’ ”

Arbosobo Mel Zzirmar Vaer Zzir Ddei Nga A

**96** <sup>1</sup> Nia Yihexrhuaxr leil caxlgo yarsixl caxl gger nia!  
Middurbbor hazza lei Yihexrhuaxr leil caxlgo caxl gger nia!

<sup>2</sup> Yihexrhuaxr leil caxlgo caxl gger nia,  
yar mi ddei leil bbeixzae gger nia!  
Bbecir-bbeni yar ca leil jiuxl dae mel biar nia!

<sup>3</sup> Circuxr-hanga dax yar middux dae mel leil biar nia!  
Cassor-worssor hazza dax yar yarzi seir yarzi murgur bei dae  
mel leil biar nia!

<sup>4</sup> Yihexrhuaxr mel yarzi vaer;  
yar leil daxlgaxl-daxllixl bbeixzae gger mibbe;  
yar leil mel, bir ca mel zi dae maelmaerjjia leil i du leixl mibbe.

<sup>5</sup> Kebal su zi dae hal mel mel guaxr-nr-zoxr,  
nael Yihexrhuaxr merlo-milo coxl.

<sup>6</sup> Yar meixsaer qir leil bbobbolbbo zza,  
arseir lei yar leil i du;

ddoddomo hal mel nei yarzi i zae hal mel yar ddei xi gga hher  
bbi a.

- <sup>7</sup> Circuxr-hanga cassor-worssor mel, nia Yihexrhuaxr leil  
bbeixzae gger nia;  
yar middux dae mel leil nei ddoddomo hal mel leil bbeixzae  
gger nia.
- <sup>8</sup> Yihexrhuaxr ddei mi ddei leil middux lol mibbe mel yar leil  
middux lol nia;  
ziddu vei dae a, yar ddei xi zzaexggu gga ddir nia.
- <sup>9</sup> Seirceix-seirmaer Yihexrhuaxr ddei bbobbolbbo mel gga yar leil  
bbeixzae gger nia;  
middurbbor hazza lei yar meiksaer qir leil lixlix-laexlaex go  
dae nia.
- <sup>10</sup> Ni circuxr-hanga dax: “Yihexrhuaxr zzirmar bei a, middurbbor  
dder vever a nga, ha nr var;  
yar bbaehhexhex mel dax zox dae a, circuxr-hanga leil  
serpaxl nia,” eine bbeix nia.
- <sup>11</sup> Merlabbor ddei leil ggese lol nia,  
middurbbor ddei leil ggese lol nia!  
Neixvi nei neixvi gga hher dae mel leil ae du lei lol nia!
- <sup>12</sup> Mi nei mi gga maelmaerjjia leil lei ggese lol nia!  
Halcar, sixzwei cili gga sixzwei mel lei ggese a,  
Yihexrhuaxr meiksaer qir leil worcixl-worni ae du lei nia.
- <sup>13</sup> Yar mel lei a; yar lei a mel, middurbbor maelmaerjjia leil  
serpaxl nia.  
Yar bbaehhexhex mel dax zox dae a, middurbbor hazza leil  
serpaxl nia,  
yar leil ddarzziddo mel dax zox dae a, cassor-worssor hazza  
leil serpaxl nia.

Arbosobo Mel Guaxr Su Vaer Zzir Ddei Nga A

97<sup>1</sup> Yihexrhuaxr zzirmar bei a, middurbbor ddei leil ggese lol nia!

Neixvi gga worga maelmaerjgia leil ggese lol nia!

<sup>2</sup> Zico mel nei neixmarmar mel yar zaza-lili tultu mo hher dae; yar zzirmar bei a mel, hoxrhoxr mo bbaehhexhhexmo bei.

<sup>3</sup> Yar xilmeir adoxl herhelher bbiu dae, yar zaza-lili yar leil dir su mel leil cu pixl gger.

<sup>4</sup> Yar almer bbiexr a, middurbbor hazza leil bbele lol; middur ddei mia a dder le du lei a.

<sup>5</sup> Worga mel Yihexrhuaxr leil mia, hherdder middur maelmaerjgia ddei Seirpor ddei leil mia a dder laxrzuxr sael a zzi a.

<sup>6</sup> Merlabbor hazza lei yar bbaehhexhhexmo nga ca mel leil saexl lol; cassor-worssor maelmaerjgia lei yar ddei bbobbolbbo mel leil mia.

<sup>7</sup> Kiexl teixl lei bbex mel leil zi su hazza leil nei ca mel zi dae nga-nr-zi mel leil kuar gger su mel leil seixlda lol nia. Ca mel zi dae maelmaerjgia, nia Yihexrhuaxr leil zi nia!

<sup>8-9</sup> Yihexrhuaxr, ni mel vaer zzir ddei nga a; ni middurbbor hazza leil vaer leixl; ni leil i du a mel bir ca mel zi dae hazza leil lei i du leixl. Yel, Xi'a zzi gga ca mel ni bbaehhexhhex mo serpaxl dae mel leil bbejjiur a dder ggese; Yoxrdaxl zzi gga ca mel lei ggese.

<sup>10</sup> Nia Yihexrhuaxr leil perniar su ca mel, zuixl mel leil vuxryixr nia!

Yar, yar kebal ca mel dax bbe teixl lei cassor-worssor mel ddei olga mel leil guaxr dae, yaa leil nixmox neix su ca mel ddei leixrga gga jiuxl teixl lei.

<sup>11</sup> Bbolbbo mel, nixmox seir su ca mel leil zoxl gex dae; ggesese mel, bota ddu nr zza su ca mel nixmox zzar hher ji dae.

<sup>12</sup> Nixmox seir su ca mel, nia Yihexrhuaxr bei dae mel leil ggese nia;  
 nia yar ddei seirceix-seirmaer mi ddei leil bbeixzae gger nia.

### Arbosobo Middurbbor Leil Guaxr

**98** <sup>1</sup> Yihexrhuaxr mel yarzi seir yarzi murgur bei goxr a;  
 yel nia yar leil caxlgo yarsixl caxl gger nia!

Yar ddei leixrhher yo bbor nei seirceix-seirmaer leixrhherba ddei ca leil jiuxl.

<sup>2</sup> Yihexrhuaxr yar arsae ca mel leil jiuxl, ca leil saexl lol;  
 yar ddei bbaehhexhhex mel, circuxr-hanga ca mel leil mia lol.

<sup>3</sup> Yar Yirsaexllixl hhexr leil perniar nei yar bei dae mel yarzi ddarzziddo holcir dae.

Middurbbor cirmaex-hanga lei niul ddei Arbosobo ca leil jiuxl ggie mia a.

<sup>4</sup> Middurbbor hazza lei ggegge-sese a,  
 Yihexrhuaxr dax ae du lei nia;  
 ggegge-sese a worcixl-worni caxl du lei a,  
 yar leil caxl zae gger nia.

<sup>5</sup> Caxlgo bbaex labox bbaex dae a yar leil caxl zae gger nia,  
 caxlgo bbaex no bbaex, caxl no caxl yar leil caxl zae gger nia!

<sup>6</sup> Baerlae nei cuxgexdaex sser a,  
 ggegge-sese a zzirmar Yihexrhuaxr meixsaer qir leil worcixl-worni mex nia!

<sup>7</sup> Neixvi nei neixvi gga hher dae hazza leil ae du lei lol nia;  
 middurbbor nei middurbbor hher dae hazza lei ae du lei nia.

<sup>8</sup> Ajjix mel leil leixrhher sael a, deil du lei lol nia;  
 worga mel leil cirter a ggegge-sese a, Yihexrhuaxr dax ae du lei lol nia;

<sup>9</sup> Yar lei a mel middurbbor leil serpaxl nia.  
 Yar hoxrhoxr mel dax zox dae a,  
 middurbbor hazza leil serpaxl nia;

yar bbaehhexhhex mel dax zox dae a,  
cassor-worssor leil serpaxl nia.

### Arbosobo Mel Vaer Zzir Zzirmar

**99**<sup>1</sup> Yihexrhuaxr zzirmar bei a, cassor-worssor mel gexr a, go dae nia!

Yar Ziluxlboxr nrmel ggaxrne cux dae a, middur ddei le du lei nia.

<sup>2</sup> Yihexrhuaxr Xi'a zzi gga hher dae a mel, vaervaer ddei nga; yar cassor-worssor hazza leil vaer leixl.

<sup>3</sup> Yaa, yar ddei vaervaermo halae i du ddoddomo mi ddei leil bbeixzae gger nia!

Yar mel seirceix-seirmaer!

<sup>4</sup> Zzirmar ddei bbesur zza,  
yar bbaehhexhhex mel leil nolnger, bbaehhexhhex mel bei ze  
si,

Yargel hhexr dax bbaehhexhhexmo hoxrhoxr mo bei.

<sup>5</sup> Nia ngua ddei Arbosobo Yihexrhuaxr leil i du nia,  
yar qihher toxl gex ggie dax bbeixzae gger nia!

Yar mel seirceix-seirmaer!

<sup>6</sup> Yar leil zi su mel gga mel Moxrxi nei Yalluixr ca dae;  
yar ddei mi ddei leil qiuxr su mel gga mel Sarmuraer ca dae.  
Yaa Yihexrhuaxr leil qiuxr a, yar dder yaa leil ddarkoxl.

<sup>7</sup> Yar sseigu lesel zico mel gga yaa dax ddar biar;  
yaa yar miardal dae nei yaa leil gger lixfaxr mel dax bei mae  
dae.

<sup>8</sup> Ngua ddei Arbosobo Yihexrhuaxr, ni yaa leil ddarkoxl a;  
ni mel yaa leil ssoxrsuxl su Arbosobo ddei nga a;  
nael yaa bei dae mel dax zox dae a yaa leil bei koxl xixl.

<sup>9</sup> Ngua ddei Arbosobo Yihexrhuaxr mel seirceix-seirmaer,  
yel nia ngua ddei Arbosobo Yihexrhuaxr leil i du nia,

yar ddei seirceix-seirmaer worga dax yar leil bbeixzae gger  
nia.

### Bbeixzae Gger Dae Caxlgo

Nawo dae sipi.

**100**<sup>1</sup> Mer woxrke maelmaerjjia Yihexrhuaxr leil ggesese a  
caxlgo caxl gger nia.

<sup>2</sup> Nia ggesese a Yihexrhuaxr leil visser nia;  
yar meixsaer qir leil lei a, yar leil caxlgo caxl gger nia!

<sup>3</sup> Nia Yihexrhuaxr mel Arbosobo a saexl nia!  
Niul leil mel yar coxl teixl lei a; niul lei yar ddei ca a.  
Niul mel yar ddei cassor-worssor a;  
niul lei yar ddei silbbarbbae leil hher dae ya mel nga a.

<sup>4-5</sup> Yihexrhuaxr mel halcar tortor dder seir;  
yar arddolcar ci a lei ca leil perniar;  
yar leil mel, cirzeix-hanga lei koxlsseiddo.  
Yel niul yar leil nawo a, yar ddei alddur peixl gga ddir nia!  
Yar leil bbeixzae gger a, yar ddei zzaexggu gga ddir nia!  
Yar leil nawo nia; yar ddei mi ddei leil bbeixzae gger nia!

### Zzirmar Ddei Bbeix Har Zaxr Dae

Daxlweixl vaexr sipi.

**101**<sup>1</sup> Yihexrhuaxr, ngo ni ca leil perniar dae nei  
bbaehhexhhexmo bei dae mel leil caxl nia;  
ngo ni leil caxl zae gger nia!

<sup>2</sup> Ngo zabbar-seilseir a bota ddu lei nr zza nixixl goxr nia.  
Ni arddolcar sael ngo dax eilmaex lei neil?

- Ngo ake gga zuixl nr zza nixixl goxr nia.
- <sup>3</sup> Yarzi gexrddo hal mel ngo meixsaer qir leil nr dol;  
ni dax bei nr mae su ca mel bei dae mel ngo vuxryixr;  
ngo yar dax naer lei nr naer.
- <sup>4</sup> Nixmox zzar nr seir mel dax ngo naer lei nr naer;  
nixmox neix su ca hazza leil ngo saexl lei nr saexl.
- <sup>5</sup> Yar dax goxr naer dae su mel leil nrbbba-nrbba ker biar su mel,  
ngo yar leil bei zil gger nia;  
ca leil i ze i su nei nixmox zzar col su mel leil ngo yar leil sser nr  
gex dae.
- <sup>6</sup> Ngo, goxrjia gga ddarzziddo ca hal mel leil i, yaa leil ngo dax  
cirgo a hher lol;  
bei seir gaxzi su mel ngo leil visser nia.
- <sup>7</sup> Cafur-calel su mel, ngo ake hher wo nr ddo;  
ddar jiar te su mel, ngo meixsaer qir leil ngier dae nr cexr.
- <sup>8</sup> Ngo bbecir-bbene lei goxrjia gga nixmox neix su ca mel leil bei  
zil gger nia,  
yel Yihexrhuaxr ddei zzi gga zuixl bei su mel leil bei zil jjia gger.

Goxtsol-goxrnaxr Pex Dae A, Arbosobo Dax Ddar Biar

Goxtsol su ca mel arsae bei nia lei nr saexl car a, Yihexrhuaxr  
meixsaer qir leil sol biar a, yar dax ddar biar.

**102** <sup>1</sup> Yihexrhuaxr, ni leil qiuxr, ngo ni dax ddar biar dae mel  
leil noni;

ngo ni leil qiuxr dae mel, ni dax ddeix ci lol!

<sup>2</sup> Ngo goxtsol-goxrnaxr gga goxr dae a, ni leil qiuxr, seirseir a  
ngo leil noni;

qiaxrmeix ddei ngo leil mal nr gger tor nr bei!

Ngo ni leil qiuxr dae car, nialngasael ngo leil ddarkoxl la!

<sup>3</sup> Ngo ddei olga ddei mel alker sael a mier a;



- ngo ddei hherggar mel lei adoxlze sael a bbiu dae.
- <sup>4</sup> Ngo nixmox taex yarzi no a, silbbar sael a hie zzu a;  
ngo almeixr lei zzor hol-nr-cir a.
- <sup>5</sup> Ngo cix doxr a, zzu zildu a,  
hoxrneixr zzi ddei lar hherggar leil niaxl gex dae a.
- <sup>6</sup> Ngo mipaerbbae gga ngax mel sael a nga;  
ca hher su nr zza ggie elercir mel sael a nga.
- <sup>7</sup> Ngo yixrmeixl lei nr jjiu zucur doxr dae;  
ngo cirmuzil mo xipaebbor hher dae zzugal mel sael a nga.
- <sup>8</sup> Ngo leil dir su mel cirni-cirni ngo leil hie vuxryixr doxr;  
ngo leil bei no su ca mel ngo leil nr seir lol ddar mel bbeix.
- <sup>9</sup> Ngo kurlu zzor goxr a; hherdder almeixr zzor sael a nga;  
ngo dda dae mel gga lei meixbbix ca dax dae.
- <sup>10</sup> Ngo eine nga a mel, ni sirzzi nei seifu faex a nga arddeir a;  
ni ngo leil ti du lei a, yoxl ngo leil piar zeixixl gger.
- <sup>11</sup> Ngo ddei nixixl mel mel, mercixl car merni taex ddei avix sael  
a nga;  
ngo lei silbbar sael a hie zzu a.
- <sup>12</sup> Yihexrhuaxr, ni cirse-cirsil lei ni ddei zzirmar baxrde taex leil  
cux dae;  
ni ddei mi ddei cirzeix-hanga dax lei zza ci.
- <sup>13</sup> Eilcar mel, Xi'a zzi ddei leil zoxlnixr zi ci a;  
nixixl ddei mel ci ho a.  
Yel ni ha du lei a, Xi'a zzi ddei leil zoxlnixr nia.
- <sup>14</sup> Ni leil miar bei gger su mel, yar ddei legelbbe taex leil ggese,  
yar ddei nilme mel leil zoxlnixr.
- <sup>15-16</sup> Yihexrhuaxr Xi'a zzi ddei zi box car,  
yar halmaex gga bbobbolbbo ca leil mia lol nia.  
Yel circuxr-hanga lei Yihexrhuaxr ddei mi ddei leil i du nia,  
gexr nia;  
middurbbor zzirmar hazza lei ni ddei bbobbolbbo mel leil i du  
nia, gexr nia.

- 17 Yar goxrsol-goxrnaxr su ca mel yar dax ddar biar dae mel leil noni;  
yaa qiuxr dae mel leil i nr ze.
- 18 Giedaebbaer ca zeix leil weix a, eilmel vaexr ze lei nia;  
yel xiu nr teixl lei seir cassor-worssor mel lei Yihexrhuaxr leil bbeixzae gger nia.
- 19 Yar mu zzir ggie seirceix-seirmaer halmaex hher dae a, i ze lei;  
Yihexrhuaxr merlabbor cirdae a middurbbor leil i dae;
- 20 yar ge ji dae ca mel qiuxr dae mel leil noni,  
si niazzir dae ca mel leil piur teixl lei.
- 21-22 Cassor-worssor mel nei cirgoxr-hanga ca mel cirgo a hher dae a, Yihexrhuaxr leil visser dae car,  
yaa leil Xi'a zzi gga Yihexrhuaxr ddei mi ddei leil biar lol;  
Yiluxlsaler zzi gga yar leil bbeixzae gger dae mel biar lol.
- 23 Ngo leixl tor seir dder Yihexrhuaxr ngo leil wor-nr-ni lol;  
yar ngo ddei nixixl nganiul lol.
- 24 Ngo bbeix: “Ngo ddei Arbosobo, ngo leil leixlgger-leixlla tor nr si lol.  
Ni mel cirzeix-hanga lei zza dae!
- 25 Azo lei nr zza seir halleix, ni middurbbor coxl,  
merlabbor ddei lei ni leixrga gga coxl teixl lei.
- 26 Merlabbor middurbbor lei mier nia, ni zzael cirse-cirsil zza doxr dae nia;  
merlabbor middurbbor lei teixlsibbor pia xiux sael a zzizzi a yarli loxr nia.  
Ni merlabbor middurbbor leil kukurzzar pia mel sael a lael box gger nia;  
yel merlabbor middurbbor dder mier a.
- 27 Ni gierbox nixixl nr zza;  
ni mel arddol cir ni ci a lei zza dae.

<sup>28</sup> Ni leil miar bei gger su ddei giedae ca mel zza doxr dae nia;  
yaa ddei giedae ca mel lei ni meixsaer qir leil zzasoso a zza dae  
nia.

## Yihexrhuaxr Ddei Seirseir Mel Leil Bbeixzae Gger

### Daxlweixl vaexr sipi

- 103** <sup>1</sup> Ngo ddei nixmox,  
ni Yihexrhuaxr ddei seirseir mel leil bbeixzae gger nia!  
Ngo dax hher ji dae hazza lei,  
yar ddei Seirceix-seirmaer Mi ddei leil bbeixzae gger nia!
- <sup>2</sup> Ngo ddei nixmox,  
ni Yihexrhuaxr ddei seirseir mel leil bbeixzae gger nia!  
Yar seirseir meixl gger dae hazza leil  
hol-nr-cir bei nr ddo!
- <sup>3</sup> Yar ni ddei zuixl maelmaerjjia ssoxrsuxl,  
ni ddei no maelmaerjjia ggukor gger.
- <sup>4</sup> Yar ni ddei olga leil jiuxl a vae xixl lei a,  
bbeddur gga nr zeil lol;  
yar ca leil perniar a seirseir meixl gger dae mel nei ca leil zoxlnixr  
dae mel,  
ni dax zaza-lili hher dae.
- <sup>5</sup> Yar seirseir mel sser a ni leil nixlodda lol,  
yel ni leil zzemar sael a leixl du xixl lei lol.
- <sup>6</sup> Yihexrhuaxr ca yojiar leil weir a  
bbaehhexhhexmo bei, hoxrhoxrmo ser.
- <sup>7</sup> Yar Moxrxi leil yar ddei jjiumo zex saexl lol,  
Yirsaexllixl su ca mel leil yar bei dae mel mia lol.
- <sup>8</sup> Yihexrhuaxr ca leil zoxlnixr, ca leil seirseir meixl gger;  
yar sirzzi nr so, ca leil perniar nor nixixl nr zza.
- <sup>9</sup> Yar ca leil hie doxr nr var,  
arddolcar ci a lei sirzzi doxr dae nr var.
- <sup>10</sup> Yar niul zuixl bei dae mel dax zox dae a, niul leil nr faxr;

yar niul ddei zuixl neixlneixl mel dax zox dae a, niul leil bei koxl  
nr xixl.

<sup>11</sup> Merlabbor ddei middurbbor ddei dax arsae mumu giex dae  
mel,

Yihexrhuaxr lei yar leil gexr su ca mel leil hal mel miumiu  
perniar!

<sup>12</sup> Dofa piar a xifa piar a dax arsae vivi giex dae mel,  
yar niul yar leil dir zuixl mel leil lei arsae vivi giex dae lol!

<sup>13-14</sup> Yar niul ggecir ddei leil saexl,  
yar lei niul mel nilhar lar nga holcir dae.

Yel arbbor ssormine mel leil arsae zoxlnixr mel,

Yihexrhuaxr lei yar leil gexr su ca mel leil arsae zoxlnixr!

<sup>15</sup> Ca mel leil bbeix ci a mel, yar nixixl goxr dae mel, silbbar sael  
a nga.

Yar mipaerbbae gga vixlux mel sael a veix zae.

<sup>16</sup> Mersi arleixr jia a dder nr zza a;  
yar ner goxr ggie lei yar leil zeixleixr nr saexl a.

<sup>17-18</sup> Nael Yihexrhuaxr mel azo lei nr zza seir cirdae a arddolcar  
ci a lei,

yar ca leil perniar a seirseir meixl gger dae mel,  
yar leil gexr su ca mel leil gger.

Yar ddei hoxrhoxr mel,

yar bbeixharzaxr dae mel dax bei mae dae su,  
yar mul gger dae mel leil holcir dae a bei mae dae su,  
yar leil gexr su mel ddei giedae ca mel leil gger.

<sup>19</sup> Yihexrhuaxr yar ddei zzirmar baxrde taex leil merlabbor  
velver a zza doxr dae lol;

yar ddei goxr ddei hazza-hamaer leil guaxr dae.

<sup>20</sup> Yar miardal dae mel bei ssi, yar ddei ddar mel leil noni,  
yarzi sexr yarzi warni tisir mel,

nia Yihexrhuaxr ddei seirseir mel leil bbeixzae gger nia!

<sup>21</sup> Yar leil miar bei gger a,

yar ggeese dae mel bei su meixr mel,  
 nia Yihexrhuaxr ddei seirseir mel leil bbeixzae gger nia!  
<sup>22</sup> Yihexrhuaxr coxl teixl lei hazza,  
 nia yar guaxr ggie cirmaex-hanga,  
 yar ddei seirseir mel leil bbeixzae gger nia!  
 Ngo ddei nixmox,  
 ni Yihexrhuaxr ddei seirseir mel leil bbeixzae gger nia!

### Cirza-hanga Coxl Su Seirpor Ddei Leil Bbeixzae Gger

**104** <sup>1</sup> Ngo ddei nixmox, ni Yihexrhuaxr leil bbeixzae gger nia!  
 Yihexrhuaxr ngo ddei Arbosobo, ni mel yarzi vaer!  
 Ni yarzi iduddo yarzi middux mel, pia sael a veixr gex dae.  
<sup>2</sup> Ni bbobbolbbo ddei wol dae a, teixlsibbor pia xiux wol dae sael  
 a nga;  
 ni merlabbor ddei kar kae a, sexlmuxl ddei mae co kar kae sael  
 a nga.  
<sup>3</sup> Ni merlabbor ajjix mel gga hher ggie zi.  
 Ni zico mel ni ddei zaxlddaexr marcae bei, mersi mel ddei  
 ddoleixr leil sser dae a ssi.  
<sup>4</sup> Mersi mel, ni ddei ddar bbeix gger su tisir bei,  
 adoxlle mel ni leil miar bei gger su bei.  
<sup>5</sup> Ni middur ddei hhelhhel ggie zza dae lol,  
 yar leil cirse-cirsil lei nr le lol.  
<sup>6</sup> Ni ajjix darneixlneixl mel sser a, middur leil bbe gex, hherdder  
 pia sael a nga;  
 ajjix mel worga mel leil mu leixl.  
<sup>7</sup> Ni hie a qie, yaa dder ggerggelgger pa du si;  
 ni almer er a qie, yaa dder ggerggelgger pe.  
<sup>8</sup> Yaa worga mel leil mil gel, lagiex mel gga pe dil a,  
 ni dixl har ggie cirgo a pe mal.  
<sup>9</sup> Ni arddolmaex zzezze ssi ci dixl har dae a, ajjix mel leil nr gger  
 lol;  
 ajjix mel leil za xixl lei a, middur ddei leil mil nr hex lol.

- <sup>10</sup> Ni ajjix mel leil lagiex gga pe dae lol nei worga dax pe dae lol a,  
<sup>11</sup> mipaerbbae gga yirvu-nilhax maelmaerjjia leil ajjix dda ddu  
 zza lol,  
 tarlodaex yir mel leil ajjix nr sixl lol.
- <sup>12</sup> Merlabbor ngaxssor-ngaxne mel ajjix qir leil hher dae;  
 sixbaxlleixr leil hher dae a, me dae.
- <sup>13</sup> Ni merlabbor almer lei zeil lol a worga leil ajjix her;  
 ni seirseir bei dae mel middurbbor hher bbi a.
- <sup>14</sup> Ni silbbar ner du lei lol a, zzeir mel leil zzor lol;  
 var ner du lei lol a, ca mel leil zzor lol,  
 ca mel leil middur ddei gga loxlmoxr paxr teixl lei lol.
- <sup>15</sup> Yoxl zzibbaer dda a, ca leil nixmox ddei ggese lol;  
 ssuvi mei a, ca leil qiaxrmeix ddei nor lol;  
 loxlmoxr zzor a, ca leil nixmox ddei zzaso lol.
- <sup>16</sup> Sixzzei mel, hherdder Lixrbanexl ddei Xiabaexr zzei mel mel,  
 Yihexrhuaxr dae a;  
 maelmaerjjia leil lei almer lei bei a.
- <sup>17</sup> Ngax mel halmaex cide bei;  
 (bolbolcir) mel tarzzei mel leil cide bei.
- <sup>18</sup> Worga darmumu mel acixl yir mel hher ggie;  
 legelbbe mel bolvixr mel pahher ggie.
- <sup>19</sup> Ni xiubbo coxl a, ca mel leil arddolcar jiax goxr nia saexl lol;  
 merni taex yar ddei yar lal saexl.
- <sup>20</sup> Ni neixmarmar coxl a eilmerxixl bei a,  
 sixzzei cili gga yirvu-nilhax maelmaerjjia dder maex teixl lei a.
- <sup>21</sup> Hhemar yarleixl mel bbialil-bbialor me dae a zzor ddu zo,  
 yaa Arbosobo dax zzor ddu ho.
- <sup>22</sup> Merni taex ddux lei a qie, cinil mel dder pahher du lei a,  
 doxlzi gga yixr ji dae.
- <sup>23</sup> Ca mel ddux a, miar bei ssi a, neixmar zzezze sulku ci.
- <sup>24</sup> Yihexrhuaxr, ni coxl teixl lei mel yarzisael miur!

- Maelmaerjjia lei ni olnoldduddu mo hal mel leil sser dae a coxl teixl lei;  
 middurbbor zzarvul-zzarmae lei ni coxl teixl lei mel hher bbi a.
- <sup>25</sup> Halmaex gga neixvi zza; vaer zzae vaer, neixl zzae neixl.  
 Neixvi gga hher ji dae cirza-hanga gol dae mel hhe lei hhe jjia nr ddo, vaervaer yelye lei zza.
- <sup>26</sup> Cuaxr mel ssissi-leilei ssi dae;  
 ni coxl teixl lei lixlweixlyaltar<sup>d</sup> mel lei neixvi gga vixluxtaer dae.
- <sup>27</sup> Eilmel maelmaerjjia lei ni leil xia dae a,  
 zzor zi ci a, yaa leil zzor ddu gger.
- <sup>28</sup> Ni yaa leil gger a, yaa dder ggux du lei;  
 ni leixrhher bbor ddaexr kae a, yaa dder zzorciddo mel zzor bbox.
- <sup>29</sup> Ni qiaxrmeix ddei yaa leil mal nr gger a, yaa dder gexr;  
 ni yaa ddei seixl qir vei xixl si a, yaa dder si a, nilme loxr.
- <sup>30</sup> Ni, ni ddei seixl qir sser a, yaa leil dder coxl teixl lei;  
 ni middurbbor ddei leil yarsixl lael box lol.
- <sup>31</sup> Yihexrhuaxr ddoddomo bei dae mel leil cirse-cirsil lei middux lol nia!  
 Yihexrhuaxr leil yar coxl teixl lei mel leil ggese lol nia!
- <sup>32</sup> Yar middur ddei leil i a, middur ddei dder le du lei;  
 yar worga mel leil mox a, worga mel dder alker sil teixl lei.
- <sup>33</sup> Ngo cir se lei Yihexrhuaxr leil caxlgo caxl gger nia!  
 Ngo gol dae seir hozze, ngo dder ngo ddei Arbosobo leil caxl zae gger nia!
- <sup>34</sup> Ngo nixmox zzar xiar dae mel, Yihexrhuaxr leil ggese lol nia!  
 Ngo ggeseddu ddei mel, yar dax lei.
- <sup>35</sup> Zuixl bei su ca mel leil middurbbor mier jjia lol nia!  
 Nixmox neix su ca mel leil cir ddei lei nr zza lol nia!

<sup>d</sup>74:14 lixlweixlyaltar Ca cir mel mel a zzirdae a, lixlweixlyaltar mel dder kolloxr a.

Ngo ddei nixmox, ni Yihexrhuaxr leil bbeixzae gger nia!  
 Yihexrhuaxr leil bbeixzae gger nia!

Arbosobo Nei Yar Ddei Cassor-worssor

- 105** <sup>1</sup> Yihexrhuaxr leil nawo nia, yar ddei mi ddei leil qiuxr nia;  
 cassor-worssor mel dax yar bei dae mel leil biar nia!
- <sup>2</sup> Caxlgo caxl a, yar leil caxl zae gger nia;  
 yar yarzi seir yarzi murgurddo bei dae hazza leil biar nia!
- <sup>3</sup> Yar ddei seirceix-seirmaer mi ddei leil kuar nia!  
 Yihexrhuaxr leil zo a, yar leil qiuxr su ca mel nixmox zzar ggese nia!
- <sup>4</sup> Yihexrhuaxr leil zo a, yar leil qiuxr a beijjiu lol nia;  
 arddolcar lei yar leil zo nia.
- <sup>5-6</sup> Yar leil miar bei gger su Yalboxrlahar ddei giedae ca,  
 yar tiur teixl lei Yargel ddei giedae ca mel,  
 nia yar bei dae arseir lei xiar ci nr xie mel leil nei yarzi seir  
 yarzi murgurddo hal mel leil holcir dae nia,  
 halae yar meir gga serpaxl dae ddar mel leil holcir dae nia;
- <sup>7</sup> Yar mel Yihexrhuaxr niul ddei Arbosobo a;  
 yar middurbbor hazza leil guaxr.
- <sup>8</sup> Yar arddolcar ci a lei yar bbeix har zaxr dae ddei holcir dae;  
 yar miardal dae ddei hormo du zeix zzezze lei ci.
- <sup>9</sup> Hherdder yar Yalboxrlahar dax bbeix har zaxr goxr,  
 Yirsar dax bbeix har goxr ddei nga a.
- <sup>10</sup> Yar yoxl bbeix har dae eil ddei Yargel ddei lixfaxr bei lol,  
 arddolcar ci a lei Yargel hherdder Yirsaexllixl dax bbeix har  
 zaxr dae ddei bei lol a bbeix:
- <sup>11</sup> “Ngo arsae bei lei Jianaxr mermi ddei ni leil gger a,  
 ni li wo mibbe ddei bei lol.”
- <sup>12</sup> Halleix yaa ca hormo ardoxr nr zza, yarzi nganiul,



halae halmaex ngol hher dae lalnga.

<sup>13</sup> Yaa eil cuxr dax cirdae a, hal cuxr dax ssi ci;  
eil goxr dax cirdae a, hal goxr dax ssi ci.

<sup>14</sup> Yar azo ca lei yaa leil nr ci lol, yaa leil weixr a,  
yar zzirmar mel leil bota a bbeix:

<sup>15</sup> “Nia ngo tiur teixl lei ca mel leil bei sol lol nr ddo;  
ngo ddei xiezi mel leil ke nr ddo.”

<sup>16</sup> Yar halmaex gga loxlmoxr dae teixl lei nr ddo lol;  
loxlmoxr zzor ddu cirdoxr lei nr zza lol.

<sup>17</sup> Yar yaa xilmeir leil ca ar ddei miardal mal;  
hherdder vur pixl gger a, zebol bei dae Yuesaexl ddei nga a.

<sup>18</sup> Ca mel qihher leil toxl gex ddu sser a, yar qihher zze leil toxl  
gex dae;

he jiaxjiax sser a, yar leixrhher ddei leil zzux gex dae.

<sup>19</sup> Yihexrhuaxr ddei ddar mel yar leil sixr i;  
hherdder yar bbeix har zaxr dae mel yarzi loxr hane zzeze ci.

<sup>20</sup> Zzirmar ddei ca leil miardal a, yar leil piur teixl lei;  
hherdder cassor-worssor leil guaxr su ddei yar leil piur teixl  
lei;

<sup>21</sup> yar leil zzirmar hhexr ddei seirpor bei lol,  
zzirmar hhexr ddei cirza-hanga guaxr lol.

<sup>22</sup> Yar leil zzirmar woxrke vaervaerpor mel leil guaxr lol;  
olnoldduddumo ddar mel yar ddei ca leil guaxr su camar mel  
leil mul gger lol.

<sup>23</sup> Yirsaexllixl lei Aezixr goxrjia ssi ci a;  
Yargel Har ddei mermi ngol hher dae.

<sup>24</sup> Yihexrhuaxr yar ddei cassor-worssor mel leil ssormine cirke  
hier lol;

yaa leil bir yaa leil dir su mel leil sexr leixl lol.

<sup>25</sup> Yar yaa leil dir su mel leil yar ddei cassor-worssor mel leil  
vuxryixr lol,

halae yar leil vissersu mel leil yarzi jiuxr xiar ji dae mel sael a bei.

- 26 Yar yar leil miar bei gger su Moxrxi nei yar tiur teixl lei Yalluixr leil miardal a,  
 27 ddoddomo yar lar bei var mel bei lol,  
 Har ddei mermi murgurgur mo bei lol.  
 28 Yar neixmarmar ddei middur ddei leil bbe gex dae lol;  
 Aezixr su ca mel zzael, yar miardal dae mel leil no-nr-ni.  
 29 Yar Aezixr goxrjia ajjix mel leil sirnilni loxr lol,  
 yaa ddei ngol mel leil si lol.  
 30 Yaa ddei middur leil nei zzirmar hher ggie xi gga lei gelderdo daxlgaxl-daxllixl cer teixl lei lol.  
 31 Yar ar qir bbeix a qie, yamir circir-circir lei a;  
 halae korxi mel lei yaa hher ggie zaza-lili lei a.  
 32 Yar yaa leil wortaxlaex lei gger a, almer bei lol;  
 yaa ddei middur ddei leil almer bbiexr lol.  
 33 Yar lei yaa ddei puxрто zzei nei vuxrhuagol zzei mel leil deil;  
 yaa dax zaza-lili sixzzei mel lei bei xiaxr gger.  
 34 Yar ar qir bbeix a qie, zaxbiul mel lei a;  
 zaxbiul mel hhe lei hhe jjia nr ddo.  
 35 Yaa ddei var maelmaerjjia nei mi gga dae teixl lei maelmaerjjia zzor jjia gger a.  
 36 Yar yoxl yaa ddei goxrjia gga ssor vaervaer maelmaerjjia bei zil gger,  
 hherdder yaa leixl seir sexrsexr car, hier beil ddei nga a.  
 37 Yar, yar ddei cassor-worssor mel leil hier dae a, piu sae vei dae a, ddux lei a;  
 yar ddei cassor-worssor mel naexlbix lei ar ddei nr zza.  
 38 Aezixr su ca mel yaa leil gexr, yel yaa ddux lei car,  
 Aezixr su ca mel yarzi ggese.  
 39 Yar zico co kar kae a, yaa leil jiul gex dae;  
 eilmerxixl adoxlle mel yaa leil bbele lol.

- 40 Yaa qiuxr a qie, yar jiux mel leil bbiu mal lei lol,  
halae yaa leil merlabbor ddei loxlmoxr mel zzor bbox lol.
- 41 Yar legelbbe taex deil bbeixr gger a, ajjix pe teixl lei a;  
ajjix nr zza ggie lei, ajjix mel lazzarmo sael a pe dae a.
- 42 Eilmel eine nga a mel, yar, yar bbeix goxr ddar mel leil nei  
yar leil miar bei gger su Yalboxrlahar leil holcir dae a nga  
arddeir a.

- 43 Yar, yar ddei cassor-worssor mel leil hier dae a, ggegge-sese  
a ddux lei;  
yar tiur teixl lei ca mel ggese a, worcixl-worni caxl dae.
- 44 Yar kebal su ca ddei middei mel yaa leil gger a,  
yaa leil kebal ca mel sulku teixl lei mel li wo lol,
- 45 yel yaa leil yar miardal dae mel dax bei mae dae lol,  
yar ddei lixfaxr mel dax bei mae dae lol.

Yihexrhuaxr leil bbeixzae gger nia!

### Arbosobo Yar Ddei Cassor-worssor Mel Leil Perniar

- 106** <sup>1</sup> Yihexrhuaxr leil bbeixzae gger nia!  
Yihexrhuaxr mel halcar tortor dder seir;  
yel nia yar leil nawo nia! Yar ca leil perniar dae mel,  
arddolcar ci a lei zza doxr dae.
- <sup>2</sup> Arseir Yihexrhuaxr ddoddomo bei dae mel biar jjia xie bbeixleir?  
Arseir yar leil bbeixzae gger dae ddar mel biar jjia xie  
bbeixleir?
- <sup>3</sup> Ha bbaehhexhhexmo bei su,  
arddolcar lei hoxrhoxr mo bei su ca mel dder Arbosobo yaa leil  
seir lol!
- <sup>4</sup> Yihexrhuaxr, ni, ni ddei cassor-worssor mel leil seirseir meixl  
gger car,  
ni leil qiuxr, ngo leil holcir dae, ngo leil jiuxl la.

- <sup>5</sup> Ngo leil ni tiur teixl lei cassor-worssor mel seirseir li wo dae  
mel leil mia lol;  
ni ddei goxr gga ca mel dax cirgo a ggese lol,  
ni ddei cassor-worssor mel dax cirgo a ni leil bbeixzae gger!
- <sup>6</sup> Ngua, ngua ddei porpor mel sael a nga, ngua lei zuixl bei a;  
ngua zuixl yarzi larhor bei a;  
yarzi gexrddo bei a.
- <sup>7</sup> Ngua ddei porpor mel Aezixr goxrjia gga hher dae car,  
ni murgurgur mo bei dae hal mel leil nr saexl;  
ni yaa leil daxlgaxl-daxllixl perniar dae mel leil hol-nr-cir;  
doxgoxleixr neixvi nilni bbe dax ni ddei ddar nr no.
- <sup>8</sup> Nael yar zzael, yar mi ddei leil i dae a, yaa leil jiuxl a,  
yar ddoddo mo bei dae mel ca leil i lol niazzir.
- <sup>9</sup> Yar neixvi nilni bbe leil hie a, neixvi gga ajjix mel dder hie a;  
yar yaa leil hier dae a, neixvi yarzibbor ssi gel,  
hherdder mipaerbbae gga ssi gel mel sael a nga.
- <sup>10</sup> Yar yaa leil vuxryixr su ca mel dax yaa leil jiuxl teixl lei,  
yaa leil dir su ca mel leixrga gga yaa leil jiuxl teixl lei.
- <sup>11</sup> Nael, ajjix mel yaa leil dir su ca mel leil mil hex gger a;  
cir ddei lei nr gol dae a.
- <sup>12</sup> Yel yar ddei cassor-worssor mel yar ddei ddar mel leil ddarzzi  
a;  
yar leil caxl zae gger.
- <sup>13</sup> Nael yaa cirleixr dder yar bei dae mel leil hol-nr-cir a;  
yar mul gger dae mel leil nr xia.
- <sup>14</sup> Doxgoxleixr mipaerbbae gga yaa li loxr ni nr zza;  
hierbolpae gga Arbosobo leil sixr i.
- <sup>15</sup> Yar dder yaa qiuxr dae mel yaa leil gger a.  
Nael yaa leil lei nogielno lol.
- <sup>16</sup> Yaa yoxl yaa hher ggie Moxrxi nei Yihexrhuaxr kebal ca mel  
dax bbe teixl lei a,

- yar leil zi su Yaxlluixr leil nixnox.
- <sup>17</sup> Yel middur ddei zex bbeixr a Daxlta leil ixl ji a;  
Yalbirlaxr nei yar dax cir piar a bei su ca hal cir leil lei middur  
gga hex ji dae a.
- <sup>18</sup> Yaa dax adoxl bbiu du lei a,  
adoxlle mel nixmox neix su ca mel leil cu pixl gger a.
- <sup>19</sup> Yaa Hexrlixl worga leil niurssor bbex ar ddei ddaexr;  
yaa ddaexr teixl lei bbex ddei leil zi a, olddetexl.
- <sup>20</sup> Yaa yaa ddei yarzi middux Seirpor ddei leil,  
silbbar zzor dae niur bbex arddeir bei mal gger.
- <sup>21</sup> Yaa yaa leil jiuxl su Seirpor Arbosobo leil hol-nr-cir;  
yar Aezixr goxrjia miar vaervaermo bei goxr a;
- <sup>22</sup> Har ddei mermi murgurgur mo bei goxr a;  
neixvi nilni bbe gga gexrddoddo mo bei goxr a.
- <sup>23</sup> Yel yar bbeix yaa leil bei zil jjia gger nia;  
yar tiur teixl lei Moxrxi yaa agala gga ngier dae a, yar leil seifu  
faex nr nor lol ar ddeir nga a,  
yar dder yaa leil bei zil jjia gger ho a piar a.
- <sup>24</sup> Yaa yoxl middei seirseir hal ddei leil i zeil,  
yar ddei ddar mel leil ddar-nr-zzi,
- <sup>25</sup> yaa armael ddei sur bei teixl lei xigex gga hher dae a boxyox  
doxr,  
Yihexrhuaxr ddei qiurte ddei leil no-nr-ni.
- <sup>26</sup> Yel yar dder yaa dax faxrsixl a,  
arsae bei lei yaa leil mipaerbbae gga si zil dae lol,
- <sup>27</sup> yaa ddei giedae ca mel leil cirgoxr-hanga dax si zil dae lol,  
zzarvul-zzarmae ssi ci lol.
- <sup>28</sup> Yaa yoxl Balixl-Pir'aer dax cir piar a bei,  
halae (neir/casima) leil zi goxr mel zzor.
- <sup>29</sup> Yaa eine bei a Yihexrhuaxr leil seifu faex lol,  
yel yaa ca mel gga dder nogiel no a.

- 30 Halcar Feinixrha ha du lei a,  
yarzi gexrddo bei su mel leil faxr a saelnei nogiel ddei no nor.
- 31 Yar eine bei a, hormo zeix zzezze,  
cirse-cirsil zzezze lei yar leil zuixl nr zza i mal gger a.
- 32 Yaa yoxl mirlixlba ajjix dax halmaex Yihexrhuaxr leil seifu faex  
lol a,  
Moxrxi leil jiujiu ke dae a;
- 33 yaa Moxrxi leil seifu faex lol a,  
Moxrxi mel ddar te labox nrnga mel te a.
- 34 Yaa Yihexrhuaxr miardal dae mel leil no nr ni,  
Yoxrtaexl su nrnga ca mel leil bei zil jjia nr gger,
- 35 doxgoxleixr yaa dax cirgo a hher xiux dae,  
yaa bei dae mel bei zza,
- 36 yaa ddei bbex mel leil zi,  
yaa bei dae mel dder bel sael a yaa leil bel gex dae a.
- 37 Yaa yaa ddei ssormine mel neir leil zi,
- 38 yaa azo lei bei nr cox ca mel leil sirnilni ddux lol,  
hherdder yaa ddei ssormine mel leil sirnilni ddux lol a,  
Jianaxr mermi bbex mel leil zi,  
sirnilni mel middur ddei leil sei-nr-beix loxr lol a.
- 39 Eine nga a, yaa bei dae mel, yaa armael leil sei-nr-beix loxr lol  
a;  
yaa zuixl bei a kerjia sael a nga a.
- 40 Yel Yihexrhuaxr yar ddei cassor-worssor mel leil seifu faex,  
yar tiur teixl lei mel leil vuxryixr a,
- 41 yaa leil Yoxrtaexl su nr nga ca mel leixrga gga jia ji gger,  
yaa leil vuxryixr su ca mel dder yaa leil guaxr gex dae.
- 42 Yaa leil dir su mel yaa leil ci,  
yaa yaa leil dir su mel leixrga gga hher ji dae a.
- 43 Yar hormo boxl nei yaa leil jiuxl,  
nael yaa zzael yar ddei ddar nr no,

yaa zuixl yarzi larhor bei a, azo lei nr per loxr a.

<sup>44</sup> Nael yar yaa qiuxr dae mel leil bbejjiur a,

yaa goxrsol-goxrnaxr gga goxr ji dae a ae a, yaa leil zoxlnixr,

<sup>45</sup> yaa leil weixr a, yar bbeix har zoxr goxr mel leil holcir dae,  
yar ca leil daxlgaxl-daxllixl perniar mel dax zox dae a yar xiar  
dae mel gierbox.

<sup>46</sup> Yar yaa leil ssu si ca mel yaa leil zoxlnixr lol.

<sup>47</sup> Yihexrhuaxr ngua ddei Arbosobo,

ni leil qiuxr ngua leil jiuxl la,

Yoxrtaexl su nr nga ca mel dax ngua leil ae pex xixl la,

ngua dder ni ddei seirceix-seirmaer mi ddei leil bbeixzae gger  
cexr,

ni leil bbeixzae gger a kuar ddu zza.

<sup>48</sup> Yihexrhuaxr Yirsaexllixl su ddei Arbosobo leil mel bbeixzae  
gger mibbe,

halcar tortor cirdae a, cirse-cirsil zzeze ci.

Cassor-worssor maelmaerjia leil Amae bbeix lol nia!

Yihexrhuaxr leil bbeixzae gger nia!

Arbosobo Yar Ddei Cassor-worssor Mel

Leil Jiuxl Ddei Leil Bbeixzae Gger

**107** <sup>1</sup> Nia Yihexrhuaxr leil nawo nia, yar mel halcar tortor  
dder seir;

yar ca leil perniar dae mel, arddolcar ci a lei zza doxr dae.

<sup>2</sup> Yihexrhuaxr jiuxl xixl lei cassor-worssor mel leil ddar eimel  
bbeix lol nia,

hherdder yar yaa leil dir su ca mel leixrga gga jiuxl teixl lei mel  
nga a;

<sup>3</sup> yar dofa, xifa, naxrfa, baexrfa cirmaex-hanga jiuxl xixl lei mel  
nga a.

- <sup>4</sup> Yaa ca goxr su nr zza mipaerbbae gga ssi za doxr dae a,  
hher cexr zzi zo wo nr xie.
- <sup>5</sup> Meixr zzae meixr, sixl zzae sixl,  
nixmox lei bbiex a.
- <sup>6</sup> Yel yaa goxrsol-goxrnaxr goxr dae car,  
ae dae a, Yihexrhuaxr leil qiuxr;  
yar dder yaa nr seir pex dae mel gga yaa leil jiuxl teixl lei.
- <sup>7</sup> Yoxl yaa leil hier dae a, jjiu zzar ssi a,  
yaa leil hher cexr zzi gga ssi lol.
- <sup>8</sup> Yihexrhuaxr mel ca leil perniar nei ca mel meixsaer qir leil yarzi  
seir yarzi murgurddo bei a,  
yel yaa yar leil nawo lol nia.
- <sup>9</sup> Yar mel sixl su ca mel leil dda bbox lol,  
meixr su ca mel leil zzorci-ddami zzor bbox lol.
- <sup>10</sup> Ca cirmelmel a neixmar ggie nei gexrddo ggie goxr ji dae a,  
goxrsol-goxrnaxr mel hexsox sael a yaa leil neixl gex dae.
- <sup>11</sup> Yaa mel Arbosobo ddei ddar nr no,  
mu zzir ggie hher dae hal ddei miardal dae mel leil i ze.
- <sup>12</sup> Yel yar dder goxrsol-goxrnaxr mel sser a,  
yaa nixmox taex leil guaxr ze gger;  
yaa de ze a lei yaa leil beijjiu su nr zza.
- <sup>13</sup> Yel yaa goxrsol-goxrnaxr gga goxr dae car,  
ae dae a, Yihexrhuaxr leil qiuxr;  
yar dder yaa nr seir pex dae mel gga yaa leil jiuxl teixl lei.
- <sup>14</sup> Yar yaa leil neixmar ggie nei gexrddo ggie hier teixl lei a,  
yaa leil neixl gex dae mel ngaxl te gger.
- <sup>15</sup> Yihexrhuaxr mel ca leil perniar nei ca mel meixsaer qir leil  
yarzi seir yarzi murgurddo bei a,  
yel yaa yar leil nawo lol nia.
- <sup>16</sup> Yar mel zzir alddur mel deil ddu gger,  
he alddur lagexddu mel taexl te gger.
- <sup>17</sup> Ca medeil mel zuixl bei nei yarzi gexrddo bei a dder goxr sol.
- <sup>18</sup> Yaa cirza-hanga zzor ddu mel leil vuxryixr a dder si niazzir  
dae a.



- 19 Yel yaa goxrsol-goxrnaxr mel gga goxr dae car,  
 ae dae a, Yihexrhuaxr leil qiuxr,  
 yar dder yaa nr seir pex dae mel gga yaa leil jiuxl teixl lei.
- 20 Yar ddar miardal teixl lei a yaa leil i kor gger,  
 yaa leil nr si lol jiuxl xixl lei.
- 21 Yihexrhuaxr mel ca leil perniar nei ca mel meixsaer qir leil  
 yarzi seir yarzi murgurddo bei a,  
 yel yaa yar leil nawo lol nia.
- 22 Yaa nawo ddei ziddu bei a, yar leil gger lol nia;  
 yaa ggese a, worcixl-worni yar bei dae mel biar lol nia!
- 23 Neixvi gga cuaxr cux su,  
 ajjix mel gga vaexleixr bei su mel,
- 24 yaa Yihexrhuaxr bei dae mel leil mia a;  
 halae yar neixvi neixlneixl gga yarzi seir yarzi murgur bei dae  
 mel leil mia a.
- 25 Yar miardal a qie, mersi daxlgaxl jia du lei,  
 neixvi gga lei bolaxl ddaexr du lei.
- 26 Yaa merlabbor ddeix ci, neixvi yarzibbor zei ci;  
 yaa goxrsol-goxrnaxr pex dae a dder nixmox bbiex a.
- 27 Yaa lecixl-lege, zzizzi-zzaezzae mo,  
 zzibbaer ddayixr su ca mel sael a nga;  
 yaa ddei olnoldduddu mel yaa dax guaxr-nr-zoxr a.
- 28 Yel yaa goxrsol-goxrnaxr mel gga goxr dae car,  
 ae dae a, Yihexrhuaxr leil qiuxr,  
 yar dder yaa nr seir pex dae mel gga yaa leil hier teixl lei.
- 29 Yar mersi daxlgaxl jia dae mel leil jia nor lol a,  
 bolaxl mel dder ddaexr nor a.
- 30 Mersi jia nor, bolaxl ddaexr nor a yaa dder ggese;  
 yar dder yaa leil yaa ssi niazzir ggie neixvi qir leil hier mal.
- 31 Yihexrhuaxr mel ca leil perniar nei ca mel meixsaer qir leil  
 yarzi seir yarzi murgurddo bei a,  
 yel yaa yar leil nawo lol nia.
- 32 Yaa leil cassor-worssor mel gga yar leil i du lol nia,

ca leil guaxr su camar mel cirgo a hher dae ggie yar leil  
bbeixzae gger lol nia!

- 33 Yar lazzarmo mel mipaerbbae loxr lol,  
lur zer teixl lei ggie hieqiuxqiux mo ajjix nr zza loxr lol,  
34 mi naxrcixl mel mi yojiar loxr lol.  
Eimel eine nga a mel, halmaex hher dae su cassor-worssor mel  
zuixl yarzi larhor bei a nga arddeir a.  
35 Yar mipaerbbae mel ajjix bbeddur loxr lol,  
ajjix nr zza ggie lur zer teixl lei lol.  
36 Yar zzo meixr su mel leil halmaex goxr dae lol a,  
hher cexr zzi zi lol.  
37 Yaa mi paxr, puxrto dae a, daxlgaxl-daxllixl se wor a.  
38 Yar yoxl yaa leil seir lol a ssormine cirke zza dax lol;  
yaa ddei zzeir mel lei nga-nr-niul lol.  
39 Nael si yaa leil ci, yaa leil goxr sol lol,  
yaa leil cix lol a, yaa dder nganiul zeir a;  
ca mel lei yaa leil i nr du.  
40 Yar zzirmar mel leil faxr a,  
yaa leil ca goxr su nr zza mipaerbbae gga ssi za dae lol.  
41 Nael yar goxr sol su ca leil zzael mu ggie hher dae lol a,  
goxrsol-goxrnaxr mel gga jiuxl teixl lei a,  
yar ddei ake ca mel leil acixl ya mel sael a miur lol.  
42 Nixmox seir su mel mia a dder ggese;  
yarzi gexrddo bei su ca mel zzael,  
ddar bbeix ddu nr zza a.  
43 Ha olnolddu su mel leil, eimel seilseir a xiar lol nia;  
yar leil seilseir a Yihexrhuaxr ca leil perniar dae mel leil xiar lol  
nia.

Arbosobo Leil Qiuxr A, Beijjiu Lol

Daxlweixl vaexr caxlgo.

- 108** <sup>1</sup> Arbosobo, ngo nixmox zzar velper a ni dax mae;  
 ngo ddei xiu ddei caxlgo caxl a ni leil caxl zae gger nia!
- <sup>2</sup> Caxlgo bbaex labox nei yoxrcixl peix labox mel, nia zucur nia!  
 Ngo armael lei neixrneixr-sisi zucur nia!
- <sup>3-4</sup> Yihexrhuaxr, ni ca leil perniar dae mel mel, merlabbor dax  
 ddeix ci,  
 ni yarzi ddarzziddo bei dae mel mel, zico dax ddeix ci,  
 yel ngo cassor-worssor mel gga ni leil nawo nia;  
 circuxr-hanga gga ni leil caxl zae gger nia!
- <sup>5</sup> Arbosobo, ca mel ni leil i du a, bir merlabbor maelmaerjjia leil i  
 du leixl lol nia,  
 ni ddei bbobbolbbo ddei middurbbor cirmaex-hanga zoxl gex  
 dae lol nia.
- <sup>6</sup> Ni leil qiuxr ngua leil ddarkoxl la,  
 ni leixrhher yo bbor sser a ngua leil jiuxl la,  
 yel ni perniar dae ca mel leil jiuxl wo lol.
- <sup>7</sup> Arbosobo yar ddei seirceix-seirmaer xi gga hher dae a bbeix:  
 “Ngo ggese nia,  
 ngo Sixljixl mermi ddei bbe kae gger nia;  
 Suxge lagiex ddei leil liaxr nia.
- <sup>8</sup> Zilixl mermi ddei mel ngo ddei a;  
 Marnaxrsi mermi ddei mel ngo ddei a;  
 Yirfaxrlixr mermi ddei mel ngo oldde leil koxl ddu a;  
 Yoxrdaxl mermi ddei mel ngo ddei quexrlixl zza zzargger a.
- <sup>9</sup> Moxrya mermi ddei mel ngo ggecir ci lar a;  
 ngo qixnex zze Yirdo mermi piar mal nia;  
 ngo Feilixlsixl su mel leil deil leixl gger a, yel worcixl-worni caxl  
 nia.”
- <sup>10</sup> Arseir ngo leil zzi yarzi ssei ddei gga hier dil cexr bbeixleir?  
 Arseir ngo leil Yirdo mermi hier mal cexr bbeixleir?
- <sup>11</sup> Arbosobo, nr nga ni doxl ngua leil piar pixl gger a zzarmar?

Arbosobo, ni ngua ddei meixr mel dax cirgo a nr ssi a ngo?

<sup>12</sup> Ca mel mel ngua leil beijjiu guaxr-nr-zoxr,  
yel ni leil qiuxr, ngua leil beijjiu a,  
ngua leil dir su mel leil ddaexr ssi.

<sup>13</sup> Ngua Arbosobo leil koxl a saelnei ddoddomo bei cexr,  
yar arsae bei lei ngua leil dir su mel leil ddaexr leixl gger nia.

### Goxr Sol Su Ca Sol Biar

Daxlweixl vaexr sipi. Caxlgo caxl su  
mel leil guaxr su ddei leil jia gger.

**109** <sup>1</sup> Ngo bbeixzae gger dae Arbosobo,  
ni leil qiuxr, meir ddei mix gex dae a ddar nr te tor nr bei.

<sup>2</sup> Nixmox neix su ca nei cafur-calel su ca mel meir ddei ngaxl dae  
a ngo leil dir;

yaa ddar nga-nr-zi mel bbeix a ngo leil nrbba-nrbba biar.

<sup>3</sup> Yaa ngo leil weixr gex dae a ngo leil bbeix vuxryixr,  
yoxl nrbba-nrbba ngo leil deil.

<sup>4</sup> Ngo yaa leil perniar a lei yaa ngo leil dir,  
nael ngo halae yaa leil ni dax ddar biar gger.

<sup>5</sup> Ngo yaa leil seir a lei, yaa ngo leil yarzi gexrddo bei xixl;  
ngo yaa leil perniar a lei, yaa ngo leil vuxryixr.

<sup>6</sup> Ni leil qiuxr, nixmox neix su ca ar ddei miardal si lei a, yar leil  
guaxr gex dae lol;

yar leil goxl su ar ddei miardal si lei a,  
yar yo piar a gga ngier dae lol!

<sup>7</sup> Yar leil serpaxl car, yar leil zuixl zza dixl gger lol nia!  
Yar ni dax ddar biar dae mel lei zuixl loxr lol nia.

<sup>8</sup> Yar leil olga niul lol nia!

Kebal ca mel leil yar bei dae ddei bei lol nia!

<sup>9</sup> Yar ddei aniux mel leil aniuxcir loxr lol nia,  
yar maerssor leil maermocir loxr lol nia!

- <sup>10</sup> Yar ddei aniux mel leil ssi za dae a, zzomeixllel lol nia;  
yaa leil yaa ddei bei xiaxr gger ho ake ddei gga ggaxr teixl gger  
lol nia.
- <sup>11</sup> Yar zzei ca dae seirpor hal ddei yar ddei cirza-hanga vei si lol  
nia!  
Yar sulku si lei mel yar leil nr saexl su ca mel leil su si lol nia!
- <sup>12</sup> Yar leil seir lol su nr zza lol nia!  
Yar ddei aniuxcir mel leil zoxlnixr su nr zza lol nia!
- <sup>13</sup> Yar leil ca sil ceix lol nia;  
yar ddei mi ddei huax pixl gger a, zeixleixr hal zeix yar dax mi  
mae su nr zza lol nia.
- <sup>14</sup> Yihexrhuaxr leil yar porpor ddei zuixl mel holcir dae lol nia!  
Yarma ddei zuixl mel bei pixl nr gger lol nia!
- <sup>15-16</sup> Yar mel ca leil seir lol nia-nr-zzir;  
doxgoxleixr goxr sol su, azo lei nr zza su nei cix su ca mel leil  
bixr, yaa leil bei zil gger niazzir.  
Yel zuixl eilmel arddolcar lei Yihexrhuaxr meixsaer qir leil zza  
dae lol nia;  
middurbbor ca mel yaa leil hol-nr-cir lol nia!
- <sup>17</sup> Yar si leil hie no meixr a, hie no dae mel dder yar leil ddeix ci  
lol nia!  
Yar seirseir mel leil nol-nr-nger a, seirseir mel dder yar dax nr  
naer lol nia!
- <sup>18</sup> Yar mel hie no dae mel pia sael a veixr gex dae;  
hie no dae eilmel dder ajjix sael a, yar dax ddir;  
ssuvi sael a, yar hherggar gga ddir.
- <sup>19</sup> Hie no dae eilmel yar ggecir lei bbe gex ddu pia bei lol nia,  
yar zoxlzoxl a neixl dae maelsael zex bei lol nia!
- <sup>20</sup> Eilmel hherdder ngo leil goxl su ca mel nei ddar yarzi gexrddo  
te a ngo leil biar su ca mel,  
Yihexrhuaxr dax li wo mibbe mel nga a.
- <sup>21</sup> Seirpor Yihexrhuaxr, ni leil qiuxr,  
ni mi ddei leil i dae a ngo leil beijjiu la;

- ni ca leil perniar dae mel yarzi seir,  
ni leil qiuxr, ngo leil jiuxl la!
- <sup>22</sup> Ngo mel yarzi goxr sol, azo lei nr zza;  
ngo nixmox zzar lei yarzi no.
- <sup>23</sup> Ngo mercixl car ddei avix mel sael a zzizzi a mier;  
ngo leil zaxbiul mel sael a go teixl lei a.
- <sup>24</sup> Ngo mel zzor lei nr zzor a, cizixlgex lei wor-nr-ni a;  
ngo ggecir leil hoxrneixr mel lei ho bei ho zzu a.
- <sup>25</sup> Yaa ngo leil bei vuxryixr,  
yaa ngo leil mia a dder oldde taex veil dae.
- <sup>26</sup> Yihexrhuaxr ngo ddei Arbosobo, ni leil qiuxr ngo leil beijjiu la;  
ni ca leil perniar dae mel dax zox dae a ngo leil jiuxl la.
- <sup>27</sup> Yel yaa leil eilmel mel ni ddei leixrhher bbor a bei a saexl lol,  
Yihexrhuaxr ni bei a saexl lol.
- <sup>28</sup> Yaa arsae hie no mel, yaa leil hie no dae lol ddo;  
ni ngo leil seir lol a dder ddo a.  
Ha du lei a ngo leil dir lei su mel leil dder qiaxrmeix zzi nr zza  
lol nia,  
ni leil visser su ddei zzael, ggeese nia.
- <sup>29</sup> Ngo leil goxl su mel leil qiaxrmeix zzi nr zza lol nia!  
Pia teixlsibbor xiux veixr sael a, seixlda ddu ddei veixr gex dae  
lol nia!
- <sup>30-31</sup> Yihexrhuaxr arsae bei lei azo lei nr zza su ca ddei yo piar a  
gga ngier dae a,  
yar leil si nia zuixl dixl gger su ddei dax jiuxl teixl lei.  
Yel ngo meir gga worcixl-worni Yihexrhuaxr leil nawo nia;  
ngo ca mel cirgo a hher dae ggie yar leil bbeixzae gger nia.

Yihexrhuaxr Nei Yar Tiur Teixl Lei Zzirmar Mel

Daxlweixl vaexr sipi.

**110** <sup>1</sup> Yihexrhuaxr ngo ddei Seirpor leil bbeix: “Ni ngo yo piar a gga cux dae a, ngo leil xia dae, ngo ni leil dir su mel leil ni qihher toxl gex ggie bei lol,” eine bbeix a.

<sup>2</sup> Yihexrhuaxr ni leil Xi'a zzi gga zzirmar bei lol a, ni leil yarzisael bbesur zza lol;

ni, ni leil dir su mel gga vaervaerpor bei nia.

<sup>3</sup> Ni, ni leil dir su mel dax zaxlddaexr car, ni ddei cassor-worssor mel ni dax ddaexr dax ggese.

Ni ddei leixl su ca mel eilneixrnehe ddei zil mel sael a, seirceix-seirmaer worga ga dax lei a, ni dax mae lei nia.

<sup>4</sup> Yihexrhuaxr mel bbeix har zaxr dae ho a, arsae bei lei gierbox nr var.

Yar bbeix: “Ni mel Maexlzixirdaexr dax zox dae a, arddolcar ci a lei ngo leil zi su bei,” □ eine bbeix a.

<sup>5</sup> Ni yo piar a gga hher dae Seirpor ddei seifu faex nixixl ddei gga, zzirmar mel leil larhorhormo deil no gger nia.

<sup>6</sup> Yar circuxr-hanga ca mel leil faxr a, casima mel dder zzarvul-zzarmae lei zza dae;

yar middurbbor cirgoxr-hanga ddei zzirmar mel leil deil leixl gger nia.

<sup>7</sup> Yar jjiumo qir leil ajjix mel dda nia, yel oldde taex bil du lei nia.

### Yihexrhuaxr Leil Bbeixzae Gger

**111** <sup>1</sup> Yihexrhuaxr leil bbeixzae gger nia!  
Ngo yar ddei nixmox seir su cassor-worssor mel cirgo a hher dae ggie,

nixmox cirtaex-lorbba Yihexrhuaxr leil nawo nia.

<sup>2</sup> Yihexrhuaxr bei dae mel yarzi ddo!

Ha eilmel leil nolnger su ca mel dder nixmox zzar  
zabbar-seilseir a xiar doxr.

<sup>3</sup> Yar bei dae mel iduddo, quexrlixl zza; yar bbaehhexhhexmo bei  
dae mel, arddolcar ci a lei zza dae.

<sup>4</sup> Yar yarzi seir yarzi murgur mel bei a, ca mel leil holcir dae lol;  
Yihexrhuaxr mel ca leil perniar, ca leil zoxlnixr.

<sup>5</sup> Yar, yar leil i du su ca mel leil loxlmoxr gger;  
yar arddolcar ci a lei yar bbeix har zaxr goxr mel leil holcir dae.

<sup>6</sup> Yar kebal su ddei middei mel yar ddei cassor-worssor mel leil  
gger a,  
yar ddei cassor-worssor mel leil yar ddoddomo bei dae mel mia  
lol.

<sup>7</sup> Yar leixrhher ddei bei dae hazza ddarzziddo, bbaehhex;  
yar mul gger dae mel koxlsseiddo.

<sup>8</sup> Yar mul gger dae mel arddolcar ci a lei zza dae var;  
yar mul gger dae mel, ddarzziddo nei bbaehhex mel dax zox  
dae a dixl teixl lei.

<sup>9</sup> Yar yar ddei cassor-worssor mel leil jiuxl xixl lei a;  
yar yaa dax bbeix har zaxr dae mel, arddolcar ci a lei zza dae;  
yar ddei mi ddei mel, seirceix-seirmaer halae iduddo.

<sup>10</sup> Yihexrhuaxr leil gexr yar leil i du a mel, olnolddu du lei beil;  
ha yar miardal dae mel dax bei mae dae su mel, jilixr su ca mel  
nga a.

Yihexrhuaxr leil mel arddolcar ci a lei bbeixzae gger nia!

### Nixmox Seir Su Ca Mel Leil Seir Lol

**112** <sup>1</sup> Yihexrhuaxr leil bbeixzae gger nia!  
Yihexrhuaxr leil gexr yar leil i du, yar miardal dae mel  
leil yarzi nolnger su ca eil ddei,  
Arbosobo dder yar leil seir lol.

<sup>2</sup> Yar ddei giedae ca mel middurbbor hher dae car, arsae bei lei  
sexr;



nixmox seir su mel ddei giedae ca mel, Arbosobo yaa leil seir lol nia.

<sup>3</sup> Yar ake zzaegu zza; zzirbae zza;

yar ddei seirseir mel arddolcar ci a lei zza dae.

<sup>4</sup> Nixmox seir su ca ddei neixmar ggie hher dae car, bbelele ddei yar leil bbele lol.

Yar mel ca leil perniar, zoxlnixr, bbaehhexhhexmo bei.

<sup>5</sup> Ca leil azo lerler meixl gger nei ca leil zzirbae cir gger, halae bbaehhexhhex mel dax zox dae a, armael bei labox mel bei su ca eil ddei,

Arbosobo arsaе bei lei yar leil seir lol.

<sup>6</sup> Nixmox seir su ca mel, vever a nga;

ca mel arddolcar ci a lei yaa leil holcir dae nia.

<sup>7</sup> Yar ddar nr seir mel lei nr gexr;

yar mel nixmox zzar vever a Yihexrhuaxr leil koxl.

<sup>8</sup> Yar nixmox zzar barver a, arsaе bei lei nr gexr;

yar saexl, yar yar leil dir su mel bei wor nr xie ggie mia var.

<sup>9</sup> Yar hoxrcixlcixl mo casolssor mel leil azo lerler gger.

Yar seirseir bei dae mel, arddolcar ci a lei zza dae var.

Yar sexr du lei a, ca mel yar leil i du.

<sup>10</sup> Nixmox neix su ca ddei mia a dder seifu faex a, ser ddei giexrgiexlgiexr kexl gex dae a mier a.

Nixmox neix su ca mel xiar dae mel mier nia.

Yihexrhuaxr Ddei Seirceix-seirmaer Mel Leil Bbeixzae Gger

**113** <sup>1</sup> Yihexrhuaxr leil bbeixzae gger nia!  
Yihexrhuaxr leil miar bei gger su mel, nia bbeixzae gger nia;

Yihexrhuaxr ddei mi ddei leil bbeixzae gger nia!

<sup>2</sup> Eilleix cirdae a arddolcar ci a lei,

Yihexrhuaxr ddei mi ddei leil mel bbeixzae gger mibbe.

<sup>3</sup> Merni ddux lei ggie cirdae a, merni lal ggie zzeze lei,

Yihexrhuaxr ddei mi ddei leil mel bbeixzae gger mibbe.

- <sup>4</sup> Yihexrhuaxr mel circuxr-hanga leil guaxr dae;  
 yar ddei bbobbolbbo mel merlabbor hazza leil bbo leixl.
- <sup>5</sup> /Arseir niul ddei Arbosobo Yihexrhuaxr lesel neil?/  
 Arseir Yihexrhuaxr niul ddei Arbosobo dax bir cexr bbeixleir?  
 Yar mel mu zzir ggie halmaex cux dae.
- <sup>6</sup> Yar mu ggie i zeil lei a,  
 merlabbor nei middurbbor hazza leil i.
- <sup>7</sup> Yar nilme cili gga cirza lei nr zza ca mel leil deix du lei;  
 cirbelde cili gga casolssor mel leil gga du lei;
- <sup>8</sup> yaa leil zzirmar ddei ssor mel dax cirgo a cux dae lol,  
 hherdder yar armael ddei cassor-worssor mel gga zzirmar ddei  
 ssor mel dax cirgo a cux dae lol.
- <sup>9</sup> Yar aniu xiu nr var ssormaer mel leil ggegge-sese a ake hher  
 dae lol,  
 yar leil aniu mel ddei ama loxr lol.

Nia Yihexrhuaxr leil bbeixzae gger nia.

### Yuxlyuexl Jiax Ddei Caxlgo

- 114** <sup>1</sup> Yirsaexllixl ddei giedae ca hherdder Yargel ddei giedae  
 ca mel Aezixr goxrjia gga ddux lei a;  
 yaa kebal ddar te su cassor-worssor mel dax ddux lei a.
- <sup>2</sup> Halcar, Yoxrdaxl ddei giedae ca mel leil kebal ca mel dax bbe  
 teixl lei a, Arbosobo ddei cassor-worssor loxr a;  
 Yirsaexllixl su ca mel yar ddei goxr gga ca loxr a.
- <sup>3</sup> Neixvi mel mia a dder pa a;  
 Yuedaxl lazzarmo zex lei doxdoxsi pe xixl. <sup>4</sup> Worgamo mel  
 yabol sael a tiuxl dae;  
 worgassor mel yassor sael a tiuxl dae.
- <sup>5</sup> Neixvi, ni arsaenga a pa?  
 Yuedaxl lazzarmo, ni arsaenga a doxdoxsi pe xixl?

<sup>6</sup>Worgamo, ni arsaenga a yabol sael a tiuxl dae?  
Worgassor, ni arsaenga a yassor sael a tiuxl dae?

<sup>7</sup>Middur, Seirpor ddei lei car, ni le du lei nia;  
ni Yargel ddei Arbosobo meixsaer qir leil le du lei nia.

<sup>8</sup>Yar mel legelbbe taex leil ajjix bbeddur loxr lol,  
legelbbe gextaextaex taex leil ajjix ddux lei ggie loxr lol.

### Arbosobo Cir Ddei A Zza

**115** <sup>1</sup>Yihexrhuaxr, ni ngua leil middux lol nr ssa, ngua leil  
middux lol nr ssa;  
ni mel ca leil perniar, ni leil yarzi ddarzziddo,  
yel ni mi ddei leil middux lol nia!

<sup>2</sup>Arsaenga a Yoxrtaexl su nr nga ca mel “Yaa ddei Arbosobo  
ddei arddolmaex hher dae?” □ eine biex.

<sup>3</sup>Nael ngua ddei Arbosobo ddei mel merlabbor hher dae,  
yar armael xiar dae ddei dax zox dae a bei.

<sup>4</sup>Yaa ddei bbex mel mel piu nei sae bei teixl lei;  
ca mel ddei leixrhher bei teixl lei.

<sup>5</sup>Yaa meir niar dae, nael ddar biar nr var;  
meixddur niar dae, nael i nr var;

<sup>6</sup>yaa nolba niar dae, nael noni nr var;  
noxlbbex niar dae, nael ner nr var;

<sup>7</sup>yaa leixrhher niar dae, nael mox nr var;  
qihher niar dae, nael ssi nr var;  
leixrhher niar dae, nael qiurte ddux lei nr var.

<sup>8</sup>Yaa leil bei teixl lei su mel yaa dax ciryoxr a nga nia;  
ha yaa leil koxl su mel lei dder eine nga nia.

<sup>9</sup>Yirsaexllixl su ca mel, nia Yihexrhuaxr leil koxl nia!  
Yar mel nia leil beijjiu su nei nia leil dir su mel leil bbiur gex  
gger su ddei nga a.

- <sup>10</sup> Yalluixr hhexr, nia Yihexrhuaxr leil koxl nia!  
Yar mel nia leil beijjiu su nei nia leil dir su mel leil bbiur gex gger su ddei nga a.
- <sup>11</sup> Nia Yihexrhuaxr leil i du yar leil gexr su ca mel, Yihexrhuaxr leil koxl nia!  
Yar mel nia leil beijjiu su nei nia leil dir su mel leil bbiur gex gger su ddei nga a.
- <sup>12</sup> Yihexrhuaxr mel niul leil holcir dae, yar halae niul leil seir lol nia;  
yar Yirsaexllixl hhexr leil seir lol nia,  
yar Yalluixr hhexr leil seir lol nia.
- <sup>13</sup> Ha Yihexrhuaxr leil i du yar leil gexr su mel,  
vaervaer bbeixsael yelye lei yar yaa leil seir lol nia.
- <sup>14</sup> Yihexrhuaxr leil nia leil ssormine miur dax lol nia;  
nia ddei giedae ca mel leil lei miur dax lol nia.
- <sup>15</sup> Mercoxl-micoxl su Yihexrhuaxr nia leil seir lol nia.
- <sup>16</sup> Merlabbor ddei mel Yihexrhuaxr ddei a;  
middurbbor ddei nael, yar cassor-worssor mel leil gger a.
- <sup>17</sup> Casima mel Yihexrhuaxr leil bbeixzae gger nr var;  
azo lei bbejjiur nr ddo ggie zei ci su mel lei nr var.
- <sup>18</sup> Nael niul mel eilni cirdae a arddolcar ci a lei,  
Yihexrhuaxr leil bbeixzae gger nia.

Yihexrhuaxr leil bbeixzae gger nia.

Arbosobo Ngo Lei Jiuxl A, Ngo Yar Leil Bbeixzae Gger

- 116** <sup>1</sup> Yihexrhuaxr mel ngo ddei qiurte ddei leil nei ngo qiuxr dae mel leil noni,  
yel ngo yar leil perniar.
- <sup>2</sup> Yar seilseir a ngo leil noni,

- yel ngo cir se lei yar leil qiuxr nia.
- <sup>3</sup> Ca leil si lol ddei baezo sael a ngo leil ssox gex dae;  
yiji ddei solzeixlzeixl mel, ngo leil ssu gex dae;  
ngo goxrsol-goxrnaxr nei cix ddu pex dae.
- <sup>4</sup> Ngo dder Yihexrhuaxr ddei mi ddei leil qiuxr a bbeix:  
“Yihexrhuaxr, ni leil qiuxr, ngo ddei olga ddei leil jiuxl la!”
- <sup>5</sup> Yihexrhuaxr mel ca leil seirseir meixl gger, bbaehhex;  
niul ddei Arbosobo mel ca leil zoxlnixr.
- <sup>6</sup> Yihexrhuaxr mel aniuessor sael a yar leil lar koxl su ca mel leil  
guaxr dae;  
ngo goxr sol zildu car, yar ngo leil jiuxl a.
- <sup>7</sup> Yihexrhuaxr mel ngo leil seirseir daxlgaxl-daxllixl meixl gger a;  
yel ngo ddei nixmox, ni zzasoso a loxr xixl nia.
- <sup>8</sup> Seirpor ni ngo leil olga jiuxl a, ngo leil nr si lol;  
ngo meixddur zze leil meixbbix nr ddux lol;  
ngo qihher zze leil de nr zeil lol.
- <sup>9</sup> Ngo Yihexrhuaxr meixsaer qir leil ca gol su hher ggie ssi nia.
- <sup>10</sup> Ngo ddarzzi a, yel dder bbeix: “Ngo yarzi goxr sol mel goxr a.”
- <sup>11</sup> Ngo gexrgexr-zizi bbeix: “Ca mel maelmaerjia lei ddar jiar te  
lalnga!”
- <sup>12</sup> Ngo azo sser a, Yihexrhuaxr ngo leil seirseir meixl gger dae  
hazza leil gger xixl bbeixleir?
- <sup>13</sup> Yihexrhuaxr ngo leil jiuxl a,  
yel ngo beizi taex jur du lei a, yar leil nawo nia.
- <sup>14</sup> Ngo Yihexrhuaxr ddei cassor-worssor mel meixsaer qir leil,  
ngo yar dax bbeix har zaxr goxr mel bei ci nia.
- <sup>15</sup> Yihexrhuaxr ddei meixddur gga i dae a,  
yar kebal ca mel dax bbe teixl lei cassor-worssor mel si a mel  
yarzi korseil.
- <sup>16</sup> Yihexrhuaxr, ngo mel yarzi ni leil miar bei gger su ca a;

ngo mel ni leil miar bei gger su ca a;  
ni leil miar bei gger su ssormaer ddei ssor a.

Ngo leil neixl gex dae mel ni ngo leil pe kae gger ho a.

<sup>17</sup> Yihexrhuaxr, ngo nawo ddei ziddu bei a, ni leil gger nia;  
yoxl ni ddei mi ddei leil qiuxr nia.

<sup>18-19</sup> Ngo Yihexrhuaxr ddei cassor-worssor mel meixsaer qir leil,  
Yihexrhuaxr leil zi ggie xi zzaexggu gga, Yiluxlsaler zzi gga,  
ngo Yihexrhuaxr dax bbeix har zaxr goxr mel bei ci nia.

Yihexrhuaxr leil bbeixzae gger nia!

Yihexrhuaxr Leil Bbeixzae Gger

**117** <sup>1</sup> Cingoxr-hanga, nia Yihexrhuaxr leil bbeixzae gger nia!  
Circuxr-hanga, nia Yihexrhuaxr leil bbeixzae gger nia!

<sup>2</sup> Yar mel, niul leil yarzisael perniar;

Yihexrhuaxr ddarzziddu bei dae mel, arddolcar ci a lei zza  
doxr dae.

Yihexrhuaxr leil bbeixzae gger nia!

Bei Leixl A, Yihexrhuaxr Leil Nawo

**118** <sup>1</sup> Yihexrhuaxr mel halcar tortor dder seir;  
yar ca leil perniar dae mel arddolcar ci a lei zza doxr dae,  
yel nia yar leil nawo nia!

<sup>2</sup> Yirsaexllixl su ca mel leil: “Yar ca leil perniar dae mel arddolcar  
ci a lei zza doxr dae,” bbeix lol nia!

<sup>3</sup> Yalluixr hhexr leil: “Yar ca leil perniar dae mel arddolcar ci a lei  
zza doxr dae,” bbeix lol nia!

<sup>4</sup> Yihexrhuaxr leil gexr yar leil i du su ca mel leil: “Yar ca leil  
perniar dae mel arddolcar ci a lei zza doxr dae,” bbeix lol  
nia!

- <sup>5</sup> Ngo goxrsol-goxrnaxr mel gga goxr ji dae a, Yihexrhuaxr leil qiuxr a,  
yar dder ngo leil ddarkoxl, ngo leil middei kuax ggie hher dae lol.
- <sup>6</sup> Yihexrhuaxr ngo dax hher dax dae a, ngo arsae bei lei nr gexr;  
ca mel ngo leil arsae bei cexr bbeixleir?
- <sup>7</sup> Ngo leil beiijiu su ddei mel Yihexrhuaxr a;  
yel ngo, ngo leil vuxryixr su ca mel leil bei koxl xixl ggie mia nia.
- <sup>8</sup> Yihexrhuaxr leil koxl a mel,  
bir ca leil koxl leil seir leixl.
- <sup>9</sup> Yihexrhuaxr leil koxl a mel,  
bir middurbbor ddei vaervaerpor leil koxl leil seir leixl.
- <sup>10</sup> Circuxr-hanga ca mel ngo leil weixr gex dae,  
nael ngo Yihexrhuaxr ddei mi ddei leil koxl dae a, yaa leil bei zil jjia gger a.
- <sup>11</sup> Yaa ngo leil zaza-lili weixr gex dae,  
nael ngo Yihexrhuaxr ddei mi ddei leil koxl dae a,  
yaa leil bei zil jjia gger a.
- <sup>12</sup> Yaa bbiur mel sael a ngo leil weixr gex dae,  
nael yaa alcur mel leil bbiu dae adoxl mel sael a bbiu zil a;  
ngo Yihexrhuaxr ddei mi ddei leil koxl dae a, yaa leil bei zil jjia gger a.
- <sup>13</sup> Yaa worcixl-worni ngo leil dder a, ngo leil de zei lol niazzir,  
nael Yihexrhuaxr ngo leil beiijiu a.
- <sup>14</sup> Yihexrhuaxr mel ngo leil warni lol su ddei nga a;  
ngo caxlgo caxl dae mel nga a;  
yar lei ngo leil jiuxl su ddei loxr a.
- <sup>15</sup> Nixmox seir su ca mel leil mel jiuxl wo a,  
ggese a dder sur bei teixl lei xigex gga worcixl-worni ae dae a bbeix:  
“Yihexrhuaxr ddei leixrhher yo bbor ddoddomo bei a!
- <sup>16</sup> Yihexrhuaxr ddei leixrhher yo bbor darmumu bil du lei;

- Yihexrhuaxr ddei leixrhher yo bbor ddoddomo bei.”
- <sup>17</sup> Ngo arsae bei lei si nr var, gol ze i si nia,  
halae Yihexrhuaxr bei dae mel biar nia.
- <sup>18</sup> Yihexrhuaxr ngo leil larhorhormo faxr,  
nael ngo leil nr si lol.
- <sup>19</sup> Arbosobo leil zi ggie xi alddur peixl ngo leil ggapu gger la,  
ngo ddir a Yihexrhuaxr leil nawo nia!
- <sup>20</sup> Alddur eil peixl mel Yihexrhuaxr ddei a;  
nixmox seir su ca mel ddir nia.
- <sup>21</sup> Ni mel ngo qiuxr dae mel ngo leil ddarkoxl ho a;  
yoxl ngo leil jiuxl su ddei loxr a;  
yel ngo ni leil nawo nia.
- <sup>22</sup> Sixrjiuxr xiuxr su ca mel piar pixl gger legelbbe hal taex mel,  
xi giexrluxl gga sixrjiuxr leil zoxlyoxl zzir legelbbe taex loxr ho  
a.<sup>e</sup>
- <sup>23</sup> Eil ddei mel, Yihexrhuaxr bei a;  
niul meixddur ga gga i dae a yarzi seir yarzi murgur.
- <sup>24</sup> Eil ddei mel, Yihexrhuaxr bbeix har dae nixixl,  
niul eil ni gga ggegge-sese a nga nia!
- <sup>25</sup> Yihexrhuaxr, ni leil qiuxr, ngua leil jiuxl la!  
Yihexrhuaxr, ni leil qiuxr, ngua leil cirza-hanga lei bei cexr lol!
- <sup>26</sup> Yihexrhuaxr miardal si lei hal ddei leil mel bbeixzae gger nia!  
Ngua Yihexrhuaxr leil zi ggie xi gga nia leil seir lol!
- <sup>27</sup> Yihexrhuaxr mel Arbosobo a; yar ngua leil bbele lol.  
Yar leil ziddu zzeir mel leil baezo neixl gex dae a,  
yar leil zi ggie halmaex gga mal mibbe.



<sup>28</sup> Ni mel ngo ddei Arbosobo a;  
 ngo ni leil nawo nia!  
 Ni mel ngo ddei Arbosobo a;  
 ngo ni leil i du nia!

<sup>29</sup> Yihexrhuaxr mel halcar tortor dder seir;  
 yar ca leil perniar dae mel arddolcar ci a lei zza doxr dae, yel  
 nia yar leil nawo nia!

### Yihexrhuaxr Ddei Lixlfaxr

**119** <sup>1</sup> Azo bei lei bota ddu nr zza,  
 Yihexrhuaxr ddei Lixlfaxr dax bei mae dae su ca mel  
 ggese.

<sup>2</sup> Yihexrhuaxr [dixl har dae lixfaxr mel/miardal dae mel] leil  
 noni,

nixmox cirtaex-lorbba yar leil zo su ca mel ggese.

<sup>3</sup> Ca eimel [ssi pie/pixl nr var];

yaa Yihexrhuaxr ddei jjiimo zex leil lar ssi.

<sup>4</sup> Yihexrhuaxr, ni, ni mul gger dae mel ngua leil miardal a mel,  
 ngua leil zabbar-seirseir a bei mae dae lol arddeir a.

<sup>5</sup> Ngo azo bei lei barververmo bei a,  
 ni ddei lixfaxr mel dax bei mae dae bbaexl seir a!

<sup>6</sup> Ngo ni miardal dae hazza leil i du a,  
 ngo dder seixlda nr var.

<sup>7</sup> Ngo ni bbaehhexhhexmo ser dae ddar mel zza wo a mel,  
 ngo dder nixmox seirseir mo ni leil nawo nia.

<sup>8</sup> Ngo ni ddei lixfaxr mel dax bei mae dae nia;  
 ni leil qiuxr, ngo leil tor piar pixl nr gger!

### Yihexrhuaxr Ddei Lixlfaxr Mel Leil Noni

<sup>9</sup> Caleixlssor mel nixixl goxr a arsae bei a saelnei bota ddu lei nr  
 zza nga var neil?

Hherdder ni ddei ddar mel dax bei mae dae nia.

<sup>10</sup> Ngo nixmox cirtaex-lorbba ni leil zo;

- ni leil qiuxr, ngo leil ni miardal dae mel dax tor ssi nr pixl lol.
- <sup>11</sup> Ngo ni ddei ddar mel nixmox zzar ji dae a mel,  
ngo zuixl bei a ni leil de dae lei a gexr a nga arddeir a.
- <sup>12</sup> Yihexrhuaxr, ngo ni leil bbeixzae gger!  
Ni leil qiuxr, ni ddei lixfaxr mel ngo leil mul gger la!
- <sup>13</sup> Ngo ni meir gga ser dae ddar mel biar ssi nia.
- <sup>14</sup> Ngo ni ddei dixl har dae lixfaxr mel leil nolnger a,  
zzaegu naxrcixlcixl mel leil nolnger sael a nga.
- <sup>15</sup> Ngo ni mul gger dae mel leil xiar doxr;  
ni bei dae mel leil i du.
- <sup>16</sup> Ngo ni ddei lixfaxr mel leil nolnger;  
ngo ni ddei ddar mel leil holcir dae.

### Yihexrhuaxr Ddei Lixfaxr Mel Leil Nolnger A, Ggeseddu Zza

- <sup>17</sup> Ni leil qiuxr, ni, ni leil visser su leil daxlgaxl-daxllixl seir lol a,  
ngo leil gol dae cexr lol, halae ni ddei ddar noni cexr lol.
- <sup>18</sup> Ni leil qiuxr, ngo ddei meixddur zze leil mia xie lol a,  
ni ddei Lixfaxr gga yarzi seir yarzi murgur mel i teixl lei lol.
- <sup>19</sup> Ngo mel middurbbor ngol hher su lar nga;  
ni leil qiuxr, ni miardal dae mel ngo dax tor ker-nr-zi dae.
- <sup>20</sup> Ngo nixmox cirtaex-lorbba arddolcar lei [ni ser dae ddar/ni  
ddei lixfaxr] mel saexl niazzir.
- <sup>21</sup> Faxr mibbe, ni miardal dae mel dax bei nr mae col su ca mel ni  
yaa leil bota.
- <sup>22</sup> Ngo mel ni [dixl har dae lixfaxr mel] dax bei mae;  
yel ni leil qiuxr, si ngo leil seixlda lol mel nei ngo leil i zeir dae  
mel, ni ngo leil vei pixl gger la.
- <sup>23</sup> Vaervaerpor mel cux dae a, ngo leil nrbbba-nrbbba biar  
bbeixarnar,  
ngo halae ni ddei lixfaxr mel leil xiar doxr.
- <sup>24</sup> Ni [dixl har dae] lixfaxr mel ngo ddei ggeseddu; ngo leil  
cirza-hanga mul gger su.

Yihexrhuaxr Ddei Lixlfaxr Mel Leil Noni Niazzir

- <sup>25</sup> Ngo nilhar gga ddir jjixr niazzir dae a;  
ni leil qiuxr, ni ddei ddar mel dax zox dae a ngo leil gol dae lol  
la.
- <sup>26</sup> Ngo, ngo bei dae mel biar a, ni ngo leil ddarkoxl a;  
ni leil qiuxr, ni ddei lixlfaxr mel ngo leil mul gger la!
- <sup>27</sup> Ni leil qiuxr, ni mul gger dae mel ngo leil saexl lol,  
ngo ni murgurgurmo ddoddomo bei dae mel leil xiar nia.
- <sup>28</sup> Ngo nixmox zzar cix a, nixmox taex lei cix bbeir a;  
ni leil qiuxr, ni ddei ddar mel dax zox dae a ngo leil hhel du lei  
lol la!
- <sup>29</sup> Ni leil qiuxr, ngo leil nga-nr-zi, ca fur dae mel nr bei lol; START  
ngo leil zoxlnixr a, ni ddei Lixlfaxr ddei ngo leil gger la!
- <sup>30</sup> Ngo ddarzi mel leil tiur,  
arddolcar lei ni ddei lixlfaxr mel leil xiar dae.
- <sup>31</sup> Ngo ni ddei lixlfaxr mel dax bei mae dae;  
Yihexrhuaxr, ni leil qiuxr, ngo leil tor seixl-nr-da lol.
- <sup>32</sup> Ni ngo leil nixmox zzar saexl dax lol a,  
ngo dder ni miardal dae mel leil noni a ni ddei jjiumo zex leil ssi.

Yihexrhuaxr Ddei Lixlfaxr Mel Dax Bei Mae Dae Niazzir

- <sup>33</sup> Yihexrhuaxr, ni leil qiuxr, ni ddei lixlfaxr mel ngo leil mul gger  
la,  
yel ngo dder bei mae doxr dae nia.
- <sup>34</sup> Ni leil qiuxr, ni ddei lixlfaxr mel azo yilsa zza ngo leil saexl lol  
la,  
yel ngo dder bei mae dae yuex,  
halae nixmox cirtaex-lorbba bei mae dae nia.
- <sup>35</sup> Ni leil qiuxr, ngo leil ni miardal dae mel dax bei mae dae lol,  
eil ddei mel dder ngo ddei ggeseddu ddei nga a.
- <sup>36</sup> Ni leil qiuxr, ngo ddei nixmox taex leil ni ddei lixlfaxr dax bei  
mae nolnger lol,

- bir zzirbae nolnger mel leil lei nolnger leixl lol.
- <sup>37</sup> Ni leil qiuxr, ngo meixddur zze leil za xixl lei a, nga-nr-zi hal mel leil tor nr i lol,  
ngo leil ni ddei ddar mel dax zox dae a nixixl goxr lol.
- <sup>38</sup> Ni leil qiuxr, ni, ni leil miar bei gger su mel dax ni bbeix har zaxr dae mel bei,  
hherdder ni, ni leil i du ni leil gexr su ca mel dax bbeix har zaxr dae mel bei.
- <sup>39</sup> Ni ddei lixfaxr mel mel seir, yel ni leil qiuxr,  
ngo gexr dae seixlda ddu mel ngo dax giex vimir lol la.
- <sup>40</sup> Ngo ni mul gger dae mel dax bei mae dae niazzir;  
ni leil qiuxr, ngo leil ni ddei bbaehhexhhex mel dax zox dae a,  
nixixl goxr lol.

### Yihexrhuaxr Ddei Lixlfaxr Mel Leil Koxl

- <sup>41</sup> Yihexrhuaxr, ni,ni bbeix har dae mel dax zox dae a,  
ngo leil perniar la! Ngo leil jiuxl la!
- <sup>42</sup> Ngo mel ni ddei ddar mel leil koxl,  
yel ngo dder ngo leil seixlda lol su mel leil ddarkoxl ddu zza.
- <sup>43</sup> Ngo mel ni ddei lixfaxr mel leil koxl, yel ni leil qiuxr,  
ni ddei ddarzi mel arddolcar lei ngo ddei meir gga biar dae lol.
- <sup>44</sup> Ngo arddolcar ci a lei ni ddei lixfaxr mel dax bei mae doxr dae nia.
- <sup>45</sup> Ngo mel yilzi a ni mul gger dae mel leil seirseir a zza,  
yel ngo middei kuax ggief ssi ji dae nia.
- <sup>46</sup> Ngo lei zzirmar mel meixsaer qir leil ni ddei lixfaxr mel biar nia,  
ngo arsae bei lei seixlda nr var.
- <sup>47</sup> Ngo ni miardal dae mel leil nolnger,  
yel ngo ni miardal dae mel dax bei mae dae a ggese.
- <sup>48</sup> Ngo ni miardal dae mel leil i du nei nolnger;

---

<sup>f</sup>119:45 middei kuax ggief middei kuax ggief ddei yilsi mel yar leil dir su nr zza,  
yar leil ke su nr zza ggief halmaex nga a.

ngo lei ni ddei lixfaxr mel leil xiar doxr nia.

### Yihexrhuaxr Ddei Lixlfaxr Mel Leil Ddarzzi

- <sup>49</sup> Ngo mel ni ddei ddar mel leil koxl dae, yel ni leil qiuxr, ni, ni leil miar bei gger su hherdder ngo dax bbeix har zaxr dae ddar mel leil holcir dae la.
- <sup>50</sup> Ni bbeix har zaxr dae ddar mel ngo leil jiuxl gol du lei; ngo goxrsol-goxrnaxr gga goxr ji dae a lei, ngo leil nixmox zzaso lol.
- <sup>51</sup> Col su ca mel cirleixr nr nor ngo leil bbeix vuxryixr, nael ngo zeixleixr lei ni ddei lixfaxr mel dax bei nr mae bei nr goxr.
- <sup>52</sup> Yihexrhuaxr, ngo ni halleix tortor dder miardal dae mel leil holcir dae a, ngo leil dder nixmox zzaso lol a.
- <sup>53</sup> Ngo, nixmox neix su ca mel ni ddei lixfaxr dax bei nr mae ggie mia a dder seifu daxlgaxl faex, adoxl bbiu dae sael a nga.
- <sup>54</sup> Ngo middurbbor ngol hher dae a, arddolcar lei ni ddei lixfaxr mel leil caxlgo caxl.
- <sup>55</sup> Yihexrhuaxr, ngo eilmerxixl ni ddei mi ddei leil xiar doxr, ni ddei lixfaxr mel dax bei mae dae.
- <sup>56</sup> Ngo eine bei a mel, ni mul gger dae mel dax bei mae dae a nga arddeir a.

### Yihexrhuaxr Ddei Lixlfaxr Mel Leil Yarzi Nolnger

- <sup>57</sup> Yihexrhuaxr, ni mel dder ngo seirseir li wo mel nga a; ngo ni ddei ddar mel dax bei mae dae nia, bbeix goxr a.
- <sup>58</sup> Ngo nixmox cirtaex-lorbba ni leil qiuxr, ni, ni bbeix har zaxr dae ddar mel dax zox dae a, ngo leil zoxlnixr la!
- <sup>59</sup> Ngo seirseir a ngo bei dae mel leil arleixr xiar a dder ni ddei lixfaxr mel dax za xixl lei.

- 60 Ngo nialngasael ni miardal dae mel dax bei mae, cirleixr lei da-nr-wo.
- 61 Nixmox neix su ca mel baezo sser a ngo leil neixl gex dae a lei, ngo ni ddei lixfaxr mel leil holcir doxr dae.
- 62 Ni ddei lixfaxr mel bbaehhexhhexmo nga a, ngo merxixl-soxiu lei ha du lei a, ni leil nawo.
- 63 Ha ni leil i du ni leil gexr su, ni mul gger dae mel dax bei mae dae su ca mel, ngo dder yaa dax ca dae.
- 64 Yihexrhuaxr, ni ca leil perniar dae mel middurbbor zzarvul-zzarmae lei hher bbi a; ni leil qiuxr, ni ddei lixfaxr mel ngo leil mul gger la!

### Yihexrhuaxr Ddei Lixlfaxr Yarzi Zoxlyoxl

- 65 Yihexrhuaxr, ni arddolcar lei ni ddei ddar mel dax zox dae a ni leil visser su ddei leil seir lol.
- 66 Ngo mel ni miardal dae mel leil ddarzzi, yel ni leil qiuxr, ngo leil olnolddu lol la, cirza-hanga saexl lol la.
- 67 Ni ngo leil goxr sol lol xilmeir leil, ngo zoxlzoxl a jjiumo ssi pixl; eilleix ni ddei ddar mel dax bei mae dae.
- 68 Ni mel halcar tortor dder seir; ni bei dae mel lei seir; ni leil qiuxr, ni ddei lixfaxr mel ngo leil mul gger la!
- 69 Col su ca mel ddar nga-nr-zi mel bbeix a ngo leil dir, nael ngo nixmox cirtaex-lorbba ni mul gger dae mel dax bei mae dae nia.
- 70 Yaa yarzi medeil cirza lei nr saexl; ngo zzael, ni ddei lixfaxr mel leil nolnger.
- 71 Ni ngo leil goxr sol lol a mel, ngo dax seirggiebbær zza, ngo leil ni ddei lixfaxr mel zza lol arddeir a.
- 72 Ni meir gga lixfaxr mel ngo dax seirggiebbær zza, bir piu sae hormo du hormo meir leil naxrcixl leixl.

## Yihexrhuaxr Ddei Lixlfaxr Mel Bbaehhexhex Mo

- 73 Ni leixrhher zze ngo leil coxl, ngo leil guaxr;  
ni leil qiuxr, ngo leil olnolddu lol a, ni miardal dae mel leil zza  
wo xie lol!
- 74 Ngo mel ni ddei ddar mel leil koxl,  
yel ni leil i du ni leil gexr su mel ngo leil mia a dder ggese nia.
- 75 Yihexrhuaxr, ni ser dae ddar mel bbaehhex ngo saexl;  
ni bei dae mel koxlsseiddo, yel ni ngo leil goxr sol lol a mel hoxr.
- 76 Ni leil qiuxr, ni, ni leil miar bei gger su ddei dax bbeix har goxr  
ddar mel dax zox dae a,  
ni ca leil perniar dae mel sser a, ngo leil nixmox zzaso lol.
- 77 Ngo mel ni ddei lixlfaxr mel leil nolnger,  
yel ni lel qiuxr, ngo leil zoxlnixr a, ngo leil gol dae lol la.
- 78 Col su ca mel leil seixlda lol nia, yaa mel nga-nr-zi mel bbeix a  
ngo leil pix;  
nael ngo zzael, ni mul gger dae mel leil xiar doxr nia.
- 79 Ni leil i du ni leil gexr su nei ni ddei lixlfaxr mel leil saexl su ca  
hal mel leil,  
ngo dax cir piar a bei lol nia.
- 80 Ngo nixmox taex ni ddei lixlfaxr mel dax bei mae gaxzi a,  
ngo leil seixl-nr-da lol nia.

## Seirpor Leil Qiuxr A, Jiuxl Lol

- 81 Ngo mel yarzisael ni ngo leil jiuxl loxia;  
ngo ni ddei ddar mel leil koxl.
- 82 Ngo ni bbeix har dae mel li wo loxia a, meixddur lei xia  
meixgguir a;  
ngo bbeix: “Ni arddolcar sael ngo leil nixmox zzaso lol?”
- 83 Ngo mel zzi bei teixl lei daexlzi yarli hal ddei sael a nga,  
nael ngo halae ni ddei lixlfaxr mel leil holcir dae.
- 84 Ngo halae arddolcar xia ci nia?

- Ni arddolcar sael ngo leil bixr su mel leil serpaxl neil?
- <sup>85</sup> Ni ddei lixfaxr dax bei nr mae yarzi col ca mel bbeddur giexl  
har ho a;  
yaa ngo leil ke niazzir.
- <sup>86</sup> Ni miardal dae mel maelmaerjjia koxlsseiddo;  
yaa nrbba-nrbba ngo leil bixr;  
ni leil qiuxr, ngo leil beijjiu la!
- <sup>87</sup> Yaa ngo leil middurbbor bei zil gger nrsulsul,  
nael ngo halae ni mul gger dae mel dax bei mae dae.
- <sup>88</sup> Ni leil qiuxr, ni ca leil perniar dae mel dax zox dae a, ngo leil  
jiuxl gol du la;  
ngo dder ni meir gga bbeix dae lixfaxr mel dax bei mae.

### Yihexrhuaxr Ddei Ddar Mel Arddolcar A Ci Lei Zza Dae

- <sup>89</sup> Yihexrhuaxr, ni ddei ddar mel vever a merlabbor zza dae,  
arddolcar ci a lei zza dae.
- <sup>90</sup> Ni yarzi koxlsseiddo bei dae mel cirzeix-hanga lei zza dae;  
ni middur ddei leil ver lol a, middur ddei dder zza doxr dae.
- <sup>91</sup> Merlabbor middurbbor lei ni miardal dae mel dax zox dae a  
eilni zzezze zza ci;  
hazza lei ni leil visser su.
- <sup>92</sup> Ngo ni ddei lixfaxr mel leil nol-nr-nger arddeirnga a,  
ngo arddol-cirsil dder goxrsol-goxrnaxr mel gga si zil dae ho a!
- <sup>93</sup> Ni, ni mul gger dae mel sser a, ngo leil jiuxl gol du lei a;  
yel ngo arddolcar ci a lei hal mel leil holcir dae nia.
- <sup>94</sup> Ngo mel ni ddei a; ngo ni mul gger dae mel dax bei mae dae,  
yel ni leil qiuxr, ngo leil jiuxl la!
- <sup>95</sup> Nixmox neix su ca mel ngo leil xia dae a, ngo leil bei zil gger  
niazzir;  
nael ngo ni ddei lixfaxr mel leil seilseir a xiar nia.
- <sup>96</sup> Ngo i dae a cirza-hanga lei bei jjia nixixl zza,  
nael ni miardal dae mel biar jjia nixixl nr zza.



## Yihexrhuaxr Mul Gger Dae Mel Ca Leil Cirza-hanga Saexl Lol

- <sup>97</sup> Ngo yarzisael ni ddei lixfaxr mel leil nolnger,  
merxixl-merni lei xiar dae.
- <sup>98</sup> Ni miardal dae mel arddolcar ci a lei ngo nixmox zzar xiar ji  
dae a,  
ngo leil, bir ngo leil dir su mel leil olnolddu leixl lol.
- <sup>99</sup> Ngo ni ddei lixfaxr mel leil xiar doxr a,  
yel ngo bir ngo ddei sulmulsu mel leil saexl leixl.
- <sup>100</sup> Ngo ni mul gger dae mel dax bei mae dae a,  
yel ngo bir koxltor mar su mel leil olnolddu leixl.
- <sup>101</sup> Ngo, ngo ddei qihher zze leil jjiumo nr hoxr zex leil nr ssi lol a  
mel,  
ni ddei ddar mel dax bei mae a nga arddeir a.
- <sup>102</sup> Ni mel ngo leil mul gger a;  
yel ngo ni miardal dae mel dax ssi nr pixl.
- <sup>103</sup> Ni ddei ddar mel ngo meir gga civilvil mo,  
bir bbiurvi leil lei ci leixl.
- <sup>104</sup> Ni mul gger dae mel ngo leil olnolddu lol,  
yel ngo bei nr hoxr bei dae maelmaerjjia leil vuxryixr.

## Seilseir A Yihexrhuaxr Ddei Lixlfaxr Mel Dax Bei Mae Nia Bbeix Har

- <sup>105</sup> Ni ddei ddar mel, ngo jjiumo ssi a de doxl ddu nga a;  
ngo jjiumo car gga bbele ddu nga a.
- <sup>106</sup> Ngo ni bbaehhexhhexmo miardal dae mel dax bei mae dae nia  
bbeix har zaxr goxr a;  
ngo arsae bei lei ngo bbeix har dae mel sael a bei nia.
- <sup>107</sup> Yihexrhuaxr, ngo yarzisael goxr sol!  
Ni leil qiuxr, ni ddei ddar mel dax zox dae a ngo leil jiuxl gol du  
la!
- <sup>108</sup> Yihexrhuaxr, ni leil qiuxr, ngo nixmox ga gga ddux lei a ni leil  
bbeixzae gger dae mel, ni li dae;

- yoxl, ni miardal dae mel ngo leil mul gger la!
- <sup>109</sup> Ngo ddei olga ddei arddolcar lei fa solsol ggie hher ji dae, nael ngo zzael ni ddei lixfaxr mel leil holcir dae.
- <sup>110</sup> Nixmox neix su ca mel ngo leil xiaxl dae, nael ngo zzael ni mul gger dae mel dax ssi nr pixl.
- <sup>111</sup> Ni ddei lixfaxr ddei mel arddolcar ci a lei ngo li wo dae yarzi naxrcixl ddei nga a; eil ddei mel ngo nixmox zzar ggese dae ddei nga a.
- <sup>112</sup> Ngo ni ddei lixfaxr mel dax bei mae xiar har ho a, arddolcar ci a lei bei mae doxr dae nia.

### Yihexrhuaxr Ddei Lixlfaxr Mel Leil I Du Su Mel Leil Hhel Du Lei Lol

- <sup>113</sup> Ni dax bei mae gax-nr-zi su ca mel leil ngo vuxryixr; nael ngo ni ddei lixfaxr mel leil nolnger.
- <sup>114</sup> Ni mel ngo ddei pahher ggie, ngo leil dir su mel leil bbiur gex gger su; ngo ni ddei ddar mel leil koxl.
- <sup>115</sup> Yarzi gexrddo bei su ca mel, nia ngo dax hher nr ssa, ssi ddo a!  
Ngo dder ngo ddei Arbosobo miardal dae mel dax bei mae dae cexr.
- <sup>116</sup> Ni leil qiuxr, ni ddei ddar mel dax zox dae a ngo leil hhel du lei lol a, ngo leil gol daelol; ngo leil ngo ni leil koxl a, tor seixl-nr-da lol.
- <sup>117</sup> Ni leil qiuxr, ngo leil hhel du lei lol, yel ngo leil dder jiuxl wo a; ngo arddolcar lei ni ddei lixfaxr mel dax bei mae dae nia.
- <sup>118</sup> Ni ddei lixfaxr mel dax bei nr mae su ca mel, ni yaa leil piar pixl gger; yaa ca fur niazzir dae mel baexr xiar lalnga.
- <sup>119</sup> Middurbbor nixmox neix su ca hazza leil, ni cirbelde i mal gger; yel ngo ni ddei lixfaxr mel leil nolnger.
- <sup>120</sup> Ngo ni leil gexr a, hoxrneixr mel lei go du lei a;

ngo ni serpaxl dae mel leil gexr.

Yihexrhuaxr Ddei Lixlfaxr Dax Bei Mae Dae A, Seirseir Li Wo Ddo

- 121 Ngo bbaehhexhhexmo hoxrhoxr mo bei goxr a;  
ni leil qiuxr, ngo leil ngo leil dir su ca mel leil tor jia nr gger!
- 122 Ni leil qiuxr, ni leil miar bei gger su hherdder ngo leil beijjiu  
bbeix har zaxr la,  
col su ca mel ngo leil tor nr ci lol!
- 123 Ngo ni ngo leil jiuxl loxia, ni bbaehhexhhexmo bbeix har zaxr  
dae mel nga loxia a,  
meixddur lei xia meixgguir a.
- 124 Ni leil qiuxr, ni ca leil perniar dae mel dax zox dae a,  
ni leil miar bei gger su ddei leil perniar,  
ni ddei lixfaxr mel ngo leil mul gger la.
- 125 Ngo mel ni leil miar bei gger su a;  
ni leil qiuxr, ngo leil olnolddu lol a, ni mul gger dae mel leil  
saexl lol.
- 126 Yihexrhuaxr, ca mel ni ddei lixfaxr mel leil no-nr-ni a,  
ni yaa leil faxr zi ci a.
- 127 Yel ngo ni miardal dae mel leil nolnger a, bir sae mel leil  
nolnger leixl,  
bir sae lillil a nga hal mel leil lei nolnger leixl.
- 128 Ni mul gger dae hazza, ngo zzirdae a, maelmaerjjia hoxr,  
nael ngo nga-nr-zi maelmaerjjia leil vuxryixr.

Yihexrhuaxr Ddei Lixlfaxr Dax Bei Mae Meixr

- 129 Ni ddei lixfaxr mel arseir lei xiar ci nr xie,  
yel ngo nixmox cirtaex-lorbba bei mae dae.
- 130 Ni ddei ddar mel azo yilsa a biar teixl lei a mel dder bbelele  
mo hal mel sael a nga,  
ca medeil mel leil lei olnolddu lol.
- 131 Ngo ni miardal dae mel leil zixlkur-zixllixl nolnger a,

- hherdder meir ddei ngaxl kae a seixl ho sael a nga.
- <sup>132</sup> Ni leil qiuxr, ngo dax za xixl lei a, ngo leil zoxlnixr la,  
hherdder ni zoxl a ni leil perniar su ddei leil zoxlnixr mel sael a  
nga.
- <sup>133</sup> Ni leil qiuxr, ni ddei ddar mel sser a, ngo cibbi mel leil vever  
a nga lol,  
azo zuixl lei ngo leil guaxr nr gex dae lol.
- <sup>134</sup> Ni leil qiuxr, ngo leil ci su ca mel dax ngo leil jiuxl teixl la,  
yel ngo leil ni mul gger dae mel dax bei mae dae cexr lol.
- <sup>135</sup> Ni leil qiuxr, ni vaesirsirmo ni leil miar bei gger su ddei leil i  
dae,  
yoxl ni ddei lixfaxr mel ngo leil mul gger la.
- <sup>136</sup> Yaa mel ni ddei lixfaxr mel dax bei nr mae a,  
yel ngo ddei meixbbix mel lazzarmo gga ajjix mel sael a pe teixl  
lei a.

### Yihexrhuaxr Ddei Lixlfaxr Bbaehhex

- <sup>137</sup> Yihexrhuaxr, ni mel bbaehhex,  
ni ca leil ser dae mel lei hoxr.
- <sup>138</sup> Ni dixl har dae lixfaxr mel bbaehhex, koxlsseiddo.
- <sup>139</sup> Ngo leil dir su ca mel ni ddei ddar mel leil hol-nr-cir a,  
yel ngo yarzi seifu faex, hherdder adoxl cu dae mel sael a nga.
- <sup>140</sup> Ni ddei ddar mel nr seir nr hoxr cirdoxr lei nr ca dae;  
yel ni leil miar bei gger su ddei ni ddei ddar mel leil nolnger.
- <sup>141</sup> Ngo mi nr ddux a, ca mel ngo leil i zei,  
nael ngo ni mul gger dae mel leil holcir dae.
- <sup>142</sup> Ni ddei bbaehhexhex mel arddolcar ci a lei zza dae;  
ni ddei lixfaxr mel ngazi a.
- <sup>143</sup> Ngo goxrsol-goxrnaxr nei cix ddu pex dae a;  
nael ni miardal dae mel ngo leil ggese lol.
- <sup>144</sup> Ni ddei lixfaxr mel arddolcar ci a lei bbaehhex;  
ni leil qiuxr, ngo leil ni ddei lixfaxr mel saexl lol a, ngo leil gol  
dae lol.

## Seirpor Leil Qiuxr A Jiuxl Lol

- 145 Yihexrhuaxr, ngo nixmox cirtaex-lorbba ni leil ae!  
 Ni leil qiuxr, ngo leil ddarkoxl la;  
 ngo ni ddei lixfaxr mel dax bei mae nia!
- 146 Ngo ni leil qiuxr, ni ngo leil jiuxl la!  
 Ngo ni ddei lixfaxr mel dax bei mae dae nia.
- 147 Mer lei mer-nr-teir seir ngo dder ni leil ae a, ngo leil jiuxl la  
 qiuxr;  
 ngo ni ddei ddar mel leil koxl.
- 148 Ngo cirxixl-lorbba zucur dae a,  
 ni ddei ddar mel leil xiar doxr niazzir.
- 149 Ni leil qiuxr, ni ca leil perniar dae mel dax zox dae a ngo qiuxr  
 dae mel leil noni;  
 Yihexrhuaxr, ni leil qiuxr, ni ddei bbaehhexhhex mel dax zox  
 dae a, ngo leil jiuxl gol la!
- 150 Yarzi gexrddo bei meixr su mel ngo dax lei naer lei a;  
 yaa ni ddei lixfaxr mel dax bei nr mae.
- 151 Yihexrhuaxr, ni mel ngo dax hher dax dae;  
 ni miardal dae hazza lei ngazi a.
- 152 Ngo arddol-cirsil dder ni ddei lixfaxr mel gga saexl a;  
 ni ddei lixfaxr mel arddolcar ci a lei zza dae.

Goxrsol-Goxrnaxr Goxr Dae A Lei,  
 Yihexrhuaxr Mul Gger Dae Mel Leil Nolnger

- 153 Ngo mel ni ddei lixfaxr mel leil holcir dae,  
 yel ni leil qiuxr, ngo goxrsol-goxrnaxr goxr dae mel leil arleixr i  
 a, ngo leil jiuxl la.
- 154 Ni leil qiuxr, ngo leil ddar te jjiu la, ngo leil jiuxl la,  
 ni ddei ddar mel dax zox dae a ngo olga ddei leil guaxr dae.
- 155 Nixmox neix su ca mel ni ddei lixfaxr mel dax bei nr mae,  
 yel yaa leil jiuxl wo nr ddo.

- 156 Yihexrhuaxr, ni ca leil yarzisael zoxlnixr;  
ni leil qiuxr, ni ddei lixfaxr mel dax zox dae a ngo leil jiuxl gol  
la.
- 157 Ngo leil bixr su, ngo leil dir su mel yarzisael miur,  
nael ngo zzael ni ddei lixfaxr mel dax bei mae dae.
- 158 Nixmox neix su ca mel ni ddei ddar mel leil no-nr-ni;  
yel ngo yaa leil mia a dder yarzisael vuxryixr.
- 159 Ni arleixr i lar, ngo ni mul gger dae mel leil yarzisael nolnger!  
Yihexrhuaxr, ni leil qiuxr, ni ca leil perniar dae mel dax zox dae  
a, ngo leil jiuxl gol la!
- 160 Ni ddei ddar maelmaerjjia lei ngazi a;  
ni ddei bbaehhexhhexmo lixfaxr hazza arddolcar ci a lei zza  
dae.

### Yihexrhuaxr Ddei Lixfaxr Mel Leil Yarzi Sael Nolnger

- 161 Vaervaerpor bei su mel nrbba-nrbba ngo leil bixr,  
nael ngo nixmox zzar ni ddei ddar mel leil i du, ni ddei ddar mel  
leil gexr.
- 162 Ngo ni ddei ddar mel leil nolnger,  
hherdder ca mel zaxlddaexr leixl a cirza-hanga cirke li wo sael  
a nga.
- 163 Ddar nga-nr-zi mel leil ngo yarzisael vuxryixr;  
ni ddei lixfaxr mel leil zzael, ngo nolnger.
- 164 Ni ddei lixfaxr mel bbaehhexhhexmo nga a, ngo cir ni, ni leil  
sir boxl bbeixzae gger.
- 165 Ni ddei lixfaxr leil nolnger su ca mel yarzisael zzaso var;  
azo lei yaa leil baxlguirle gger nr var.
- 166 Yihexrhuaxr, ngo mel ni ngo leil jiuxl loxia a,  
ni miardal dae mel dax bei mae dae a.
- 167 Ngo nixmox zzar ni ddei lixfaxr mel dax bei mae dae;  
lixfaxr eilmel ngo yarzisael nolnger.
- 168 Ngo bei dae hazza lei ni meixsaer qir leil zza dae,

yel ngo ni mul gger dae mel dax nei ni dixl har dae lixfaxr mel  
dax bei mae dae.

Seirpor Leil Qiuxr A, Beijjiu Lol

<sup>169</sup> Yihexrhuaxr, ngo ni leil ae dae qiurte ddei ni meixsaer qir dax  
ddeix ci lol nia;

ni ddei ddar mel dax zox dae a, ngo leil olnolddu lol la.

<sup>170</sup> Ngo ni leil qiuxr dae mel ni meixsaer qir dax ddeix ci lol nia;  
ni ddei ddar mel dax zox dae a, ngo leil jiuxl la.

<sup>171</sup> Ni, ni ddei lixfaxr mel ngo leil mul gger a;  
yel ngo meir gga ni leil bbeixzae gger nia.

<sup>172</sup> Ni miardal dae hazza lei bbaehhex,  
yel ngo lo ddei ni ddei ddar mel leil caxl lol nia.

<sup>173</sup> Ngo ni mul gger dae mel leil noni a;  
yel ni leixrhher bbor ngo leil beijjiu lol nia.

<sup>174</sup> Yihexrhuaxr, ngo yarzisael ni ngo leil jiuxl loxia!

Ni ddei lixfaxr mel mel, ngo nolnger dae mel nga a.

<sup>175</sup> Ni leil qiuxr, ngo leil gol dae lol a, ni leil bbeixzae gger cexr  
lol!

Ni ddei lixfaxr mel ngo leil beijjiu lol nia!

<sup>176</sup> Ngo ya sael a jjiumo ssi pixl a;  
nael ngo ni miardal dae mel leil holcir doxr dae,  
yel ni leil qiuxr, ngo leil zo lei.

Yihexrhuaxr Leil Qiuxr A, Jjiu Lol

Dexbbor ddeix a caxlddu caxlgo.

**120** <sup>1</sup> Ngo goxrsol-goxrnaxr car, Yihexrhuaxr leil qiuxr a,  
yar dder ngo leil ddarkoxl a.

<sup>2</sup> Yihexrhuaxr, ni leil qiuxr,

ngo leil ddar jiar te su nei cafur-calel su mel dax jiuxl teixl la!

<sup>3</sup> Ddar jiar te su ca, Arbosobo ni leil arsae bei var neil?  
Yar ni leil arsae faxr neil?

<sup>4</sup> Yar zzi deil su mel ddei jir teixvilvil baex sser nei cu taxl dae  
saernir mel sser a ni leil faxr.

<sup>5</sup> Ngo Mirsaexl mermi ngol hher dae,  
Zidaxr mermi sur bei teixl lei xigex gga hher dae a, ngo zoxr a!

<sup>6</sup> Ngo mel toltor a bei su mel leil vuxryixr su ca mel dax hormo  
nixixl hher dax ho a.

<sup>7</sup> Ngo ca dax toltor a bei niazzir;  
nael ngo ddar bbeix teixl lei a, yaa zzael zaxlddaexr niazzir.

Ngo Leil Guaxr Su Yihexrhuaxr

Dexbbor ddeix a caxlddu caxlgo.

**121** <sup>1</sup> Ngo worga mel leil i dae;  
ngo leil beijjiu dae mel arddolmaex gga lei?

<sup>2</sup> Ngo leil beijjiu dae mel,  
mercoxl-micoxl su Yihexrhuaxr dax lei.

<sup>3</sup> Yar ni qihher zze leil yoxl lol nr var,  
ni leil guaxr su ddei yixrmeixldox nr var!

<sup>4</sup> Yirsaexllixl su ca mel leil guaxr su ddei,  
yixrmeixl lei dox nr var,  
yixrmeixl lei jjiu nr var.

<sup>5</sup> Ni leil guaxr su ddei mel Yihexrhuaxr a;  
Yihexrhuaxr ni yo piar a gga hher dae a,  
ni leil jiul gex dae a ni leil guaxr.

<sup>6</sup> Eilnirggu, merni taex ni leil lexl no gger nr var;  
eilmerxixl, xiubbo taex ni leil bei no gger nr var.

<sup>7</sup> Yihexrhuaxr ni leil guaxr dae a,



cirza-hanga nr seir mel pex nr dae lol;  
yar ni olga ddei leil guaxr nia.

<sup>8</sup>Ni ddir ni ddux a lei, Yihexrhuaxr ni leil guaxr nia;  
eilcar cirdae a, arddolcar ci a lei guaxr nia.

Yiluxlsaler Zzi Ddei Leil Bbeixzae Gger

Daxlweixl vaexr Dexbbor ddeix a caxlddu caxlgo.

**122** <sup>1</sup>Ca mel ngo leil bbeix: “Niul Yihexrhuaxr ddei xi gga ssi  
a yo,” bbeix a ngo dder ggese!

<sup>2</sup>Yiluxlsaler zzi, ngua ddei qihher zze ni ddei gielmi gga ngier ji  
dae a.

<sup>3</sup>Yiluxlsaler zzi ddei mel zi box a;  
weixrqiaxr ddei maerssissi mo yarzi ssei.

<sup>4</sup>Circuxr-hanga, hherdder Yihexrhuaxr ddei circuxr-hanga  
halmaex ddeix a,  
Yihexrhuaxr Yirsaexllixl su ca mel leil miardal dae mel dax zox  
dae a,  
yar ddei mi ddei leil bbeixzae gger.

<sup>5</sup>Ca leil serpaxl su ddei cux ggie zzirmar baxrde taex mel  
halmaex gga zza dae;  
hherdder Daxlweixl giedae ca mel ddei zzirmar baxrde taex  
nga a.

<sup>6</sup>Nia Yiluxlsaler zzi ddei leil kebal goxrjia dax toltor a nga lol  
qiuxr gger nia!  
Yiluxlsaler zzi, ni leil perniar su ca mel leil cirza-hanga seir lol  
nia!

<sup>7</sup>Ni ddei zzi gga hher dae su ca mel leil zzasoso a nga lol nia;  
ni ddei zzirmar hher ggie ca mel leil lei sosarsar a nga lol nia.

<sup>8</sup>Ngo ddei arzzi-nimar nei ngo ddei carbeix mel leil i dae a,  
ngo, “Ni leil zzasoso a nga lol nia,” eine bbeix nia.

<sup>9</sup> Ngua ddei Arbosobo Yihexrhuaxr ddei xi zzir leil i dae a,  
ngo ni leil seirseir qiuxr gger nia.

Seirpor Leil Qiuxr A, Zoxlnixr Lol

Dexbbor ddeix a caxlddu caxlgo.

**123** <sup>1</sup> Merlabbor cux dae Seirpor,  
ngo oldde taex bil du lei a, meixddur zze ni leil i.

<sup>2</sup> I ddo a; ca leil miar bei gger su ddei meixddur zze, arsae yar  
seirpor ddei leixrhher zze leil i dae;  
ca leil miar bei gger su ssormaer ddei meixddur zze, arsae yar  
seirpor maerssor ddei leixrhher zze leil i dae mel,  
ngua ddei meixddur zze lei hal mel saelsael a ngua ddei  
Arbosobo Yihexrhuaxr leil i dae,  
hherdder yar ngua leil zoxlnixr zzezze ci.

<sup>3</sup> Yihexrhuaxr, ni leil qiuxr,  
ngua leil zoxlnixr la, ngua leil zoxlnixr la!  
Ca mel ngua leil i ze i a arddol ci ho a.

<sup>4</sup> Goxr seir su ca mel ngua leil vaessi nei col su ca mel ngua leil i  
zei a, arddol ci ho a.

Yihexrhuaxr Mel Yar Ddei Cassor-worssor Leil Guaxr Su Ddei Nga A

Daxlweixl vaexr Dexbbor ddeix a caxlddu caxlgo.

**124** <sup>1</sup> Yirsaexllixl su ca mel eine bbeix nia:  
Yihexrhuaxr niul leil bei-nr-jjiu arddeirnga a,

<sup>2</sup> Yihexrhuaxr niul leil bei-nr-jjiu arddeirnga a,  
ca mel niul leil deil lei a,

<sup>3</sup> niul dax seifu faex car,  
yaa dder niul leil ca gol ixl ji a.

<sup>4</sup> Halcar, vi mil dae ajjix mel niul leil pe teixl si a;

- lazzar gga ajjix mel niul leil mil hex a.  
<sup>5</sup> Ajjix ggerggelgger pe dae mel niul leil pe teixl si a.  
<sup>6</sup> Yihexrhuaxr leil nawo nia!  
 Yar niul leil dir su ca mel leil,  
 ser sser a niul leil zzorddu sael a si me nr gger lol.  
<sup>7</sup> Niul mel ngax bel su mel ddei bel gga pato wo ngax mel sael a  
 nga;  
 bel ddei bbaer zil a, niul dder pato wo a.  
<sup>8</sup> Niul leil beijjiu dae mel,  
 mercoxl-micoxl su Yihexrhuaxr dax lei.

Yihexrhuaxr Leil Koxl Su Ca Mel Volver A Nga

Dexbbor ddeix a caxlddu caxlgo.

- 125** <sup>1</sup> Yihexrhuaxr leil koxl su ca mel, Xi'a worga ga sael a  
 nga;  
 arsae bei lei le nr var, arddolcar ci a lei vover a zza dae.  
<sup>2</sup> Worga mel arsae Yiluxlsaler zzi ddei leil weixr gex dae mel,  
 Yihexrhuaxr lei hal mel sael a yar ddei cassor-worssor mel leil  
 weixr gex dae,  
 eilni cirdae a cirse-cirsil zzezze ci.  
<sup>3</sup> Nixmox neix su ca mel arddolcar lei nixmox seir su ca mel leil  
 guaxr doxr dae nr var;  
 nr nga a, nixmox seir su ca mel lei yarzi gexrddo bei ssi lei.  
<sup>4</sup> Yihexrhuaxr, ni leil qiuxr, seirseir bei su, bota ddu nr zza ca  
 mel leil seir lol.  
<sup>5</sup> Yihexrhuaxr dax ssi nr mae su mel leil bbeix ci a mel,  
 yar yaa leil nixmox neix su ca mel dax cirgo a faxr.  
 Yirsaexlxl goxrjia leil kebal goxrjia dax toltor a nga lol nia!

Yihexrhuaxr Hier Xixl Lei Ca Mel, Ggese

Dexbbor ddeix a caxlddu caxlgo.

- 126** <sup>1</sup> Yihexrhuaxr kebal mermi ssu mal ho ca hal mel leil hier  
xixl lei car,  
ngua yixrmeix ka su ca mel sael a nga.
- <sup>2</sup> Ngua ggeese a vae no vae, caxl no caxl car,  
Yoxrtaexl su nr nga ca mel bbeix:  
“Yihexrhuaxr yaa leil miar vaervaermo bei gger a.”
- <sup>3</sup> Yihexrhuaxr yarzi ngua leil miar vaervaermo bei gger a, ngua  
dder ggeese.
- <sup>4</sup> Yihexrhuaxr, ni leil qiuxr,  
ngua leil halleix sael a seir lol la;  
hherdder naxrfa piar a gga hierbolpae mel ajjix pe teixl box lei  
sael a nga.
- <sup>5</sup> Meixbbix ddux dae a silmo xiu ji su ca mel,  
ggegge-sese a ae dae a, loxlmoxr se nia.
- <sup>6</sup> Nge dae a silmo xiu ssi su ca mel,  
ggegge-sese a ae dae a, loxlmoxr deix xixl lei nia.

Ca Mel Seirseir Li Wo Dae Mel, Arbosobo Gger A

Sorloxrmexr vaexr Dexbbor ddeix a caxlddu caxlgo.

- 127** <sup>1</sup> Yihexrhuaxr xi zi nr nga a mel, xi zi su ddei dder baexr  
a zi lalnga;  
Yihexrhuaxr zzi ddei leil su dae nr nga a mel,  
su su ca ddei dder baexr a zucur dae lalnga.
- <sup>2</sup> Yihexrhuaxr perniar dae ca mel, yar yaa leil yixr seir lol,  
yel nia neixrneixr-sisi ha du lei a, laelae saelnei yixr a, sulku  
doxr a lei baexr a sulku lalnga.
- <sup>3</sup> Ssormine mel Yihexrhuaxr gger dae seirseir mel nga a;  
xilbe gga ji dae mel lei yar gger.
- <sup>4</sup> Leixl tor seir hier teixl lei ssormine mel mel,  
jir ddaexr sexrsexr mel leixrga gga vei dae jir baex sael a nga.
- <sup>5</sup> Jir ji ddu ddei gga jir bbilbbi ji dae ca ddei,

Arbosobo yar leil seir lol a!

Yar zzi gielmi dax yar leil vuxryixr su ca mel dax zex car,  
seixlda nr var.

Yihexrhuaxr Leil I Du Yar Leil Gexr Su Ca Mel Leil Seir Lol

Dexbbor ddeix a caxlddu caxlgo.

**128** <sup>1</sup> Ha Yihexrhuaxr leil i du yar leil gexr,  
yar ddei ddar noni su ca ddei, yar ni leil seir lol.

<sup>2</sup> Ni, ni sulku si lei mel zzo nia,  
ni goxr seir nia, azo bei lei bei cexr nia.

<sup>3</sup> Ni maerssor ake gga hher dae a, yarzi niar bex puxrto zzei mel  
sael a nga;  
ni ddei ssormine mel valpexpex a zaezir dax cux dae a, saercor  
zzei yarbaxlleixr mel sael a nga.

<sup>4</sup> I ddo a; Yihexrhuaxr leil i du yar leil gexr su ca ddei leil,  
eilmel sael a seir lol nia.

<sup>5</sup> Yihexrhuaxr leil Xi'a worga leil hher dae a, ni leil seir lol nia!  
Ni leil cirse-cirsil lei Yiluxlsaler zzi ddei seirseir mel leil mia lol  
nia!

<sup>6</sup> Ni leil ni ddei lilbol-lilmo mel leil mia lol nia!

Yirsaexllixl goxrjia leil kebal goxrjia dax toltor a nga lol nia!

Yihexrhuaxr Leil Qiuxr A, Dir Lei Su Mel Leil Jjixr Lol

Dexbbor ddeix a caxlddu caxlgo.

**129** <sup>1</sup> Yirsaexllixl su ca mel eine bbeix nia:  
“Ngo ye tor cirdae a, ngo leil dir su ca mel ngo leil hormo  
boxl nei ke,

- <sup>2</sup> ngo ye tor cirdae a, ngo leil dir su ca mel ngo leil hormo boxl nei ke a bbeixarnar a,  
nael ngo leil bei leixl nr gger.
- <sup>3</sup> Yaa mi mor su ca mel sael a ngo nolgger ddei leil mor, mor goxr ddu zex yarzi si.”
- <sup>4</sup> Yihexrhuaxr mel bbaehhex,  
yar nixmox neix su ca mel ddei baezo mel taexl te gger.
- <sup>5</sup> Xi'a zzi leil vuxryixr su ca mel leil qiaxrmeix zzi nr zza a doxdox si jjixr lol nia.
- <sup>6</sup> Yaa leil xipaebbor ner dae silbbar mel sael a nga lol nia,  
ner lei ner nr vaer seir dder hie zzu a.
- <sup>7</sup> Caer lei caer ngexl nr bbe, neixl lei neixl du lei nr bbe.
- <sup>8</sup> Jjiumo car gga ssi gel su mel lei:  
“Yihexrhuaxr nia leil seir lol nia!  
Ngua Yihexrhuaxr ddei mi bbeix dae a nia leil seir lol nia,” □  
eine nr bbeix.

Yihexrhuaxr Leil Qiuxr A, Beijjiu Lol

Dexbbor ddeix a caxlddu caxlgo.

**130** <sup>1</sup> Yihexrhuaxr, ngo xiarngexl ggie lei nr zza car, ni leil qiuxr!

- <sup>2</sup> Seirpor, ngo ni leil qiuxr, ni ngo qiuxr dae mel leil noni la!  
Ni leil qiuxr, zabbar-seilseir a ngo qiuxr dae mel leil noni la!
- <sup>3</sup> Seirpor Yihexrhuaxr, ni ca mel ddei zuixl mel leil holcir dae arddeirnga a,  
arseir faxr dae mel leil pato xie bbeixleir?
- <sup>4</sup> Nael ni mel ca mel leil ssoxrsuxl a,  
ca mel leil ni leil i du ni leil gexr lol.
- <sup>5</sup> Ngo Yihexrhuaxr leil xia dae; ngo nixmox zzar yar leil xia dae;  
ngo yar ddei ddar mel leil koxl.
- <sup>6</sup> Ngo nixmox zzar Seirpor leil xia dae,

bir eilmerxixl su su ca mel merteir loxia leil lei loxia leixl,  
 bir eilmerxixl su su ca mel merteir loxia leil lei loxia leixl.

<sup>7</sup> Yirsaexllixl su ca mel, nia Yihexrhuaxr leil koxl nia!

Yar mel ca leil zoxlnixr, arddolcar lei ca leil jiuxl niazzir.

<sup>8</sup> Yar Yirsaexllixl su ca mel leil cirza-hanga zuixl mel gga jiuxl  
 teixl lei nia.

### Seirpor Leil Koxl

Daxlweixl vaexr Dexbbor ddeix a caxlddu caxlgo.

**131** <sup>1</sup> Yihexrhuaxr, ngo nixmox zzar nr col, ngo meixddur nr  
 mu;

miar vaervaer mel nei bei ci nr ddo hal mel ngo bei ssi nr bel.

<sup>2</sup> Ngo nixmox zzar zzasoso arla, arjjiuljjiu arla,

hherdder baxr zil ho anix bexlelte mel yarma yar leil deix dae  
 sael a nga;

ngo baxr zil ho anix bexlelte mel sael a nixmox zzar zzasoso  
 arla.

<sup>3</sup> Yirsaexllixl su ca mel, nia eilcar cirdae a arddolcar ci a lei  
 Yihexrhuaxr koxl nia.

Yihexrhuaxr Hher Ggie Ddei Leil Bbeixzae Gger

Dexbbor ddeix a caxlddu caxlgo.

**132** <sup>1</sup> Yihexrhuaxr, ni leil qiuxr,  
 ni Daxlweixl leil nei yar goxr sol goxr maelmaerjgia leil  
 holcir dae.

<sup>2</sup> Yar halleix Yihexrhuaxr dax bbeix har zaxr,

cirza-hanga lei yarzi ddo Yargel ddei Arbosobo dax bbeix har  
 zaxr a, bbeix:

- <sup>3</sup> “Ngo arsae bei lei ngo hher ggie nr ddir,  
ngo ddei yixrgguci leil nr yixr,
- <sup>4</sup> yixrmeixl-nr-jjiu, yixrmeixl-nr-dox,
- <sup>5</sup> hherdder ngo Yihexrhuaxr leil hher ggie zi gger,  
cirza-hanga lei yarzi ddo Yargel ddei Arbosobo leil hher ggie zi  
gger halcar zzeze ci,” □ eine bbeix a.
- <sup>6</sup> Ngua Yueguixl ddei Yirfaxrta mermi zza dae bbejjiur a,  
ngua dder Zilixlyilixr zzi gga mi dax zo wo a.
- <sup>7</sup> Ngua bbeix: “Niul Sexlmuxl gga ddir a, yar qihher toxldi ddei  
dax middur ddei leil puxr gex dae a,  
yar leil bbeixzae gger nia.
- <sup>8</sup> Yihexrhuaxr, ni ha du la,  
ni ddei bbesur zza Yueguixl ddei dax cirter a, ni wornol ggie  
ddir.
- <sup>9</sup> Ni leil zi su mel leil bbaehhexhhexmo nga lol nia;  
ni ddei cassor-worssor mel leil ggeze a, worcixl-worni ae du lei  
lol nia!
- <sup>10</sup> Yihexrhuaxr, ni leil qiuxr,  
ni, ni leil miar bei gger su Daxlweixl leil i dae a,  
ni tiur teixl lei zzirmar ddei leil tor piar pixl nr gger.
- <sup>11</sup> Yihexrhuaxr mel, Daxlweixl dax yarzi bbeix har zaxr goxr a;  
arsae bei lei gierbox nr var.  
Yar bbeix: “Ngo ni ddei giedae ca mel gga ar ddei tiur teixl lei  
a,  
ni ddei zzirmar baxrde taex leil cux lol nia.
- <sup>12</sup> Ni giedae ca mel, ngo yaa dax bbeix har zaxr dae ddei dax bei  
mae nei ngo yaa leil mul gger dae dixl har dae lixfaxr mel leil  
noni arddeirnga a,  
yaa giedae ca mel, arddolcar ci a lei ni ddei zzirmar baxrde  
taex leil cux nia,” □ eine bbeix a.
- <sup>13</sup> Yihexrhuaxr mel Xi'a zzi ddei leil tiur teixl lei a,



- yar ddei hher ggie bei lol a,  
<sup>14</sup> bbeix: “Eilmaex mel arddolcar ci a lei ngo wornol ggie a;  
 ngo eilmaex gga hher nia;  
 eil ddei mel ngo bei bei ggese.  
<sup>15</sup> Ngo halmaex gga loxlmoxr zzeilil-zzeilor zza lol nia;  
 halmaex gga ddei casolssor mel leil zzor bbox lol nia.  
<sup>16</sup> Ngo, ngo leil zi su mel leil ngo ca leil arsae jiuxl biar gger ssi lol  
 nia;  
 ngo kebal ca mel dax bbe teixl lei cassor-worssor mel ggese a,  
 worcixl-worni ae nia.  
<sup>17</sup> Ngo Daxlweixl giedae ca ar ddei leil zzirmar bei lol nia;  
 ngo tiur teixl lei zzirmar ddei leil zzirmar bei nor nixixl nr zza  
 lol nia.  
<sup>18</sup> Ngo yar leil dir su ca mel leil qiaxrmeix zzi nr zza lol nia;  
 nael yar ddei goxr ddei ho bei ho sexr du lei nia.

Arzzi-nimar Arzzi-nimo Mel Zzi Dax Toltor A Bei

Daxlweixl vaexr Dexbbor ddeix a caxlddu caxlgo.

**133** <sup>1</sup> I ddo a! Arzzi-nimar arzzi-nimo mel zzi dax toltor a bei  
 a mel,

yarzi seir yarzi ggese!

<sup>2</sup> Eil ddei mel hherdder ssuvi naxrcixlcixl mel Yalluixr oldde leil  
 dox deix a,

bborvu dax vaexr ze i ci,

yoxl leigguqir dax vaexr ze i ci sael a nga.

<sup>3</sup> Halae yoxl Hiemexr worga ddei zil mel,

Xi'a worga leil ddar deix sael a nga;

halmaex mel Arbosobo bbeix har dae seirseir mel zza,

hherdder arddolcar ci a lei olga zza.

## Yihexrhuaxr Leil Bbeixzae Gger Nia

Dexbbor ddeix a caxlddu caxlgo.

**134** <sup>1</sup> Yihexrhuaxr leil miar bei gger su mel,  
nia eilmerxixl yar ddei xi gga ngier dae car,  
yar leil bbeixzae gger nia!

<sup>2</sup> Nia Yihexrhuaxr ddei xi gga leixrhher ddei jur du lei a,  
yar leil bbeixzae gger nia!

<sup>3</sup> Merlo-milo coxl su Yihexrhuaxr leil,  
Xi'a worga leil nia leil seir lol nia!

Bbeixzae Gger Dae Caxlgo

**135** <sup>1</sup> Yihexrhuaxr leil bbeixzae gger nia!  
Yihexrhuaxr ddei mi ddei leil bbeixzae gger nia!  
Yihexrhuaxr leil miar bei gger su mel, yar leil bbeixzae gger  
nia.

<sup>2</sup> Yihexrhuaxr ddei xi gga ngier dae, yar ddei xi zzaexggu gga  
ngier dae su ca mel,  
nia yar leil bbeixzae gger nia!

<sup>3</sup> Yihexrhuaxr mel halleix tortor dder seir;  
yel nia yar leil bbeixzae gger nia!  
Yar ddei mi ddei mel seir zzir ddei nga a;  
yel nia yar ddei mi ddei leil caxl zae gger nia.

<sup>4</sup> Yihexrhuaxr mel Yargel hhexr leil tiur,  
hherdder Yirsaexllixl su ca mel leil tiur a,  
yar ddei cassor-worssor bei lol.

<sup>5</sup> Ngo saexl, Yihexrhuaxr mel halcar tortor dder vaer zzir ddei a;  
ngo lei saexl, ngua ddei Seirpor mel ca mel zi dae hazza leil  
vaer leixl.

<sup>6</sup> Yihexrhuaxr mel, merlabbor, middurbbor, neixvi gga,

- middurzzar lei yar armael xiar dae mel sael a bei.
- <sup>7</sup> Yar meixker mel leil middurbbor zzarvul-zzarmae ddeix lei lol,  
almer bbiexr lol, almer lei lol;  
yar, yar ddei cirza-hanga dol ji ggie gga mersi jia teixl lei lol.
- <sup>8</sup> Aezixr goxrjia gga, xiu beil nei cer beil mel,  
yar ca lor zzeir lor maelmaerjjia seixl zil gger a.
- <sup>9</sup> Aezixr goxrjia, yar ni dax halmaex ddoddomo murgurgur mo  
bei a,  
Faxrlar zzirmar leil nei yar woxrke vaervaerpor mel leil faxr.
- <sup>10</sup> Yar ca hormo cuxr nei hormo cuxr seixl zil gger a;  
zzirmar sexrsexr mel leil lei seixl zil gger a.
- <sup>11</sup> Hherdder Yalmoxrlixl su ddei zzirmar Xihoxr nei Basa su ddei  
zzirmar Exl,  
halae Jianaxr su ddei zzirmar maelmaerjjia nga a.
- <sup>12</sup> Yaa ddei middei mel,  
yar ddei cassor-worssor Yirsaexllixl su ca mel leil gger a.
- <sup>13</sup> Yihexrhuaxr, ni ddei mi ddei mel arddolcar ci a lei zza dae!  
Yihexrhuaxr, cirzeix-hanga ca mel ni leil holcir dae nia!
- <sup>14</sup> Yihexrhuaxr yar ddei cassor-worssor mel leil beijjiu nia;  
yar, yar leil miar bei gger su mel leil zoxlnixr nia.
- <sup>15</sup> Yoxrtaexl su nr nga ca mel zi dae bbex mel mel piu sae sser a  
bei teixl lei,  
ca leixrhher gga bei teixl lei;
- <sup>16</sup> meir niar dae lei ddar te nr var,  
meixddur niar dae lei i nr var,
- <sup>17</sup> nolba niar dae lei noni nr var,  
meir gga lei seixl nr ho dae.
- <sup>18</sup> Yar leil bei su ddei yar dax ciryoxr a nga,  
yar leil koxl su ddei lei yar dax ciryoxr a nga.
- <sup>19</sup> Yirsaexllixl hhexr, nia Yihexrhuaxr leil bbeixzae gger nia!  
Yalluixr hhexr, nia Yihexrhuaxr leil bbeixzae gger nia!

<sup>20</sup> Lixlweixl hhexr, nia Yihexrhuaxr leil bbeixzae gger nia!  
 Yihexrhuaxr leil gexr yar leil i du su mel, nia yar leil bbeixzae  
 gger nia!

<sup>21</sup> Xi'a worga hherdder Yiluxlsaler zzi gga hher dae Yihexrhuaxr  
 leil bbeixzae gger nia!

Yihexrhuaxr leil bbeixzae gger nia!

Nawo Dae Caxlgo

**136** <sup>1</sup> Yihexrhuaxr leil nawo nia, yar mel halcar tortor dder  
 seir;

yar ca leil perniar dae mel arddolcar ci a lei zza doxr dae.

<sup>2</sup> Ca mel zi dae maelmaerjgia leil vaer leixl Arbosobo ddei leil  
 nawo nia;

yar ca leil perniar dae mel arddolcar ci a lei zza doxr dae.

<sup>3</sup> Seirpor mel ddei Seirpor ddei leil nawo nia;

yar ca leil perniar dae mel arddolcar ci a lei zza doxr dae.

<sup>4</sup> Yar larni ddoddomo bei var;

yar ca leil perniar dae mel arddolcar ci a lei zza doxr dae.

<sup>5</sup> Olnoldduddu mel sser a, merlabbor coxl su ddei leil nawo nia;

yar ca leil perniar dae mel arddolcar ci a lei zza doxr dae.

<sup>6</sup> Ajjix teixl leil middur kar su ha ddei leil nawo nia;

yar ca leil perniar dae mel arddolcar ci a lei zza doxr dae.

<sup>7</sup> Merni, xiubbo nei gie coxl su ddei leil nawo nia;

yar ca leil perniar dae mel arddolcar ci a lei zza doxr dae.

<sup>8</sup> Merni taex eilnirggu leil guaxr;

yar ca leil perniar dae mel arddolcar ci a lei zza doxr dae.

<sup>9</sup> Xiubbo nei gie mel eilmerxixl leil guaxr,

yar ca leil perniar dae mel arddolcar ci a lei zza doxr dae.

<sup>10</sup> Aezixr su ca mel ddei ssor vaervaer mel leil seixl zil gger su  
 ddei leil nawo nia;

- yar ca leil perniar dae mel arddolcar ci a lei zza doxr dae.
- <sup>11</sup> Yar Yirsaexllixl su ca mel leil yaa dax hier teixl lei;  
yar ca leil perniar dae mel arddolcar ci a lei zza doxr dae.
- <sup>12</sup> Yar ddoddomo bei dae leixrhher bbor nei leixrhherba ddei cei  
teixl lei a yaa leil hier teixl lei;  
yar ca leil perniar dae mel arddolcar ci a lei zza doxr dae.
- <sup>13</sup> Neixvi nilni ae hal bbe leil bbe kae gger su ddei leil nawo nia;  
yar ca leil perniar dae mel arddolcar ci a lei zza doxr dae.
- <sup>14</sup> Yar Yirsaexllixl su ca mel leil hier dae a, halmaex ssi gel;  
yar ca leil perniar dae mel arddolcar ci a lei zza doxr dae.
- <sup>15</sup> Yar Faxrlar zzirmar nei yar ddei meixr mel leil zzael, neixvi  
nilni ae dae bbe gga mil hex ji gger;  
yar ca leil perniar dae mel arddolcar ci a lei zza doxr dae.
- <sup>16</sup> Armael ddei cassor-worssor mel leil hier dae a mipaerbbae  
gga ssi gel su hal ddei leil nawo nia;  
yar ca leil perniar dae mel arddolcar ci a lei zza doxr dae.
- <sup>17</sup> Zzirmar vaervaer mel leil seixl zil gger su hal ddei leil nawo  
nia;  
yar ca leil perniar dae mel arddolcar ci a lei zza doxr dae.
- <sup>18</sup> Yar midduxddux mo zzirmar mel leil seixl zil gger;  
yar ca leil perniar dae mel arddolcar ci a lei zza doxr dae.
- <sup>19</sup> Hherdder Yalmoxrlixl su ddei zzirmar Xihoxr leil seixl zil gger,  
yar ca leil perniar dae mel arddolcar ci a lei zza doxr dae.
- <sup>20</sup> Yoxl Basa su ddei zzirmar Exl leil seixl zil gger;  
yar ca leil perniar dae mel arddolcar ci a lei zza doxr dae.
- <sup>21</sup> Yar yaa ddei middei mel yar ddei cassor-worssor mel leil gger;  
yar ca leil perniar dae mel arddolcar ci a lei zza doxr dae.
- <sup>22</sup> Hherdder yar leil miar bei gger su Yirsaexllixl su ca mel leil  
gger;  
yar ca leil perniar dae mel arddolcar ci a lei zza doxr dae.
- <sup>23</sup> Ngua bei wor nr xie car, yar ngua leil zoxlnixr;  
yar ca leil perniar dae mel arddolcar ci a lei zza doxr dae.

<sup>24</sup> Yar ngua leil, ngua leil dir su ca mel dax jiuxl teixl lei;  
yar ca leil perniar dae mel arddolcar ci a lei zza doxr dae.

<sup>25</sup> Yar gol dae hazza leil zzor ddu gger;  
yar ca leil perniar dae mel arddolcar ci a lei zza doxr dae.

<sup>26</sup> Merlabbor hher dae Arbosobo leil nawo nia;  
yar ca leil perniar dae mel arddolcar ci a lei zza doxr dae.

### Yirsaexllixl Su Ca Mel Aenge Dae Caxlgo

**137** <sup>1</sup> Ngua Babirluixr goxrjia gga ddei lazzarmo qir leil cux  
dae a,

Xi'a zzi ddei leil holcir du lei a, ngua dder meixbbix ddux dae a.

<sup>2-3</sup> Ngua leil ssu si su ca mel ngua leil caxlgo caxl lol;  
ngua leil goxrsol lol su ca mel ngua leil yaa leil ggesse lol a  
bbeix:

“Nia ngua leil Xi'a zzi gga ddei caxlgo ar ser caxl gger la!” □  
eine bbeix.

Yel ngua dder caxlgo bbaex labox ddei vimir zzei leil gaxl gex  
gger a.

<sup>4</sup> Ngua arsae kebal mermi gga Yihexrhuaxr ddei caxlgo caxl ddo  
bbeixleir? <sup>5</sup> Yiluxlsaler zzi, ngo ni leil hol-nr-cir arddeirnga a,  
ngo ddei leixrhher yo bbor caxlgo bbaex labox ddei bbaex  
hol-nr-cir lol nia.

<sup>6</sup> Yiluxlsaler zzi, ngo ni leil hol-nr-cir,  
ni leil ngo ggesse zzir hal ddei i mal nr gger arddeirnga a,  
ngo lo ddei leil bborngax ggaxrsibbor niaxl gex dae lol nia.

<sup>7</sup> Yiluxlsaler zzi ddei leil bei xiaxr gger halleix,  
Yirdo su ca mel bbeix: “caexr pixl gger ssi, caexr pixl gger ssi,  
sixrjiuxr zzezze caexr pixl gger ssi,” □ eine bbeix.

Yihexrhuaxr, ni leil qiuxr, eilmel leil holcir dae.

<sup>8</sup> Babirluixr goxrjia, ni leil cirleixr dder bei xiaxr gger du a;

ni ngua leil bei dae mel sael a, ni leil bei koxl xixl su ca mel,  
Arbosobo yaa leil seir lol nia.

<sup>9</sup> Ni ddei aniux bexlelte mel leil vei du lei a,  
legelbbe leil zuax ngexl gger su ca mel,  
Arbosobo yaa leil seir lol nia.

Arbosobo Leil Nawo A, Yar Dax Ddar Biar

Daxlweixl vaexr sipi.

**138** <sup>1</sup> Ngo nixmox cirtaex-lorbba ni leil nawo nia,  
ca mel zi dae mel meixsaer qir leil ni leil caxl zae gger  
nia.

<sup>2</sup> Ni mel ca leil perniar; ni leil mel koxlsseiddo;  
ni, ni ddei ddar mel leil nei ni ddei mi ddei leil cirza-hanga leil  
lei vaer leixl lol,  
yel ngo ni ddei xi zzir dax mal dae a,  
cizixl gger a, ni ddei mi ddei leil bbeixzae gger nia.

<sup>3</sup> Ngo ni leil qiuxr hal cir ni, ni dder ngo leil ddarkoxl,  
ngo leil nixmox dder vaer gger a, nixmox zzar hhel du lei lol.

<sup>4</sup> Yihexrhuaxr, middurbbor zzirmar maelmaerjjia ni meir gga  
bbeix teixl lei ddar mel leil bbejjiur a;  
yel yaa ni leil bbeixzae gger nia.

<sup>5</sup> Yihexrhuaxr mel yarzi middux,  
yel yaa Yihexrhuaxr bei dae mel leil caxl zae gger nia.

<sup>6</sup> Yihexrhuaxr arsae mumu hher dae bbeixarnar, yar nr col su ca  
mel leil guaxr;  
yar vimirmir hher dae a lei, col su ca mel leil i teixl lei.

<sup>7</sup> Ngo goxrsol-goxrnaxr gga goxr ji dae bbeixarnar, ni arsae bei  
lei ngo leil jiuxl gol;  
ngo leil vuxryixr su mel seifu faex a, ni arsae bei lei leixrhher  
bbor cei teixl lei a yaa leil bbiur gex dae,

ni leixrhher yo bbor arsae bei lei ngo leil jiuxl.  
<sup>8</sup> Yihexrhuaxr ngo leil arsae nga lol niazzir mel yar arsae bei lei  
 bei ci;  
 Yihexrhuaxr, ni ca leil perniar dae mel arddolcar ci a lei zza  
 dae!  
 Ni leil qiuxr, ni leixrhher zze coxl teixl lei mel leil tor piar nr  
 pixl.

### Yihexrhuaxr Azo Lei Saexl

Daxlweixl vaexr sipi. Caxlgo caxl su  
 mel leil guaxr su ddei leil jia gger.

- 139** <sup>1</sup> Yihexrhuaxr, ni mel ngo arsaesael nga i goxr ho a;  
 ni ngo leil saexl.
- <sup>2</sup> Ngo cux zei, ngo ngier du lei a lei, ni saexl;  
 ni vimirmir hher dae a lei,  
 ngo azo xiar dae saexl.
- <sup>3</sup> Ngo jjiumo ssi dae, ngo yixr dae a lei, ni seilseir a i dae;  
 ni lei ngo bei dae hazza leil saexl.
- <sup>4</sup> Yihexrhuaxr, ddar mel ngo meir gga bbeix nr teixl lei seir dder,  
 ni maelmaerjia saexl ho a.
- <sup>5</sup> Ni ngo xilmeir giedae ssi dae a,  
 leixrhher ddei ngo leil guaxr dae.
- <sup>6</sup> Ni ngo leil einezeixl saexl a,  
 ngo yarzi murgur, ngo xiar lei xiar ci nr xie.
- <sup>7</sup> Ngo arddolmaex ssi a, ni ddei Xiu ddei leil pahher ssi bbeixleir?  
 Ngo arddolmaex pa mal a ni leil pahher ssi bbeixleir?
- <sup>8</sup> Ngo merlabbor ddeix ci arddeirnga zzorbbeixlei,  
 ni halmaex gga hher dae;  
 ngo ca sima hher ggie yixr dae arddeirnga zzorbbeixlei,  
 ni lei halmaex gga hher dae.
- <sup>9</sup> Ngo merni ddux lei ggie dofa piar a gga bbiu mal,



bbeixsael xifa piar a gga neixvi qir leil hher dae arddeirnga  
zzorbbeixlei,

<sup>10</sup> ni halmaex gga hher dae a,  
ni leixrhher bbor arsae bei lei ngo leil jjiimo hier;  
ni leixrhher yo bbor arsae bei lei ngo leil zar gex dae.

<sup>11</sup> Ngo “Neixmarmar mel ngo leil jiul gex dae,  
ngo zaza-lili bbelele mel neixmarmar loxr,” eine bbeix  
zzorbbeixlei,

<sup>12</sup> neixmarmar mel lei ngo leil jiul gex dae a,  
ni leil nr mia lol bei nr cexr,  
eilmerxixl lei eilnirrgu sael a bbele;  
neixmarmar nei bbelele lei ni i dae a mel, ciryoxr a nga.

<sup>13</sup> Ngo xilbe zzar maelmaerjjia lei ni coxl a;  
ngo ngama xilbe gga hher ji dae seir dder ni ngo leil coxl ho a.

<sup>14</sup> Ni ngo leil coxl a mel,  
yarzi murgur yarzi iduddo,  
yel ngo ni leil nawo nia.  
Ni bei dae mel,  
yarzi seir yarzi murgur;  
eil ddei mel,  
ngo nixmox zzar yarzisael saexl.

<sup>15</sup> Ca mel mia nr ddo ggie ni ngo leil coxl;  
ngo middurzzar arsae neixlneixl hher dae seir<sup>9</sup>,  
ni dder ngo leil ca ar ddei loxr lol ho a;  
halleix ngo ggecir ddei lei ni dax ker-nr-zi.

<sup>16</sup> Ngo ca lei nr loxr seir dder ni ngo leil mia ho a;  
ni ngo leil dixl har gger dae nixixl mel halae nr goxr seir dder  
maelmaerjjia ni ddei sul ber leil vaexr deix dae ho a.

<sup>17</sup> Arbosobo, ni xiar dae mel,  
ngo dax bbeix ci a mel einezeixl naxrcixl,  
einezeixl miur!

---

<sup>9</sup>139:15 ngo middurzzar arsae neixlneixl hher dae seir Yilsi mel dder bbeix, ngo ngama xilbe gga hher dae seir.

- <sup>18</sup> Ngo hhe arddeirnga a,  
bir neixvi qir leil sa mel leil lei miur leixl;  
ngo yixr zucur car, halae ni dax cirgo a hher dae.
- <sup>19</sup> Arbosobo, ni ca nr seir mel leil seixl zil gger la;  
ngo ca seixl meixr su mel ngo dax bbe kae loxia!
- <sup>20</sup> Yaa mel yarzi vuxryixrddo ddar hal mel te a ni leil dir;  
ni leil dir su ca mel lei ni ddei mi ddei leil nrbba-nrbba bbeix.
- <sup>21</sup> Yihexrhuaxr, ni leil vuxryixr su ca mel ngo yaa leil sididi  
vuxr-nr-yixr arddollei bbeixleir?  
Ni leil dir su ca mel ngo yaa leil vuxr-nr-yixr arddollei bbeixleir?
- <sup>22</sup> Ngo yaa leil vuxryixr zil niazzir dae a;  
ngo yaa leil ngo leil dir su ca mel i mal gger ho a.
- <sup>23</sup> Arbosobo, ni leil qiuxr,  
ni ngo arsaesael nga bbe i a,  
ngo nixmox taex leil saexl;  
ni ngo leil sixr i a,  
ngo xiar dae mel saexl.
- <sup>24</sup> Ni ngo nixmoxzzar yarzi gexrddo zza zza bbe i;  
ngo leil hier dae a,  
arddolcar ci a lei gol dae var jjiumo hal zex leil ssi.

Yihexrhuaxr Leil Qiuxr A, Guaxr Lol

Daxlweixl vaexr sipi. Caxlgo caxl su  
mel leil guaxr su ddei leil jia gger.

**140** <sup>1</sup> Yihexrhuaxr, ni leil qiuxr, ngo leil nixmox neix su ca mel  
dax jiuxl teixl la;  
ngo leil guaxr dae a, yarzi gexrddo bei su ca mel dax jiuxl teixl  
la!

<sup>2</sup> Yaa nixmox zzar yarzi gexrddo xiar ji dae,  
zoxlzoxl a ca mel leil zzi dax zex lol.

- <sup>3</sup> Yaa lo ddei sae sael a teixvilvil mo nga<sup>h</sup>;  
yaa meirlaexgel leil sae sael a duxr zza.
- <sup>4</sup> Yihexrhuaxr, ni leil qiuxr, ngo leil nixmox neix su ca mel dax  
jiuxl teixl la;  
ngo leil guaxr dae a, yarzi gexrddo bei su ca mel dax jiuxl teixl  
la!  
Yaa mel ngo leil baxlguirzei gger niazzir.
- <sup>5</sup> Col su ca mel bel nei baezo mel mia nr ddo ggie ngo leil xiaxl;  
yaa jjiimo qir leil bel sser a ngo leil xiaxl.
- <sup>6</sup> Ngo halleix Yihexrhuaxr leil bbeix, ni mel ngo ddei Arbosobo a.  
Yihexrhuaxr, ni leil qiuxr, seirseir a ngo qiuxr dae mel leil noni!
- <sup>7</sup> Ngo leil jiuxl su yarzi sexr Seirpor Yihexrhuaxr,  
zaxlddaexr car ni ngo leil guaxr dae.
- <sup>8</sup> Yihexrhuaxr, ni leil qiuxr, nixmox neix su ca mel leil yaa nga  
loxia dae mel sael a tor nr nga lol;  
yaa nr seir xiar dae mel tor bei nr cexr lol;  
nr nga a, yaa yarzi col leilei.
- <sup>9</sup> Oldde taex arsae mumu bil dae a ngo leil weixr du lei su ca mel,  
yaa meir gga yarzi gexrddo bbeix teixl lei ddar mel yaa leil ke  
lol nia.
- <sup>10</sup> Saernir taxl mel yaa ggecir leil de deix lol nia!  
Yaa leil adoxl gga piarji gger, bbeddur neixlneixl gga piar ji  
gger a, ha du lei nr xie lol nia.
- <sup>11</sup> Yarzi gexrddo ddar te su ca mel leil middur bbor azo bei lei bei  
cexr nr var lol nia;  
goxrsol-goxrnaxr mel cirleixr dder yarzi gexrddo bei su ca mel  
leil mier lol nia.
- <sup>12</sup> Ngo saexl, Yihexrhuaxr arsae bei lei goxrsol-goxrnaxr su ca  
mel leil beijjiu;

---

<sup>h</sup>140:3 Yaa lo ddei sae sael a teixvilvil mo nga Yilsi ddei mel hherdder yaa ddar  
te teixl lei mel sae sael a duxr.

yar arsae bei lei sol su ca mel leil ddar te jjiu.

<sup>13</sup> Nixmox seir a bota ddu nr zza ca mel arsae bei lei ni mi ddei leil bbeixzae gger nia;  
hoxr gaxzi su ca mel arsae bei lei ni dax hher nia.

Zuixl Mel Gga Jiuxl Teixl La Qiuxr

Daxlweixl vaexr sipi.

**141** <sup>1</sup> Yihexrhuaxr, ngo ni leil qiuxr, nialngasael ngo dax lei!  
Ngo ni leil qiuxr dae car, seirseir a ngo qiuxr dae mel leil noni.

<sup>2</sup> Ngo ni dax ddar biar dae mel hexzzi ner xiuxiu mel sael a ni meixsaer qir leil ddeix ci lol nia.  
Ngo leixrhher ddei bil du lei a ni leil qiuxr dae mel,  
mercixl a ni leil zi dae mel sael a nga lol nia!

<sup>3</sup> Yihexrhuaxr, ni leil qiuxr, ngo meir ddei leil nrbba-nrbba hal mel tor nr biar lol,  
ngo meirlaexgel ddei leil guaxr gex dae!

<sup>4</sup> Ni leil qiuxr, ngo nixmox ddei leil yarzi gexrddo mel leil tor xiar ssi nia-nr-zzir lol;  
nr nga a, ngo zuixl bei su ca mel dax cirgo a yarzi gexrddo hal mel bei ssi leilei;  
ngo leil yaa ddei zzorci-ddami mel lei tor nr zzor lol.

<sup>5</sup> Ngo ca seir mel leil ngo leil deil, ngo leil bota lol yuex.  
Eil ddei mel yaa ngo leil perniar a nga arddeir a;  
ngo oldde leil ssuvi dox deix gger sael a nga;  
ngo oldde taex leil nr li nr bei lol.  
Ngo cirleixr nr nor Arbosobo dax ddar biar a,  
nixmox neix su ca mel yarzi gexrddo bei dae mel leil bbiur gex dae nia.

<sup>6</sup> Yaa ca mel gga ca leil ser su mel leil lagiex gga piar zeir gger car,

cassor-worssor mel ngo ddei ddar no nia, yaa zzirdae a hazzi noni guaxrzoxr.

<sup>7</sup> Yaa ddei hherggar mel lixrbbaex dax piar pixl gger dae, hherdder ca mel mi mor nei giexl pox du lei nilhar mel sael a nga.

<sup>8</sup> Seirpor Yihexrhuaxr, ngo meixddur zze ni leil i dae, ngo ni leil koxl;

ni leil qiuxr, ngo leil piar pixl gger a, ngo leil nr guaxr tor nr bei.

<sup>9</sup> Ni leil qiuxr, ngo leil zuixl yarzi larhor bei su ca mel, bel sser a ngo leil xiaxl dae ddei gga nei ngo leil ke niazzir dae mel gga jiuxl teixl la!

<sup>10</sup> Ngo zzasoso arla pa teixl lei car, nixmox neix su ca mel leil yaa armael xiaxl dae ddei gga de ji dae lol nia.

### Arbosobo Leil Qiuxr A, Zoxlnixr Lol

Daxlweixl doxlzi gga hher dae a vaexr ca leil mul gger dae sipi. Eil pi mel Yihexrhuaxr dax ddar biar dae arddeir a.

**142** <sup>1</sup> Ngo Yihexrhuaxr leil ae dae a, zabbar-seilseir a yar leil qiuxr.

<sup>2</sup> Ngo yar meixsaer qir leil ngo cix dae mel biar; ngo yar dax ngo goxrsol-goxrnaxr dae mel biar.

<sup>3</sup> Ngo arsae bei nia lei nr saexl car, ni ngo ddei jjiumo zex leil saexl.

Ngo leil dir su ca mel ngo ssi dae jjiumo zex gga mia nr ddo ggie ngo leil xiaxl dae.

<sup>4</sup> Ni ngo ddei yo piar a gga arleixr i, ngo leil saexl su ca nr zza; ngo pahher ggie nr zza; ngo leil zoxlnixr su ca lei nr zza.

<sup>5</sup> Yihexrhuaxr, ngo ni leil qiuxr goxr a;

ngo bbeix: “Ni mel ngo ddei pahher ggie a; gol dae ca mel dax,  
ni ngo leil seir lol.”

<sup>6</sup> Ngo leil i du su ca lei nr zza, yel ni seilseir a ngo qiuxr dae mel  
leil noni la;  
ngo dax mae dae su ca mel bir ngo leil sexr leixl, yel ni ngo leil  
yaa dax jiuxl teixl la.

<sup>7</sup> Ni leil qiuxr, ngo leil ge ji ggie ngo leil hier teixl la,  
ngo dder ni ddei mi ddei leil bbeixzae gger cexr.  
Ni mel ngo leil yarzisael seir lol a, yel ca seir mel arsae bei lei  
ngo zaza-lili hher dae.

Seirpor Leil Qiuxr A Jiuxl Lol

Daxlweixl vaexr sipi.

**143** <sup>1</sup> Yihexrhuaxr, ni leil qiuxr, ngo ni dax ddar biar dae mel  
leil noni;

seilseir a ngo qiuxr dae mel leil noni;  
ni leil ddarzziddo mel dax nei bbaehhexhhex mel dax zox dae  
a, ngo leil ddarkoxl la.

<sup>2</sup> Ni meixsaer qir leil, ha gol dae ca mel gga zuixl nr zza cir ddei  
lei nr zza;  
yel ni leil qiuxr, ni leil miar bei gger su hherdder ngo leil tor nr  
ser.

<sup>3</sup> Ngo leil dir su mel ngo leil bixr; ngo leil middur leil deil guirle  
gger.  
Yaa ngo leil neixmar ggie hher dae lol a, si ho hormo nixixl loxr  
ca mel sael a nga.

<sup>4</sup> Yel ngo arsae bei nia lei nr saexl,  
ngo nixmox zzar yarzi cix.

<sup>5</sup> Ngo halcar goxr dae nixixl mel leil holcir;  
ni bei dae hazza leil xiar, ni bei dae maelmaerjjia leil xiar doxr.

<sup>6</sup> Ngo leixrhher ddei jur du lei a ni leil qiuxr;

ngo nixmox zzar ni leil jjiur, hherdder hormo nixixl almer lei nr goxr ggie almer lei loxia sael a nga.

<sup>7</sup> Yihexrhuaxr, ni leil qiuxr, nialngasael ngo leil ddarkoxl la!

Ngo xiarngexlggie lei nr zza ho a!

Ni qiaxrmeix ddei ngo leil mal nr gger tor nr bei;

nr nga a, ngo lixrbbaex gga ze nia ca mel sael a nga.

<sup>8</sup> Ngo mel ni leil koxl, yel ni leil qiuxr, eilneixrnehe ngo leil ni ngo leil perniar dae ddar mel bbejjiur lol la.

Ngo mel nixmox ddei ni leil koxl, yel ni leil qiuxr, ngo leil ngo ssi labox jjiumo zex mul gger la.

<sup>9</sup> Yihexrhuaxr, ngo leil dir su mel dax ngo leil jiuxl teixl la!

Ngo ni dax halmaex pahher ssi.

<sup>10</sup> Ni mel ngo ddei Arbosobo a; ni leil qiuxr, ngo leil mul gger a, ni xiar dae mel dax bei mae dae lol.

Ni ddei seirseir mo Xiu ddei leil ngo leil hier dae lol a, jjiumo bbaelerler gga ssi.

<sup>11</sup> Yihexrhuaxr, ni leil qiuxr, ni mi ddei leil weixr a, ngo leil jiuxl goxl du la.

Ni ddei bbaehhexhhex mel dax zox dae a ngo leil goxrsol-goxrnaxr mel gga hier teixl la!

<sup>12</sup> Ngo mel ni leil miar bei gger su a;

yel ni leil qiuxr, ni ca leil perniar mel dax zox dae a,

ngo leil dir su mel leil bei zil jjia gger,

ngo leil bixr su mel leil si jjia lol.

Zzirmar Ddei Zaxlddaexr Leixl A Arbosobo Leil Nawo

Daxlweixl vaexr sipi.

**144** <sup>1</sup> Yihexrhuaxr hherdder ngo ddei legelbbe taex leil mel bbeixzae gger nia.

- Yar ngo leixrhher zze leil zaxlddaexr zza lol, ngo leixrni mel leil zzi deil zza lol.
- <sup>2</sup> Yar mel ngo leil perniar su ddei nga a;  
zaxlddaexr a, ngo pahher ggie ddei nga a;  
ngo leil dir su mel leil bbiur gex gger su ddei nga a;  
ngo leil jiuxl su ddei nga a;  
ngo yar leil koxl, yar leil qiuxr a ngo leil beijjiu lol;  
yar ngo ddei cassor-worssor mel leil ngo ddei ddar no lol.
- <sup>3</sup> Yihexrhuaxr, ca mel azo suax bbeixleir, ni halae yar leil holcir dae?  
Ca ddei ssor ddei yoxl azo suax bbeixleir, ni halae yar leil perniar dae?
- <sup>4</sup> Yar mel seixl ar qir sael a nga;  
yar ddei nixixl ddei mel avix mel sael a cirleixr dder nr mia a.
- <sup>5</sup> Yihexrhuaxr, ni leil qiuxr, ni merlabbor ddei ggapu a zeil lei a,  
worga mel leil ta a, worga mel leil alker sil teixl lei lol.
- <sup>6</sup> Ni leil qiuxr, ni almer bbiexr teixl lei a, ni leil dir su ca mel leil ggaxr pixl gger;  
ni jir baex ddaexr teixl lei a, yaa leil beix du si lol.
- <sup>7</sup> Ni leil qiuxr, ni leixrhher bbor merlabbor gga cei zeil lei a, ngo leil jiuxl la;  
ngo leil ajjix arsae neixlneixl gga gga teixl la;  
ngo leil kebal su ca mel leixrga gga jiuxl teixl la.
- <sup>8</sup> Yaa ddei meir qir ddar jiar te;  
leixrhher yo bbor bil du lei a, Arbosobo meixsaer qir leil bbeix dae ddar mel lei yarjiar a nga.
- <sup>9</sup> Arbosobo, ngo ni leil caxlgo sixl caxl gger nia;  
ngo cei zex zza bbaex labox ddei bbaex dae a, ni leil bbeixzae gger nia.
- <sup>10</sup> Ni mel zzirmar mel leil bei leixl lol;  
ni leil miar bei gger su Daxlweixl leil altor mel dax jiuxl teixl lei.



- <sup>11</sup> Ni leil qiuxr, ngo leil jiuxl la, ngo leil kebal su ca mel leixrga  
gga jiuxl teixl la;  
yaa ddei meir qir ddar jiar te;  
leixrhher yo bbor bil du lei a, Arbosobo meixsaer qir leil bbeix  
dae ddar mel lei yarjiar a nga.
- <sup>12</sup> Ngua ddei ssor mel leil leixl tor seir car yarzi naxrcixl sixzzei  
mel sael a nga lol nia;  
ngua ddei ssormaer mel leil zzirmar hher ggje xi gga yarzi zae  
kiexl teixl lei sseigu mel sael a nga lol nia.
- <sup>13</sup> Ngua loxlmoxr ji ggje gga loxlmoxr bbilbbi ji dae lol nia,  
cirza-hanga loxlmoxr lei zza;  
ngua zzeir loxl bbae gga acixl ya mel leil hormo du hormo meir  
cer teixl leil lol nia.
- <sup>14</sup> Ngua ddei zzeir mel leil cir ke cer lol nia,  
zzeix nr var lol nia, nganiul nr var lol nia.  
Ngua zzijiul gga aenge su ca lei nr zza lol nia.
- <sup>15</sup> Eilmel sael a, eine nga su cassor-worssor mel, Arbosobo yaa  
leil seir lol a!  
Yihexrhuaxr leil yaa ddei Arbosobo bei lol su cassor-worssor  
mel, Arbosobo yaa leil seir lol a!

### Arbosobo Leil Bbeixzae Gger

Daxlweixl Arbosobo leil bbeixzae gger sipi

**145** <sup>1</sup> Ngo ddei Arbosobo, ngo ddei Zzirmar, ngo ni leil i du  
nia;

arddolcar ci a lei ni mi ddei leil bbeixzae gger nia.

<sup>2</sup> Ngo bbecir-bbeni ni ddei seirseir mel leil bbeixzae gger nia;  
arddolcar ci a lei, ni mi ddei leil bbeixzae gger nia.

<sup>3</sup> Yihexrhuaxr mel vaervaer ddei nga a;  
yar leil daxlgaxl-daxllixl bbeixzae gger mibbe;  
yar ddei vaervaer mel leil arseir lei xiar ci nr xie.

- <sup>4</sup> Eil zeix hal zeix dax ni bei dae mel leil bbeixzae gger nia;  
halae ni ddoddomo bei dae mel leil biar nia.
- <sup>5</sup> Yaa ni yarzi iduddo, yarzi middux, yarzi zae mel leil bbeix nia,  
Ngo lei ni bei dae yarzi seir yarzi murgurddo mel leil xiar nia.
- <sup>6</sup> Ca mel ni murgurgurmo ddoddomo bei dae hal mel leil biar nia;  
ngo lei ni vaer zzir ddei a biar nia.
- <sup>7</sup> Yaa ni daxlgaxl-daxllixl seirseir meixl gger dae mel leil holcir  
dae nia;  
halae ni ddei bbaehhexhhex mel leil lei caxl nia.
- <sup>8</sup> Yihexrhuaxr mel ca leil seirseir meixl gger, ca leil zoxlnixr,  
sirzzi nr so,  
ca leil yarzisael perniar, perniar nor nixixl nr zza.
- <sup>9</sup> Yihexrhuaxr hazza-hamaer leil lei seir;  
yar bei teixl lei maelmaerjjia leil lei zoxlnixr.
- <sup>10</sup> Yihexrhuaxr, ni bei teixl lei maelmaerjjia lei ni leil nawo nia;  
ni ddei cassor-worssor mel lei ni ddei seirseir mel leil bbeixzae  
gger nia.
- <sup>11</sup> Yaa ni ddei goxr ddei midduxdduxmo hal mel biar nia;  
ni ddoddomo bei dae hal mel leil bbeix teixl lei nia;
- <sup>12</sup> yel middurbbor ca mel leil ni ddoddomo bei dae mel saexl lol  
nia;  
halae ni ddei goxr ddei yarzi iduddo, yarzi middux hal mel leil  
saexl lol nia.
- <sup>13</sup> Ni ddei goxr ddei mel arddolcar ci a lei zza dae!  
ni cirzeix-hanga lei zzirmar bei nia!
- <sup>14</sup> Yihexrhuaxr de ze i su ca hazza leil zargex du lei,  
daxr lirlir bil su ca hazza leil gga du lei.
- <sup>15</sup> Meixddur maelmaerjjia lei ni leil i dae,  
zzor zi ci a ni yaa leil zzorddu gger.
- <sup>16</sup> Ni leixrhher zze ddaexr kae a,

olga zza maelmaerjgia leil yaa cirza-hanga sserzoxr mel yaa leil gger.

<sup>17</sup> Yihexrhuaxr bei dae maelmaerjgia lei bbaehhex;  
yar azo bei lei cirza-hanga leil perniar.

<sup>18</sup> Ha Yihexrhuaxr leil qiuxr su mel,  
hherdder nixmox zzar yarzi Yihexrhuaxr leil qiuxr su mel,  
yar yaa dax naer.

<sup>19</sup> Yihexrhuaxr leil gexr su ca mel,  
yar yaa nixmox zzar nga loxia dae mel nga lol;  
yaa qiuxr dae mel leil noni a, yaa leil jiuxl.

<sup>20</sup> Yihexrhuaxr yar leil perniar su ca hazza leil guaxr dae;  
nael yar leil vuxryixr su ca hazza leil bei zil gger nia.

<sup>21</sup> Ngo ddei meir gga Yihexrhuaxr leil bbeixzae gger dae ddar mel  
bbeix nia;

olga zza maelmaerjgia arddolcar ci a lei Yihexrhuaxr ddei  
seirceix-seirmaer mi ddei leil bbeixzae gger lol nia.

Yihexrhuaxr Beijjiu Dae Mel Leil Bbeixzae Gger

**146** <sup>1</sup> Yihexrhuaxr leil bbeixzae gger nia!

Ngo ddei nixmox,  
ni Yihexrhuaxr leil bbeixzae gger nia!

<sup>2</sup> Ngo cir se lei Yihexrhuaxr leil bbeixzae gger nia!

Ngo gol dae seir car, ngo ddei Arbosobo leil caxl zae gger nia!

<sup>3</sup> Nia vaervaerpor mel leil koxl nr ddo,  
middurbbor ca leil koxl nr ddo;  
yar nia leil jiuxl nr cexr.

<sup>4</sup> Yar seixl qir ceix a dder nilme gga jjixr a;  
yar azo bei nia xiar har dae mel, hal cir ni dder mier a.

<sup>5</sup> Yargel ddei Arbosobo ddei leil yar leil beijjiu su bei lol,  
Yargel ddei Arbosobo Yihexrhuaxr leil koxl su ca ddei,  
Arbosobo yar leil seir lol!

<sup>6</sup> Yihexrhuaxr mel merlabbor, middurbbor, neixvi nei eilmel gga  
ddei hazza-hamaer leil coxl;  
yar leil mel arddolcar ci a lei ddarzziddo.

<sup>7</sup> Yihexrhuaxr si yaa leil ci dae ca mel leil beijjiu;  
meixr su ca mel leil zzor ddu gger;  
ge ji dae ca mel leil piur teixl lei.

<sup>8</sup> Yihexrhuaxr mia nr xie su mel leil mia xie lol;  
Yihexrhuaxr daxr lirlir bil su ca hazza leil beijjiu.  
Yihexrhuaxr ca seir mel leil perniar.

<sup>9</sup> Yihexrhuaxr mel si mermi ngol hher dae ca mel leil guaxr;  
aniuxcir nei maermocir mel leil beijjiu;  
nael, nixmox neix su ca mel ddei jjiumo zex ssi bei nr ddo lol.

<sup>10</sup> Yihexrhuaxr mel arddolcar ci a lei zzirmar bei nia!  
Xi'a, ni ddei Arbosobo mel cirzeix-hanga lei zzirmar bei nia!

Yihexrhuaxr leil bbeixzae gger nia!

Arbosobo Ddoddo Mo Bei Dae Mel Leil Bbeixzae Gger

**147** <sup>1</sup> Niul ddei Arbosobo leil caxl zae gger a mel, yarzi seir;  
yar leil bbeixzae gger a mel yarzi ggesse, yarzi hoxr,  
yel Yihexrhuaxr leil bbeixzae gger nia!

<sup>2</sup> Yihexrhuaxr Yiluxlsaler zzi ddei zi box;  
kebal mermi ggaxr mal gger ho Yirsaexllixl su ca mel leil ae pex  
xixl lei.

<sup>3</sup> Yar nixmox no su ca mel leil i kor gger;  
yaa ddei no ggie ba gex du lei.

<sup>4</sup> Yar gie hormo taex zza hhe;  
cir taex cir taex leil mi mi gger.

<sup>5</sup> Niul ddei Seirpor ddei mel vaervaer ddei a;  
yarzi ddo; yar ddei olnoldduddu mo hal mel arseir lei xiar ci nr  
xie.

- <sup>6</sup> Yihexrhuaxr nr col su ca mel leil beijiu;  
nixmox neix su ca mel leil middur leil deil guirle gger.
- <sup>7</sup> Caxlgo caxl a Yihexrhuaxr leil nawo nia;  
caxlgo bbaex labox bbaex dae a, niul ddei Arbosobo leil caxl zae  
gger nia.
- <sup>8</sup> Yar zico sser a merlabbor jiul gex dae lol;  
almer lei ze lei a middurbbor lei bei lol;  
silbbar mel leil wordabbor ner dae lol.
- <sup>9</sup> Yar yirvu-nilhax nei me dae axneixssor mel leil zzor ddu gger.
- <sup>10</sup> Yar mur mel worni a gge-nr-se;  
yar ca mel qihher zze beix jiax a gge-nr-se.
- <sup>11</sup> Nael Yihexrhuaxr mel,  
yar leil i du yar leil gexr nei yar ca leil perniar dae mel leil koxl  
su ca mel leil ggesse.
- <sup>12</sup> Yiluxlsaler, ni Yihexrhuaxr leil caxl zae gger nia!  
Xi'a, ni Arbosobo leil bbeixzae gger nia!
- <sup>13</sup> Yar mel, ni ddei gielmi ddei leil lagexddu ddei ssei lol;  
ni dax hher ji dae ssormine mel leil seir lol.
- <sup>14</sup> Yar ni zaza-lili zaxl-nr-ddaexr lol;  
yar so naxrcixlcixl mel ni leil gger a ni leil nixlodda lol.
- <sup>15</sup> Yar middurbbor miardal ze lei a;  
yar ddei ddar mel cirleixr dder biar jiax a.
- <sup>16</sup> Yar wor lei ze lei lol mel, ya me sael a nga;  
yar nixpiu xiu ze lei lol mel, kurlu sael a nga.
- <sup>17</sup> Yar wortaexlaex piar ze lei mel, legelbbessor sael a nga;  
yar zzix lol a mel, arseir zzix wor xie bbeixleir?
- <sup>18</sup> Yar miardal teixl lei a qie, eilmel dder zzi jjia a;  
yar mersi jia lol a, ajjix mel dder pe dae a.
- <sup>19</sup> Yar, yar ddei ddar mel Yargel leil bbeix gger;  
yar ddei lixfaxr nei yar miardal dae mel Yirsaexllixl leil bbeix  
gger.

<sup>20</sup> Yar kebal goxrjia mel leil zeixleixr lei eimel sael a nga nr goxr;  
yaa yar miardal dae mel leil saexl nr goxr.

Yihexrhuaxr leil bbeixzae gger nia!

Hazza-hamaer Lei Yihexrhuaxr Leil Bbeixzae Gger Nia

- 148** <sup>1</sup> Yihexrhuaxr leil bbeixzae gger nia!  
Merlabbor cirdae a, yar leil bbeixzae gger nia;  
mu ggie hher dae a, yar leil bbeixzae gger nia!
- <sup>2</sup> Yar ddei tisir maelmaerjjia yar leil bbeixzae gger nia!  
Merlabbor gga yar ddei meixr maelmaerjjia yar leil bbeixzae  
gger nia!
- <sup>3</sup> Merni, xiubbo, nia yar leil bbeixzae gger nia!  
Bbo dae gie mel, nia maelmaerjjia lei yar leil bbeixzae gger nia!
- <sup>4</sup> Merlabbor ddei merlabbor nei merlabbor ddei ajjix mel,  
nia yar leil bbeixzae gger nia!
- <sup>5</sup> Yar miardal a dder eimel leil coxl teixl lei a;  
yel eimel lei Yihexrhuaxr ddei mi ddei leil bbeixzae gger nia!
- <sup>6</sup> Yar eimel leil arsae nga lol mel,  
arddolcar ci a lei eimel dder hane nga;  
yar miardal ho a mel dder gierbox nixixl nr zza.
- <sup>7</sup> Middurbbor hher dae hazza,  
hherdder ajjix gga gol dae yarzi gexrddo hal mel, nei  
darneixlneixl mel,
- <sup>8</sup> adoxl nei wortaxlaex, wor nei meixker,  
yar miardal dae mel bei su mersi vaervaer mel,
- <sup>9</sup> worga vaervaer nei yelye,  
saer zzei nei Xiabaexr zzei maelmaerjjia,
- <sup>10</sup> yirvu-nilhax nei zzeir maelmaerjjia,  
middurbbor maex dae nei merlabbor bbiu dae mel,

<sup>11</sup> middurbbor zzirmar nei ca maelmaerjjia,  
 vaerzzirpor nei middurbbor ca leil ser su maelmaerjjia,  
<sup>12</sup> caleixlssor nei ssormaerleixl,  
 camar nei aniuxssor,  
 eilmel maelmaerjjia lei Yihexrhuaxr leil bbeixzae gger nia!

<sup>13</sup> Yar ddei mi ddei larnei arseir lei i du;  
 yar merlabbor middurbbor maelmaerjjia leil middux leixl,  
 yel eilmel maelmaerjjia lei Yihexrhuaxr ddei mi ddei leil bbeixzae  
 gger nia!

<sup>14</sup> Yar, yar ddei cassor-worssor mel ddei cuxgexdaex mel  
 darmumu jur du lei<sup>i</sup>,  
 yel yar ddei cassor-worssor Yirsaexllixl su,  
 hherdder nixmox zzar yar dax naer su cassor-worssor mel lei  
 yar leil bbeixzae gger nia!  
 Yihexrhuaxr leil bbeixzae gger nia!

Yirsaexllixl Su Ca Mel Yihexrhuaxr Leil Bbeixzae Gger Nia

**149** <sup>1</sup> Yihexrhuaxr leil bbeixzae gger nia!  
 Yihexrhuaxr leil caxlgo yarsixl caxl gger nia;  
 yar ddei cassor-worssor mel cirgo a hher ggie yar leil bbeixzae  
 gger nia!

<sup>2</sup> Yirsaexllixl leil, yar leil coxl su ddei leil koxl dae a ggese lol nia!  
 Xi'a ddei cassor-worssor mel leil yaa ddei zzirmar ddei leil koxl  
 dae a ggese lol nia!

<sup>3</sup> Yaa leil huade tiuxl dae a yar ddei mi ddei leil bbeixzae gger lol  
 nia;  
 surgu deil dae, bbaex labox bbaex dae a yar leil caxl zae gger lol  
 nia!

<sup>4</sup> Yihexrhuaxr mel yar ddei cassor-worssor mel leil ggese;

<sup>i</sup>148:14 Yar, yar ddei cassor-worssor mel ddei cuxgexdaex mel darmumu jur du lei Ddar eil qir ddei yilsi mel dder: “Yar, yar ddei cassor-worssor mel leil sexr lol”.

yar nr col su mel leil bei leixl lol.

<sup>5</sup> Yar ddei cassor-worssor mel bei leixl a,  
yel yaa leil ggesse lol nia!

Yaa leil yixrgguci leil hher dae a lei,  
ggesse a worcixl-worni ae du lei lol nia!

<sup>6</sup> Arbosobo leil bbeixzae gger dae ddar mel zoxlzoxl a yaa ddei  
meir gga biar lol nia;

leixrhher gga altor ser nr piar niar ar baex vei dae lol nia,

<sup>7</sup> yel circuxr-hanga leil bei koxl xixl cexr;  
cassor-worssor mel leil faxr cexr.

<sup>8</sup> Hexsox sser a yaa ddei zzirmar mel leil neixl gex dae nia;  
zzuxgex sser a, yaa ddei vaervaerpor mel leil zzuxgex dae nia.

<sup>9</sup> Arsae ser nia vaexr dae mel dax zox dae a yaa leil ser nia.  
Eil ddei mel dder yar ddei cassor-worssor maelmaerjia li  
mibbe ddei nga a.

Yihexrhuaxr leil bbeixzae gger nia!

### Yihexrhuaxr Leil Bbeixzae Gger Nia

**150** <sup>1</sup> Yihexrhuaxr leil bbeixzae gger nia!

Arbosobo ddei seirceix-seirmaer xi gga yar leil bbeixzae  
gger nia!

Yar ddoddomo bei ggie merlabbor gga yar leil bbeixzae gger nia!

<sup>2</sup> Yar ddoddomo bei a, yar leil bbeixzae gger nia!

Yar yarzi sexr, yarzi vaer bei a, yar leil bbeixzae gger nia!

<sup>3</sup> Cuxgexdaex mex no mex, yar leil bbeixzae gger nia!

gurze nei pixrpa bbaex no bbaex yar leil bbeixzae gger nia!

<sup>4</sup> Leixrhher gga deillabox deil no deil, huade tiuxl no tiuxl yar leil  
bbeixzae gger nia!

Bbaexlabox bbaex no bbaex, mexlur mex no mex yar leil bbeixzae  
gger nia!

<sup>5</sup> Worcixl-worni biulbiulcar deil dae a, yar leil bbeixzae gger nia!

Bbialil-bbialor biulbiulcar deil dae a, yar leil bbeixzae gger nia!



<sup>6</sup>Seixl ho dae maelmaerjjia leil lei Yihexrhuaxr leil bbeixzae gger lol nia!

Yihexrhuaxr leil bbeixzae gger nia!